

明季稗史彙編







吻

亭

穆


出

氣

編

沈錦垣

署檢





光緒三十一年上海圖書館  
集威馬雜圖冊



DS  
753  
M5  
v.1

序

三代以來得天下之正莫如我

朝

世祖入關之初他務未遑首先改葬崇禎帝后褒揚死節諸臣深仁厚澤亙古無倫恭讀

開國方略一書偉烈豐功震爍今古乃書中於明臣著述間有采擇而引用黃道周博物典彙尤夥竊嘆大聖人量同天地闡及幽微固非管蠡之淺見所能仰窺于萬一者也至

御批通鑑輯覽書法悉本

睿裁尤爲大公至正誠

聖訓所謂此非一時之書而萬世之書也夫明季自北都淪沒大命已傾福王竊號江東首尾僅及一載特詔謂疆域可憑猶從建炎南渡之例分注宏光年號若唐桂二王棲遁閩滇迹同是舛雖顯黜其僞號尙隱念其遺臣別考事端附綴書後俾不至湮沒無傳而褒忠曠典復定爲專諡通諡之法大矣哉

純廟制作之公度量之溥又豈歷代所可及哉康熙中橫雲山人撰明史稿多收遺老紀述於是烈皇小識聖安本紀行在陽秋等十餘種漸行于世好事者因有明季稗史彙編之刊是書出自遺逸諸公之手

明季稗史彙編 序



拳拳于政亂寇起之由有君無臣之感而於民窮財盡將脣卒悍三致意焉亡國之音哀以思其此之謂乎噫嘻桀犬吠堯雖乖倒戈之義而黍離麥秀猶存故國之悲後之覽者傷其遇又未嘗不鑑其心也第原書日久殘缺已甚魯魚亥豕所在多有茲特重加排印悉心校勘仍其舊爲二十七卷嗜古好奇之士欲考勝國遺聞者庶於是有取焉

光緒十有三年歲次丁亥冬十月尊聞閣主人撰



烈皇小識序

烈皇昔繇藩邸入繼大統毒霧迷空荆棘滿地以予身出入于刀鋒劍鋌之中不動聲色巨奸立掃眞所謂聰明睿智神武不殺者耶儼監于殷盡徹諸內奄政事俱歸于外庭誠千載一時也然而逆璫遺孽但知力護殘局不復顧國家大計卽廢籍諸公亦閱歷久而情面深無復有贊皇魏公其人者且也長山以改敕獲戾而上疑大臣不足倚矣未幾烏程以枚卜告訐而上疑羣臣不足信矣次年罪督以私款償事而上疑邊臣不足任矣舉外廷皆不可恃勢不得不仍歸于內適又有借不測之恩威伸具瞻之喜怒者事權乃盡歸于內而不可復收嗟乎赫赫師尹顛倒豪傑者乃爾卽後先臣以講筵荷蒙聖鑒超拔政府真有虛己以聽之意而兩月揆地一語招尤致負聖明特達無以報稱天乎人乎豈氣運使然乎先臣罷而韓城武陵輩進雖聖主日見其憂勤而羣上日流于黨比痼疾已成不復可藥矣不肖于十七年中備集烈皇行事以志堯舜吾君之恩又以志有君無臣之嘆集成巨帙數十冊可備一朝史料因遭家難同世藏書翰墨等項誤行寄託遂不可問致烈皇遺跡燬行湮沒不彰當亦有志所共痛心疾首者也年來屏跡深山間有客相過從詢及舊事尙有一二仿佛胸臆間竊恐失此不傳後悔無及又承同忠或一人一事相示因纂抄成冊名曰烈皇小識共八卷意四方君子當有識其大者雖所纂者十不得二三然以



備修史者之采擇亦未必無小助迨至天不祚明帝星告殞守正不屈甯以身殉輒悲憤填膺扼吭欲絕涕泗滂沱幾執筆而不能下矣竹塢遺民文秉書于考槃之煮石亭



明季稗史彙編目錄

卷一 烈皇小識

卷二 烈皇小識

卷三 烈皇小識

卷四 烈皇小識

卷五 烈皇小識

卷六 烈皇小識

卷七 烈皇小識

卷八 烈皇小識

卷九 聖安本紀

卷十 聖安本紀

卷十一 行在陽秋

卷十二 行在陽秋

卷十三 嘉定屠城紀略

卷十四 幸存錄

卷十五 幸存錄

卷十六 續幸存錄

卷十七 求野錄

卷十八 也是錄

卷十九 江南聞見錄

卷二十 粵游見聞

卷二十一 賜姓始末

卷二十二 兩廣紀略

卷二十三 東明聞見錄

卷二十四 青燐屑



卷二十五 青燐屑

卷二十六 吳耿尙孔四王合傳

卷二十七 揚州十日記



明季稗史彙編卷一

烈皇小識

烈皇帝爲光廟第五子孝純劉太后所出而撫育于李莊妃天啟二年九月册封信王七年二月出就外邸成婚册妃周氏熹廟病危魏忠賢遣腹奄涂文輔迎上入宮上時自危甚袖食物以入不敢食宮中物是夜秉燭獨坐見一奄攜劍過取之留置几上許給以賞憫邏者欲以酒食問左右何從取給左右對宜取之光祿因傳令旨遍犒之歡聲如雷周后在外邸禱卜無虛畧亦虞入朝有他變也

上既卽位廷議改元禮部擬進者四永昌紹慶咸甯崇貞御筆改貞爲禎點用之

上卽位後追尊劉后孝純皇太后遷祔慶陵加李莊妃諡號立周后爲皇后尊張后爲懿安皇后孝純母年七十五封瀛國太夫人姪劉文炳封新樂侯周后父周奎授左都督次年册立太子封奎嘉定伯懿安父張國紀封太康伯凡四大朝廷臣俱用朝冠朝服內奄則否惟除歲祭中霽之神司禮監掌印太監代行祭禮奏請祭服服之大朝止磕頭呼萬歲而已逆賢擅政凡遇大朝自王體乾至牌子等俱僭用朝冠朝服于乾清宮大殿內照外廷儀行慶賀山呼禮贊禮內奄一如鴻臚班首亦致辭焉後魏良卿晉封逆賢改戴貂蟬冠班列王體乾上及上登極逆賢仍照熹廟行禮繼憚上英明止用本等服色



同衆叩頭呼萬歲

逆賢用事動以立枷示威前後斃者以千計上一日問及逆賢時與王體乾侍側體乾對曰大奸大惡法所不能治者用之上感然曰雖如此說殊覺太慘非國家盛事也逆賢默然衆共叩頭呼萬歲而退

上既登極所以優容客魏者一如熹廟而信邸承奉盡易以新銜入內供事後將李朝欽裴有聲王秉恭吳光成譚敬裴芳等次第准其乞休逆賢羽翼剪除一空復散遣內丁方始謫逐逆賢肘腋巨奸不動聲色潛移默奪非天縱英武何以有此時閣臣四員黃立極施鳳來張瑞圖李國楷皆逆賢爰立也上首放立極而亟允枚卜之請特點華亭錢龍錫吳江周道登蕭山朱宗道高邑李標長山劉鴻訓晉江楊景辰六員後宗道以禮部題崔呈秀父卹典有在天之靈等語景辰以掌院率諸翰林公疏頌美逆賢俱爲科道劾奏次年與三舊輔俱次第斥放回籍

上諭兵部各處鎮守內官一概撤回凡相機度宜約束吏士無事修備有事却敵俱聽督撫便宜調度無復委任不專體統相軋以藉其口各鎮督撫諸臣及大小將領務提起精神殫竭忠盡以副朕懷

上諭戶部封疆多事徵輸甚煩朕殊憫焉蘇松等處織造朕不忍以衣被組繡之工重用此一方民其俟東南底定之日方行開造以稱朕敬天恤民至意



上諭吏部魏忠賢崔呈秀天刑已極臣民之憤稍紓而詔獄遊魂猶然鬱錮含冤未伸著該部院九卿科道將已前斥害諸臣從公酌議採擇官評有非法禁斃情最可憫者應褒贈卽與褒贈應卹蔭卽與卹蔭其削奪牽連者應復官卽與復官應起用卽與起用有身故捏贓難結家屬波累羈囚者應開釋卽與開釋勿致久淹傷朕好生之心

上諭禮部朕覽會典自宮禁例一款民間有四五子以上許以一子報官奄割有司造冊送部院收補日選用敢有私自淨身者本身及下手之人處斬全家發烟瘴地面充軍兩鄰歇家不舉者治罪我祖宗好生德意真至周密故立法嚴明近來無知小民希圖財利私行奄割童稚不堪多至殞命違禁戕生深可痛恨自今以往且不收選爾部可宣布朕命多列榜文諭到之日爲始敢有犯者按法正罪仍許諸色人等當時首告本地方官司奏聞鄰右歇家不舉從重治罪有司知而不禁併行究處倘有強奄他人希圖誣賴的訊明反坐決不徇縱布告中外恪行遵守

御史楊維垣疏參崔呈秀後擬與羣奸共收餘燼力持殘局時已差河東巡鹽河南掌道御史安伸題請留佐大計削籍諸臣雖屢奉起用之旨維垣一手握定百方阻遏新參蕭山晉江係彼同志協力護持監生胡煥猷疏論黃立極等四人謂當逆賢擅權揣摩意旨專事逢迎浙直建碑立祠各撰文稱頌宜



亟行罷斥并乞查究督撫按之建祠者又言起廢不公不廣維垣特出疏參駁且請下法司究問指使蕭山已票嚴旨御筆批胡煥猷雖必有賄使之者但不必苛求以滋葛藤璫黨咸俯首喪氣中外頌大聖人舉動出尋常矣

時言路皆逆賢餘孽上特下考選之令先後授曹師稷顏繼祖宗鳴梧瞿式耜鍾炘等爲給事中吳煥葉成章任贊化等爲御史咸以糾彈璫黨爲事而朝端漸見清明矣

崔呈秀子崔鐸北榜中式周應秋子周錄南榜中式雖經褫革而衡文者尙逃指摘南京國子監助教施元徵上疏劾之於是中書林瑞芳江陰知縣岑之豹俱下部議罷斥主考時徐泰陳具慶等各疏辨以糊名爲辭蕭山輩力庇之有旨免議

崇禎元年戊辰正月大計天下吏主計者吏部尙書房壯麗左都御史曹思誠考功郎中李宜培吏科都給事中魏照乘掌河南道印御史安伸佐計者楊維垣也是舉也爲聖天子第一新政宜將媚璫諸奸痛加埽除顧壯麗等皆璫孽也互爲容隱咸逃吏議人心頗爲不平云

江西巡撫楊邦憲由陝西布政陞任當今上正位之後猶進廠臣功德巍巍之疏拆毀名賢子羽祠并毀祠旁民居千餘家爲造逆祠地河南右參政周鏘造逆祠于開封建標祠所僭書大工且致書魏良卿



欲爲逆賢造謗金像四川右參政郭士望補官一疏痛詆應山其諛頌逆賢也令人髮指江西副使李光春已例轉矣猶疏論福清備極醜詆及申詳逆祠司道張福臻王化行等槩置格外卽云撫按不行開送科道拾遺疏獨不可糾舉耶仲與維垣不足道照乘亦漫無短長耶按照乘于甲子冬陞吏垣長見璫炤方張遂力請告歸里似乎有品骨者今臨事如此前後若兩截矣然照乘雖非璫孽而長垣一脈淵源有自後入政府構黃解之獄其生平已見于此

翰林院編修倪元璐奏世界已清方隅未化疏略曰近攻崔魏者必引東林爲對案一則曰邪黨再則曰邪黨何說乎以東林諸臣爲邪黨人將以何名加之崔魏之輩崔魏而旣邪黨矣向之首効忠賢參提是秀者又邪黨乎哉且天下之議論甯涉假借而必不可不歸于名義士人之行已甯存矯激而必不可不準諸廉隅自後之君子以假借矯激深咎前人於是乎豹虎之徒公然起而背畔名義毀裂廉隅矣於是乎連篇頌德匝地生祠矣夫頌德不已必將勸進生祠不已必且呼嵩而人猶且寬之曰無可奈何不得不然耳嗟充一無可奈何不得不然之心又將何所不至哉然今日之持議者能以忠厚之心曲原此輩而獨持已甚之論苛責吾徒亦所謂悖也臣又伏讀聖旨有韓爌清忠有執朕所鑒知之諭深仰天聰曠然知人則哲如此而近聞廷臣之議殊有異同可爲大怪竈之相業光偉他不具論卽



如紅丸議起舉國沸然維時與事大臣皆蓄縮閤默而熿獨侃侃條揭明其不然夫孫慎行君子也熿且不附況他人乎而今推轂不及點灼橫加則徒以其票擬熊廷弼一事耳夫廷弼固自當誅在熿不爲無說封疆失事纍纍有徒而當日之議乃欲獨殺一廷弼豈平論哉此熿之所以擱筆也然究竟廷弼不死于封疆而死于局面不死于法吏而死于奸璫則又不可謂後之人殺廷弼而熿獨不能殺之也又如詞臣文震孟正學勁骨有古大人之器其鄉人之月旦比于陳實王烈三月居官昌言獲罪人又以方之羅倫舒芬而今起用之旨再下謬悠之譚不已甚有加以窩盜之名者豈以數十年前有其兄某不逞之事乎夫人知其有某之不逞以爲之兄而不知有某之至德某之特行以爲之祖父且愚賢相越舜象已然世不聞柳下惠膺盜跖之誅司馬牛受向魑之罰文震孟何罪遭此嫌譏將無門戶二字不可重提聊用更端以相遮抑耶時衆論咸推蒲州舊輔及先文肅錢公謙益姚公希孟等戶部員外王守履疏薦蒲州奉有韓爌清忠有執朕所鑒知之旨而楊維垣一手障天於蒲州先文肅尤力行貶駁輿情不平甚故倪公出此疏維垣隨出詞臣持論甚謬生心害政可虞疏駁之倪公亦出微臣平心入告臺臣我見未除疏略曰臣讀楊維垣入告諸疏深訝其不能仰副聖心且若力欲與皇上相反者蓋皇上之諭一則曰分門別戶已非治徵一則曰化異爲同一則曰天下爲公而維垣之言則曰



孫黨趙黨熊黨鄒黨皇上於韓爌文震孟曰清忠有執曰已著起用而維垣於二臣曰非賢曰不檢是皇上于方隅無所不化而維垣于正氣實有未伸皇上事事虛公而維垣言言我見臣竊惑焉據維垣折臣盛稱東林之尊李三才而護熊廷弼也然亦知東林有首參魏忠賢二十四罪之楊璉及提問崔呈秀欲追賊擬戍之高攀龍乎且當日之議其於三才也特推其揮霍之略未嘗不指之爲貪其於廷弼也特卽西市之誅未嘗不坐之以辟則猶未爲失論失刑也若以今日之事例之以魏忠賢之窮凶極惡積賊無算而維垣猶尊之曰廠臣公廠臣不愛錢廠臣爲國爲民而何況李三才以五虎五彪之交結近侍律當處斬法司奉有嚴諭初擬止于削奪豈不如驕兒護之維垣身係言官不聞駁政又何尤昔人之護熊廷弼者乎而以臣爲謬臣不受也維垣又折臣盛稱韓爌夫舍爌抵觸逆璫及抗疏撓禍之蹟而加以說情罔利莫須有之言已非定論矣卽如廷弼一事爌但票免一梟未嘗赦而欲用之也至廷弼行賄之說自是逆璫借此爲楊左諸人追賊地耳逆璫初擬用移宮一案殺楊左諸人及獄上而以爲難于坐賊於是再傳覆訊改爲封疆之案派賊毒比此天下共知者維垣奈何尙守是說乎至不附紅丸與孫慎行君子之說臣言原非矛盾蓋慎行清望與王之案不同議論深刻亦不失春秋趙盾之法使後之人加慎焉可耳夫董狐不爲賣直趙盾未嘗貶賢而以臣爲謬臣不受也維垣又折



臣盛稱文震孟夫震孟臣不更論卽如王紀清正素著以參沈瀛忤逆璫而譴斥文則以救王紀而降  
削均之得罪於逆璫者也至以破帽策蹇傲蟒玉馳驛此說胡可全非夫刑賞出于朝廷而榮辱因之  
若王紀之時已半是魏忠賢之刑賞矣維垣試觀年來破帽策蹇之輩較之超階躐級之儔誰爲榮辱  
自此義不明于是畏破帽策蹇者相率而頌德建祠希蟒玉馳驛者遂至呼父呼九千歲而不顧可勝  
嘆哉至批炤告公祖之謗吳人盡能辯之當朱童蒙官吳時偶一犯杖斃其妻貧不能殮乞丐里中文  
震孟從衆題助二金事止此耳有何把持放肆而以臣爲謬臣不受也維垣又極力洗發臣矯激假借  
四字夫臣之爲此言正爲人之詆真狂狷爲假名義者發也當崔魏之世人皆任真率性相與頌德建  
祠使有一人矯激假借而不頌不祠豈不猶賴此人哉認臣抑揚之辭爲一成之論而以臣爲謬臣不  
受也乃若維垣之持論臣心未安者三維垣以爲真小人待其貫滿可攻而去之而臣以爲非訓也卽  
如崔魏之貫滿久矣使不遇聖明御宇誰有能攻而去之者維垣到底以無可奈何之說爲頌德建祠  
者解嘲假令崔呈秀舞蹈稱臣於逆璫其餘諸臣便亦以爲無可奈何而盡舞蹈稱臣乎又令逆璫以  
兵劫諸臣使從叛逆諸臣亦以爲無可奈何俛首從叛乎維垣又言今日之曲直不當以崔魏爲對案  
而臣以爲正當以崔魏爲對案也夫人意見不同議論偶異總不足以定真邪如宋臣蘇軾程頤交詆



爲邪而兩人並自千古我朝大禮之爭論者亦兩賢之而惟至品節大閑一失遂成霄壤夫品節試之于崔魏而定矣故有東林之人爲崔魏所憎恨其抵觸畏其才望而必欲殺之逐之者此正人也有攻東林之人爲崔魏所惜而勁節不阿或遠或逐者亦正人也以崔魏定邪正譬之以鏡別妍媸維垣不取案于此而妄取案乎總之東林取憎逆璫獨深受禍獨酷在今日當曲原其高明之槩不當毛舉其纖寸之瑕而揭揭焉反代逆璫分謗斯亦不善立論者矣疏入上爲心動維垣輩之毒網始破人謂倪公二疏實爲廓清首功云

光祿寺阮大鍼上合算七年通內神奸疏略曰汪文言以徽州庫吏逃罪投王安幕下引左光斗入幕移宮之疏紛紛迎合此內外謀傾宮闈之始御史賈繼春疏揭立爭汪文言等嗾臺省諛王安佐楊漣左光斗而繼春削籍此中外謀殺言官之始吏部尙書周嘉謨雅重熊廷弼復任經略而重處姚宗文馮三元此中外謀危封疆之始汪文言處霍維華以謝王安逆賢効之逐戚畹撼中宮此中外謀危母后之始後御史毛羽健劾其比擬不倫黨邪害正有旨阮大鍼前後反覆陰陽閃爍著冠帶閑住去蓋長山所票也

二月會試天下士命施鳳來張瑞圖爲考試官取中曹勳等三百五十人



時羣奸力持殘局海內正人槩不得登啟事翰林必由內閣題請元城既逐平湖當國亦力持不可及是平湖晉江以會試主試入闈高陽特題起陞先文肅姚文毅虞山朱繼祚四兼及者以避嫌也人謂老高陽聳涌成之

三月廷試策士賜劉若宰何瑞徵管紹甯等進士及第出身有差時上留心策士進呈三十六卷並貯名金甌中以金箸夾之凡三夾皆得若宰遂定爲狀元前是枚卜華亭少所推轂者吏都垣魏炤乘係亭丙辰所取士故與會推上亦貯名金甌用金箸決之首夾卽得華亭然兩公勲業德望俱無聞焉何以邀有天幸乃爾

御史吳煥疏參漕運太監崔文昇略曰文昇引進李可灼漫投寒瀉之藥以致光廟賓天實坐不赦之辟而日爲逆璫腹心總督漕運控扼江淮要害與劉忠選恣爲縱肆剝君虐民幾激大變應行逮問疏入文昇拉同伴宮門哭聲達帝上立拿倡首二奄同文昇各杖一百俱降淨軍發孝陵煥疏留中

倪元璐疏請毀三朝要典略曰臣觀梃擊紅丸移宮三案議關清流而三朝要典一書成于逆豎其義不可不兼行其書不可不速毀請詳其說蓋當事起議興盈廷互訟爭梃擊者力護東宮爭風癩者計安神祖主紅丸者仗義之言爭紅丸者原心之論主移宮者彌變于幾先爭移宮者持平事後六者各



有其是不可偏非以爲忠悃則皆忠悃以爲明見則皆明見總在逆璫未用之先羣小未升之日雖甚水火不害墳簾此一局也旣而楊璉二十四罪之疏發魏廣微此輩門戶之說興於是逆璫殺人則借三案羣小求富貴則借三案經此二借而三案之面目全非矣故凡推慈歸孝于先皇猶夫稱頌德功于義父又一局也網已密而猶疑有遺鱗勢極重而或憂其翻局於是崔魏諸奸乃始剗立私編標題要典以之批根今日則衆正之黨碑以之免死他年則上公之鐵券又一局也由此而觀三案者天下之公議要典者魏氏之私書三案自三案要典自要典今執爲金石不刊之論者誠未思若未翻卽紛譌改亦多事如臣所見惟有毀之而已夫以奄豎之權而屈役史官之筆亙古未聞當毀一未易代而有編年不直書而加論斷若云彷彿明倫規模大典則是魏忠賢欲與肅皇帝並聖崔呈秀可與張孚敬比賢悖逆非倫當毀二矯誣先帝僞撰宸篇旣不可擬司馬光資治通鑑之書亦不得援宋神宗手製敘文爲例假竊誣妄當毀三又況史局將開館抄具備七載非難稽之世實錄有本等之書何事有此駢枝供人唾罵當毀四當今正氣日升方隅漸化自宜進以平飲沃以溫湯然而逆璫之遺蹟一日不滅則公正之憤千年不釋也時上卽欲將要典焚毀肅山票旨這所請關係重大著禮部會同史館諸臣詳議具奏下增聽朕獨斷行五字旣而廷議僉同奉旨要典著卽行焚毀侍講孫之獬詣東閣力



爭不可毀繼以痛哭聲徹內外退復上力疾不能供職疏極言要典不可毀之故御史吳煥上疏糾之略曰孫之獬爭要典不可毀者云皇上于熹宗曾北面事之見有御製序文在朕之一字豈可投之火是明以御製二字壓皇上不敢動矣又云皇上同枝繼立非有勝國之埽除何必如此忍心狠手於祖考則夫孝於熹廟則失友是明咎皇上以不孝不友矣夫孫之獬亦知今日要典之毀毫無損於聖祖神孫之孝慈而當日爭梃擊爭紅丸爭移宮三案諸臣原未嘗陷主于不慈陷主于不孝特羣邪奸黨欲殺忠良苦無題目借此爲罪案耳夫當張差之梃而馳至排闥直入也其有所使而然何待辯辯此而不問將亢圖魚腹踵發禁廷東宮危矣惟廷臣持破柱詰之威神廟光考自行燒梁獄詞之法父子兄弟之間所全實多止慈止孝得此益彰而謂諸臣陷主于不慈陷主于不孝不亦冤乎及光宗嗣寶匝月之內雨露滂沱天下方慶萬年有道之長一旦哀思太過聖體恒羸崔文昇李可灼以瀉下之藥進鼎湖遽逝攀髯無策而涕泣號呼歸罪嘗藥此忠臣孝子痛極不擇音之言乃遽以悲憤叫號定諸臣不赦之罪反以聖躬嘗試之崔文昇立躋總鎮李可灼登用方新亦大不平矣至于移宮一案誠嫌太驟然當其時大故接踵朝野震驚宮府徑庭危疑紛起誠蚤得元子升中出震以定羣心則負扈奠鼎他何暇恤彼謂待宮眷必宜從厚者此痛定事後之言迨至聖眷無改恩禮有加於先帝之孝益顯



惟日爭挺擊爭紅丸爭移宮而初無損於三聖之孝慈則又何劉志選徐紹吉諸奸勒成要典一書稱之爲孝而後孝稱之爲慈而後慈也如以爲先帝敘文必不可更彼僞祠之建僞爵之封位上公錫鐵券胙土田何一非稱皇稱制奸人邪黨正將借此以壓羣愚欺當世而不知斯民三代之直斷不可枉也惟是公罪不明邪正顛倒所以辯言亂政邪說橫行伏祈皇上將孫之獬立賜褫斥以爲無禮於君者戒疏入蕭山輩竭力調護得旨孫之獬已經回籍詞林閑局不必過求

原任尙寶司卿黃正賓上聖世除惡務本疏略曰前臣戍大同目擊內鎮剋滅馬匹銀兩陽和各軍鼓譟毀官署劫典鋪將吏叩頭求免此時撫按脅於內鎮之威莫敢據實奏聞邊防迄今壞盡卽一鎮可推各鎮也是奄宦者天下禍本也至交結近侍明律森然乃虎彪肆行而子孫蟪集究其爲作俑者魏廣微發縱指示者徐大化也大化始以攻熊廷弼爲媚璫贄見旣而逢惡魏廣微以擔當共謀富貴某宜戍某宜削奪一一疏記與廣微使大肆其排擠之毒手黃緣督理大工日奉魏忠賢色笑剋減工銀無餘最後私受銅商厚賄挪借惜薪司錢糧二十萬拂忠賢之意勒令閑住原疏可按也及覩逆賢將敗令表姪楊維垣疏參崔呈秀以爲翻身轉局地目今大化維垣雖奉譴斥潛居輦轂日與奄宦往來世界翻雲覆雨已三轉于大化之線索何叵測也時蕭山票旨有不苟求句御批楊維垣不許潛住京師



徐大化著回原籍去

御史陳乾陽疏參趙鳴陽曾入逆賢之幕有旨逮問先是有魏奄學顏者侍神廟久奏對便捷能解聖意神廟頗信任之光廟時卽休退矣曾延吳江趙鳴陽訓其姪逆賢事敗乾陽誤以學顏姓魏疑卽逆賢故疏參之後法司審鞫得實鳴陽仍放回籍

上以潛邸留心時藝卽入內合諸奄而試之出事君能致其身題取鄭之憲第一卽陞隨堂掌尙膳監印未幾乞休

上求治頗急召對羣臣多不稱旨每加誚詰羣臣愈惶悚不能對惟長山條陳稍捷上每溫顏以優禮之時貂孽楊維垣等相繼出逐雖出聖斷而票旨多由長山於是御史袁宏勛有疏攻之略曰劉鴻訓一入黃扉揚揚自得浹旬之間革職閑住無虛日可異者楊所修賈繼春楊維垣夾攻表裏之奸有功無罪而誅鋤禁錮自三臣始且軍國大計未暇平章惟亟毀要典謂水火元黃是書爲祟今毀矣水火元黃息耶否耶未毀以前崔魏借之以空善類旣毀以後鴻訓借之以殛忠良以暴易暴長此安窮御史高捷史堃相繼糾參錦衣張道濬亦有疏參而工科楊繼祖出疏爭之且言道濬越位妄言亂政乞加重創時上傳諭欲將宏勛等重處鴻訓三揭力救乃免



時當考館選龍飛首科例應加額侍讀張士範上館額蒙恩疏內有准加大名以示優異之旨等語上因召對問士範此旨從何而來士範對此疏臣不與知乃新進士張星所作上曰既不與知何以列名又曰既知張星名又何云不知士範對疏入後始知之上詰責再四閣臣劉鴻訓奏此新進士功名念重致有此舉誠爲可惡闕在皇上登極宏恩惟望優容上乃命寫本人闕又命士範具本回話後士範回話疏上有旨士範著回原籍張星不准授官

周起元之逮也由于李實之疏李實已逮問大辟矣一日上召對特宣刑部署部事侍郎丁啟睿問曰李實一案有疑惑無疑惑有暗昧無暗昧啟睿奏奉旨九卿科道會問過據實回奏上曰李實何以當決不待時啟睿對李實與李永貞構殺七命不刑自招上曰豈有不刑自招之理因問吏部尙書王永光王永光對李實初不肯承及用刑然後承認上曰重刑之下何求不得李實爲魏忠賢追取印信空本令李永貞填寫如何含糊定罪啟睿對威福出於朝廷一憑聖裁上曰持法要平朕豈爲李實爾五虎五彪緣何不問他決不待時後又召對上特攜李實原疏示閣臣曰此李實參問周起元等原疏卿等可詳觀之看是硃在墨上墨在硃上諸閣臣詳覽良久俱對果是墨在硃上上曰可見是空頭本復命傳九卿科道遞閱皆然閣臣改票李永貞決不可待時劉若愚次一等李實又次一等按李實空本是



矣本內所列事款遠在江南係何人開送時爲實實奏者孫昇也何不請提孫昇鞫問窮究到底卽云填寫出於永貞次一等足矣何至又次一等也永光窺瞰上意全無執持小人常態固不必言啟睿身任司寇不能執法廷諍乃以威福出自朝廷一語卸責亦安用司寇爲矣而閣輔科道諸臣俱無一言糾正此廷臣之所以見輕也至虎彪不問決不待時天語烺烺法司置面孔於何地竊謂蘇茂相等之罪尤浮于逆賢以

以下闕

給事中韓一良有勸廉懲貪疏深當聖意因召對出此疏覆閱良久命一良高聲朗誦甫讀畢取疏付閣臣閱劉鴻訓奏弊有兩端有交際有納賄上問何謂交際鴻訓奏交際如親友問遺之類情有可原納賄則希榮求寵便不可以數計矣上曰朕閱一良所奏大破情面忠鯁可嘉當破格擢用可加右僉都御史吏部尙書王永光承旨因奏科臣露草必有所指乞皇上命科臣摘其尤者重處一二以爲貪官之戒上召一良指疏內開之有源導之有流等語著據實具奏來一良對臣今未敢深言俟插遼平復之後具奏若納賄等事臣疏中原說風聞不曾知名上意怒曰難道一人不知遽有此疏限五日具奏一良回奏參周應秋閻鳴泰張翼明褚泰初後復召對上曰周應秋等自有公論張翼明已下部聽勘俱無用爾參又取一良前疏反覆展視御音朗誦至臣素不愛錢而錢自至據臣兩月內辭却書帕已



五百餘金以臣絕無交際之人而有此金他可知矣讀至此擊節感嘆聲厲問一良此五百金何人所餽一良對臣有交際簿在上固問之一良始終以風聞對上遂震怒謂其以風聞塞責也上卽諭閣臣曰韓一良前後矛盾他前疏明明有人今乃以周應秋等塞責都御史不是輕易做的要有實功方許實授劉鴻訓等合詞奏請臣不爲皇上惜此官但爲皇上惜此言上愠色曰分明替他說話他既不知其人如何輕奏豈有紙上說一說便與他一個都御史召一良面叱曰韓一良所奏疏前後自相矛盾顯是肺腸大換本當拿問念係言官姑饒遣遭

廷推袁崇煥爲甯錦督師崇煥赴任陛見上召問曰建部跳梁十載於茲封疆淪陷遼民塗炭卿萬里赴召忠勇可嘉所有平遼方略可具實奏來崇煥奏所有方略已具疏中臣今受皇上特達之知願假以便宜計五年而建部可平全遼可復矣上曰五年復遼便是方略朕不吝封侯之賞卿其努力以解天下倒懸之苦卿子孫亦受其福崇煥謝恩歸班上暫退少憩給事許譽卿面叩五年之略崇煥言聊慰聖心耳譽卿言上英明豈可漫對異日按期責功奈何崇煥慨然自矢頃之上出崇煥卽奏東建四十年蓄聚此局原不易結但皇上留心封疆宵旰于上臣何敢言難此五年之中須事事應手首先錢糧上卽諭戶部署部事右侍郎王家禎著力措辦毋致不充於用崇煥又請器械謂東建蓄謀已久器械



犀利馬匹調習今後解邊弓甲等項亦須精利上卽諭工部署部事左侍郎張維樞今後所解各項須鑄定監造司官及匠作姓名若有脆薄不堪者俟查究治崇煥又奏五年之中事變不一必須吏兵二部俱應臣手所當用之人卽與選授所不當用者勿致濫推上卽召吏部尙書王永光兵部尙書王在晉諭以崇煥意煥又奏以臣之力制全遼而有餘調衆口而不足一出國便成萬里忌功妒能夫豈無人卽凜凜於皇上法度不以權掣臣之手亦能以意見亂臣之方略上起立伫聽者久之尋諭條對方略井井不必謙遜朕自有主持閣臣劉鴻訓等俱奏請假崇煥便宜賜之尙方至如王之臣滿桂之尙方應行撤回以一事權上深然之命擬諭來看

廷推王象乾以原官總督宣大上召同閣臣皆入檻內去御案咫尺蓋異數也上曰卿三朝元老忠猷素著見卿矍鑠知袁崇煥薦舉不差有何方略可面陳來象乾奏臣年八旬齒疎不能詳奏所有方略具在疏中上固問之象乾敘插漢卜哈諸酋離合始末因奏朵顏等夷三十六家今日應與哈慎一同連絡可得數萬安插薊鎮沿邊駐牧爲我藩籬似亦可敵插酋上曰觀酋意似不肯受撫者象乾奏從容籠絡撫亦可成上曰禦夷當恩威並濟不可專恃羈縻閣臣劉鴻訓奏聞虎酋知王象乾至退六百里上卽問退去在何地方鴻訓不能對象乾代奏退去直北沙磧中上又問倘款事不成如何象乾奏夷



情約數百言上始色喜隨諭象乾曰卿年雖踰八旬精力尙壯朕心喜悅卿撫插酋于西袁崇煥禦於東恢復功成皆卿等之力也象乾與閣臣俱叩首而退按崇煥原知遼不可復冀以款羈縻歲月耳觀其舉薦象乾意可知矣蓋象乾專主撫也象乾既赴任專任插酋撫賞事宜舊例屬夷出馬中國出綵繒互相貿易名曰馬市虜中駒初生繫其母於山頂駒從下一躍而上者留充馳驅躍至半而踏者殺以爲食其懦不能躍者則以與中國爲市象乾建議虜中既驚馬相誑不若却其馬而以價之半與之少司馬申公用懋持不可謂虜所市馬誠不堪用然每歲徵馬以萬計於虜不無少損且以幣易馬尙有名可舉今無故斂繒幣與之去歲幣幾何母乃爲朝廷辱乎又插索數甚奢申公謂遽損其數虜未必俯首聽命塞外舊弃地甚多盍以泰甯等地爲名虜能歸我舊疆我當如虜所請虜必不肯割地然後減損其數在我爲有辭矣時象乾耄無遠圖當事者急欲成功遂苟且從事未幾插酋內犯入大同殺僇甚慘撫終不可成而浪擲金錢數十萬云

上勵精圖治而念切民艱給事中黃承吳面陳水利因言東南時患水災皆水利不修之故上問水利何爲不修閣臣周道登錢龍錫同奏水利是東南第一大事但修理須要錢糧臣等前已擬旨著撫按酌議具奏上沈思久之曰要修水利可擾民否龍錫奏臣等惟恐擾民故行彼處撫按酌議御史毛羽健



有疏請蘇驛遞上命羽健自讀因諭閣臣曰驛遞疲困已極小民敲骨吸髓馬不歇蹄人不息肩朕甚恨之若不痛革民困何由得蘇卿等可卽擬票來及票至上以票內有按撫司道公務外俱不許遺白牌語屬含糊復命改票御史高欽舜奏請令各開爐鑄造軍器上問可行否閣臣皆奏可行上曰何謂可行李標奏各邊自爲禦敵計定當堅好上曰此非祖制御史梁子璠疏請汰兵餉內有各邊虛冒等語上召戶兵二部問兵餉何以冒濫至此戶部署部事侍郎王家禎同兵部尙書王在晉奏兵餉冒濫已久各邊有事督撫累次請添兵增餉情弊已非一日又讀至老弱之人曾荷戈而弗克上矍然曰荷戈者皆老弱豈能禦敵如何不查卽勅戶兵二部速選廉幹司官往各邊查核具奏

上因召對特命科官道至御前諭曰朕思進賢退不肖故令爾等爲耳目司舉劾就中無不冒濫爾等試自思之所舉者果人人皆賢乎所劾者果人人不肖乎朕曾降諭切責有反坐二字以求直言今又面諭爾等若藉口不言要科道官何用上之孜孜求治求言若此

袁崇煥至錦州連疏請餉上御文華殿諭曰崇煥前云安撫錦州兵變可彌今疏又云軍欲鼓譟求發內帑與前疏何相矛盾卿等奏來時百官有請允發者有請發內帑者上詰問戶部時尙書畢自嚴甫履任極言戶部缺乏容當陸續措給上曰據崇煥疏云初三日卽發變今已初二卽此時發去已遲何救



於鼓譟上又云將兵者果能如家人父子自不敢叛不敢叛者畏其威不忍叛者懷其德如何有鼓譟之事上又曰內帑外庫俱係萬民脂膏原用以保封疆安社稷若發去果實實有用朕豈吝此禮部右侍郎周延儒奏曰國家最忌無如關門但昔止防虜變今并防兵變前此甯遠鼓譟不處治流水發餉與他今又鼓譟請發內帑各邊效尤將何底止上曰卿以爲何如延儒奏臣非敢阻皇上發帑此時安危在呼吸間急則治其標固當與之然非長策還望皇上集廷臣從長計議畫一經久之策上曰此說良是若是急寧一請帑各邊比例這內帑豈不涸之原何以應之上又曰爾等不肯大破情面極力擔當動稱邊餉缺乏朕每下旨嚴催通不解來卽如贓銀充餉至今不解豆價行查至今不曾回奏如此拖欠稽遲糧餉何時得足上又曰你們每每上疏求舉行召對文華商榷猶然事事如故召對都成舊套商榷俱屬虛文何曾做得一件實事來上又曰朕自卽位以來孜孜求治以爲卿等當有嘉謀奇策召對商榷時朕未及周知者悉以入告俱推諉不知朕又何從知之時天威震迅憂形於色大小臣工皆戰懼不能仰對而延儒由此荷聖眷矣時十月初二日也

插曾入犯大同總兵渠家禎閉門不出任其殺掠上召百官諭曰朝廷養士費許多兵餉一遇虜至便束手坐視只請兵餉上又曰插曾殺僇人民滿載而歸巡撫官不能防禦是功是罪朕之封疆止仗一嘯



麻僧請款不令虜輕中國耶上又曰講款整飭著實整飭難道中國就勝不得他上又曰今邊疆失事只參總兵等官難道敘功不升文官朦朧偏心朕甚惡之後渠家禎辯疏至上示閣臣俱言大同失事甚夥家禎擁兵坐視豈能逃罪上曰督撫如何令千餘兵馬便要去敵插酋十餘萬衆渠家禎既有督撫作何事劉鴻訓奏武臣在外提兵文臣在內調度上曰文臣還當節制武臣今督撫一向人馬不行操練平日虛冒臨敵張皇以千餘弱兵抵十萬插酋等試思如何抵得鴻訓奏皇上責備文臣極是但自皇祖靜攝以來至先帝時二三十年邊備廢弛已久一時猝難整頓上曰而今何如錢龍錫等俱奏而今比前大不相同上曰此俱是贊揚之詞尙未見行一實事如何便見不同嗚呼有君無臣之概上已顯然於言外矣

阮大鍼之逐也票擬出長山手大鍼先嗾袁宏勛等攻之不動因日夜伺其短而長山恃有聖眷頗肆招搖復向人語皇上畢竟是冲主隨有布此語於宮中者上聞之怒甚適有擅增勅言之事長山遂膺嚴譴

惠安伯張慶臻營謀管事用賄于長山於勅書內擅增數字大同失事本兵王在晉隱匿不以實告御史吳玉上疏參劾上召對命吳玉宣讀讀畢上問閣臣李標奏在晉屢被人言宜放他去上曰此事只有



一個是非封疆大事中樞重任自有祖宗之法如何只教他去便了上又問閣臣張慶臻改勅書一事卿等豈不知道卿等先奏兵部有手本慶臻有揭帖豈有不知上又問慶臻不上本如何敢送私揭慶臻奏臣以一時盜賊生發不及上本又係小事不敢瀆奏上曰改勅書怎云是小事因令諸臣奏來戶部尙書畢自巖等俱謝不知上曰卿等在外邊都是知道的今乃說不知又令科道官奏來給事中張廷鼎奏張慶臻用賄改勅書是實李覺斯與御史王道直俱奏如廷鼎言但不知主使何人吳玉奏主使係劉鴻訓張慶臻辯改勅書係中書之事臣實不知吏部左侍郎張鳳翔奏慶臻用賄改勅竊弄兵權大不敬無人臣禮中書不過頤指氣使之人如何擅敢改勅閣臣李標等合詞奏臣等與鴻訓同事並不聞有此還求皇上細訪上曰這樣明講何須更訪卽令閣臣擬票閣臣逡巡未卽擬上正色嚴促者再乃擬旨鴻訓慶臻俱革職聽勘又吳玉疏內有時局字上問何爲時局玉奏如當初是魏忠賢的局面而今是皇上的局面上怒曰如何將魏忠賢比朕又吳玉奏事時給事中熊奮渭私議疏中開國元勛等語爲非是其聲頗高上問班中有聲是誰熊奮渭長跽俟命候召對畢與百官同出隨傳熊奮渭著降三級調用後部院會勘有旨王在晉革職回籍劉鴻訓附近充軍

袁崇煥屢疏請餉上召對諭諸臣曰袁崇煥在朕前以五年復遼及清視爲己任這關餉事須講求長策



又曰關兵動輒鼓譟各邊效尤何以底止禮部右侍郎周延儒奏曰軍士要挾不止爲少餉畢竟別有隱情古人羅雀掘鼠軍心不變今各兵止少他折色未嘗少他月餉如何動輒鼓譟此其中必有原故上曰正如此說古人尙有羅雀掘鼠的今雖缺餉豈遂至此羅雀掘鼠四字深契聖心延儒之盼盼于枚卜其衷愈熱矣

上一日御講筵問閣臣曰宰相須用讀書人當作何解周道登對曰容臣等到閣中查明回奏上始有愠色繼而微笑嘻甚上又問閣臣近來諸臣奏內多有情面二字何謂情面周道登對曰情面者面情之謂也左右皆匿笑

上究心利弊尤留意邊防各邊以缺餉告司農仰屋無計上因召對諭諸臣曰朕記得先年有大工有生祠多少錢糧無日不進益有發有餘今大工完了生祠毀了如何不足前日又撤了各處內鎮便該有許多錢糧下來那裏去了戶部尙書畢自嚴奏外解不能全完所以不足上問外解何以不全完上又曰太倉銀兩原非邊用如何急了便要請帑朝廷給餉養兵原期實用如此動輒鼓譟養這驕兵何用隨諭自嚴卿到部裏將新舊錢糧多要徹底澄清逐一查算具奏按祖制直省各有預貯銀兩以備急用多者幾十萬少者十餘萬如蘄鎮則有銀八萬五千有奇貯遵化縣庫名曰備邊江南有銀十萬



兩有奇貯鎮江府庫浙江有銀十七萬兩有零貯温州府庫名曰備倭他省仿是地方猝有變亂不煩催科不支官帑事可立辦自魏忠賢生祠開端咸取給於是造祠者十之二三餘皆入撫按司道私囊中矣斯時若大臣有留心國計者委曲詳列其弊并請嚴查各邊各省備邊備倭原額錢糧幾何生祠開銷幾何卽勒令建祠撫按司道照額補償遴選風力科道究竟其事俾國家收士飽馬騰之用而氓庶免頭會箕歛之苦且使世之爲貪吏有餘財者知法制嚴明不敢恣其谿壑亦救世一策也惜乎廷臣平日毫不究心無以慰聖天子焦勞至念自此以後帝意天下自有餘財羣臣不肯實心任事雖兵荒洊臻言賑言蠲皆置不省嗚呼真千古有餘痛矣



明季稗史彙編卷一終



明季稗史彙編卷二

烈皇小識

天啟元年辛酉虞山錢謙益以編修主浙江試歸安韓敬與秀水沈德符預選字眼假稱關節令人遍投諸應試者約以事成取償浙士子多墮其網中錢千秋與焉千秋字眼以一朝平步上青天七字爲七藝之結謙益在闈中弗暇察也比撤棘敬等卽發覺其事復唆禮科顧其仁磨勘參送謙益亦自具疏簡舉奉旨下部部擬千秋與居間徐時敏金保元俱依律遣戍謙益與本房鄭履祥失於覺察罰俸三個月奉旨依擬此天啟二年事也後時敏保元在獄病故千秋發東勝右衛所充軍收管存案隨遇赦撫按給帖釋放事結久矣當枚卜廷臣共推轂謙益而宜興周延儒以召對數語上契聖衷若一系列名必蒙點用延儒又結好於戚晚鄭養性萬煒及東廠唐之徵以爲內援繕事中瞿式耜恐兩人不能並相因力阻延儒延儒大不堪時吏部尙書王永光杜門乞休勢在必去御史梁子璠持疏欲令侍郎卽代行之理於是式耜疏請永光料枚卜然後聽其去永光遂開籍見朝會推疏上首承基命次卽謙益而延儒溫體仁俱不得預延儒暗布流言謂此番枚卜皆謙益黨把持上閱會推無延儒名遂入其說體仁乃上直發蓋世神奸疏卽舉千秋關節事參謙益上爲召百官面訊謙益奏辯千秋關節已經疏



參刑部勘問明白現有案卷在部體稱千秋在逃過付者爲徐時敏金保元二人提至刑部親口供扳謙益如何隱得彼此質辯良久上命辯疏與參疏俱取上來上問體仁疏內稱神奸結黨欺君奸黨是誰枚卜大典誰人一手握定體仁奏謙益之黨甚多臣還不敢盡言至於此番枚卜皇上務求真才其實多是謙益吏部都給事中章允儒奏錢千秋一事久經問結體仁資俸雖深品望甚輕會推不與遂不甚熱中如謙益關節果真何不糾於未枚卜之先今會推疏上點與不點一聽聖裁體仁奏科官言正見其黨謙益蓋未枚卜之先不過冷局參他何用糾之於此時正爲皇上慎用人耳允儒奏從來小人陷害君子皆以黨之一字昔者魏廣微欲逐趙南星楊漣等於會推疏中使魏忠賢加一黨字盡行削奪留傳至今爲小人害君子之榜樣上怒叱曰胡說御前奏事怎這樣胡扯拿了時無人承旨上問錦衣衛何在衛帥承旨將允儒扶出體仁又奏皇上試問冢臣王永光屢奉溫旨何以不出直待瞿式耜有疏完了枚卜大事然後聽其去是臣冢去留皇上不得專主有此事否謙益熱中枚卜先令梁子璠上疏欲令侍郎張鳳翔代行會推此從來未有之事上召諸臣問曰朕傳旨枚卜大典會推要公如何推這等人是公不是公王永光奏皇上召問吏科河南道與郎中耿志煒便知道了體仁奏永光是六卿之長用賢退不肖是他的職掌如何推在司官身上河南道掌道御史房可壯奏臣等多是公議



上曰會推大事其中推遣等人還說是公議諸臣奏來閣下李標等俱奏關節與謙益無干體仁壽分  
明滿朝俱是謙益一黨臣受四朝知遇忠憤所激不容不言關節是真若不受賄如何得中況今錢千  
秋現在京師日入謙益之幕指望益謙入閣希圖辨復謙益可以枚卜則千秋亦可會試李標等又奏  
前次招問明白上曰招也閃爍不可憑據禮部右侍郎周延儒奏皇上再三問諸臣不敢奏者一者懼  
干天威二者牽於情面總之錢千秋一案關節是真現有招案硃卷已經御覽詳明關節已有的據不  
必又問諸臣上又請問諸臣曰朕著九卿科道會推便推這樣人就是會議今後要公若會議不公不  
如不會議卿等如何不奏延儒又奏大凡會議會推皇上明旨下九卿科道以爲極公不知外廷止沿  
故套只是一二個人把持定了諸臣都不敢開口就開口也不行徒然言出禍隨上命再奏延儒復奏  
如前體仁奏臣子身孤立滿朝俱是謙益之黨臣疏既出不惟謙益恨臣凡謙益之黨無不恨臣臣一  
身豈能當衆怒臣叨九列之末不忍見上焦勞於上諸臣皆不以戒慎爲念不得不參懇乞皇上罷臣  
歸里以避凶鋒上曰既爲國劾奸何必求去時謙益伏地待罪上命出外候次日奉旨錢謙益既有議  
論著回籍聽勘錢千秋法司提問又章允儒房可壯各具疏認罪瞿式耜梁子璠各具疏回話有旨俱  
著降三級調用



已而御史毛九華疏糾溫體仁逆詞媚獻詩冊任贊化疏糾體仁居鄉不法事上召對體仁奏臣若有媚  
璫詞詩必以手書爲贊萬無木刻之理既係刻本必流傳廣布何以兩年來絕無人論及且此冊何不  
發於籍沒逆璫之時而得於九華之手乞皇上勅下該部嚴究所刻之人此詩從何得來則真僞立見  
若但以刻本爲據則刻匠遍滿都城以錢謙益之力何所不假捏上如言請九華九華對八月買自途  
間上曰八月買的如何到今纔發九華對臣十月考選體仁奏臣參錢謙益在十一月九華參臣在十  
二月九華既得此冊何以不急具疏特糾冊中媚璫諸人而但於條陳疏末單指臣名種種真情已自  
畢露上問閣臣如何說首輔韓爌奏體仁平日硜硜自守亦有品望但因參論枚卜一事情激過當致  
犯衆怒所以諸臣攻他體仁奏臣通籍三十年並無一字掛入彈章只因參了錢謙益攻者四起凡可  
以殺臣逐臣者無所不至豈一人之身賢奸頓異至此毛九華係謙益之黨無疑上曰溫體仁也辯得  
是又召御史任贊化上曰毛九華參溫體仁一詩尙且不真爾如何參他許多無根之言如此褻語在  
御前瀆奏體仁奏贊化疏全是誣捏凡宦游臣鄉者俱可問卽如說臣與陳與郊兒女姻家此一查可  
明事事無影虛捏如此贊化奏臣之所言不過採訪公論長安萬口如一體仁奏去年謙益未入都門  
贊化代謙益首攻御史陳以瑞以瑞係崔魏削奪皇上賜環之人因曾參謙益科場之事贊化反以媚



璫糾之及謙益入都把持吏部覆之爲民此贊化爲謙益死黨之一證也去秋皇上未有枚卜之旨贊化特出薦相才一疏蓋爲謙益而發至稱謙益爲伊周之班行此贊化爲謙益死黨之二證也若謙益幸入綸扉贊化自居擁戴首功一旦被臣參破故恨臣最深誣臣最甚贊化奏陳以瑞部覆冠帶閒住皇上獨斷著他爲民體仁如何力保以瑞體仁奏臣非敢力保陳以瑞只因以瑞曾參謙益故贊化還將以瑞參論上曰不必多奏候旨行自是體仁以告訐見知於上結黨之說深啟聖疑攻者愈力而聖疑愈堅矣

江西庶吉士朱統銹與吳江相公有交其得館選也吳江爲之道地雖云無私而實有意給事中間可陞疏攻吳江并及統銹著仍選中書周道登准回籍調理後統銹朦朧起授檢討上亦弗深究也

上一日御日講講官徐光啟講中庸畢上忽問曰旣云知天地之化育又云其孰能知之是同是異光啟以化育分內知孰能知分外知上哂曰知也有內外年終講官敘勞內閣題光啟以禮部侍郎加太子賓客照舊日講上抹去照舊日講四字

二年己巳二月初四日皇長子生中宮周后出我明中宮無生子者三百年來周后一人而已

考聖躬燕寢之所爲屋三楹而不並列由第一間而後第二間而後第三間其第三間聖躬晏息處



也其第二間具大薰籠貯衾裯之屬凡召幸宮眷至第一間則盡卸諸裳裸體至第二間取衾裯被身乃進至第三間所謂抱衾與裯也卽中宮與東西兩宮赴召不敢不遵用此禮惟先后以曾同糟糠不肯赴召又聖駕幸宮中舊例聖母趨出宮門外接駕先后亦以糟糠故廢此禮不用

蒲州再召適當推敲逆案右庶子楊世芳其姻家也世芳乃纂修要典者自應入逆案中蒲州力庇之薛國觀亦以沈維炳護持俱邀漏網而同事朱繼祚余煌張惟一袁鯨等皆援例格外矣以此蒲州相業頗不協人心

工部節慎庫主給發商人上供顏料銀兩最深稱弊蔽設有監督主事一員巡視科道各一員所以釐奸剔弊計自至詳也而諸府奸吏甚四月上特發其弊監督主事劉鱗長巡視給事中祖重燧御史高資明俱下獄因追論元年同事諸臣惟重燧與御史吳阿衡狼籍頗著復徵阿衡下獄鱗長資明以無染止行降調阿衡於邊警時以邊才拔爲監軍御史重燧遣戍

烏程旣特疏參虞山宜興復於召對佐理之舉朝皆與爲敵彈章如羽上堅留不放時有四凶之目指烏程長垣宜興及少司馬也八月部推烏程爲南京禮部尙書以駱從宇陪推大理寺卿康新周爲南京工部侍郎以何喬遠陪御筆俱點陪喬遠以尙寶卿請告林下僅五品耳而躡躅九列則烏程之提挈



也

九月河南道驛傳道缺推原任副使路周賀填補領勅之日適上正視朝路老邁甚支離萬狀上傳諭閣臣云路周賀舉步蹣跚語言蹇蹇河南雖不是邊道驛傳也不是容易做的卿等還傳與吏部知道出言成章真天縱也

於是三盛事皆非人力可強致者一則錦衣徐本高之八世一品也本高爲文貞公元孫文貞前以少傅贈其曾祖父如其官連本身四世一品矣本高承父貞武蔭歷官都督同知際遇覃恩亦得贈其曾祖父如其官連本身亦恰四世一品雖總由文貞推恩而一人不中斷一人不重疊恰符八世俱腰玉稱一品亦字內所希觀矣一則南海黃士俊之父也士俊登萬曆丁未狀元歷官禮部尙書際遇覃恩封其父如其官適百歲士俊給假歸家稱觴有旨准與建坊錫名熙朝人瑞夫百歲稱觴異矣乃其子以尙書頓首堂下己亦受尙書封緋袍犀帶稱百歲老臣且邀有煌煌天語不尤異乎一則晉江楊元錫也元錫登崇禎甲戌進士年纔十六釋褐之日髮僅覆額所謂其位可致其年不可倖也

浙江總兵王光有病不任事甯紹副將林某勇而且廉當事者擬以林繼王之座林某亦頗有望擢之思遣役入都修候王亦遣役入都兩役交過於職方之司王役謂林謀攘其主之缺也不勝甚其怒遂揮



老拳林役不敢抗展側之際所資候儀墮地事既宣傳不可終隱職方郎中方孔炤具疏參林有旨革職提問人皆寃之

琉球國王新立遣使告知且請受封舊例給事中行入各一員充正副使時科已推山東杜三策行人應屬江西蕭士瑋次則山東孔聞籍兩人交相推諉至詬詈于司正楊掄之門掄不勝其憤遂自請行有旨楊掄歸陞京堂用蕭士瑋降三級調外任孔聞籍不准考選調南京用掄與三策皆賜一品服以是年九月出都至六年八月始克航海完冊封事歸時颶風大作幾葬魚腹七年二月復命三策陞太常寺少卿掄陞尙寶司少卿掄以驚悸成疾未幾卒聞籍後陞陝西西甯兵備道適番夷之變合家自焚陝西饑民倡亂蔓延廷推楊鶴以兵部右侍郎總督全陝上召問方略鶴第以清廉自持撫恤將卒對先是天啟丁卯陝西大旱澄城知縣張耀采催科甚酷民不堪其毒有王二者陰糾數百人聚集山上皆以墨塗面王二高喝曰誰敢殺張知縣衆齊聲應曰我敢殺如是者三遂闖入城守門者不敢禦直入縣殺耀采衆遂圍聚山中巡撫胡廷宴老而耄置之不問又延慶連歲荒旱去冬有王嘉允者倡亂于府谷蔓延於西漢以南今春延綏巡撫岳和聲陝西巡撫胡廷宴各報略陽淳化綏德宜川等處流賊孔棘隕陽撫治梁應澤亦以漢南盜告急三月商維兵備劉應過率毛兵至漢中合川兵擊賊賊奔漢



陰應遇追斬五百餘人誅其渠魁十餘人餘悉北走漢南盜平八月賊復犯耀州參政洪承疇合官兵鄉勇共萬餘人擊賊于雲陽賊既敗夜來乘雷雨掠淳化入神道嶺

此流賊之始也

九月奢安二酋平先是土司奢崇明安邦彥先後稱叛雲貴不靖者七年于茲去冬復起朱燮元總督雲貴川湘廣西五省專任討賊而賊據大方阻險負隅崇明僭號大梁王邦彥自稱四裔大長老謀犯先赤水燮元偵知之命守將許成名佯北誘賊深入度賊已抵永甯分遣林兆鼎從三壘入王國禎從陸廣入劉養鯤從遵義入邦彥分兵四應力頗不支復遣監軍副使劉可訓同降將羅象乾以奇兵繞出其背夾擊之賊大驚潰崇明邦彥皆沒于陣官兵斬其首以獻捷聞燮元等俱進爵資銀幣子蔭有差御史毛羽健疏請添設永甯巡撫卽以劉可訓爲之以靖地方以勸勞臣不報

是冬擬冊立東宮中外皆望大赦九月二十六日上召閣臣進己素袍角帶決意行刑二十七日御筆勾逆案倪文煥李夔龍梁夢環田吉封疆則總督鎬撫臣張翼明總兵渠家禎監造則工部高道素偕內臣黃用督造桂王府第時惠王封荊州桂王封衡州並在湖廣筦計者臆揣就國必以齒序經費每急荆綏衡天啟七年夏桂王之國距惠王僅數日巡按溫臯謀疏乞展期逆奄矯旨切責有司倉皇趕辦道素與用畫工趨造道素督正殿以外用督寢殿以內皆潦草塞責今年三月初三夜大風雨雷震寢



殿壓死宮女六人以後每遇風雨王同諸宮眷卽露立庭中蓋深恐覆壓之懼也事聞黃用司禮監拿問道素革職法司究問用獄未具道素在刑部先擬贖徒御史董羽宸上疏激上怒屢譴屢駁加等論死至是勾及之閣臣韓爌以爲請上曰朕若出落邸這就是榜樣高道素監造王府而使數百宮人死於非命卽寸斬之未足蔽辜又何請焉是日道素意必無他虞沉醉以往及行刑則已醒矣倉皇不能出一語但連呼如何如何而已人多冤之黃昏大雨雪

十月之朔上御殿頒歷忽有聲冤自刎于丹墀者究竟之乃民間詞訟事其人刎而不死上命刑部提問其事立案不行時先文肅語當事曰此怪兆也宜修邊逾月卽有遼警

毛文龍向爲遼東參將遼陽陷沒文龍逃至海濱適有難民數千人文龍以術籠絡之遂同航海至皮島蓋皮島居遼東朝鮮登萊之中稱孔道文龍斬荆棘具器用招集流民通行商賈南貨繒幣北貨參貂咸于文龍處輪稅掛號然後敢發不數年遂稱雄鎮又掠沿海陵丁或指建州奸細或稱臨陣斬獲以是積功官都督掛平遼總兵印逆賢時各邊出內奄鎮守文龍亦疏請內奄監其軍上卽位嚴核軍餉勅下山東撫按檄登萊兵備王廷試往廷試多欲人也旣飽其欲遂盛誦文龍忠勇可用士飽馬騰絕無破冒文龍亦憚上英明思有以自立乃通情於清願捐金三百萬易金復二衛地奏恢復功邀上賞



已成約矣袁崇煥督師出關上召問方略以五年爲期可以平遼及履任覘知文龍有成約急遣喇嘛僧入清啖以厚利欲解文龍議以就已而清最重盟誓堅持不可強之再四不聽喇嘛僧曰今惟有斬毛文龍耳在清不爲負約在我可以收功崇煥遂以閼武爲名直造皮島大閱軍士文龍置酒高會次日文龍進謁崇煥亦置酒留宴酒半稱有密旨卽座中擒文龍斬於轅門外時崇煥立營嚴整衆亦不敢犯文龍部下千餘人散往他處餘衆悉就撫事定然後入告朝廷亦姑容之時七月間事也先是崇煥出都閣臣錢龍錫叩以遼事答以當先從東江做起龍錫謂舍實地而問海道何也且毛帥亦未必可得力崇煥云可用則用之不可用則殺之至是疏中卽入錢語上以問龍錫龍錫謝實有之而文龍旣殺之後清來索賂崇煥無以應特疏請增三百萬謂五年之後全遼皆復并從前所加各項皆蠲除此一勞永逸之計也上集羣臣廷議皆執奏不可崇煥無所出遂聽清入犯由喜峯口黑蘭谷松棚路闌入直抵遵化時新令嚴汰冗兵被汰者陰謀爲亂清兵臨遵化城下薊撫王元雅尙汰兵四百人兵卽開門延師元雅死于亂軍清兵遂破三屯營薊鎮總兵朱國棟自縊山海總兵趙率教統兵赴援營於七家鎮嶺猝與清兵遇衆潰率教死之報至舉朝震恐上命薊遼總督劉策戴罪立功控扼石門以防西軼又命保定巡按解經傳同倉總督南居益駐守通州專護倉儲又命太監李鳳翔提督京營



與總協二臣料理城守又命兵部急徵宣大山西兵入衛

枚卜一案以烏程虞山故高閣不行至是蒲州乞休力請點用十一月初六上點大名成基命

成後避諱改名麟之

一員至歲底復點桐城何如寵又于會推外特點宜興周延儒及會稽錢象坤共四員

王在晉被譴後上召對羣臣陞工部右侍郎王洽爲兵部尙書洽山東人相貌極偉岸上私語云好似門神卜者周生聞之曰中樞之座不久矣以門神一年卽易故也至是清兵闖入十一月十一日上召對禮部右侍郎周延儒奏中樞備禦疎虞調度乖張旣不能預授方略拒敵于塞外又不能整頓兵馬殲敵于城中誰任中樞決裂如是簡計項煜繼之且引世廟康戊丁汝襲故事云斬一丁汝襲將士震悚虜聞風宵遁上遂下王洽于獄說者謂旣例丁汝襲必有爲楊守謙者矣

以左侍郎申用懋代王洽陞口北兵備梁廷棟爲順天巡撫起舊帥楊肇基爲薊鎮總兵起舊輔孫承宗於家督師通州

詔天下勤王

申甫者遊棍也始爲僧號本初游滇黔中得彼中役鬼之術小試輒驗庶吉士金聲薦之上召問頗惑其術特授爲副總兵捐內帑七十萬金聽其造車募兵之用授金聲爲御史監其軍時庶吉士劉之綸四



川人請纓甚銳上壯其志超授兵部右侍郎募兵剿敵 大同總兵滿桂番種也勇悍敢戰率兵五千入衛營于德勝門外敵騎以十一月初三破遵化十五至壩上二十日薄都城自敵衝突而西從城上望之如黑雲萬朵挾迅風而馳須臾已過滿桂身帶重傷血染征袍所存僅三千人 袁崇煥入援抵都城下上召對問行間方略賜御膳解上所御貂裘被之與祖大壽皆賜盛甲一副然崇煥雖名入援聽敵騎劫掠焚燒民舍不敢一矢相加遣城外戚畹中貴園亭莊舍爲敵騎蹂躪殆盡皆比而揭其罪狀入告民謠云投了袁崇煥東人跑一半兼崇煥出言無狀對百官訟言東人此來要做皇帝已卜某日登極矣戶部尙書畢自嚴至橋舌不能下舉朝皆疑之 閣部孫承宗雖奉旨督師通州而南居益解經傳皆不受調度時都城盛傳通州三河等處皆陷承宗遣人實奏至上喜曰通州固無恙乎卽奉旨督撫等官俱聽樞輔節制 時廷臣請纓者甚衆祭酒錫疇願任募兵可得二十萬人簡討項煜薦舉尙書李騰芳可當大任請面對者不一而足上傳各官俱於本衙實修職業諸臣俱廢然而退十二月初一日上復召崇煥祖大壽入上溫諭大壽而歷數崇煥之罪遂擒崇煥下詔獄閣臣力諫謂臨敵易將兵家所忌上曰勢已至此不得不然大壽出朝悍然竟率衆東行中朝無可如何劾閣部孫承宗撫諭之



初二日上以城守療草下工部尙書王鳳翔于獄營繕司郎中許觀吉都水司郎中周長應屯田司郎中朱長世俱廷杖八十臨時閣臣合詞祈請寬宥上曰目下與敵止隔一牆宗廟社稷都靠這堵牆若這牆一倒宗廟社稷都沒靠了豈不可重處時觀吉長應以年老長世以羸弱俱斃杖下玉音杖畢下獄與鳳翔俱擬贖徒 上既下袁崇煥于獄拔滿桂爲總理宣府總兵侯世祿昌平總兵黑雲龍等皆屬焉又起舊帥王威尤岱楊御蕃孫祖壽出罪帥馬世龍於獄俱以原官立功桂以十六日誓師而南十八日遇敵兵于良鄉時敵騎皆做官兵服飾桂以爲援兵不設備敵騎乘不意掩之全軍殲焉桂與尤岱孫祖壽皆死之敵騎亦飽掠得意二十三日旄頭盡望東而行都城始解嚴先是桂乞餉一萬金徧餽諸臺省每人五十金然後出師 申甫漫爲大言其所募兵皆乞丐子及優人三尺童子知其必敗亦以十六日誓師至盧溝橋猝與敵兵遇所造車旣不可用試術復不驗所統七千人跪而受刃猶幸而不爲郭京之續也金聲以在城中得免 劉之綸募兵近萬人尾敵兵而東適敵兵有零騎從後驟至之綸急營於丫髻山上敵兵立營山下絕其水道次日衆潰不能師之綸遂遇害 劉愛塔者遼人也莅孫閣部標下改名興祚自敵兵入犯從無敢與鬪者劉率勁卒千二百人夜搗其營殺敵兵千八百人奪回器械牛畜無算天明解赴閣部軍前令鐵騎追及于半途劉誓死鬪復殺數百人而後援不



繼力竭以死千二百騎殲焉孫閣部疏請立廟賜諡廷議不一遂不果

二十二日上召侍郎周延儒羅喻義李成名河道總督李若星御史饒京喻思恂趙延慶又召吳阿衡于獄中上面詢方略延儒但言願捐軀報國援兵事實非所長若星條奏頗迂緩阿衡議論頗有氣概二十六日特旨梁廷棟陞兵部尙書提督援兵吳阿衡著復原官軍前監紀巡關御史方大任陞順天巡撫大任老而且病然巡關時章奏皆有條理人亦冀其成功袁崇煥既逮御史高捷疏參錢龍錫卽指疏中與輔臣相商之話以爲同謀先是文肅勸錢辯疏當痛言一番明主可爲忠臣而錢不能從也引罪疏甫奉旨不復再辭隨卽入閣二十三日高捷再疏語更加厲得旨著致仕去至是而始悔不用前言則已晚矣

二十六日之夜刑部獄盡逸幾爲大幸東兵退盡外無接引耳目次日城門不啟爲擒囚也逮刑部尙書喬充升左侍郎胡世賞下錦衣衛獄先是邊警疊至士夫有潛遣家眷南歸者右侍郎朱世守以借輜與御史劉廷佐家眷出城劉止罰俸而朱降二級調用得免此禍上初政盡撤內閣東兵闖入乃命太監李鳳翔提督京營時總督襄城伯李守綺協理侍郎李邦華邦華素持正不爲下又以嚴汰老弱執法不少徇至是守綺煽惑軍心幾成鼓譟邦華引罪回籍以閔夢得代之或詢兩人優劣夢得曰鳳



翔中涓耳尙可耐惟守鎬則真凶惡無比守鎬於逆賢建祠時與靈壁侯湯國祚各疏捐貲附祠共祝者也 山西巡撫耿如杞率兵五千入援皆勁卒也至日兵部調守通州次日調守昌平又次日調守良鄉功令初到之日不準開糧次日列營汎地乃準開糧西兵連調三日皆不得糧旣飢且憤隨路劫掠東兵旣退如杞以不職軍士逮問如杞旣逮五千人哄然奔散潰歸山西而晉中流賊從此起矣甘肅巡撫梅之煥統兵入援兵以糧不時給脫巾鼓譟之煥查首數人正法有千餘人潰歸陝西後之煥亦以軍令不嚴革職爲民 時敵兵所至望風奔潰惟三河三攻其城不克寶坻亦受攻堅守得全三河知縣樊士英陝西舉人寶坻知縣史應聘河南人乙丑進士昌黎知縣左佩弦亦以却敵功超陞山海兵備僉事後以冒破軍餉遣戍 時紅夷貢砲至涿州敵騎充斥不能前進敵騎甫退馮銓躬率家丁護送入都冀以回聖心爲翻案言中外皆爲之地矣上傳旨馮銓准復冠帶不必陛見銓怏怏而去舉朝歎頌聖明真不可及云

三年庚午正月兵部尙書申用懋罷本兵與司禮文移往來向有定式神廟末年諸事叢脞舊式遂廢後來者亦不講究文移違式司禮拒不收則以厚賄徇申公蒞任重復舊式厚賄禁不用大璫皆不悅又時上銳意功業申公老成持重不能仰副聖意梁廷棟猥巧人也甚爲上所倚任初五日內旨申用懋



著解任回籍梁廷棟著回部管事 大學士韓爌罷爌忠厚拘謹不能當聖意左庶子丁進以陞轉新期遂出彈章工部主事李逢中中書原抱奇繼之爌三疏請告得旨允放其禮頗厚進與逢申皆爌己未所取士也進後奉旨以陰陽閃爍降調逢中隨以監督火藥失事下獄遣戍 吏部從無以五品調者二年八月以南司官陸康節稷給假同鄉共推轂無錫華允誠華亭相公獨推轂同邑王陞王興望未孚而華一寒徹骨退遜不前以此久無定局宜興入政府借江北司官解學夔降謫事遂票旨著破格推堪用的來看乃超調戶部郎中吳鳴虞以文選郎中管員外事真破格矣吳年耄矣無所短長踰年請告歸 敵騎既退廷議昌平陵寢所在通州國儲所寄應各設重臣鎮守於是推河南巡撫范景文太僕少卿侯恂俱以兵部右侍郎往恂督治昌平景文督治通州又遣兵部主事王建侯章應望各贊畫軍務

二月初十日册立太子上以戒嚴免陞殿百官聽宣勅于午門行十二拜禮賜三品以上及日講官各花朶紅一疋三品以下皆半紅花枝用角日講官紅全匹花枝用銀儀制署司事員外賀世壽敘勞陞光祿寺少卿尙書李騰芳加太子少保 方大任既放復有身雖去國心不忘君一疏先臣特上疏糾之略曰臣初見大任疏計必當以薊門要害將士情形與夫戰守防禦用兵治餉之策懋將死之誓言酬



破格之隆遇灑灑洋洋祇勦襲朋黨之唾餘復理東林之塵案卽今皇上起用東林諸臣其無才而不稱任使者則有之其懷奸而恣爲欺罔盜用朝權者未之有也近者諸臣之得罪或以封疆或以職守皇上未嘗有一毫成心一毫偏聽乃曰時時因事掃除夫離照當空八柄在手當去則去之當罪則罪之何必借事爲掃除之計哉此奸回術數奈何以誣聖主也王言綸綍炳若日星惟真惟澹曉然與天下昭揭之亦何不可而必欲但與密勿餘衡三五大臣私相告誡成一家之私言此又曖昧行徑不當入告明明之后矣況真澹二字大任亦僅言之已耳七品小官驟膺開府煌煌節鉞不用以經武而用以畫錦澹乎不澹乎佯死卸担何其憊也發憤揮毫抑何壯也反復如此真乎不真乎其所獻媚于三五大臣恐三五大臣之公忠者亦未肯任受也大任試衮影自盟斯亦不澹不真之極思矣疏入留中三月上命出刑部尙書喬允升左侍郎胡世賞于獄寓所聽勘先臣以去年四月入朝班秋講卽題充日講官同事者侍郎李孫宸少詹事何吾驥庶子丁進姚希孟而羅喻義以侍郎先臣以諭德則新題者往例春講以二月上御講筵是歲以邊事孔殷至三月初十日始開講先臣進講定公問君使臣章反覆規諷頗極剴切騰畢上傳講官暫留久之殿門皆閉諸講官退至東閣則聖諭已宣付閣中釋允升世賞于獄乃知諭留講官俾知卽見之行事也閣臣俱拱手誦啟沃之功先臣不敢當也以後進講大



璫窺聖意所注競前致殷勤焉先臣但一揖而已不交片言 一日上御講筵足加于櫺榜上意有情容先臣適進講尙書講至爲人上者奈何不敬因以目視御膝上卽以袍袖隱之徐徐放下 經筵開講詞林諸臣無不畢至講官二人一講論語一講尙書上與講官各自一桌資淺者充講書等官春講秋講止舉行一二次天廚頗費弗克給也日講則止用講官六人一講論語一講中庸一講尙書一講通鑑餘二人輪替上與講官共一桌真不啻天顏咫尺矣講之日上出御文華殿閣臣率講官行五拜三叩頭禮畢內侍舉桌安放訖上宣先生們來講官始入講畢上復宣先生們吃酒飯乃謝恩而退若遇齋祭之期則云茶飯春秋開講後日日進講除上傳免外毋或廢者傳免皆于隔日薄暮傳旨云明日暫停講讀一日雖或連輟十日半月皆日日傳免但云暫停一日也遇立春端陽中秋重陽冬至除夕日講官每人各內賜酒饌一盒大小五器湯餅二器酒二鉗聖壽元旦各內賜銀三十萬兩進講之夕光祿寺每人折供給銀一兩三錢傳免則否 吳江呂純如護送惠王之國其復命疏於護送太監劉興趙秉彝皆極揄揚褒美有云其愛地方也旣一草一木之恐傷而其自愛也又一薪一水之若沈仁聲遐布清節可師至歸美逆賢一則曰廠臣之選良材再則曰廠臣之率屬嚴云云此係天啟七年九月邸報抄傳四海共觀而鼎湖之泣純如適以待郎署中樞事密弄神通私行改換乘敵騎甫退之



後擬借邊才以翻逆案王永光等爲之與主純如遂首先上疏訟冤護送惠藩復命疏未嘗歸美廠臣不當列于逆案之內且引聖諭須有憑據不許借題之旨又謂紅本在御前別本在通政司抄案在禮部如有廠臣二字便甘附璫云云通政使章光岳卽爲封進時純如氣焰甚張言路俱暗先臣特出講筵已輟疏糾之略曰帝王之學與經生學士不同必以經術經世乃爲實用竊見敵騎內犯聖心焦勞綜數事功須挈綱領刑法雖峻猜疑漸啟于事未有濟也故於君使臣以禮章勸皇上培養士氣推心感人而辨賢奸酌用舍尤惓惓焉見命將出師莫有定算功罪未審賞罰未明今敵距遵永十有餘旬瞬息長夏又將秋高彼時時可來我著著無備勢如懸絲絕少成緒故於管仲器小章引管子言兵主不足畏則戰難勝也德必當其位功必當其祿信小人者失亡也見羣小合謀必欲借邊才以翻逆案故於子語魯太師樂章願皇上剖晰是非辨別邪正而曰一音雜衆音皆亂一小人進而衆君子皆廢今有平生無恥慘殺名賢之呂純如且籍輿援而必辨雪矣消長剝復之關甚可畏也又見吏部尙書王永光身爲六卿之長猶蒙皇上眷注而假竊威福擅行私臆故於甘誓章言戰勝攻取非獨左右之共命尤在大卿之得人而曰用舍不淆於倉卒則國是定而王靈暢威福不假於信任則神氣振而敵懷惕大抵皆爲用人之人發也又見王永光機深計巧投無不中故以年例大典而變亂祖制考選公典



而擴斥清才舉朝震畏莫敢訟言故於子五之歌章言識精明則環而伺者無所售其欺心純一則巧於中者無所投其隙臣故知皇上聰明天縱必能洞燭其情猶爲此語者則憂治危明之極思耳總之今日大小臣工當視國如家除兇雪恥不當分門別戶引類呼朋此臣一念孤忠九死不回者也奉旨文某講幄敷陳寓規時事知道了所指呂純如慘殺名賢藉援求雪及年例變制考選擴才等語還著據實奏明先臣再疏略曰臣所謂呂純如慘殺名賢蓋指故吏部員外郎周順昌也當純如爲福建守道日以諂媚稅監高案爲事比高案窘執閩撫激成民變純如與案攜手同步揚揚市塵萬口唾罵周順昌爲福建州推官剪除稅棍撫定人心純如忌之屢肆下石後純如投身逆璫躡取節鉞順昌訟言攻之語多過激純如遂挑怒巡撫毛一鷺復旨時走入京師與諸用事者構成李實之疏而順昌被逮且榜死獄中矣同時慘死諸臣所號爲徹骨之清及公忠亮直人人心服者以順昌爲第一其致死之由全出于純如此天下所共知今當先上疏求雪不但變天下之是非且搖皇上之斧鉞則恃有吏部尙書王永光爲之奧援也夫逆案之定其主持全稟宸斷而羣小營營窺闕以爲璇轉聖意易於反掌故首借邊才之說進而純如之疏卽繼之呼吸通靈投掇如響不然通政司固喉舌之寄也非大力者主之此何等事何等人而輒其亟以進哉至於臺省爲公論所自出凡會推年例等大關係事則吏部



不自主而必會同吏科河南道若近日所推年例吏科都給事陳良訓誰爲開送誰爲商計哉不過以其稍持公道每多參駁乃借外轉以除礙手耳至考選新資賢才輩出永光度無所施其籠絡乃獨斥一才名素著物望咸歸之陳士奇以示有權而十年冷署之潘有功亦以猜疑見棄迫人情洶洶衆議沸騰則始爲兩請而終擯之爲大臣而心術如此斯亦不忠之尤者矣王永光疏辯前者閣部定案進呈時臣被言註籍呂純如入案臣不及知何自援而出之至陳良訓濫廁首垣與參廷議人言嘖嘖夫豈無因至考選過堂十六人內選授科道十四人部屬二人而此二人者前途正遠因材儲用期待殊不薄也時永光已密結大璫王永祚爲之道地謂士奇出姚庶子之門姚與先臣渭陽誼考選時力爲把持既考後復聳成此疏于是聖意拂然永光得旨甚溫而先臣奏疏奉旨講官懷忠啟沃循職自可敷陳文某不得任情牽詆若夫逆案之堅持不動雖由聖斷而此疏亦不無小補矣

清兵雖東復破永平灤州盤踞不退永平鄉官白養粹首先迎降孫閣部督師東行奉撫諭祖大壽之旨令馬世龍衝重圍而東馳三日夜追至蘆峯口說以利害激以忠義衆皆聳聽大壽始率遼兵三萬世龍亦招集趙率教部下及舊時部曲共萬六千人合隧而西世龍獨薄敵壘而前死傷者千餘人始抵都城復躡清兵至薊門時洪橋大安等處清兵擄漢人運所掠輜重世龍偵知之密以大礮先伏于路



旁俟其過發礮衆皆驚走世龍追擊之殺獲百餘人遂以大捷聞祖大壽統兵三萬立木柵於山海西關不敢前進入援總兵尤世祿吳自勉楊麒宋偉王承恩等各率所部聯營于灤州之西相顧莫敢先發世龍既連洪橋大安之捷乃貽書大壽曰遼兵每謂西南兵將怯弱不若遼兵強健今怯弱者皆奮不顧身連兩地之捷而強健者何在況各鎮勒兵已鱗集若合謀兵力退敵共復故城遼之強健將士何顏復支朝廷厚餉乎大壽見書始移營而西孫閣部乃嚴檄諸將期共攻灤水申明軍令有警永平兵備張春者素得民心曾練有鄉勇二萬皆精銳可當一面逆璫時張春被劾罷歸鄉勇皆散及是上復起張春爲永平兵備永民間之皆不遠千里來迎向所練鄉勇皆來會軍聲大振四川副使劉可訓甫破水西酋率勝兵入援本兵梁廷棟又使其所善司務邱禾嘉監紀軍事奉旨趣師期者再高陽遂以五月四日誓師六日詣撫甯八日大壽先趨灤與大壽分地夾攻世龍麾兵人斫一柳頃刻平其濠世龍與張春劉可訓等皆披堅執銳作諸軍前茅身冒矢石誓不返顧急以大礮仰擊敵兵稍却師從間以登十三日克灤州敵兵冒雨突出而敵騎自永平趨救者知灤已破遂并遷安兵于永平屠其衆從冷口出所存者十之四五而已師既復永平而謝尙政等亦以十六日克遵化生擒獐獐木等二十二人及我叛人馬思恭賈維鏞呂及第等十一人獻俘闕下先是灤之叛將遣一老道士詣禾嘉請獻



城高陽授計大壽妙應之而言其後勁以備不虞及我師抵灤莫有應者最後中北伏兵幾盡人咸服高陽先見云大兵之入城也叛人白養粹已死其母尚在張春先至盡封所有而出絕無染指世龍則盡取其所有大壽至空無所得遂將白母用極刑乃盡出窖藏蓋幾百萬云永平糧儲陳此心鄉紳郭鞏俱以屈節被逮後刑部擬此心等以謀反律大理寺卿金世俊力爭之乃擬監候處決

當灤永之未復也高陽與東江牽制之議令茅元儀統龍武三協兵以往中協兵譁斥元儀而以周文郁爲中協副總兵兼攝左右兩協甫行而劉興治之變作興治者興祚弟興祚之者卽劉愛塔也興祚沒于陣興治居皮島東江副總兵陳繼盛諜報興祚未死其弟興賢自北營以書招興治興治畜有夷丁旦夕當有變興治大恨僞爲兄設醮誘殺繼盛等二十餘人揚帆至小平島適灤永克復之信至乃復返皮陽島高遣文郁以興祚舊恩招之文郁入興治營始以溫言喻之繼以危言悚之興治心動時部將逃匿雙島者與東師相鬪而興治怒令島衆繞舟號訴文郁呼其將語之曰陳繼盛流言島衆謀反今若殺我是實其言也島衆不足惜劉氏從此無噍類矣興治大悔悟明日飲餞文郁搏頸大哭而別九月興治敗東師于青山鳳凰城高陽奏捷并上文郁首功當國者惡其無所餽絀其功不敘高陽又請移興治于旅順責以恢復金復部議逡巡不果踰年興治爲島衆所殺



薊鎮總兵朱國棟自縊以舊總兵張世顯署鎮事與總督劉策率兵堵禦俱以逗遛不前被逮至是俱伏法先是河南巡撫缺陞太僕卿張潑往潑既領勅矣復上乞休一疏閣中票旨遽准其請山左諸公大譁以爲摧折東人太甚也適薊遼總督喻安性罷歸共推轂劉策不半年遂罹此禍

灤永既復廷議添設山永巡撫適方大任以病乞休王廷試梅之煥相繼罷斥乃陞四川副使劉可訓巡撫順天司務邱禾嘉巡撫山永前屯兵備孫元化巡撫登萊漢中兵備劉應遇巡撫甘肅皆孝廉也張春加太僕寺少卿候巡撫缺推用按邱禾嘉以九品務郎躡躡節鉞尤屬異數非中樞梁廷棟之力不至此似當以張春撫山永禾嘉陞永平道爲安

先臣旣以疏言不當聖意且永光輩側目甚切欲乞南京掌院以歸時大名爲李逢甲所劾在告宜興許爲題轉矣大名開籍出以爲此例轉不便乃題封差以行是秋賚節冊封進賢王及益府世子妃

烏程之參虞山也宜興實佐之宜興旣援立所以爲烏程地者甚力矣吳宗達宜興姻也于是特揭二人奏請上亦以烏程孤忠可任六月十一日特旨溫體仁吳宗達俱著以原官兼東閣大學士同首輔成基命入閣辦事

袁崇煥在詔獄尙未定罪至是獄具八月十七日上下袁崇煥著卽會官處決錢龍錫著革了職法司議



罪隨卽逮問其甫逮也人皆以高忠獻期之迨其至則辱國甚矣且牽扯同事兩輔嗷嗷不置又有導之傾陷蒲州以快其睚眦之忿者然聖意已定蓋其奏對語入于天聰不可援人以自解也然不如此株連起大獄則又共仰聖主離明之照已陸澄源疏參御史毛羽健爲崇煥黨亦革職下獄

崇煥旣決羣小合計欲借此以起大獄翻逆案御史田唯嘉疏薦楊維垣賈繼春通政使章光岳疏薦呂純如霍維華徐楊光傳樾虞廷陞葉天陞六人有旨逆案奉旨方新居然薦用成何政體而後羣小阻喪始不敢妄冀云

時上以封疆多故羣臣蒙比爲奸削謫逮繫辜不少貸河南府推官湯開遠上疏略曰皇上急于求治諸臣救過不給臨御以來明罰勅法自小臣以至大臣與衆推舉或自簡拔無論爲故爲誤俱褫奪配戍不少貸甚者下獄考訊幾於亂國用重典矣皇上或以薦舉不當疑其黨徇四岳不薦鯨乎績用弗成未嘗併四岳誅之也皇上又以執奏不移疑其藐抗漢文不從廷尉之請乎亦以張釋之曰法如是止耳不聞責其逆命也皇上以策勵望諸臣於是多戴罪夫不開以立功之路而僅戴罪戴罪無已時矣皇上以詳慎望諸臣于是有認罪夫不晰其認罪之心而概行免究認罪亦成故套矣侵糧欺餉之墨吏逮之宜也恐夷齊之侶不皆韓范宜稍寬之不以清吏詘能臣今諸臣恍于參罰之嚴一切加派帶



徵餘徵行無民矣民窮則易與爲亂皇上寬一分在民子卽寬一分在民生而尤望皇上宮府之際推諸臣以心進退之間與諸臣以禮錦衣禁獄非係寇賊奸宄不可入如是而大小臣工不圖報爲安壤者未之有也時左副都御史易應昌御史李長春皆以言事下獄長春幾至西市閣臣力救得免故開違疏及之

先文肅雖奉使出都而羣奸修怨未已呂純如辯疏甫至而錦衣張道濬隨疏參劾其氛甚惡奉有不必苛求之旨聖主明照固自萬里後先臣亦有疏辨略曰微臣立身粗有本末仕版初登卽觸權奸之烈焰謫居五載復撓羅織之兇鋒朝端公論難誣海內清評俱在夫昏夜黃緣望塵羅拜正狐媚蠅營之故態蓋純如嘗謂生祠之建不妨委蛇媚璫惡名所不必諱種種無恥之言昭著耳目有必不能抵賴者臣尙不欲盡揭之奈何反以相誣臣亦不屑與較至於敵騎臨城之日正臣闔門自誓之時臣子應試南都去在城守解嚴之後迫乎奉時辭都顧驛覓輶眷屬累累該門可查若曰君父恩輕妻孥念重此又小人肝胆中事臣死不爲也夫臣所深恨者逆璫之私客而必坐之曰背公臣所深憐者慘死之忠魂而必坐之曰死黨推其意仍欲窮鈎黨之流殃刈貞臣如草菅而後快于心恐光天霽朗宿霧澄清似不必續曉殘之夢噓衆溺之灰矣至若張道濬未諳文義謬析臣疏代人報復彼固欲陷臣以危



法而皇上已洞悉其隱情夫獬豸固能傷人而豺聲亦當自斃臣尙不屑與純如辨何屑與道濬辨第臣雖不才備員講幄純如何人哆口雌黃微臣何足惜其輕朝廷而羞當世之士亦已甚矣豈可復覲顏清班以負皇上之禮遇哉奉旨奏內事情公論自明文某依限前來供職不必陳情

去冬甘肅援兵鼓譟潰兵千餘逃回陝西二月王子順苗美勾連逃兵掠米脂清澗綏德遂南圍韓城總督楊鶴巡撫劉廣生提兵撲剿斬首千餘級賊北走復犯清澗官兵追逐之降三百餘人苗美叔苗登霧嘯聚於安定總兵杜文煥擊敗之四月王子順苗美自神木渡河陷蒲縣適山西逃兵亦至遂與合其勢頗熾子順自號橫天一字王苗美自號混天王王承允亦攻陷府谷渡河入山西犯吉州太平等處五月王子順等復歸陝西掠同官破金鎮關殺參將王廉六月王嘉允亦還陝西陷黃甫川清水二營遂據府谷延綏巡撫洪承疇總兵杜文煥擊敗之延安知府張輦參將艾穆感賊于延川賊求撫王子順張述聖姚三兒皆降王嘉允等分掠延慶等處多陷總兵總兵楊鶴主撫匿不以聞賊首黃虎一丈青小紅狼混江龍掠地虎等俱謀免死安插河西地方民罹毒益甚有司莫敢告八月王嘉允勾本虜入犯洪承疇杜文煥從孤山進擊破之十月嘉允復陷清水營殺游擊李顯宗甯夏總兵賀虎臣擊賊于盤谷斬首六百餘級又敗之甯州十一月山西總兵王國樑擊賊于河曲發礮礮炸衆亂賊乘之



大潰遂陷河曲十二月神一元作亂破甯塞殺參將陳三槐遂圍靖邊時又有高迎祥聚眾稱亂自號  
闖王米脂李自成入其黨號曰闖將



明季稗史彙編卷二終



明季稗史彙編卷三

烈皇小識

四年辛未正月外察姚庶子門人永城知縣賀鼎武進知縣岳凌霄皆被察凌霄於丁卯鄉闈中抗言以折張士範者本邑相公惡其強項遂以酷處鼎則以師門之故欲斷其考選之路也雖云肆毒者王永光而助紂爲虐者則考功郎中程國祥寶尸之

二月會試天下士命大學士周延儒何如寵爲考試官取中吳偉業等三百五十人

吏部尙書王永光罷給事中葛應斗疏糾御史袁宏勛錦衣張道濬通賄鬻權等事指宏勛得參將胡宗明銀三千兩以囑兵部尙書梁廷棟又得主事趙建極銀一千七百兩以囑吏部尙書王永光而廷棟隨上疏佐之并列道濬諸奸狀有旨俱革職提問先是舊樞王洽之逮也雖事屬封疆而召對之日宜興實開其端舊督劉策之又以失事服法東人摧折已甚東省諸公多不平烏程籠絡人爲事人多嘆其孤涎於是江西山東諸公俱以烏程勝宜興也一意以去宜興爲主時宏勛道濬日夜入長垣之幕實爲奸利道濬先旣參御史劉芳革職繼又助呂純如參先文肅毒焰甚烈而從中保護長垣因并護袁張者宜興也時長垣之伎倆窮而上之眷注已移鄢陵擬除去之而以己繼其席且却中樞之重擔



烏程亦擬藉此傾宜興而自居首揆故乘宜興入闈日發之烏程卽票嚴旨以進給事中吳執御浙人也而合于東疏論王永光誨貪崇墨不可以表率羣僚永光再疏請告回籍

三月廷試策士賜陳于泰吳偉業夏曰瑚等進士及第出身有差

大學士錢象坤兵部尙書梁廷棟罷宜興之出闈也不能急收後著與此輩香火之情甚篤行人司副水佳允悍然操戈直攻鄢陵顯爲袁張報復水疏入分會稽票擬會稽鄢陵房師也宜興直從會稽手拉去頗左袒佳允佳允再疏則發鄢陵私人沈敏與薊撫劉可訓往來諸奸狀據有手書盈握且有暮夜之迹鄢陵幾不免禍幸中涓左右之乃得旨閑住會稽與可訓俱株連而去可訓奉旨削去撫職銜以

#### 四川副使致仕

四月京師大旱皇上夢禱步禱百官俱齋宿本宿衙門而最冷淡之詹事府經年不一到者掌詹協理等官可二十餘員皆羣居其中亦一奇也

五月上爲雪禱不應遂釋張鳳祥易應昌李長春於獄始閣臣以雲間舊輔爲請聖意斷斷不可繼而俯從廷臣之請慨然出之圖扉真可謂堯仁如天矣

時羣小側目姚公希孟甚去秋姚與姚明恭主試北闈搜索無所得乃借武生冒籍一事給事中王猷上



疏參之猷宏勛門人也理應嚴查實籍與否與衡文者無預宜興乃票旨覆試金允治以文理粗疎罰停會試三科高岱以不能完篇褫革正副主考俱下部議處

廷推閣臣宜興以護持長垣故至于助水佳允而逐會稽鄢陵人心愈憤會稽鄢陵雖去俱不能忘情于宜興而其勢焰猶足以使人適會試廷試兩元一以文一以行俱大不協于衆口廷元尤爲公論所不許給事中吳執御一疏再疏竟借兩元爲題然在偉業不過雲迷五色在于泰則實受其萬金之餽而于泰亦疏參執御揭其有無不可知之事欲傾人以自救而適以動天下之兵則宜興之至巧而實自拙也嗣繼執御以救攻宜興者不下十餘疏上概行留中聖心已不能無動宜興因其留中也付之不聞不見入直票擬如故則爲從來閣臣之變局旣而揭請廣閣員俞旨隨下且准廷臣會推似悟特簡之爲非者聖意蓋可知矣

自虜騎入犯後上復命內閣提督京營自是銜憲四出命太監王坤往宣府劉文宗往大同劉允中往山西各監視兵餉又命太監張國元往薊鎮東協王之心協邵希韶西協各監軍又命太監李茂奇監視陝西茶馬又命太監張彝憲總理戶工二部錢糧

從來文場有會試廷試有傳臚武則否十月復當武會試有董某者以勇力聞達入帝聽時主武試者庶



子楊世芳中允劉必達某以策不中程被格上謂諸臣故拂聖意也兩主考及兩監試俱下獄閣臣揭  
救反奉嚴旨重令會試另點諭方逢年中允倪元璐主試事董某中式復劾廷試傳臚禮一如文場董  
遂賜武狀元及第選昌平遊擊次年邊警陣亡

是夜虜騎圍錦州恣掠三日隳大陵雙堡而去高陽於是倡城右屯大陵以圖進取之議本兵梁廷棟主  
之上從部議命祖大壽率馬步兵四千領其事以班軍一萬四千供版築護以石砦兵一萬改巨嘉禾  
巡撫甯錦親往相度高陽欲先城大陵嘉禾不從廷棟去中朝盡反其所建置謂屯陵荒遠不當築令  
撤班軍赴薊時尙存糧萬石高陽欲運糧散軍委空城而去嘉禾又不從八月虜騎進圍陵城祖大壽  
與副總兵何可綱固守巨嘉禾率監軍張春總兵宋偉吳襄來援嘉禾怛悸屢易師期宋偉主進吳襄  
不可兩不相下高陽至錦剋期進兵襄曰日者言大壽命宮難星將出少待之越八日始進遇虜兵于  
長山襄營主近水偉主近草議未定而虜兵前驅至偉營柵甚固虜兵連攻不能入移攻襄營襄衆亂  
不能軍遂潰偉力戰至晡亦潰張春陷而錦人高應元陳二韓五從北營拔歸願自效其奇知四王之  
營於白雲山乞以通夷語者百人裹火藥入營乘不意縱火向王子帳而刺之卽不成入營皆擾亂可  
走也大壽之弟大弼敢死戰喜結客戰于錦州四王子免胄掠陣大弼突出搏之刃幾中馬腹虜號曰



祖二風子四王子嚙指稱之三人在北營知大弼名樂從之高陽以三人屬大弼結爲兄弟夜三鼓三人爲導大弼率死士百二十人斫四王子營火藥發烟焰蔽帳前四王子跳而免八營皆大亂相蹂殺既辨色我兵僞爲胡語混虜兵而出先一日陵城食盡虜兵招降甚急何可綱爲文自祭而死大壽降于清四王子勞來甚至賁酒食鞍馬約下錦州大壽養子逸出清兵乃復毀大陵城引去而中朝喧言長山之敗喪失師徒輕重無算皆以開釁咎高陽坐以矯旨復城詔官帶閑住削甯錦敘功世廕張春既陷其妻翟氏六日不食自縊死而春通書求款廟堂計無復之乃授張春副都御史黑雲龍帶都督奉以羈縻之後嘉禾與大壽相訐大壽抗章抉擿其貪穢高陽力止之而聞之中朝遷嘉禾南京太僕卿以去

日講官羅喻義進講尙書先期草講章送閣內有傷執政語烏程裁其半喻義執不可直至中堂動色而爭體仁遂出疏參之言舊例惟經筵多進規語日講則正講多進規少今喻義以日講而用經筵之例駁改不聽自愧不能表率後進有旨喻義閑住此真詞林怪事究竟所指之例不知出何典故也

少詹事姚公希孟在講筵爲上所識每講畢歸班上未嘗不目送也衆咸謂大拜可期時適有枚卜之旨宜興所以阻攔後輩者不遺餘力當會推時衆共推轂姚冢宰閔洪學語人曰首揆不欲衆復面懇宜



興宜興急相引重衆再詣冢宰冢宰堅以首揆爲辭衆乃促總憲陳于延同冢宰往見宜興令門役兩次延見先冢宰而後總憲冢宰出語人曰首揆終不欲也最後烏程顯然排擠謂姚科場有話講部覆未上豈可預推少詹公乃急喻同人止弗復言若不見幾則虞山之故轍必復見于當日矣御史遲大成特上資淺望重一疏本爲少詹公及姜曰廣而發奉有再奏之旨少詹公力挽之乃指先文肅之家居者以對其併及陳諭德仁錫則遲有戒心焉借陳以免于詰責也宜興以是有歉於心歲終置講筵諸臣不敘而單疏特題少詹公陞正詹以謝過云

時當考選開封推官張瑤杞縣知縣宋致皆萊陽人也宋致考選得給事中張瑤得同知瑤大不平因發致賄營情狀列疏上聞吏科都給事中宋鳴梧特出悍吏劣考猶輕疏參瑤乞加重處有旨張瑤降四

級調用後瑤補河州判官流賊破河州瑤殉難卹贈光祿寺丞蔭一子入監

時致與鳴梧通譜推轂甚力瑤頗薄之且不向鳴梧

父子投誠鳴梧等大怒劣轉同知

是年正月流賊神一元陷保安副將張應昌擊敗之一元死弟神一魁領其衆二月總兵賀虎臣杜文煥合軍圍保安神一魁突圍出都指揮王英不能禦諸道兵皆潰一魁遂攻慶陽破東關遊擊伍維藩擊斬五百餘人時總督楊鶴駐邠州不卽援而宜君賊趙和尚等復南犯涇三陽原韓城澄城等處三月



張應昌等援慶陽賊圍解時議招撫神一魁等癸未賊首孫繼業茹成名六十餘人來降總督楊鶴受之設御座於固原城樓上賊叩首呼萬歲因宣聖諭令設誓各解散歸原籍自是羣賊視總督如兒戲矣四月神一魁降於楊鶴鶴侈其事上言請數萬金賑濟其脅從飢民各給牒回籍而餘賊劉五可等據鐵角城混天飛獨行狼等據蘆保嶺分犯平固耀涇等處混天猴分犯甯環王虎圍莊浪不沾泥攻米脂總兵王承恩侯拱極率兵至葭州洪承疇張應昌亦至賊分兩營以待官兵憤擊大破之不沾泥逃奔關山嶺副將馬科等追之盡殲其衆不沾泥手殺賊首雙翅虎縛獻紫金龍以自贖五月王承恩擊宜川賊敗之賊首闡王虎金翅鵬降金翅鵬卽王子順姪王成功也餘賊走宜君參將曹變蛟逐甯塞賊於唐毛山四戰皆捷先後斬一千四百餘級賊大潰延安賊趙四兒掠韓城郃陽參將張全昌擊斬三百餘級賊走鄜州復進擊斬六百餘級是月滿天星降於楊鶴曹文詔攻河曲賊克之斬賊千五百餘級六月擊王嘉允於陽城斬之其黨又推王自用爲首號曰紫金梁其黨皆自相名目除混天猴張孟金不沾泥張存孟外張獻忠號八大王趙四兒號點燈子張有義號一盞燈王之臣號豹王羅汝才號曹操高嘉計號險道神張大受號滿天星劉國能號飛來虎常國安號托天王賀一龍號革禮眼李萬慶號射塌天惠登相號過天星張一川號埽地王楊旭號一隻虎馬守應號老回回張胖子號整



齊王伍林號一桿鎗王光恩號小秦王楊光甫號一連鷹劉正國號關索其他蝎子虎翻山鷄等名類甚多 鄜州混天猴謀襲定邊張應昌邀之於真水川敗之追斬四百餘級洪承疇又敗之甘泉山中王承恩曹文詔等擊諸賊於太平原等處連敗之延慶之間稍息肩焉

癸未以神一魁等復叛逮楊鶴下獄以洪承疇總督全陝軍務點燈子東渡至山西入沁水攻寶莊寶莊故張公銓里居也聚衆拒守矢石並發賊傷甚衆乃退復陷隰州蒲縣總督魏雲中削職聽勘以張宗衡代之以宋統殷巡撫山西

八月王承恩擊斬中部賊七百餘級賀虎臣擊斬慶陽賊劉六殺其餘黨六百餘人 神一魁劫守將吳弘器官兵圍之其黨黃友才斬一魁以降 獨頭狼滿天星一丈青上天猴等沿劫同郃等處副總兵趙大允在韓城去賊營二十里不敢邀擊士紳強之出報斬五十級驗之則皆婦女首也給事中魏呈潤劾之有旨提問洪承疇擊點燈子擒之伏誅其黨黑煞神鑽天哨等皆起黃友才亦叛洪承疇陞任延綏巡撫缺時御史吳牲奉旨賚銀十萬賑濟陝西饑民兼行招撫部推牲爲正布政陳奇瑜陪上用

奇瑜

十一月陝西賊譚雄陷安塞王承恩誘雄等五人斬之復安塞不沾泥等陷安定王承恩進攻安定賊走



綏德混天猴陷甘泉劫餉銀十萬八千兩殺知縣郭允圖河西兵備張允登陣亡洪承疇遣王承恩進剿而自率六百人趨鄜州十二月甘泉賊陷宜君又陷葭州兵備郭景嵩死之於是諸降盜皆叛承疇日不暇給矣 山西賊陷掠聞喜河津等處孫顯祖討之與賊大戰皆捷

五年壬申正月孔有德等據登州以叛先是孫元化以前屯兵備超陞登撫隨帶遼丁三千人駐防登州遼丁貪淫强悍登人不能堪適是冬有大凌河之警孫令孔有德等率遼丁往援卽於原籍著伍亦兩全之術也行至吳橋後隊尙滯新城奪取王氏莊僕一雞王氏大族勢凌東省隨稟領兵官必欲正法領兵官不得已查奪雞者穿箭遊營衆乃大譁遂殺守莊僕王氏申詳撫按必欲查首亂者戮以徇衆遼丁急至吳橋邀前隊改轅而南時統兵者左步營參將孔有德右步營都指揮陳有時東江副總兵毛承祿登州參將李允成也遼丁三千人皆插血立誓若不雪此恥而北行者衆共殺之遂擁孔有德以叛盡滅王象乾家王象春等皆易服前竄抄劫新城一空越臨清德州取間道而東過青州知府汪喬年餽酒牛犒師令無相犯遼兵果結隊而過距登數十里於馬塘店扎營曰爲王氏所逼非敢反也元化令旗鼓遊擊耿仲明傳諭扎營城外教場候撫教場故有三千營房援遼將卒家屬居焉令欲移入城出房以舍步兵城中堅拒不納有德說仲明亦反尙有遼人在城中者紳民必欲搜戮之遂遼人



開門納師登城陷時正月初三日也

呂純如復有疏參論多人通政章光岳送還之至是復上疏止於自辯不及他人御史吳彥芳駁之上遂留純如疏不發彥芳者憤憤人也去秋曾有一疏爲宜興解嘲公論譁然有教之懺悔者故出此疏疏亦不爲無功後復有疏薦李瑾李邦華而給事中吳執御亦疏薦黃克纘劉宗周上責其朋比俱下獄說者謂執御之處顯然修廷元之怨而彥芳則前疏之故也

上點禮部尙書徐光啟鄭以偉入閣辦事登城之變孫元化自刎不死孔有德等欲奉以爲主亦不可東省之人以其不死也遂以朱泚目之言路欲借以傾宜興宜興與元化同舉於鄉最相暱也時調總兵王洪楊禦蕃往剿相持不敢進于是轉而爲主撫之說而舊歲枚卜事一推再推未奉俞旨於是宜興烏程各欲樹其同志以爲薪傳之計而宜興所急欲引進者巴縣次則上海烏程亦注意巴縣故宜興素所暱愛而上海者則宜興因言路借登撫以攻之頗有危機上海與登撫師生莫逆此老迂慙勇於任事而不顧利害日夜爲主撫之說以祈紓登撫之死故宜興欲借之自助且卸前擔至是具揭以兩人爲請上乃點用上海徐光啟及上饒鄭以偉而首推竟不用先是首推投誠烏程以求必濟乃奉旨另推者再終於聖意未愜林下某公意有推必蒙點用遂飛書長安極相推許書中復縱論某正某邪



某可推戴某可聯絡某可擯棄書中全注毒宜興而不及烏程又郵致錦衣吳孟明吳首推姻家也復落中書周大成之手都下鬩然旣而首推遂不用其不用之故皆以爲此書旣露政府從而危之首推之恨不可言若上饒蓋以恬靜得之則天也

首推爲姜逢元

登州旣陷山東巡撫余大成革職逮問以徐從治爲山東巡撫謝璉爲登萊巡撫又令兵部主事張國臣往諭解散一面議撫一面進兵孔有德等因統兵直薄萊州城下謝璉等復申撫議有德等必欲邀登撫至彼營中方肯受撫璉不得已同萊州知府朱萬年撫其營俱被拘留於是復主剿烏程特出疏力攻主撫者時總兵劉國柱王洪鄧玘統兵二萬由沙河西路以進副總兵吳安邦徐樹聲統兵二萬由入角東路以進天津參將孫應龍統水兵三千抵廟島斷其入海之路旣而三路皆敗樹聲應龍被擒東撫徐從治爲砲所擊死於是復令萊州推官屈宜陽入營議撫撫亦卒不就更調榆林薊昌各邊兵統以總營楊禦蕃陞金華朱大典爲山東巡撫拒堵於萊州元化龍航海至天津自投刑部以封疆律正法有德等禱於海城小聖廟抗本朝與投清孰吉卜得投清隨得順風出海歸遼登人隨毀小聖廟吏部尙書閔洪學罷長垣旣去閔洪學爲吏部尙書亦烏程人也每事收人心以歸溫有過則皆諉之宜興而宜興不覺也登撫之變烏程顯出疏攻出撫者以陰傾宜興宜興危甚又洪學蒞任惟奉行烏程



意旨於宜興不甚照管左侍郎張捷至不能進參一語斯時操整孤者不在宜興而在烏程一時捷足者競走烏程宜興之黨皆怨閔冢矣於是張捷與太僕少卿賀世壽投誠諸君子謂言路若能攻閔冢而去之者烏程之去宜興力任之有餘時給事中王績燦御史劉令譽周堪賡先後疏參閔冢兵部員外華允誠疏尤切允誠疏略曰當今時勢有三大可惜四大可憂夫以皇上聖德加之勵精何難總握大權坐躋郅治乃當事者借皇上剛嚴而佐以舞文擊斷之術借皇上綜核而騁其訟逋握算之能遂使和恆之世競尙刑名皇上圖治之聖心爲諸臣鬪治之捷徑可惜一師屬大僚驚魂於回奏認罪封駁重臣奔命於接本守科直指風裁徒徵事件長吏考課惟聞錢糧以多士端靖共之精神爲案牘鈎較之能事可惜二今何時乎非大小臣工同舟遇風之時乎廟堂不以人心爲憂政本不以人才爲重意識互崎議論滋繁遂使詭剿詭撫等於築舍忽用忽舍有似舉碁以興邦啟聖之日時爲卽聾從昧之舉動可惜三夫人主所以尊於天下者法也喪師誤國之王化貞何以與楊錫異辟潔己愛民之余大成何至與孫元化並逮甚而一字偶誤一言偶失執訊隨之刑罰不中鈇鉞倒置一可憂也國家所以爲元氣者公論也今直言敢諫之士一鳴立斥指佞薦賢之章非奸卽黨不惟不用其言并錮其人又加之罪讒奸得志忠黨屈抑二可憂也國家所賴以防維者廉恥也近者中使四出大臣懼不諫阻



小臣又安敢抵觸與之抗衡者僅二三人耳其餘奔走之輩惟恐後時諂曲趨承猶宜獲戾皇上以爲近臣可任而不知倖竇已開以爲內任可惟吾操縱而不知其屈辱士大夫已如此矣三可憂也國家所藉以進賢退不肖者銓衡也我朝罷設丞相用人之職吏部掌之閣臣不得侵焉今次輔與冢臣同邑爲朋比惟異己之驅除閣臣兼操吏部之權吏部惟阿閣臣之意造門請命夜以爲常統鈞大臣甘作承行之吏加膝墜淵惟其所欲黜陟大柄祇供報復之私甚至庇同鄉則逆黨可公然保舉而白簡翻爲罪案排正類則講官可借題逼逐而薦剡遂作爰書皇上惡諸臣之欺欺莫欺於此也皇上怒諸臣之專專莫專於此也皇上疑諸臣之黨黨莫黨於此也威福下移正氣消磨四可憂也疏入與令譽等皆奉嚴旨而續燦尋以他事革職時關外議論衆歎謂張春失節不死反加副都御史何以報袁崇煥於地下黑雲龍翰誠通款反都督府帶俸何以謝郭鞏陳此心於獄中故疏內復及楊王一案閔冢果不安其位連疏請告以去閔冢既去張捷輩意足志滿宜興復飲烏程狂藥謂死生決不相負於是盡反前言於同志舉動不復照管矣張捷者與僕少公慮烏程知其謀而修郤也轉而入烏程之幕盡以始末告之且謂華疏出詹事姚公手故烏程恨詹事與總憲最深北闡冒籍事部覆旣上烏程密揭入大內以挑聖怒至尊初念頗佳忽然中變遂奉旨姚希孟著降二級調用總憲後以考核御史畢佐



周事有旨畢佐周著降三級調用陳于廷著革職爲民

詹事公之處也宜興實知之而不救旨下之日宜興休沐不出檢討徐洊庶吉士張溥適在坐宜興見旨頓足曰惜我出直朝端又去一正人矣然而人之視己如見其肺肝矣

御史史堃爲長垣私人北方悍將也時以巡按淮陽回道考核淮陽素稱鹽地前按曹暹未及半年贓罰已積十七萬有奇猝當例轉百計僅支二萬金歸餘俱留貯庫繼任者爲史堃盡掩取之史堃又署巡鹽事欺匿鹽課二十一萬考核時噴有煩者總憲長子陳貞裕屢次干謁婪有數千金堃執其手書相挾總憲懼乃考核稱職回道管事爾時爲總憲者正當臚列史堃奸貪諸狀奏請提問追贓如高宗憲於崔呈秀故事並首其子干謁說情罪狀而自束身待罪聖明必深加矜亮不特可稱埋輪破柱之職而一番舉動自足令人心振聳乃畏首畏尾坐失事機終爲當軸擠去良可歎也爲大臣者當於此處著眼

工部右侍郎高宏圖疏略曰臣部有公署中則尙書旁列侍郎禮也內臣張彝憲奉總理二部之命儼臨其上不亦辱朝廷而褻國體乎臣今日之爲侍郎二尙書非二內臣國家大體臣固不容不慎故僅延之川堂相賓主而公座毋甯以之且總理公署奉命別建則在臣部者宜還之臣部豈不名正言順而



內外平乎上以軍興餉事急緊彛憲應到部驗核不聽宏圖遂引疾求去疏七上上怒其悻悻無人臣禮竟削籍

南京禮部主事周鏞疏略曰內臣用易而去難此從來之通患然不能遽去猶冀有以裁抑之今張彛憲用而高宏圖之骨鯁不可容矣金鉉之事雖幸免罪以他事中之矣王坤用而魏呈潤以救胡良機處也趙東曦以直糾扶同處矣鄧希詔用而曹文衡以互訐投閒矣王宏祖以禮數愈緩斥矣若夫孫肇興之激直李日輔熊開元之慷慨無不罷去未易屈指尤可歎者每讀邸報半屬內侍之溫綸從此以後草菅臣子委棄天言祇徇中貴之心將不知所終矣上怒其切直削籍爲民禮部員外袁繼咸疏救不聽

是年正月延綏賊僞爲米商入宜君陷之復陷保安合水而甯塞餘賊復合環慶諸賊屯鎮原之蒲河欲犯平涼及鳳翔漢中巡撫練國事檄固原兵備王振奇同副總兵王性善等截守各隘口檄平涼兵備徐如翰同副總兵董志義守涇州各要害又檄總兵楊嘉謨等緝捕奸細獲賊唐馬殺之斷其耳目賊遂不敢出適洪承疇從鄜州問道疾至慶陽曹文詔以臨洮兵至賀虎臣兵亦至齊集于西澳夾擊之與賊大小十餘戰斬首千餘級追奔數十里傷墮者無算而甯塞之賊盡矣惟渾天猴等尙據襄樂練



國事遂移鎮甯州時以西澳之捷爲從來用兵第一而延西諸賊郝臨菴可天飛屢爲官軍所敗獨行狼復入其伍據鐵角城耕牧其中爲持久計洪承疇曹文詔進擊之斬可天飛其二賊亦生擒伏誅自西澳捷後軍聲大振文詔忠勇善戰承疇與下同甘苦得士卒心轉戰四載斬級三萬餘西人稍稍休息然亦憊甚矣

三月甯塞餘賊夜襲鄜州兵備郭應響死之關西餘賊亦攻陷華亭知縣徐兆麟甫任七日城陷逮問服法人皆以爲冤

八月山西巡撫宋統殷擊賊於長子賊奔沁水賊首紫金梁老回回八金剛圍寶莊張道濬率其族禦之賊多死且聞秦兵至甚懼紫金梁老回回皆乞撫惟張獻忠塌闖天不受命紫金梁歸款未決官軍乘賊不備輕騎襲其營賊遂南奔犯齊源陷溫陽

九月山西賊豹五等破臨縣據之滾地狼等南犯陷修武殺知縣劉鳳翔焚掠武涉遂圍懷慶上以藩封重也切責河南巡撫宋統殷冀南兵備王肇生帥兵次陵川扼賊歸路賊北歸遇官軍殊死鬪互有勝負會夜與賊爭險對營兩山頭賊緣谷潛登大譁官軍亂統殷肇生皆走與諸軍相失宣大總督張宗衡提兵至高平統殷肇生以兵來會大破賊于桑子鎮賊復入沁水



十月山西巡撫宋統殷以陵川失律回籍聽勘以許鼎臣代之

十二月張宗衡許鼎臣同逐臨縣賊賊入磬磨山山方六百餘里賊首獨頭虎搖天動據交城文水北窺太原邢滿川上天飛據吳城東向汾州紫金梁亂世王屯紅梯關吾兒峪遂乘虛從沁州北掠榆次及壽楊距太原止六十里許鼎臣撤兵北歸時亂世王與紫金梁爭一掠婦構小隙遣其弟混天王來投誠廷議方主進剿諸將諱言受降權辭謝之約得紫金梁頭方爲請于朝混天王唯唯而去諸賊遂分爲三陷霍州垣曲長子等處壬辰陷遼州是日除夕也

六年癸酉三月給事中陳贊化疏劾周延儒招權納賄游客李元功借勢威人又云延儒嘗語去輔李標曰上先允於放余封還原疏上卽改留頗有回天之力今上義皇人也此係何語豈徒小人之輕泄乎至指借停刑以圖賄利此固通國所共知也且引科臣李世祺爲證世祺亦奏延儒曾有此言給事中朱文煥復疏參延儒重負國恩毫無補救宣府太監王坤亦疏攻延儒左副都御史王志道疏爭王坤不宜侵輔臣語頗過激上召廷臣于平臺諭志道曰遣用內臣原非得已朕諭甚明爾等不自省察徒事執王坤之疏朕已責其誣妄乃羣臣舉劾無不牽引內臣豈處分各官皆爲內臣耶志道對曰王坤疏劾輔臣舉朝煌煌皆爲紀綱法度之憂臣爲紀綱法度惜非爲諸臣地也上曰廷臣於國家大計不



聞一言惟用內臣在鎮不利奸弊乃借王坤疏要挾朝廷誠巧佞也詰責志道者再三延儒奏志道非專論內臣實責臣等溺職上曰職業不修沽名立論何堪風憲之任志道退卽引罪乞罷時烏程同召竟無一言相助宜興亦以是憾之

宣府巡撫馬士英甫蒞任冒侵餉銀六千兩鎮守太監王坤疏發其事士英逮問遣戍舊例巡撫到任修候都門要津徧以厚賄倉卒不能猝辦則撮庫中正額錢糧應用而徐圖償補此相沿陋習各省各邊皆然不獨一宣府也士英蒞任未幾一時不及抵償遂爲王坤所糾坤旣以發奸爲功上亦心喜內臣之果能絕情面而剔積弊也故凡言內臣者皆不聽

六月大學士周延儒罷陳贊化復疏參宜興宜興循例請罷第三疏擬邀俞旨卽出烏程心圖首輔巧用機權准予休告旨下出其不意宜興殊不能堪乃謀於內召桐城舊輔以壓之宜興在政府每借力於內以示其威權其語人也輒以喜怒不測歸之聖意而實閣中之權盡歸于中涓矣是閣體之壞自宜興始也而其罪之大者在不能沮內閣之出鎮幾與崑山等惟烏程能踵其智他輔皆不能及

上饒上海相繼告殂閣臣復請枚卜上點用嘉善錢士升士升雖浙人與諸君子頗相周旋唐世濟力言於烏程當急收之無爲彼中所用遂有南京禮部侍郎入正揆席宜興旣去又點用巴縣王應熊香山



何吾騶亦以投誠烏程得之巴縣則宜興所注意而烏程援以自助者也給事中章正宸疏言爰立命下吾騶人無間言應熊則競以奸邪目之應聽休致有旨革職提問正宸方以館選外授也王承恩敗安塞賊于西川胡堡賊自喬六斬其魁以降餘衆悉遁自是秦中稍甯而晉豫之間多暴骨矣

正月副總兵左良玉提兵援懷慶敗賊于涉縣西斬其渠既而擊林縣賊敗績于武安磨下兵七千先後  
死亡殆盡乃請鄧玘兵相援賊遂掠真大井陘兵備道檄守將李定王國璽禦之竊賊伏中賊遂長驅  
而東大名兵備盧象昇禦之曹文詔連敗賊于忻代間斬首千五百級又敗賊于榆社時文詔屢捷  
張應昌逗遛不進紫金梁老獬回從榆社北奔

三月山西兵擊賊于陽城北張道濬設伏於三纏凹賊至伏起擊之斬其渠滿天星賊大奔巡撫許鼎臣  
奏道濬功第一

五月曹文詔夜襲賊于偏店賊驚走墜山谷者無算諸將會兵逐之賊盡南走總兵鄧玘帥兵三千同石  
柱土司馬鳳儀馳援河南未幾鳳儀敗沒

六月川兵潰于林縣潞王告急上念中州流寇蔓延命總兵倪寵王樸分將京營兵賜二將弓矢戰馬命  
太監楊進朝盧九德馳赴南河夾剿上以剿賊諸將一時功罪勤惰應有監紀特命太監陳大金閩



思印謝文舉孫茂霖分監曹文詔張應昌左良玉鄧玘軍仍發內帑銀四萬兩紅素蟒緞四百匹紅素紵緞二千匹軍前給賞

七月張應昌進剿汾州諸賊內監紀需索百倍汾陽知縣費申鑣以供應不能給投井死左良玉破賊于懷慶賊奔太行山山西賊陷永和復陷沁水自秦入晉五犯沁水至是始破

八月陝西賊復起攻隆德殺知縣費彥芳固原兵備陸夢龍進剿於綏德城下死之賊流入真定者殺

掠甯晉南宮甚慘

九月張應昌敗賊於平山獲賊首張有義卽一盞燈也賊遂走五臺山據顯通寺其中薪儲皆具阻險自守官軍不敢擊

十月山西河北諸賊二十四營乘冰渡河而南犯閭鄉陷澗池

十二月己未河南賊陷伊陽庚申陷盧氏徧掠汝州浙川內鄉戊寅犯南陽遂流入湖廣掠均州光化庚辰賊假稱進香陷鄭西癸未陷上津鄭陽撫治蔣允儀河南巡撫曾倜皆被逮按鄭陽不過一聚村

耳以其介川陝河南三省之交山川綿亘盜賊易于盤踞故設重臣建牙以鎮撫之又以撫綏流民故易巡撫爲撫治奉憲孝二宗勅旨撫治管轄地三省巡撫不得干預萬厯初年覈餉猶有一萬六



千之額王公世貞在事以六千改充邊餉以四千發荆商兩道募標兵而數止六千矣中軍有官無俸令食缺官俸後以搜刮故闕餉俱解太倉旗鼓官日廩二錢取之餉銀而餉又不時給標兵三百歲糧十兩有奇皆各縣有身家者買頂首以免門戶而覓人充當又義勇二百歲糧六兩且餉口不足而南下之賊動稱數十萬將何所施其堵禦說者謂但易鄖鎮之官而不爲鄖鎮計長久重事權而增兵餉雖武侯復生終無濟也

延綏賊鑽天哨開山斧獨據永甯關前阻山險下臨黃河負固數年不下巡撫陳奇瑜簡銳卒八千人出不意疾走入山賊不虞大兵至潰走縱擊斬首一千六百級二賊死遂焚其巢復擊賊首一座城斬之河西盜悉平

七年甲戌正月山西提學僉事袁繼咸疏略曰士有廉恥然後有風俗有氣節然後有事功如總理戶工太監張彝憲有請令入覲官員投冊以隆體統之奏皇上從之意在釐奸剔弊非欲羣臣屈膝也乃上命一出靡然從風藩臬守令參謁屏息得免呵責爲幸嗟乎一人輯瑞萬國朝宗而相率趨拜內臣之座士大夫尙得有廉恥乎國家自有覲典二百餘年未聞有此可爲歎息也上以其越職言事切責之既而彝憲奏辨謂覲官參謁乃尊朝廷繼咸再疏略曰尊朝廷莫大於典例知府見藩臬行屬禮典例



也見內臣行屬禮亦典例乎諸臣入覲投冊吏部典例也參謁內臣亦典例乎事本典例雖坐受猶可  
以爲安事抑彝憲卽長揖祇增其辱高皇帝立法內臣不得預外事若必欲以內臣繩外臣會典所不  
載上再切責之時當國者烏程也

二月會試天下士命大學士溫體仁吳宗達爲考試官取中李青等三百人又特旨五經顏茂猷准列正  
榜前一名顏茂猷福建人五經俱拈就知貢舉官禮部左侍郎林鉉具疏題請奉旨准與謄錄先文肅  
同考領易一房分送先文肅房中先文肅力請中式烏程堅拒五上堂而終不允榜出亦具疏奏請奉  
旨准列正榜前一名茂猷遂列李青之前於是海內咸識聖天子破格用人盛心以後丁丑揭重熙癸  
未馮元颯等皆以五經中式遂循爲故事矣 先文肅本房首拔臨川陳際泰陳老宿名震都下次如  
臯許直甲申以吏部殉難者也又次新昌漆園首題其行己也恭四句篇末痛言不恭不敬之害先文  
肅毅然取之呈時意烏程必當見駁當有一番質辨既呈上卽批允心內竊以爲疑比撤棘烏程于  
閣中揚言曰外人說我們要進場收幾個門生我們今日地位也靠不著門生了況場中卽有人罵我  
嘉善曰場屋中如何罵得烏程曰他篇末竟說不恭之臣如何不敬之臣如何豈不是罵嘉善曰老先  
生如何打發他烏程曰本房批伸眉抗手想見其人敢不中敢不中其陰忍如此 是時場中皆推陳



際泰爲會元檢討項煜欲令會元出其門以計使先文肅謂渠首卷乃楊廷樞也廷樞乃名重江南爲庚午解元先文肅雅不欲與人爭元遂力讓之及拆號則李青也項煜向有項黑之稱故項黑得李青之號闕傳一時 是科雖烏程爲主考而力行阻抑如榜額每科三百五十名甲戌止得三百名會元多入鼎甲而李青不得列每科考選館員獨甲戌則否又倡爲內外兼用之說而考選館推爲館選至欲令三甲就選縣丞主簿衆議沸騰以爲不可行乃止 給事中李世祺降級調用以其論溫體仁吳宗達也山西提學僉事袁繼咸上疏略曰養鳳欲鳴養鷹欲擊今鳴而箝其舌擊而縲其羽朝廷之於言官何以異此使言官括囊無咎而大臣終無一人議其後此大臣所甚利忠臣所深憂臣所謂太息也且皇上所樂聽者讜言而人誤以攻彈貴近爲天子所厭聞其勢將波靡不止上終以其越職言事切責之

三月廷試策士賜劉理順吳國華楊嘉祚等進士及第出身有差

五月陝西副使賀自鏡奏監紀太監孫茂霖縱兵劫掠玩寇殃民宣府太監王坤代辨監紀紀功罪耳追剿自有將吏在如果如自鏡所言則行間文武地方官員罪俱不在茂霖下矣

七月二十六日上爲外警焦勞召對九卿科道天語詳明下莫有能酬對者



八月十一日吏部尙書李長庚削職爲民下文選員外程良籌于獄長庚素見憎于烏程欲因事除之久矣是時適議起廢元是寬恤條款議及罪譴諸臣奉旨下部刑部方具招列名疏請旨尙未下有語長庚者當俟刑部疏下先釋罪而後起廢烏程欲陷之罪促其急上疏上臚列無遺共一百一十六人上以其屈法徇私朋比欺蒙也故有此重遣良籌爲吏部甫蒞任卽作誓文誓于伏魔城隍之神隨判其文徧都市門衆咸聳動謂必刻意簡飭關節不到如包老也後狼籍異常較無誓文者更甚辛未詞林程其揆其叔也每乞假之夕兩人俱易便衣入青樓家爲卜夜之飲衆論益鄙之至是下獄索贓者趾相錯於路也正揆以次年京察長庚旣去左都御史張延登亦以請告去旨府部九卿科道公舉堪任宰總憲者來看時吏部左侍郎張捷署部事特疏薦逆案呂純如及原任兵部侍郎唐世濟八月二十一日上特御平臺召五府六部九卿科道官面對上諭曰吏部尙書乃用人的官須要天下第一才品若據會推故套不過精心定力兩語混題止須一二人把持足矣何名會推卿各舉所知來張捷奏臣昨辭部印正爲會推一事年來諸臣黨同伐異誤盡朝廷在外會推自然瞻顧局面孰敢犯忌今蒙皇上召對諭臣等各舉所知務得天下第一才品須不論方隅容臣等破格推舉上曰立賢不以其方卿等舉來時定國公徐允禎等大學士溫體仁等共舉謝陞唐世濟等十餘人張捷仍獨舉呂純



如唐世濟諸臣舉訖捷又奏臣已舉兩人但此兩人皆舉朝所不欲用者隨取奏本呈御覽上問科道官何爲不舉吏科都給事中盧兆龍奏會推大典科道例無保薦九卿推舉當則聽皇上點用不當者臣等糾參聖旨深然之隨取張捷疏細閱訖上問曰呂純如是欽案有名的張捷如何舉他捷奏呂純如有才有品臣所深知欽案列名謂其頌美逆賢今紅本具在並無一字相及豈可坐以頌美上曰他已曾辨過但不可開端因以目視科道官曰科道如何說盧兆龍奏諸臣薦舉各有本末抑聽聖明裁奪至張捷所舉呂純如係欽案有名臣等正擬糾參適蒙聖諭已有明鑒臣等不敢復有爭執張捷再奏臣實見呂純如清執可用今棄之草野實爲可惜御史張三模奏廷推冢臣所關甚重即使事非欽案亦須昭雪呂純如生平賢否姑且勿論業已身負重累何以服人況欽案久定此端一開漸何可長張捷又奏臣實知呂純如是真賢者故從公推舉卽在欽案中亦須分別倘皇上用之不効如李長庚削職臣亦與同削職或處分更有甚於此者臣亦甘與同罪捷又奏小民作奸犯辟朝廷五年大審每年熟審惟恐其冤何況大臣如何冤得給事中孫晉奏張捷如此如何比擬今日皇上鄭重冢臣特召諸臣公同諮詢乃以開釋罪囚相喻乎盧兆龍奏臣任清江知縣時記得呂純如護送惠藩之國沿途騷擾只此一事已見無才況屈身逆賢其品可知時給事中姚思孝顧國寶蔣德璟吳南澗等御史金



光宸韓一光楊繩武等俱奏呂純如身在欽案斷不可用捷猶嗷嗷置辯給事中姜應甲叱之曰張捷所舉如此心事可知還敢在皇上前巧辯上卽命張捷下去隨將諸臣奏本傳示各官徧閱乃退明日旨下陞南京吏部尙書謝陞爲尙書南京右都御史唐世濟爲左都御史

先臣上先朝實錄未正一疏略曰臣頃因纂修熹宗皇帝實錄從閣中恭請光宗皇帝實錄副本較對見其紅丸大事皆祖三朝要典之邪說而應和之蓋天啟三年七月十六日實錄進呈則禮臣周炳謨等吏臣莊際昌等所纂修而閣臣葉向高韓爌等所總裁者也至天啟六年逆黨崔呈秀等謂實錄非實請旨重修則崇禎元年二月十七日所進今實皇史宬之所藏者是也是時皇上初登大寶要典未毀逆案未定閣臣施鳳來等不行奏明含糊從事凡先帝二十年青宮之憂患與夫一月天子萬年聖人等事俱隱而不彰斯固臣子之所痛心者也若先帝紀載尙未清明則今日編纂將何所據倘謂一入皇史宬不可復出則逆璫之矯旨且能行于當年聖明之獨斷豈不易于反掌臣謹謫其甚者上瀆睿覽一云當命哲之日詔誥恩賚儼然負震器之重儲宮既定典制文明乃浮議外滋無端蔓引皆好事者之過云云臣謹按先帝冊立一事自萬曆十四年以至二十八年諸臣羽翼國本有貶謫者有例職者有廷杖者忘身殉國九死不移諸臣亦何利于己而爲之繼皇上有主未敢言夾日之功而精忠自



盟豈可沒回天之力乃謂浮議外滋無端導引一語抹殺謂皆好事者之過此與三朝要典所稱奸黨構釁希圖定策與三案諸奸一脈相貫者同一邪說也宜改正者一一云四十三年五月有男子張差持挺入東宮殿簷下擊傷門者巡視皇城御史劉廷元回奏張差話不情實語無論次按察其迹若涉風魔稽其貌的是黠猾而刑部提牢主事王之案捏謀危東宮之說詞連二璫科臣何士晉行人陸大受主事張廷等附和其說愈加激聒云云臣按此卽要典中梃擊一案也卽據劉廷元疏亦明言稽其貌的是黠猾而必欲以風癩二字草草結局不容王之案揭奏張差口詞指爲捏謀何也且張差有口舉朝豈應嘿然而一有言者輒曰附和曰激聒則必使東宮無一護衛之人而後快乎正與要典同一邪說宜改正者二一云工科給事中惠世揚疏論劉廷元遂謂初張差狂闖薊道闌入宮門廷元巡視皇城按狀風魔皇祖是其奏讞決平允自王之案突揭構釁徒黨因以爲利借他事巖廷元未幾果顯攻風癩之案一時邪說世揚實爲之倡云云臣按王之案摘發張差之逆至于察處至於削奪後逮死詔獄莫敢議卹卽惠世揚身被五毒體無完膚所以不卽死者逆璫欲借爲戎首偏殺天下名流非宥之也幸遇聖明御宇僅免一死尙稽啟事乃云黨徒因以爲利斯亦何利之有焉況風癩之案忠臣義士所共明目張膽而攻者何俟世揚爲倡始顯攻之要典邪說宜改正者三一云張差闖入東宮言者



紛紛御史劉光復言致辟行刑一獄吏任似不必言官詫爲奇貨可居爲言元功以此二語爲異議者刺骨云云臣按劉光復之得罪也實以奏對越次然據其語但言皇上極慈愛皇太子極仁孝兩言亦未見其有功於神祖及先帝而奇貨元功之語不可謂非抹撥忠義矣大抵闢宮一事槩擊殿簷近侍俱寤真天下奇變也必欲視爲常事不當根究以爲僅一獄吏之任此何心哉要典邪說宜改正者四一云之上疾大漸召李可灼并趣和藥悉出聖意一時臣工所共聞共見其後有爲許世子止不嘗藥之喻李附和囂然鼎沸污穢君父幾成晦暝之世迨正論大明邪說漸滅且云李可灼往來施善門中使以聞其傳奏姓名莫可得而云云臣按此卽要典中紅丸一案也昔唐憲宗歿杖殺方士柳泌泌蓋爲憲宗製長生藥者彼豈不願其主之長生而餌藥不効則殺之而不以爲過後世亦不以爲冤今可灼進藥而先帝賓天縱謂之誤庸醫誤傷平人律有明條況誤傷天子乎乃與顧命大臣同賜金帛比屢經論劾僅准致仕回籍此何以解於天下後世且宮闈之中傳奏姓名豈遂不可窮請稍欲窮詰卽曰羣小曰汙讎曰晦暝此皆要典邪說也宜改正者五以上五條皆其尤悖謬者伏乞聖裁卽勅史館逐一改正以信千秋以光大典云先是八月初六日先臣入閣進所修實錄特致一揭於政府欲題請改正與烏程巴縣辯折良久意思拂然故無辭以難也先臣遂與十二日拜疏十三日發與嘉善



云要典以燬是非自明據奏皇考實錄是否與要典同異並天啟三年所進實錄該部一並查議具覆票入不發至九月二十七日上御平臺召閣臣手出此奏面諭曰皇考潛德青宮幾四十年憂勤惕勵靡有甯暑雖長幼固有定序皇祖意無偏向然儲貳爲國家大事諸臣上疏催請是其職掌如何說他浮議說他好事溫體仁奏無嫡立長皇祖屢有旨申明因諸臣不行靜聽屢疏擾瀆以致大典久稽實是諸臣之罪上曰雖如此說然諸臣催請之疏自不可少還是有功國本又如張差持梃闖入東宮此何等大變王之案揭稱其強壯不類風癲請集多官會審正是他敬慎處如何反說他捏謀王應熊奏王之案原係官箴有玷知不能免故捏出此段心機以圖自全上曰張差直到殿簷韓本用聚眾擒拏可是王之案捏造的後多官會審張差口供歷歷是風癲不是風癲溫體仁奏王之案此揭原不差但其本意欲借此以自免上又曰皇考病亟時李可灼輕進紅丸以致賓天爾時廷臣還是不聞不見的是還是據法執奏的是王應熊奏李可灼本意原祈皇考速愈因皇考病久後一時挽回不轉上曰君父有疾豈是臣子可以嘗試以希望富貴之地當時諸臣不行執奏已是錯了反說執奏的不是有此理否溫體仁奏此皆是逆璫時羣小附會造爲此說今要典已經焚燬是非已明今又屢奉皇上申飭便可垂示萬古上乃將此疏付閣臣改票二十九日奉旨奏內冊立大典皇祖淵衷默定外廷未知故



屢有瀆請然諸臣羽翼國本忠貞難泯張差實係風癩雖無別情然挺擊異變法應重究紅丸輕進諸臣無一執奏殊欠敬慎但其意亦忠愛諭旨明中卽爲定案實錄不必議改該部知道巴縣所繫也聞奸臣護奸如此上有堯舜下有共驩可奈何自是聖意屬注先臣欲大用矣

十月初十日日講官姜曰廣誤讀通鑑引罪上傳停通鑑講春秋閣議春秋非專經不可時詞林止先文肅習春秋舉朝相慶謂聖意之有在也十一日閣中題先文肅習春秋日講官舊例日講官止六人今始增七人爲例矣十二日先文肅日講命下十七日進講元年一傳十八日進講春王正月一傳十九日進講盟蔑一傳二十日進講克段一傳聖上御講筵向未有連講四日者天顏甚和御月白龍袍亦向所未覩也二十四日進講祭伯傳而宰恒係歸昭盟密係闕疑俱不進講隨奉聖諭宰恒一章正見當時朝政失宜所以當講今後以此類推讀之使人凜然真不世出之英主也

二十六日廷遣登萊總兵倪寵倣古授鉞之意滿朝俱角素

此條與七月二十六日召對記註及賀兵部王盛參論烏程諸疏山西巡撫吳牲陞辭疏皆膾炙人口因同遺書寄出不返日久不能追憶故舉其概



明季稗史彙編卷四

烈皇小識

癸酉應天鄉試論題聖心如日明水清墨卷多用青山綠水等句皆性理中語也上閱之大駭又御筆塗出文理紕繆者八卷以禮部不行糾駁回奏反行曲庇尙書李康先閑住主考庶子丁進降調舉人李懋王佩等停革有差

烏程倡論行取知推考選館員於是徐開禧胡守恆張居賴垓林增志王用予梁兆陽郭之祥李仕淳李景灝魯元寵薛所蘊等十三人考授編修檢討等官十二月十九日始命下又考選徐耀范淑秦之麒宋學顯辜朝薦葉向標荆可棟李汝璨商用初等爲給事中鄧鋐張肯堂張纘魯劉呈瑞張孫振等爲御史其改授者張孫振擬兵部而上改御史鄭爾說擬御史而上改刑部爾說曾疏參溫王二輔者也崇德知縣龔立本考選授兵馬張孫振爲歸安知縣係烏程父母官有奧援因拉龔同營捷徑先是龔夢有人言他日有張姓者邀與同事慎勿預至是龔果辭張遂由他途改換御史

溫體仁烏程籍歸安人王應熊巴縣人同惡相濟吳宗達奉行兩人意旨毫無短長時目爲篋片適禮部尙書黃士俊丁未狀元左右侍郎孔貞運陳子壯己未榜眼探花京師爲之語曰禮部重開天榜狀元



榜眼探花有些惶恐黃孔內閣翻成妓館烏歸王巴篋片總是遭瘟溫一時傳以爲笑雖云出輕薄少年手然赫赫師尹而令人鄙夷至此其生平亦可見矣

是年正月降賊王剛王之臣等至太原挾賞巡撫戴君恩誘剛等斬之王之臣卽豹五也而岢嵐大盜高嘉計號險道神者尤橫會山陝大旱飢民投賊者甚衆南賊自鄖陽薄穀城掠新楚光化襄陽一時大路賊俱集官兵大不能支賊遂圍均州掠荆門景陵陷房縣及保康

陝西賊陷洵陽西鄉土寇乘之漢中震動賊遂連陷紫陽平利白河圍興安兵備王在臺固守道洪承疇赴援乃退破鳳縣

二月特設五省總督以延綏巡撫陳奇瑜爲之去歲廷議流賊孔熾擬特設總督共推兵部侍郎汪慶伯慶伯不欲往烏程力庇之遂止不設至是始設用奇瑜受命檄諸將會兵於陝州賊在漢南者爲土人所拒乃趨夔州入四川矣

上發帑金五萬兩命御史梁炳賑濟山西山陝自去秋八月至是不雨大饑人相食永甯州民蘇倚哥至食其父母

張應昌兵敗於均州賊還屯鄖陽之黃龍灘分三股一趨龍舖一趨浙川一趨廬氏時調甯遠邊兵剿賊



加副將張外嘉爲總兵統之行至中途餉不時給遼丁直興至帳下外嘉撫馭無術遂遇害遼丁結隊潰入流賊營中

四川賊復入陝陷兩當鳳縣將由陽平關渡河趨鞏昌洪承疇追至成縣見賊勢方盛乃檄副總兵賀人龍劉成功等統兵赴藍田夾擊賊南奔潰中承疇令斷棧道據守雞頭關賊不得前從間道犯城固洋縣官兵禦却之南犯川中而川兵復扼守諸險賊首李自成張獻忠等坐困於漢中之車箱峽會連雨二旬餘賊饑無所得食賊馬乏芻死者過半弓矢俱脫指日束手就擒矣李自成等大窘乃求撫密遣人賄奇瑜每撫一名納銀五十兩奇瑜利其賄許之凡降賊三萬四千有奇勒令還鄉仍歸原籍檄諸軍按甲無動每百人以一安撫官押送所過郡邑爲具糗糧傳送之既度棧道出諸險口至草涼樓地方一夜衆賊盡縛諸安撫官或殺或割耳或杖責或縛而擲之道旁攻掠寶雞麟游等處始縱橫不可制矣

七月陝西賊陷文縣官兵逐之東走網峪川遂陷同官旣而走鳳翔趨汧陽隴川初賊之甫叛也猝至鳳翔西關口稱奉督撫檄安插城內守臣知其詐給以門不敢啟須臾上城先登三十六人盡殺之總督陳奇瑜因借爲辭劾地方官紳撓僨撫局以激上怒於是知縣李加彥紳衿孫鵬等皆逮問下獄



洪承疇知降賊復叛統兵進剿至岐山賊衆大至承疇兵僅三千張疑設伏賊遂趨耀州時漢中兵三千四百有奇總兵左光先等將之臨鞏兵三千五百總兵孫顯祖等將之平涼兵二千副總兵艾萬年將之止可城守總兵張全昌等統兵六千專視賊所向以爲援剿是時猖獗甚烽火直徹于耀州富平三原涇陽叛兵楊國棟擁三千騎披雙鎧直抵西安城下乞撫巡按范復粹不敢應巡撫練國事在鄠縣聞之馳還登南城檄國棟至語一日未決度不受撫必西走盤屋密檄沿途官兵飭備更設伏于盤屋之夾水溝時禾茂泥淖騎不任馳伏發殲其半一賊斬國棟以獻餘入終南山賊混世王等從鳳翔東趨欲犯西安洪承疇一夜馳入西安檄諸路兵赴西安合擊之賊至西安東境官兵以力疲不能出承疇恐賊東出潼關先令張全昌曹變蛟間道趨渭南遇其前而自帥兵駐潼關紅鄉溝賊至游擊李効祖柏永鎮力戰賊却不得入關因登玉山承疇馳赴藍田欲從山後問道剿之賊懼夜走商南初老回回等先據雒南山中今又益以諸賊共阻險自守承疇帥諸將駐潼關大峪口以防其出仍飭備閩鄉靈寶等處閏八月關西賊陷隴州屯城中浹月參將賀人龍剿之賊圍之數重十月承疇遣左光先等援之圍始解而西走之賊陷靈臺及崇信白水又至涇州是時北至慶陽西至鞏昌西北至邠州永壽西南至盤屋鄠縣遍地皆賊衆殆二十餘萬陳奇瑜至是始悔其見晚分兵堵禦而力已不支矣御史



傅永疏言漢南降盜陷城破邑所在騷然皆由陳奇瑜專主招撫謂盜已革心不許道途訊諸故郡邑不敢問開門揖盜剿撫兩妨皆奇瑜之流毒也十月上以秦賊猖獗逮陝西巡撫練國事以李喬代之十一月陳奇瑜削職聽勘時廷論俱罪奇瑜誤國應逮問正法而烏程一力護持僅遣戍李自成於七月陷澄城圍邵陽聞洪承疇至解圍去轉寇平涼邠州八月陷咸甯殺知縣趙濟昌適承疇至西走乾州十月左光先擊自成於高陵富平間斬首四百餘級自成佯求撫于監軍劉三顧真甯知縣王家永遽出城招撫失其印三顧卽登陴拒守自成乃奔邠州張獻忠同自成陷澄城轉掠平涼閏八月自成先鋒高傑降于副將賀人龍

七月鄭陽撫治盧象昇剿竹山竹谿諸賊連戰斬七百餘級復敗之于硤石墮崖及投水者又千餘人

十二月進洪承疇兵部尙書總督五省先是西甯兵變兵備孔聞籍閭室自焚承疇還師定亂賊遂陷隴州汧陽西甯既定承疇整師而東賊悉衆東奔分道盡入河南集汝雒間左良玉軍澠池總兵陳永福令鄧玘軍南陽

八年乙亥正月下吏部左侍郎張捷于獄張捷自薦呂純如之後倚烏程爲奧援乞休疏凡三十二上皆溫旨不允疏內猖狂吠無復顧忌最後奉旨張捷佐計在邇著卽出供職正擬于計典肆其兇鋒而



適有御史劉宗祥之疏先是宗祥巡按四川成都知縣賀儒修者張捷姻也捷特作東託宗祥欲得卓異一舉華陽一調未又有忠言不入朝事日非等語宗祥入川儒修狼籍甚者宗祥不能諱據實糾劾有旨革職逮問捷還大恨時宗祥回道考核捷一力把持擬加重譴宗祥具疏剖辨以捷手書上聞宗祥甫投疏還過太常少卿祝世美告之故世美力止以爲不可急趨會極門取索原疏則已封進御前矣次日旨下張捷革職提問後都察院擬宗祥降三級調外任御筆批劉宗祥著回道管事

二月流賊犯鳳陽焚燬皇陵報至傳輟經筵是日十二正當開講也百官皆角素九卿上慰安公疏二十四日乙巳上御布袍慰祭太廟二十六日丁未廷遣駙馬都尉王昺慰告皇陵百官俱布服從事下詔罪己減膳撤樂隨命逮鳳陽巡撫楊一鵬巡按吳振纓下之獄振纓者烏程幕客也在臺中七年規避不差及甲戌臺中沸然謂此番吳再規避當上公疏以正臺規振纓不得已乃就差次應得貴州胡平運應得鳳陽振纓挾以烏程之勢請以貴州易鳳陽蓋鳳廬淮揚素稱擅地又與浙江隣近平運因壓于烏程從之至是以陵寢失事同一鵬被逮一鵬正法振纓以烏程力庇僅從遣戍然烏程爲振纓祈哀大璫屈膝者再閣體皆掃地矣

又楊一鵬者筮仕成都府推官遊蛾眉山有狂僧踞佛座詬楊而笑曰汝猶記下地時行路遠啼哭數日



夜吾撫汝頂而止耶楊追憶兒時事大驚異曲致禮焉因留同宿耳語達旦臨別囑曰二十年後當會汝于淮上及是楊開府淮安一日薄暮有野僧擊鼓稱峨眉山萬世尊寄書發函得絕句詩七首急索寄書僧已不知所往矣未幾流賊犯鳳陽焚祖陵楊坐失事論死其詩始傳於世其詩云謫向人間僅一週而今限滿恐難留清虛有約毋相負好覓當年范蠡舟其二云業風吹破進賢冠生死關頭著腳難六百年來今一遇莫將大事等閒看其三云浪遊生死豈男兒教外真傳別有師富貴神仙君兩得尙牽韁鎖戀狂癡其四云難將蚌玉拒無常勲業終歸土一方欲問後來神妙處碧天齊擁紫金光其五云殞來法旨不容違仙律森嚴敢洩機楚水吳山相共聚與君同跨片霞飛末二首不傳萬世尊卽前狂僧也密語受記楊之子稍向人吐露楊聞而訶之臨刑神氣如常時預知定數不可違也事頗怪并附記

先臣上皇陵震動疏略曰頃者流賊不靖乃致侵犯皇陵焚燒禮殿則真古今未有之奇變君辱臣死之秋也顧不亟滅賊無以洩神人之憤而不追溯亂源亦無以施勘定之功天縱神明如皇上勵精求治如皇上而紛紜恒擾寇盜相尋斯其說在易之蠱矣蠱之敗壞必易世而後見故文皆以幹蠱爲辭明前人養其疾至後人始受之也皇上御極於乾剛解紐國步幾危之日一番振滌日月重光深得先甲



之維新而於後甲之丁甯似稍略焉蓋戊己之際廢籍諸臣彙征連茹而謀國罔效邊疆失事以致聖衷懷疑羣邪伺隙沿至於今繆種漸芽蔓延滋長孤陽時翳於陰曖砥柱莫挽於狂瀾魍魎或嘯舞於離明狐鼠且縱橫於城社逆氣足以召逆妖氛足以成妖此致亂之原也堂陛之地欺猜愈深朝野之間刻削日甚搢紳感靡騁之懷士子嗟束濕之困商旅咨歎百工失業本猶全盛之海宇忽見無聊之景色此又致亂之源也邊事既壞修舉無謀兵不精而自增餉隨兵而日益餉則賦重賦重則刑繁復乘之以天災加之以饑饉而守牧惕功令之嚴畏參罰之峻不得不舉鳩形鵠面無食無衣之赤子而笞之禁之使愁苦之氣上薄於天皇上雖有卹民惠下之德意而九重邃密何由得聞下民無知直謂有司仇我虐我今而後得反之也此又致亂之源也將無紀律兵無行伍淫污殺劫慘不可言尾賊而往莫敢奮臂所報之級半是良民民間遂有賊兵如梳官兵如櫛之謠民安得不爲盜盜安得不日繁此又致亂之源也具此亂源而當事諸臣不能憂國奉公反躬省己加膝墮淵總由恩怨張羅布網費盡機關試觀數年以來所爲整綱肅紀者何事推賢用能者何人安內攘外者何道富國強兵者何策卽如流賊一事飄忽已久旣失一夫當關之事縱虎出林復誤各撫分鎮之謀教猱升木今日廟社怨悵幽明胥痛國事至此諸臣之肉豈足食乎凡食君之祿擔君之爵者皆當伏鐵鑕之誅膺放流之典



固非角素盈朝可以塞責慰安一疏可以畢事者也在皇上宜赫然一怒以安天下發哀痛之詔明罪己之懷按失事之誅正誤國之罪行撫綏之實蠲民間之積逋使愷悌循良民得專意于牧令徐議財源之濬無徒竭澤之魚盡斥患得患失之鄙夫廣集羣策羣力以定亂蠱之象曰振民有德蓋振取蕩滌之義育爲有補救之方若復養癰不決弛瑟不張俞咈無聞而但云有旨矣方圯旣極而尙言戴罪立功忽忽悠悠將安底止哉奉旨本內追溯亂源亟圖妙算殊屬剴切併理財用人等事該部悉心籌畫以備採擇

三月陞盧象昇兵部左侍郎總督五省軍務賜尙方劍統關遼兵剿東南賊洪承疇剿西北賊陞山東巡撫朱大典總督漕運巡撫鳳陽同象昇協剿逮河南巡撫元默以陳必謙代之

復召大學士何如寵堅以疾請允之東閣直房前第一間爲首輔所居若未正首輔之稱者雖次敘第一不敢居也桐城再召疏辭不允勉強就道至臨淮復以病堅辭始蒙俞允烏程竭力邀首輔之稱不可得端陽閣臣例有賜饌大璫傳諭口稱首輔烏程卽開首輔之室居之

七月二十六日皇上闢門徧召羣臣試以票擬先臣以病不能出倪庶子元璐無病而亦不出三十日旨下吏部取姜逢元陳子壯先臣張至發蔡奕琛張元佐閔仲儼馬之驥張居九人履歷次日廷推林鉉



孫慎行劉宗周三人閣票再推幾員來看越三日御筆批兵部馬上差人召來七月二十六日奉旨文震孟張至發俱陞禮部左侍郎兼東閣大學士卽行入閣與首輔體仁等協同辦事閣中初票禮部尙書御筆批禮部左侍郎真特達之知也二十八日上辭疏二十九日旨下八月初二日復上辭疏午上而旨未卽下次日卽宣聖諭盡撤各鎮監視內官其有拱己以聽之意先臣欲堅以病辭香山力止以爲不可遂于十三日面恩入閣辦事

罷各鎮監視太監諭曰朕御極之初撤還內鎮舉天下事悉以委之大小臣工比者多營私圖罔恤民艱廉謹者又迂疎無通論己巳之冬京城被攻宗社震驚此士大夫負國家也朕不得已用成祖監理之例分遣內臣監視添設兩部總理雖一時權宜亦欲諸臣省咎引罪今經制粗定兵餉稍清諸臣應亦省改其將總理監視等官盡行撤回以信朕之初心張彝憲侯潛蛟卽回監供職惟關甯密邇東兵高起潛著削去總監字樣督理如故

先臣供事日講上甚屬意宮中嘗言文震孟到閣中到好只是他還是板金繚時先臣官少詹止四品也烏程偵知之年終講官應敘勞題陞先臣應陞正詹烏程寢閣不題傳祭酒冠應陞正詹仍陞少詹阻遏後進亦已甚矣六月至八月烏程大病不能起上乃點用烏程使烏程不病此舉不可幾也



時聖恩深重捐軀莫能圖報而爾時天下事實有不可爲者政府之事權日輕貂璫之盤踞已久能盡削之以歸中書乎疆場之飭備無期內地之流毒愈熾誰爲宗岳之選乎真小人張弧以伺我隳僞君子甘言以售其奸能一一燭照之俾勿墮其網乎雖欲佐聖天子以轉移天下將安從措手也竊爲先臣計不若堅以病辭使聖天子知能辭宰輔者惟先臣一人耳宋神宗論溫公辭樞密曰若他人雖迫之使去亦不肯矣惜乎香山諸公見不及此也

上爲流寇事於二十一日召閣臣及府部科道官平臺對面諸臣各有數陳先臣奏今調官兵剿賊本以爲衛民也乃官兵不能剿賊反以殃民以致民間有賊兵如梳官兵如櫛之謠今惟嚴申號令凡兵丁擾害民者必殺無赦將官能鈴束兵丁秋毫無犯監軍御史立刻奏聞破格優擢上曰卿說得是又召入門內先臣奏民間團聚村堡正人自爲守家自爲戰之意官兵不得以索糧爲名到處騷擾以致流賊亦冒妝官兵混入村堡欲堵禦之則虞以殺傷官民致干法網欲拱手聽之則子女玉帛聽其捆載而去民害何由得除寇氛何由得靖臣意請天語申飭今後凡官丁所過地方官預備糗糧勿得以惡草塞責違者參處兵丁亦不許入村堡違者聽民間堵禦將官不得故縱五府中某有言此不可行者先臣復和辨折時跪奏良久上曰先生起來稱先生亦異數也



故事新參入直後以名帖同禮帖致意大璫大璫亦以名帖禮帖致意此舊規也先文肅由特簡入政府此例遂廢大璫曹化淳係王安名下素附正人疑先文肅有意外之託王安之姪中書某轉致同人且盛稱曹璫皈依先文肅之意又云若循例往來外廷惟所欲爲大璫無不奉命同人以告先文肅堅持不可曰極大璫之力使我不爲宰輔耳不爲宰輔於我何損而名帖旣入此辱豈能洗耶同人乃止曹璫久不見復以爲大恥遂與烏程比而呼吸相應先文肅頓失聖眷蓋由于此

烏程於內廷凡有執事人員極小者節中俱有禮相候掌印及秉筆者又不必言先文肅乃孤行一意如此欲久居揆席得乎

先文肅壬戌廷試大璫王體仁以御批第一持名帖報喜舊例以晚生帖復之先文肅語其人曰我新進書生不知回帖怎麼寫今姑以原帖奉復蓋甫進卽與內奄抗薑桂之性老而彌竦如此

時杭州解到龍緞三萬匹內奄索賄不遂駕言不中用令票旨駁還先文肅與烏程言龍緞雖云不堪御用然以充賜賚雜賞似亦無妨況三萬匹入京不知費民財幾十萬若行駁還復造以進民不堪命矣明主可以情告宜出一揭爲杭民請命乞行暫收以後不以不堪者塞責烏程不可票旨盡數駁還後徵之數年始克補解



總兵曹文詔以剿賊陣亡奉有卹典其子曹變蛟任副總兵有謝恩疏閣票者再四仍發出改票御筆將  
奉卹典月日及上疏月日各加一點閣臣咸不解其故後數日烏程入直反覆良久曰得之矣乃卹典  
之旨尙新與謝恩疏日月不相應蓋變蛟託人在京幹當邀旨後隨即具疏卽漢昭察霍光之明也乃  
票旨詰問其故次日卽下先文肅謂烏程亦有小才謂此

浙江提學僉事黎元寬以文體事褫革元寬出揭盡發烏程囑託諸私事謂執法不阿烏程修怨所致御  
史姜思睿據揭具疏參論給事中姜應甲助之思睿疏有爲代草者事頗洩烏程乃得預爲地上果主  
先入之言欲加降處屢發改票先文肅與香山竭力調護得免

九月部推操江正爲太僕寺卿張元佐光祿寺卿王道直陪上召對於暖閣元佐勦拾陳言率爾殊甚道  
直兢兢言不能出口上點用道直後四年己卯浙江巡按題涂必浚雲南巡按題王範上亦召對必浚  
條奏兩浙利弊甚悉上改王範巡按浙江必浚巡按雲南蓋聖意用人不測如此

十月上以流賊未平震驚陵寢特頒聖諭避正殿撤樂減膳以初三日始居武英殿百官俱宿公署閣臣  
俱宿于朝房詔曰朕以涼德繼承大統不期倚任非人邊虜三入流寇七年師徒暴露黎庶顛連國帑  
匱絀而徵調未已閭閻凋敝而加派難停中夜思維不勝愧憤今年正月流氛震驚皇陵祖恫民仇罪



實在朕今調邊兵留新餉立救元元務在此舉惟是行間文武吏士勞苦饑寒深切朕念念其風餐露宿朕不敢獨臥重幃念其飲水食粗朕不敢獨享甘旨念其披堅冒險朕不敢獨衣文繡茲擇十月三日避居武英殿減膳撤樂非典禮事惟以青衣從事與我行間文武吏士共甘苦之以寇平之日爲止文武官其各省過淬厲用回天心以救民命

七日上御筆起用黃道周十日上御筆放王應熊此兩日烏程皆以待罪不入直而十日嘉善香山皆以暫假不入惟先文肅與輜川司票擬說者謂巴縣之放先文肅實爲之由是忌者益耽耽不能旦夕容矣

給事中許譽卿削籍爲民福建右布政申紹芳革職法司提問譽卿由壬戌考選歷任工科都給事中計今十四年資俸俱極深以母老欲得南京太常少卿以便迎養同人俱不可德州遂欲題陞南缺先文肅愠甚語侵德州過當德州懷恨適臺省同時攻德州及總憲許公謂必須舍德州而專攻總憲蓋總憲與烏程朋比肆惡尤不可緩戶科姚思孝業具彈章以德州總憲並列以許公言遂去德州德州稍稍相忘矣而御史張纘曾不通商榷特疏獨參德州張寓與許比隣德州疑此疏出先文肅及許公意又山東左布政勞永嘉輦金六萬兩主兵科宋之普家營陞登萊巡撫已入啟事矣勞故三案漏網諸



臺省擬合力以攻之德州三過戶科宋學顯曲致殷勤求諸君稍徐之候旨下而攻之未晚蓋旨既下則前金可分享也又曰勞公之座卽申公之座也申係寒家嫗戚時以右布政資表入都瓜期已及蓋直以此相而臺省竟不能待交章連續有旨登撫著另推而東省諸人又無不懷恨矣宋之誓力懲德州謂先文肅決不相容自當以鉉席待南家及大司農豈能久留汝耶德州已心動適又值張繼會之疏以之誓語爲信然遂具疏參譽卿與紹芳坐以爭官講缺而參紹芳中有憑藉輿援等語閣中相顧錯愕嘉善謂爭官須有實跡當令回奏不應烏程票而悍然搶去票旨云大千法紀著降級調用夫既云大千法紀矣而僅僅降調乎次日果改票著削籍爲民先文肅力爭之不能得乃言科道爲民極榮之事敬謝老先生玉成之又二日旨下譽卿爲民紹芳提問

十一月大學士何吾騶與先臣同罷許給事譽卿復有去國一疏參烏程烏程辨疏卽參先文肅卽指前爲民極榮之語謂皇上所以鼓勵天下者止有此爵祿位號而文某乃云云以股肱心膂之臣爲此悖倫滅法之語曰悖曰滅蓋深以激聖怒也上覽之果怒有旨吾騶震孟不宜徇私撓亂疏未及吾騶而旨突及之知烏程所以相中者非一朝一夕之故矣吾騶與先臣俱具疏引罪再疏吾騶奉旨著致仕去先臣奉旨著冠帶閒住去



下庶吉士鄭鄮於錦衣獄鄮爲壬戌庶吉士建言蒙譴林居亦十四年矣與嘉善皆出華亭之門稱先後同門鄭之得館選也宜興口誅筆罰不少寬假鄭心怒之辛壬之際攻擊宜興烏程者甚重鄭因昌言宜興決不可留而烏程實可大用言路不當並攻嘉善心善其說既入政府卽力譽鄮於烏程烏程唯嘉善郵寄鄮書謂當急來吾致子情於烏程矣鄮復寄訊先文肅先文肅力阻其來鄮反有愠心以文肅之相爲不如嘉善也至是赴京補官嘉善復言於烏程謂某已來是人可備老先生藥籠中物當以館職畀之烏程復唯唯武進舊輔鄮族母舅也力毀鄮於烏程烏程信之適時烏程新逐香山與先文肅甚安閑然不平其事鄮亦隨衆持憤激之論烏程偵知之謂鄮特假語以欺嘉善耳遂具疏糾鄮疏成語嘉善曰今爲鄮某事具疏當與老先生同題嘉善欣然及取視則糾其杖母事嘉善面赤股栗不能出一詞烏程冷笑曰固知老先生不願預也遂獨具名以進上方欲以孝弟風勵天下覽疏震怒下鄮於錦衣獄杖母者鄮爲孝廉時父振先私寵一婢爲嫡吳氏所虐振先與子謀假亂先以怵之吳氏懼甚願受杖以贖罪卽令此婢行杖行杖之次鄮不禁失笑吳氏大怒謂渠父子私搆此局徧慙三黨由是喧傳有杖母之事然其事已三十年不可得而究竟也

十二月在籍禮部左侍郎林銓順天府尹劉宗周行取到京有旨林銓著以原官兼東閣大學士入閣辦



事劉宗周陞補工部右侍郎

是年二月流賊犯鳳陽先是總兵尤世威等統兵扼守遠關諸隘口露宿凡十旬皆患疫癘不能軍聞賊大至遂潰賊乃越廬氏超永甯轉陷滎陽攻汜水屠之又破固始復分爲三路一趨鳳陽一趨六合一趨穎毫穎州知州尹夢鼐判官趙士宏率士民固守城破俱闔家殉難遂犯鳳陽鳳陽無城郭賊至官軍無一人敢迎敵者賊焚皇陵樓殿俱燼燔松柏三萬餘株殺守陵內閹六十餘人縱放高牆罪宗百餘人留守朱國相率家丁巷戰斬賊二十七人力竭以死賊首掃地王太平王入府治知府顏容暄囚服匿獄中賊縱囚獲之賊首張蓋鼓吹杖容暄于堂下殺之推官萬文英等六人武弁四十六人俱被殺士民被殺者數萬剖孕婦以視男女泣望兒於槩觀其宛轉呼號以爲樂焚公私邸舍三千餘間光燭百里恣掠三日太監盧九德總兵楊御蕃統京營兵至南京兵亦至賊乃拔營趨廬州沿途殺掠無孑遺陷巢縣殺知縣嚴覺攻舒城知縣章可試塞三門止開一門以誘賊暗設坑以陷之賊入死者千餘人援兵亦漸相逼賊遂掠霍山抵廬江廬江斂金求免賊僞許之乘不意夜襲城城陷復陷無爲州賊首滿天星張大受等攻桐城乘輿繞城呼降守將射中其腰遂趨潛太諸縣山民皆習獵以毒注矢人輒斃所在結寨殺賊賊遂走麻城



三月江北賊掠安慶陷潛山應天巡撫張國維率兵禦之江南兵素不習訓練猝與賊遇陸營守備周祐望風先逃總練指揮包文達陣亡全軍潰散賊遂入湖廣陷麻城及羅田

斬黃民擒獲賊首爬天王身長八尺日啖人心數十雙目與髮肉俱赤自言此天凶我非我過也倡亂九年陷州縣十餘所向無敵今乃爲村民所擒豈非天哉解至軍門伏誅

總兵鄧玘爲叛兵殺於樊城玘素無紀律所將川兵淫掠尤甚俄騎營叛玘登樓以避之見勢逼赴火死舉營北竄惟步兵未動洪承疇令參將賈繼選周繼元分統之

五月漢南賊陷甯羌曹文詔進剿夜至王峪賊伏險以待文詔擊之敗張全昌自咸陽出興平之東賀人龍入子午谷斷其南奔劉成功同游擊王永祥駐金牙關遏其北走賊夜渡河趨郿縣承疇亦渡河追之至王渠鎮賊方出恣掠賀人龍擊敗之追至大泥峪賊舍騎登山張全昌復擊之賊盡入終南山

六月隴西賊搖天動等襲陷西和曹文詔赴援詔至婆羅寨大軍在後而賊十餘萬驟至力竭自刎文詔敗戰能殺賊爲賊所畏報至官軍爲之奪氣

陝西巡撫李喬革職議罪甘學潤代之

七月賊高迎祥張獻忠等陷澄城八月陷咸陽先是賊翻山鶴降於承疇賊首高迎祥鄧王屯乾州承



疇令翻山鷄說之不聽南走武功承疇追擊敗之迎祥率大隊自武功整屋分道渡河十月張獻忠老  
迴獨突出潼關守將艾萬年等兵潰遂犯南鄧而一字王等部衆十餘萬高迎祥統十二萬亦自潼關  
出犯關鄉靈寶大隊東行塵埃漲天闊四十里絡繹百里老弱居中精騎居外總兵祖寬左良玉兩軍  
相對遙望不敢邀擊賊遂屯於陝州十一月祖寬破賊整齊王于九蒿賊潰而爲二東走偃鞏南走汝  
郊丙辰羣賊大合於龍門白沙連營六十餘里祖寬分兵襲擊張獻忠於姑家廟大敗之斬首千餘級  
獻忠遂陷巢縣含山又陷和州沿江下犯江浦

十二月賊高迎祥羅汝才卽曹操破光州官吏士民屠戮無遺參將羅于葵擊賊漢南賊追至子午谷又  
敗之賊奔饒風關

補錄毛馬魏傳四公疏略

周延儒未枚卜之前上獨召對日西而入星移始出語祕莫傳舉朝驚駭御史毛羽健疏言其事略曰國  
家設閣臣以備顧問設九卿以課職掌設臺省以司糾彈封駁大小相維雍蔽不生祖宗立法固有深  
意皇上每事法祖今日欲訪軍國大務耶一二執政誰敢不竭股肱欲探機密隱情耶二三言路誰敢  
不披肝膽乃舍葑菲之遺獨結魚水之契皇上將無謂與朝皆不足信惟延儒一人可信乎延儒果有



嘉謀論亦宜昭示中外宣付史館俾天下萬世曉然知聖眷之專有所屬而大小臣工劃然於進退之不可苟如此昔漢武帝非冠帶不見汲黯宋臣蘇軾恥由他途進今皇上於延儒召見不以朝參而於晏暇非宣室之鬼神何爲前席豈通明之傳令何爲夜半不幾以南衙之出入而同北門之學士乎延儒賢者必將形跡自遠不肯冒昧以赴功名如其不然又安用取此人而用之次年袁崇煥伏法兵部員外郎陸澄源疏參羽健爲崇煥黨同法應同坐有旨革職提問

時王永光起補高捷史堃爲御史御史馬鳴世疏劾之略曰王永光以逆璫餘孽作神奸領袖違旨拂衆薦用高捷史堃兩邪臣夫捷爲霍維華遺黨一脈相傳皇上豈不知之彼逆案諸臣已死之灰也而護持逆案諸臣是未剪之翼也若嚴逆黨之身而寬逆黨之類竊恐鷹眼獨存鷗音復振其爲芝蘭嘉禾之害非淺鮮也

宣府太監王坤以冊籍委頓劾巡按胡良機有旨究明奏奪給事中魏呈濶疏爭之略曰代巡之任簿書刑名碎如蟻聚使良機果有註誤則回道考核應以直枉候之聖鑒今王坤在鎮良機亦在鎮而隨以究明奏奪一付中貴之手良機倘堅如矢之概乎知其不以危改節萬一百練剛腸化爲繞指與鼃窟宅轉爲徑竇不亦羞朝廷壞士節令後來銜憲而往者靡所展其才猷乎人見綱紀之司諮訪之使一



且獲戾中貴莫能自必其命彼半銅分符誰復敢以國事爭抗者異日皇上欲聞九邊之動靜監視之善惡奚從知之

給事中傅朝祐疏略曰皇上慮周邊境用王坤監視宣大未嘗令其司彈劾之權操中朝之議也乃一參再參及閣臣縱令閣臣有過朝廷耳目之司夫豈乏人乃令中官言之書之史冊何以示子孫而傳後世哉臣于是不能不爲首輔咎焉當遣內臣之始何不近援祖制遠援漢唐宋之覆轍以力諫卽不然相率以去就爭之可也臣又不能不爲諸輔咎焉當票擬王坤之疏曷不直言揭奏正義責坤爲皇上遵祖制爲朝廷持大權而顧唯唯以聽之乎臣不特爲閣臣惜而深爲國體惜爲天下治亂之大關惜也

九月丙子特授武舉陳啟新爲吏科給事中啟新上疏言天子有三大病曰科目取人資格用人推知行取科道惟皇上停科目以詘虛文舉孝廉以崇實行罷推知行取以除積橫之習而且蠲災傷錢糧蘇累困之民專拜大將舉行登壇推轂之禮使得節制有司便宜行事庶幾民怨平而寇氛靖等因啟新賁疏跪正陽門者三日內奄輩傳聞大內上閱其疏異之特命授職閣臣不敢繳旨六科未敢執爭本科給事中顏繼祖疏請增設公座嗚呼閣臣科臣真可謂無人矣



三月下禮部右侍郎陳子壯於獄時上篤厚天潢以祖訓凡郡王子孫有文武材能堪任用者宗人府具以名聞朝廷考驗授官其遷除如常例命下部行之子壯先詣政府力言其不可行之故烏程盛稱皇上神聖臣子不宜異同子壯曰世宗最英明然祔廟之議動戚之獄當時諸臣猶執持不已今皇上威嚴有類世宗公之恩遇孰與張桂但行將順而廢匡正恐非善則歸君之義也烏程大愠既而子壯上疏言宗秩改授適開僥倖之門隳藩規溷銓政等云方疏之入也尙書黃士俊恐觸聖怒辭不列名疏入上果大怒適當御茶擲茶甌於地烏程票旨罪其阻詔問親法司提問

五月大學士錢士升罷嘉善之入政府也實由烏程頗相結納凡烏程有所舉動每令嘉善先發而後繼之如用冢宰謝陞總憲唐世濟皆烏程意也而嘉善成之烏程之攻先文肅也引嘉善爲助嘉善効力甚至及先文肅與香山同日去國烏程遂以嘉善爲贅物矣適有武生李璉疏言致治在足國請搜括巨室充餉嘉善票嚴旨以進有旨卿以密勿大臣卽欲要譽已足致之毋庸汲汲而嘉善始危又嘉善弟士晉巡撫雲南狼籍大著經歷吳鯤化疏許士晉贓私不法諸事烏程卽票嚴旨仍戒晉江無得漏言嘉善再疏卽罷

祭酒倪元璐疏參鄒華略曰昨見黃安縣生員鄒華妄行薦舉列及臣名不勝駭異陛下求言者渴本欲



宣隱豁幽而宵小干進薄孔孟爲糟糠網簪纓爲桎梏率吳鯢化部民也參及撫按鄒華下士也薦及朝紳如是而望朝廷之上昂首伸眉豈可得乎

原任山東滋陽知縣成德母辱溫體仁於朝成德持身廉介筐篚絕饗又賦性峭直不能左右上官先文肅在朝廷極稱道之御史禹好善巡按山東具疏參劾先文肅大爲稱屈德又有疏參烏程奉旨下獄好善遂參及先文肅云成德係舊輔文某私人此疏係文某屬草以授德者時申布政紹芳已逮到下部羣小合謀擬借事株連代烏程修怨勢岌岌矣適先文肅以六月去世羣謀始解申成俱行遣戍成之母同烏程入朝攔輿醜詈且集瓦礫擲之烏程狼狽走免隨具疏奏聞有旨著五城驅逐而烏程令錦衣尉加校尉五十名護視人謂成母此舉不減施全之刺秦檜云後闖逆入犯破昌平成母同其媳若女俱自投井中

逮山東巡按張孫振孫振疏參提學袁繼咸繼咸素有廉明之譽巡撫吳桂業保薦之矣有旨以撫按舉劾互異嚴行詰問桂具疏備陳繼咸居官廉明當薦不當劾并列孫振不職諸狀時長安閔然皆不平其事都察院遂疏參孫振是非顛倒大負代巡之職宜行提問以儆官邪有旨孫振逮問桂與繼咸供職如故



嘉善既去晉江以病卒復行枚卜上點句容孔貞運江夏賀逢聖南海黃士俊俱以尙書入閣淄川因是亦得加尙書丙辰不考館而鼎甲三人皆大拜庚戌亦不考館選鼎甲三人俱不得正揆席而武陵金溪補其闕亦一異也

千戶楊光先疏論陳啟新溫體仁昇棺隨其後上大怒命廷杖八十遣戍遼西極邊

祭酒倪元璐罷先文肅既去烏程恨倪公刺骨必欲逐之而後快言路部僚莫有應者乃以京營爲餌欣動武弁誠意伯劉孔昭應募遂摘倪冒封事併及許生重熙蓋熙曾纂有五陵注略以書生不當妄言國事也倪請於家取前所給誥勅驗無冒封事罪無可坐烏程稟旨該部議處至是部覆上有旨倪元璐冠帶閑住去許重熙革去衣巾書板追毀後京營缺不可得遂以南京操江賞之孔昭卽前參侯恂以媚烏程者嗚呼青田有此孫辱青田矣

七月清兵入犯上命太監李國輔守紫荆關許進忠守倒馬關張元亨守龍門關崔良用守固關孫繼武劉元斌率禁旅六千防治河口上又命太監魏國徵守天壽山尋以國徵總督昌宣等營以鄧良輔守之鄧希詔監視中西二協杜勳監視東協陞張元佐仇維俱兵部右侍郎鎮守昌平通州時所遣內奄皆卽日出城上語閣臣曰內臣卽日就道而侍郎三日尙未出何怪朕之用內臣耶上又命太監盧維



甯總督通津臨德軍務兼理漕運河道

上命兵部尙書張鳳翼總督各鎮勤王兵關甯太監高起濟爲總監甯錦總兵祖大壽爲提督南援霸州工部右侍郎劉宗周疏略曰人才之不競非無才之患而無君子之患今天下卽乏才亦何至盡出二三中官下每當緩急之際必授以大任三協有遺通津臨德有遣又重其體統等於總督將置總督於何地是以封疆嘗試也且小人於中官每相結納而君子獨岸然自異故自古有用小人之君子無黨比中官之君子皇上誠欲進君子而退小人而復用中官以參制之此明示以左右祖也不報

御史金光宸疏參侍郎仇維禎首敘內臣均爲借援又請內臣督兵爲蔑法并及本兵張鳳翼上弗善也至是爲援剿事召對廷臣于平臺并召光宸上詰之曰仇維禎方至通州爾卽借題沽名乎上時怒甚直欲按紅牌處斬適迅雷暴雨直震御前乃止僅行降調

工部右侍郎劉宗周疏略曰皇上以不世出之資際中興之運卽位之初銳意太平甚盛心也而施爲次第之間未得其要屬意邊疆賊臣以五年復遼之說進遂至戎馬生郊震及宗社而皇上遂有積輕士大夫之心矣由此而耳目參於近侍心腹寄於干城廠衛司訊防而告密之風熾詔獄及卿士而堂廉之情隔人人救過不給而欺罔之習轉甚事事仰承獨斷而諂諛之風日長甚者參劾之法惟重徵翰



官愈貪民愈甚而賦愈通總理之外復設監紀權愈分法愈廢而盜愈多夫君臣相遇最難也得一文某以單詞報罷矣得一陳子壯又以過慙下獄矣於是井市雜流乃得操其訛說乘間抵隙以希進用國事尚可問哉夫皇上不過始於一念之矯枉而積漸之勢釀爲厲階遂幾於莫可匡救則今日轉亂爲治之機斷可識已皇上所恃以治天下者法也所以法者道也如以道則必體上天生物之心而不徒倚用風雷念祖宗學古之益而不致輕言更改以寬大養人材以拊循結人心而且還內侍以掃除之役正懦帥以失律之誅慎宗潢以改秩之授特頒尺一之詔遣內廷臣賁內帑巡行郡邑爲招撫使赦其無罪而流亡者專責撫鎮陳師險阻堅壁清野聽其窮而自歸誅渠之外不殺一人此聖人治天下之明效也武生陳啟新一言投契立置清華此誠盛事臣愚謂宜先令以冠帶辦事黃門如試御史例俟數月後果有忠言奇計實授未晚不然如名器可惜何皇上天縱神明而諸臣不能以道事君徒取一切可喜之術臣竊痛之不報

九月北兵從建昌冷口出守將崔秉德請統兵先遏其歸路總將高起潛不敢前進揚言當半路擊之及報至北兵已盡出口猶觀望兩日始進至石門

時當八月鄉試之期以城守暫輟及北兵既退改期十月亦文運之厄也




北兵陷昌平將天壽山陵寢禮殿盡行拆毀北兵退後督撫奏稱忽有怪風從東北起將陵寢禮殿盡行吹壞有旨卽著估價修理上下相蒙不復究竟而閣臣樞臣反敘功加恩三新參俱加太子太保薊督丁魁楚戴罪管事薊撫吳阿衡供職如故



5712

1512











明季稗史彙編卷五

烈皇小識

劉宗周以乞休允放矣聞邊警卽杜門私邸俟解嚴後始出都陞辭疏略曰自己已以來無日不編繆末  
兩而禍亂一至於此往者袁崇煥誤國其他不過爲法受過耳小人競起而修門戶之怨舉朝士之異  
己者皆坐以煥黨次第置之重典或削籍去自此小人進而君子退中官用事而外臣寢疎朝政日隳  
邊政日壞今日之禍實己已釀成之也且樞臣張鳳翼溺職負任而與之專征何以服王治之死督臣  
丁魁楚失事嚴疆而與之戴罪何以服耿如杞之死諸鎮撫勤王之兵爭先入衛者幾人而概從寬典  
何以服劉策之死今二州八縣生民塗炭也極矣廷臣之纍纍若若者皆相倖無事又何以諱韓爌李  
邦華張鳳翔之或戍或去豈昔之爲異己驅除今不難以同志互相容隱乎臣于是而知小人之禍邦  
國無已時也皇上惡私交而臣下多以告訐進皇上錄清節而臣下多以曲謹容皇上崇勵精而臣下  
奔走承順以爲恭皇上尙綜覈而臣下瑣屑苛求以爲察規其用心無往不出於身家利祿皇上不察  
而用之將聚天下之小人立於朝而有所弗覺矣至近日刑政最外者成德傲吏也而以臧戍何以肅  
懲貪之令申紹芳十年監司也而以營求戍何以昭抑競之典鄭鄮雖久干鄉議而杖母之獄乃以無



告坐何以示敦倫之化凡此數事皆爲故輔文震孟引繩批根卽向者驅除異己之故智羣臣不敢言皇上亦無從而知之也嗚呼八年之間誰秉國成臣於是不能爲首輔溫體仁解矣語曰誰生厲階至今爲梗惟皇上念亂圖存進君子而退小人急罷三協津通之使責成中外諸臣各修職業毋再以邦家爲僥倖體仁桑榆之收庶幾在此不報

下左都御史唐世濟於獄吏部尙書謝陞罷北兵旣退羣小復欲借邊才以翻逆案烏程主之德州佐之唐世濟當先特疏薦霍維華隨一疏揚言於衆曰若臺省中以逆案事見罪者卽先以此殪之臺省果相顧不敢糾乃疏進而上留不發給事中荆可棟先上一疏微微點綴以探之烏程混票該部知道已而臺省相繼而進烏程知不可掩乃票旨逆案頒行已久何得妄希薦舉於是給事中宋學顯遂疏言霍維華昔曾極口袁崇煥之功願以己蔭讓之夫崇煥負君誤國遭禍甚酷豈堪維華再誤兵科徐燿繼之謂維華推戴崇煥不啻口出卽使不在逆案亦當服連坐之條況現奉皇上逆案奉旨方新居然薦用成何政體原闕之旨曾幾何時而世濟以統憲大臣藐旨蔑法公行抗違安望其正己率屬乎未及德州謂進退人才冢臣職也而徇人主使漫無主持將統均之謂何疏入上大怒遂下世濟於獄謝陞引罪卽准回籍烏程袖手不效一臂矣



是年正月賊高迎祥李萬慶張獻忠等連營數十萬攻滁州南京太僕寺李覺斯知州劉大章督率士民固守賊百道環攻城上連發巨礮擊賊死者甚衆而盧象昇援兵適至副總兵祖寬以關遼健卒爲前鋒象昇以火攻三營爲後勁躬率麾下五百騎居中督戰昧爽至城下賊方空營出掠官兵至不覺也祖寬大呼直入賊羣起接戰戰於城東五里橋賊大敗象昇麾諸軍追之北逐三十里斬三千二百級漕撫朱大典令參將楊世恩復截之於定遠斬三百餘級總兵劉良佐扼之於廣武賊遂西突池河次日賊自池河別道出東岡守備劉光輝孤軍格鬪力竭赴水死一軍皆沒賊襲其甲裳旗幟渡河奪路而走江浦總兵杜引域追之不及五里橋之戰祖寬殺賊近萬人盧疑爲平民有無辜之嘆祖寬大怒拉盧欲同往驗委是流賊與否盧乃以異語謝之祖惟冷笑終不釋然也一說盧督兵勦賊特招死士爲衝鋒陷陣之選賊令奸細混入其中對壘時奸細內應縛盧將獻賊矣中軍李某救之得免西走之賊復陷鳳陽朱大典同總兵楊御蕃列營陵牆下賊不敢攻遂掠淮達陷之朱大典攝兵至賊焚廬舍北渡陷靈璧進逼泗州祖寬再破之東破宿州突入沛縣焚戮婦孺靡有孑遺丁壯盡掠入營中賊迎祥合掃地王紫金梁等二十四營攻徐州不克遂西陷虞城入河南而曹操一字王五營由歸德趨開封總兵祖大樂潛師歸德截其前分兵設伏而以輕兵誘之遇賊於雪圍旣接戰官軍佯敗爭先馳



逐大樂鳴鼓麾東西兩翼突出攻賊賊驚大亂官軍三面奮擊斬首四千二百餘級

二月江北賊陷潛山又陷太湖

湖廣賊九條龍張胖子等攻竹山知縣黃應鵬棄城走縣有徵糧六百石賊遂奄有之食盡焚縣治而去東掠南漳陷穀城西陷竹谿房山知保康空城不入盧象昇統諸將追賊至穀城賊走鄖陽官兵三路並進適大霧賊不知兵至倉卒接戰官兵逐之大敗殺賊首黑煞神飛山虎追奔數十里祖寬李重鎮先馳赴荊州防其奔軼秦翼明楊世臣等搜山祖大樂由光鄧夾擊之賊大潰盡遁入萬山中

李自成出河南欲攻固始左良玉遇於閩鄉相持六日總兵陳永福援之敗之自成走登封土賊廖三袁世儒李玉石等以牛酒相迎張樂大譙連夥入營自成卽令廖三等駐河南當官軍而自率部賊走鄖陽循南山險阨遵商雒而行復出延西官軍敗績於羅家山自成自鄜州走延安而高迎祥蝎子塊亦自興安趨漢中陝西巡撫甘學潤以縱賊削籍聽勘以孫傳庭代之

四月賊過天星復叛於延安而老回回混十萬等自汝鄖入商雒大嶺李自成欲往綏德渡河入山西定邊副總兵張天機力戰却之賊沿河犯朝邑將圍綏德延安總兵俞翀霄引兵逐賊恃捷輕進陷賊伏中翀霄被執延綏精銳俱盡賊遂陷綏德米脂延長七月高迎祥蝎子塊攻漢中不克遂趨西安秦撫



孫傳庭設伏於盤屋邀擊大破之擒賊首高迎祥及劉哲等獻俘闕下磔於市蝎子塊卽劉哲高迎祥卽闖王也是時羣賊奪氣潛跡鄖陽山中盧象昇方合大兵逐之九月以勤王率關遼之兵北去老回回乃以全軍合曹操闖塌天諸賊合二十餘萬沿江長驅而下斬黃安慶江浦六合所在告警烽火及於儀揚矣鄖陽府宋祖舜追賊敗績失其符印削籍聽勘以苗祚土代之未幾祚土復罷去以陳良訓代之

十年丁丑正月外計浙江左布政姚承濟貪污衆著兼以錢糧積欠已列爲民中浙省諸紳溫體仁姜逢元王業浩等五十餘人公疏保留謂承濟居身廉慎剔弊精明爲從來方伯之冠有旨下部議覆覆上准降級管事後庚辰外計姚貪聲大著計察爲民使皇上追論前次保薦之罪不知體仁等何以置對二月會試天下主命大學士張至發孔貞運爲考試官取中吳貞啟等三百名

下戶部尙書侯恂於獄勞永嘉之推登撫也寶輦金入兵科宋之普家代爲營幹德州復三過宋學顯諄諄戒以言路交章而登撫另推之普輩懷恨未嘗須臾忘也至是之普以馬豆事參恂及學顯學顯以科臣巡視而恂則烏程所久側目者烏程票旨以恂徇私養奸革職提問學顯以從未經手免議之普與學顯同年同官修私怨悅當軸不難手出彈章人心叵測亦已甚矣左僉都宋鳴梧以子之普參恂



與學顯也終身以爲大垢遂謝歸里

三月廷試策士賜劉同升陳之遴趙士春等進士及第出身有差

例轉給事中宋學顯爲湖廣副使御史張盛美爲河南右參議撫甯侯朱國弼疏言溫體仁受霍維華厚賄謀爲出山假令唐世濟發其端又以言路之糾參爲宋學顯主使密諭吏部擠令外轉有旨責其誣捏首輔革職候俸

四月改河南巡按張任學爲河南總兵任學覲得巡撫且欲薦原任丹徒知縣張文光因極詆諸總兵不足恃而盛稱文吏中有奇材可以禦寇上竟以總兵授之意大沮悔

太倉民陸文聲疏言風俗之弊皆起於士子因參太倉庶吉士張溥前任臨川知縣張采倡立復社以亂天下有旨著提學御史倪元珙覈奏旣而元珙回奏極斥文聲之妄而申詳者蘇松道馮元颺也有旨元珙元颺著該部重從議處後部覆上俱降三級調用去歲張漢儒疏參廬山以致逮問故一時讒小得意告訐四起先是蘇州推官周之夔以爭軍儲事與溥采相忤蓋溥欲利盡歸於太倉而之夔欲公營之合郡事本甚公甚正後之夔密揭溥等於漕撫并傷知州劉士斗於是衆議沸然皆歸罪於夔夔與士斗俱不安其位以去至是之夔亦訐奏溥等樹黨挾持則曲甚矣



上命太監楊顯名總理兩淮鹽課顯名抵任查參前任巡鹽張養高欽舜各侵匿稅額幾十萬有旨逮問時養已卒命籍其家永平兵備劉景耀關內兵備楊于國各降三級管事時總監太監高起潛行部景耀于國恥行屬禮俱上疏求罷烏程票旨總監著照總督體統行事申飭已久景耀于國徇私瞻顧殊屬藐玩姑著降三級管事以後監司皆俯首屈膝莫敢爭矣

七月工部員外方璽疏皇上親擒魏忠賢而手刃之豈溺情奄豎者止以外廷諸臣無一可用而借才及之況人臣感恩圖報何論內外每見廷臣處地懸絕不若宮廷暫御效忠倍易凡此內臣邀茲曠典孰不願棄捐頂踵以酬皇上者不必鯁鯁過慮也給事中何楷參璽通內呈身請重治示戒有旨方璽降三級調外任用

大學士溫體仁罷烏程啣恨虞山必殺之而後快常熟陳履謙巨奸也特爲獻謀唆張漢儒參虞山并及瞿式耜並逮問下錦衣衛獄虞山爲老高陽門下士託高陽公子求援於大瑞曹化淳化淳係王安名下以虞山所撰王安碑文爲證曹瑞覽之泣下乃盡力爲營救虞山又令密友馮舒求援於馮銓連伺三日不得見第四日二鼓始命入堂中馮方欲有所言銓曰錢謙益的事我都曉得了如今已不妨你可回去教他安心卽揮之出馮次日入都局面一變矣虞山具辯疏將前後被陷事情宛曲點破上閱



之首肯淄川票語頗惡上盡行抹去止批不得瀆陳烏程謀始阻陳履謙復獻詭賊出首之計先具一匿名揭有虞山款曹擊溫等語隨令王藩出首云虞山賁四萬金託周應璧求款於曹璫曹璫覈釀無地自請窮究其事先是衛帥董琨定招以匿揭爲根據以王藩爲確證周應璧堅執不認董琨逼勒成招事頗昭著而曹璫奉旨嚴究大家搜訪備悉陳履謙父子奸狀遂擒履謙父子到廠次日曹璫五更親至外東廠審鞫先後嚴訊弔一弔夾四夾打二百扛拶一日招出張漢儒草疏王藩出首併伊父子捏造款曹和溫擒陳大字及改和溫爲擊溫等情歷歷有據凡領廠者非重大事情不親審不親至外東廠前年廠役緝獲逆犯董天王賞銀三十兩今緝獲陳履謙亦賞銀三十兩則其鄭重履謙可知已前此首狀中引式耜弟瞿式穀初爲陳履謙所愚至是洞悉其奸先後質對語皆中款曹璫溫語諭之令其盡言無所駁問於是逆案之謀翻總憲之薦霍與漢儒之疏匿名之揭王藩之首俱出烏程一手握定事狀昭灼獄上虞山及式耜俱從寬送刑部擬罪漢儒履謙俱立枷一個月而烏程允告之旨亦下烏程每興大獄必稱病以聚謀謀定而後出是時修理湖州會館擇日移居上疏邀宣諭之旨卽出矣淄川已票擬宣諭御書大書三字云放他去閣票有人夫祿米等項御筆抹去疏下出其不意方食失節長安中歡聲雷動雖婦人孺子皆舉手相慶云



烏程既去復當故卜上點用綿竹劉字亮進賢傳冠韓城薛國觀旨云著與輔臣張至發協同辦事不稱首輔淄川有與善者勸宜且稱病淄川沉吟久之曰無奈賤體頗康昔宋蔡攸引其父京手作診脈狀曰大人脈勢舒緩體中得無少倦乎京曰無有攸去京語客曰此兒殆欲以疾罷我也淄川才智萬不堪京作奴而不肯稱病則古今合轍矣

山東民家墾地得數顆古鳳印有明鳳年號蓋小明王時年號也巡撫顏繼祖具疏以進極盡諂諛若與玉璽鳳麟同一呈瑞識者預占爲不祥謂分爭從此起矣

唐王之父爲世子時以世弟離間故失愛於老唐王鬱鬱以死老王薨唐王嗣位卽上疏列其寃上遣大璫二人往唐府和解之唐王所以媚二璫者不遺餘力二璫甫出境卽懸父世子像召兩郡王至數其罪並極殺之事聞於法應賜自盡以大璫左右之發入高牆宏光卽位乃得赦出乙酉清兵南下唐王走福建撫鎮張肯堂鄭芝龍等擁立稱帝改元隆武說者謂旣入高牆似難復君臨天下矣

時當考選行取各官俱鱗集都下舊例止推敲臺省甲戌復增入詞林雖以官評爲據而營私者正自不少時江南推轂建陽知縣沈鼎科而歸縣知縣陸自嶽必欲攘之互相訐揭陳啟新疏論及之奉旨著指名回話又旨下吏科取訪冊進覽於是姜逢元王業浩孫晉等皆以圖多蒙旨詰責有何廣知若此



之語各降調有差啟新回奏指涇縣知縣尹民興江都知縣顏允紹及同鄉預定詞林之陸自嶽部覆三人俱降處自嶽卽許奏沈鼎科鼎科亦不得考選吏部尙書田唯嘉乃請先推部屬所共推二十三人皆孤立寡援者輿論譁然諸受推者亦各懷不平惟成勇恬然無怨色不數日竟辭朝赴南京吏部之任識者共服其雅量云

逮福建興泉兵備曾櫻廠役緝事緝得曾櫻營陞事狀有旨逮問櫻力辯無此事人役書禮皆僞也旣而漳泉副總兵鄭芝龍疏曾櫻廉明忠恕龍感佩其德特代爲之營陞而來役疎虞致蒙聖譴其實與櫻無干願以官贖罪有旨姑不究曾櫻仍還原職

按芝龍爲泉州南安人初同弟芝虎流入海島顏振泉黨中爲盜振泉死芝龍代領其衆剽掠海上官兵不能禦興泉兵備蔡善繼以書招之芝龍降善繼坐戟門令芝龍兄弟囚首自縛請命芝龍無難色芝虎一甯皆譁同叛去攻取廣東海豐嵌頭村以爲巢穴掠奪商民船復進擊漳浦等處時天啟六年也巡撫朱一馮遣總兵洪先春擊之而令游擊許心素陳文廉爲策應會海潮夜發心素文廉所統水師皆飄沒失期先春大敗總兵俞咨臯望風先逃崇禎元年給事中顏繼祖疏劾咨臯喪師失律臨陣怯逃有旨革職提問芝虎最躡捷能於海面跳越兩舟左右擊射人莫敢攖其鋒適



爲颶風飄沒不知下落芝龍頓失所恃二年巡撫熊文燦招之芝龍降授官游擊三年海盜李魁奇倡亂芝龍擊斬之六年海盜劉香老犯長樂又犯福建小埕芝龍擊走之七年劉香老犯海豐兩廣總督熊文燦令嶺南守道蔡雲蒸巡道康承祖參將夏之本張一傑招撫之俱被執八年芝龍統福廣兩省兵擊劉香老於田尾遠洋香老敗困挾守道蔡雲蒸遂自焚死承祖三人脫歸敘功加芝龍副總兵十三年加芝龍總兵

是年正月總兵秦翼明逐賊於麻城黃岡間敗之老回回整齊王張獻忠等九營分而爲三一走羅田一走團風鎮一走蘄水闖場天等又分三路擾江北一自桐城犯廬江舒城一自固水犯霍山六合一自潁州犯滁州營火夜燭數十里

李自成敗官軍於寶雞縱掠涇陽三原等處西安大震

二月左良玉大破賊於舒城六安三戰三捷秦翼明敗闖場天於細石嶺擒賊首一條薊飛山虎賊至英山立營山巔伐竹爲筏爲渡江計朱大典檄左良玉入山搜捕良玉不應屯舒城月餘大典三檄之始自舒城進發賊已飽掠出境矣山西總兵王忠統兵剿賊稱疾數月不進一軍噪而歸西給事中凌義渠劾之有旨王忠逮問左良玉革職殺賊自贖



閏四月以熊文燦總督五省以常道立巡撫河南以孫傳庭兼河南總督時宣大總督楊嗣昌守制家居上特起爲兵部尙書嗣昌具疏辭不允令以墨纓從事嗣昌舉文燦爲總督而大發兵剿賊戶部苦於無餉嗣昌建議每條銀一兩加銀三分名因糧納餉共加賦二百萬兩以濟軍需下詔有誓累吾民一年除此心腹大患等語

按因糧輸餉一項止徵一年惟應撫張國維浙撫熊奮渭相訂獨徵二年江南十府共二十餘萬盡入私囊華亭許公譽卿不平其事獨持昌言而羣分國維之潤者競起而和解之公論遂不克伸故從來應撫之富以國維爲第一旗鼓朱某亦婪有二萬金亦從來旗鼓所推爲第一蘇松沿海等口素嚴出洋之禁張國維令守海諸將弁潛放洋船出海俟其滿載而歸盡掩取之兩年所得亦不下百萬

十月陝西賊過天星同李自成陷甯羌混天王革裏眼等會之分三道入四川自成自七盤關度朝天閣戊戌至廣元壬寅陷昭化癸卯過劍閣甲辰陷劍州乙巳陷梓潼黎雅參將羅尙文大敗混革二賊於廣元斬首千餘級賊自梓潼復分爲三一走潼州一趨綿州一入江油遂陷青州彰明鹽亭等縣進圍綿州巡撫王維章次保甯畏賊不敢出丙辰賊焚郫縣漸逼成都事聞維章革職聽勘以傅宗龍巡撫



四川 王維章所至以貪墨著備兵西甯以剋削致激軍變巴縣力護之舉爲川撫至公然形之揭奏曰維章臣畏友也臣益友也等語及任四川狼藉無比至受番夷黃金四萬兩擅將邛州界內地割以與之合州士民咸憤不平迄無敢以入告者次年楊編修廷麟召對乃指及之真開人不敢開之口矣

十一年戊寅二月下刑部尚書鄭三俊於獄先是馮英下獄改用三俊適當侯恂屯豆一案先有讒言謂三俊與恂皆東林契友必將屈法徇私上入其言至是獄上果多爲恂卸罪上大怒并三俊亦下獄宣大總督盧象昇首先具疏稱冤盧昔爲鄭司官素服其公忠廉慎者也繼盧者不下十餘疏而應天府丞徐石麟爲最略曰鄭三俊品重三朝賢著四海即使果有過誤猶望皇上優容老成曲施赦宥今擬議一不當而僇辱隨之將敬大臣之義何居漢張釋之爲廷尉不敢屈法以徇主意文帝卒降心以相從千古兩賢之謂非釋之不能守朝廷之法非文帝不能用釋之之言臣於是而歎臣工之不能仰體皇上也皇上每事欲踵前哲而臣工輒道以刻薄慘激之術皇上每事欲臻盛治而臣工輒佐以刑名擊斷之學皇上每事欲崇禮義而臣工輒肆其乘間抵隙之私云云閣票回話發改閣票爲民又發改閣票提問御筆批可將三俊罪狀一一講明不必更處奏事官閣中乃票令旨以進當晚卽下



禮部題二月十七日皇太子出閣講讀侍班官四員禮部尙書姜逢元詹事姚明恭少詹事王鐸屈可伸講讀官六員禮部侍郎方逢年右諭德項煜修撰劉理順編修吳偉業楊廷麟林增志較書官二員編修胡守恆檢討楊士聰侍書官二員中書黃應恩朱國詔舊制日講官東宮講官無相兼者恐皇上與東宮同日御講筵致相妨也黃應恩既充正字又充侍書則以淄川從外入不諳衙門規例而士聰係辛未增志係甲戌一輩尤爲錯謬臨期逢元罷去侍郎顧錫疇代

二月十二日上御經筵畢召禮部左侍郎顧錫疇等二十餘人問保舉考選二者孰爲得人諸臣各以大意支吾諭德黃景昉獨以鄭三俊下獄及朱天麟成勇不得考選對上細詢良久諭以三俊蒙詢有徒清亦不濟事之語至朱成二人則庶子李建泰而下多同辭稱其果屈上命起序列有言者出奏於是諸臣各陳所見上亦隨意答之上又曰言須可用如先年講官姚希孟欲將漕米改折一年這個行得行不得編修楊廷麟對自溫體仁之舉唐世濟王應熊之舉王維章今二臣皆敗而體仁應熊竟無恙是連坐之法先不行於大臣而欲收保舉之效得乎上爲之動色久之無所言項煜乃奏成勇不得考選以任濬爲閣臣張至發兒女親家前任濬列在第二後以有議以成勇易之閣臣不欲勇獨得考選若曰得則俱得失則俱失云爾上曰誰沒有個兒女親家這也不在此至發奏請敕山東撫按勘驗臣



與任濬結親或現在或已亡有一於此治臣之罪上諭以不必與辯對畢諸臣出朝吏部偵事者誤傳奏成朱者爲楊廷麟田唯嘉恨甚嗣是轉攻廷麟矣次日黃道周黃景昉楊士聰各有疏景昉中言鄭三俊事道周疏亦及之士聰則言考選事而田唯嘉亦有疏則直攻楊廷麟內云成勇任濬各爲同鄉所引科道求科道詞林雖未預訪單而暗中皆爲主持臣一旦推之部屬安得不觸諸臣之怒至楊廷麟則尤有說焉今考選推部之涂必泓係麟同鄉至戚保舉聶明楷係麟同鄉萬穀春所保舉臣且參革并穀春議降調矣是以廷麟恨臣以保舉考選爲不平而特借成勇朱天麟爲口實也奉旨接引主持有何憑據且原奏係黃景昉何訛爲楊廷麟還通著明白回奏十六日上御日講面諭黃景昉昨原切責鄭三俊豈是矜亮又諭俞煌昨召對有姚希孟全折漕糧一年之說煌對曰行不得如何此疏竟隱不載時講官張少詹四知出語人曰今日上怒甚說者謂三俊自此得釋矣十九日上御門畢諭百官數百言內言鄭三俊一案屯豆牆穴情弊顯然有何可疑而欺罔委卸巧爲彌縫屢奏批駁訖法愈甚但念別無贓賄姑作回家聽擬蓋聖明本欲受言第不欲恩歸於下耳三俊以初九日下獄風霾陡作咫尺不辨是日得釋微雨澄清誰謂主心不上應天心耶按講章之末必附時論一段猶奏疏中條陳非欲必一一見之施行也姚文毅進講在上初年時入夏始兌糧阻凍間河直待來春始得交



納京倉較之祖制十二月兌糧二月開幫五六月赴京交納七八月回空何啻天淵故引及之云或不妨改折一年以通其窮亦作商量語耳後史堉辨疏復牽及先文肅與文毅乃知羣小所以相中者不遺餘力八年之後猶令人主追憶其過如此

楊士聰疏下著指名回奏於是指陸自嶽張若麟沈迅蓋自嶽與沈鼎科同在考選自嶽爲陳啟新指參降處不甘鼎科獨留特出疏以傾之若麟與迅則愛省中不愛詞林者蓋當考選時第一第二當爲詞林第三第四當爲省中第五第六當爲柱史迅與若麟列在三四此正握定省中樞要也及任濬議處乃舍第三之迅而推第五之成勇此其驗也

東宮講讀官項煜楊廷麟各疏願讓少詹事黃道周淄川具疏極排之內云道周近疏有臣不如鄭鄭之語夫蔑倫杖母明旨煌煌鄭何如人而自謂不如是可爲元良輔導乎草此揭者中書黃應恩也先是戶部尙書馮英同時下獄道周辭官疏內及侯馮因遍及用刑之未當者鄭鄭特其一耳疏中有一日內塾兩尙書偶遣一尙字有旨疏一日內塾兩書敬慎何在迨後英竟以微罪得釋是上未嘗不用其言也給事中馮元颺上疏略曰頃項煜楊廷麟疏讓黃道周夫二臣係閣臣所選不肯苟悅於閣臣爲閣臣者宜深加贊歎風勸百僚而近日一揭若大不快於其言者并遷怒於道周何也若以道周建言



爲罪則皇上已還其清秩數次奏皆荷優容天下萬世皆頌爲主聖臣直一大盛事而閣臣反因此怒及道周恐天下後世以議閣臣之有得失矣淄川又出辨揭謂臣硜硜孤執卽有苟悅之臣不能呈身於臣云云亦應恩代草也旣而復上世風宜挽一疏屢數千百言內云道周出山緣愛母之心借一言以周旋鄭鄮豈曰非孝但不宜以朝廷是非爲一己環草之私又云有一二人焉建壇玷執牛耳自命於人曰吾將主持世風已而自命者與附之者入主出奴了不得其何緣何故未又請禁投刺往來云自今士大夫門盡可羅席盡可塵夫人而能爲言也夫人而能爲讓也終推重於溫體仁稱其孤執不欺竊願學之云云此疏出江夏手嗚呼江夏生平於斯掃地矣編修吳偉業具疏駁之略曰前事者後事之師今日輔臣之鑒取之溫體仁而足矣體仁學無經術則當請求仁義練習朝章體仁性習險諛則當矢志光明立心公正體仁狎匿宵人則當嚴杜譚訾之輩體仁護持逆黨則當力繼忠孝之經庶幾聖恩可副輿望可塞乃積習未化近日辨揭盛稱體仁之美曰孤執曰不欺夫體仁有唐世濟關洪學蔡奕琛胡振纓胡鍾麟之徒參贊密謀有陳履謙張漢儒陸文聲之徒驅除異己何謂孤庇樞貳則總督可不設而事敗乃設庇鳳撫則鎮可不移而事敗乃移何謂執皇上之決去體仁謂其善欺耳家窩巨盜產過蒼溪自詭曰廉孽子招權匪人入幕自詭曰謹何謂不欺輔臣真以爲孤執不欺乎若仍



因私踴躍盡襲前人所爲將公忠正直之風何日得見夷狄盜賊之風何日得平也適上御經筵項煜面糾淄川庇至戚任濬而擠成勇淄川再疏辨有旨著項煜回奏略曰有問斯對而曰紛囂爲國摘奸而曰排擠至發至何處把持則臣敢明白指之曰考館則把持於閣中推補則把持於吏部又云臣孤冷自守於考選何與於任濬成勇何預向使經筵不召對不問用人諸臣不言及考選則臣雖有區區之愚何自而發當日一堂都俞夢想不到拜颺之語一片肝膈而至發乃謂臣爲異同爲愛憎如此欺罔豈能逃聖明之燭照哉疏語最切第疏內指任濬與淄川次子聯姻則未確謂濬以銀鞍馬賄張孫振斥爲貪吏則太過有旨著再奏而淄川八出疏曉曉攻訾全無大臣之度矣項煜遂奉旨議處

東宮日講黃充正字管誥敕撰文又兼東宮侍講勢不能相顧凡傳講寫講皆委之朱國詔臨時國詔病不能出乃暗撰儀注委之較書淄川不詳所以遽爲題請士聰等詣閣力辯其謬旣而項煜等撰完講章送應恩應恩復拒之云此楊胡二公職掌士聰亦不平具疏爭之發票淄川卽具揭隨進士聰遂不行士聰乃尙書閣中極言其事而應恩適以撰文事特旨爲民撰文者本兵楊嗣昌父楊鶴三邊總督以逮問遣戍至是甯夏敘功奉旨復官給誥命舊例贈恤誥命皆中書撰文者爲之應恩爲楊鶴撰文極力洗發呈上上塗抹發下合查職名議處淄川將具公揭申救旬容進曰去年許朗城事與此同彼



時未曾申救今奈何救之蓋前歲許祭酒撰高忠憲公贈誥爲上所駁降處也淄川憤曰難道閣中少得此人諸公不救我自救之連進三揭上終不允御筆批云撰文官自註職名新經申飭黃應恩供役閣中首先違玩人臣功罪各不相掩蒙冤等語視當日之處分爲何如黃應恩著革職爲民楊嗣昌疏救亦不聽既而大理寺副曹筌疏參應恩納賄等事先是四川富順知縣許國佐以參劾下部應恩受其千金許爲從輕票擬適又有摺摭應恩事款一冊乘夜投於中書周國興之門由是長安喧傳直達聖聽曹筌疏入有旨著刑部提問

給事中王都疏參吏部尙書田惟嘉略曰冢臣之與逆黨作緣非自今日始也當王永光借題邊才引用匪人之日惟嘉爭先應募卽薦楊維垣賈繼春二人章光岳遂薦呂純如霍維華傅樾徐揚先虞廷陞葉天陞六人賴聖明獨斷有逆案奉旨方新居然薦用成何政體之旨而後羣奸屏息疏在御前可覆案也夫唐世濟應喜臣薦一人而拿問彼薦二人薦六人者宜何居焉疏入次日上召對閣臣及惟嘉出疏示惟嘉諭以秉公盡職不必與辯前有疏參刑部侍郎章光岳行人司副水佳允蓋光岳官通政時建議請於逆案中有枉者辯疏許其封進佳允官御史時疏請吏部將逆案中不平者一一明告有旨吏部議覆惟嘉復光岳致仕佳允免議故都并參之先是德州去位惟嘉以吏部侍郎內旨陞吏部



尙書其勢張甚凡臺省議及者必以年例處之若宋權宋學顯凌義渠皆其人也都可謂履虎尾而不悔者矣

田惟嘉疏參楊廷麟奉有明白具奏之旨而屢疏回奏總無指實上詰責不已會項楊各疏參淄川遂以項楊爲接引以河南掌道御史王萬象爲主持又有神謀權力一疏其云神謀權力者一指李嗣京爲句容所托一指涂心泓爲進賢所托蓋淄川在閣中惟江夏欣附同臬句容進賢多所不合惟嘉知之欲借此以傾二人二人大懼惟嘉疏發票淄川時待罪在寓句容進賢票擬項煜楊士聰著議處復進密揭言煜與士聰疏參首輔有壞閣體當加重處隨使人傳語於惟嘉惟嘉大喜再上回奏疏神謀權力卽指項煜士聰萬象三人句容進賢復票議處尙未進而惟嘉前疏密揭乞加重處者御筆批面奏成勇不得館選乃黃景昉今言楊士聰是何緣故項煜已有旨了長安喧傳田太宰挾質挑戰兩閣下望風投降者卽指此也

士聰指名疏下查沈迅等三人治行及考滿緣由具奏惟嘉將考滿開復截俸日月俱隱匿不載止詳著其各院考語士聰隨上大臣蒙欺有據一疏內指惟嘉得周汝弼銀八千兩升延綏巡撫係大理寺丞史堃過付又參史堃巡按淮陽時署巡鹽事侵匿課銀二十一萬兩有旨史堃沈迅張若麒各著回話



而惟嘉復上盡職招誣一疏內云士聰參史堇並及臣也蓋有由矣史堇者時局之所懲惡而不容者也若麒與迅皆爲堇父母官士聰惡史堇並及其父母官也已久唧之又見成勇被臣推部屬倘麒迅及選科道則惡其氣味不投必欲一網打盡以爲快也沈張回奏俱言士聰平日招搖局騙至於考選大典公然登壘而招已惟中正聽命以致大觸其怒云云而於開復考滿日期俱置不及惟嘉又收陸自獄爲助自獄亦出疏參士聰羽翼沈鼎科爲接引指吏科葉高標爲主持高標鼎科鄉房師也史堇回奏疏云臣孤立寡儔屢糾奸惡今乃誣以關通閣部之線索憶向年文某姚希孟爲詞臣之雄死者死矣文某借虛名以入閣入閣便行私去後復草疏稿募成德代上臣曾有綸扉之線索一斷論議之風雨寂然二語有犯時忌故士聰借考選之事硬以線索二字誣陷微臣也具辯疏云臣入仕以來指佞如仇奸黨恨臣久矣士聰曾受宋琮銀萬兩營謀館選又今特出聖明燭奸之疏丟却考選突以田惟嘉得周汝弼銀八千兩濫推延撫指臣過付臣巡按淮揚僅代鹽差數月便誣以侵匿鹽課二十一萬伏乞勅下九卿科道將此疏會勘令淮揚內臣楊顯名及周汝弼各自面奏則士聰之誣捏始露而微臣之心跡得白矣有旨俟衛招訊明定奏奪 史堇貪著淮揚幾與崔呈秀等三尺童子能道之其侵匿鹽課爲延撫過付俱自作之孽於人何尤乃無端辜及時局又無端辜及先文肅姚文毅何爲



乎先文肅以請改正光廟實錄一疏荷蒙聖鑒致此超拔非關虛名也大璫屈意求好先文肅堅拒不應是私行者否必如烏程之謀翻逆案巴縣之力庇貪撫方謂之不行私者乎至成德應募之說乃禹好善造此以取媚烏程耳今烏程罷矣復拾好善餘唾何爲乎雖百足之蟲至死不僵終不能當聖明離明之照也宋琮萬金之說尤屬誣讎宋致擬爲出疏申辯而躊躇未定給諫之念重雖其兄受誣於身後勿遑恤矣嗚呼

四月吏部尙書田惟嘉罷時士聰廉得惟嘉納賄事款復上聖主神明燭弊一疏淄川見疏有事款卽密抄一通送惟嘉俾預爲辨地不意惟嘉不待旨下而遽上疏辨也士聰乃上臣疏預設甚奇一疏有旨著惟嘉回奏而前疏竟下錦衣衛提究事既下部矣惟嘉仍視大選自如給事中吳麟徵上疏略曰今之進言者益難矣爲公正而發憤動輒指爲朋比卽自盡其職掌亦借題以驅除卽如冢臣田惟嘉鬻官通賄事下衛訊供吐未盡職已累累其奴與私人方在對簿而其主安坐朝堂視事尤爲三百年絕無之事未云以真廉真謹之鄭三俊尙不免爲法蒙譴以極貪極橫之田惟嘉乃容其跋扈自如有旨冢臣以推選視事不得苛求蓋淄川力爲之地也旣而惟嘉回奏疏稿預洩緣由稱係寫本人所送進有旨旣係寫本人傳送何難稽查著卽指名速奏惟嘉再奏乃稱是蚤有人傳呼門外云有人誣捏你



主人事款速速取去門役驚起開視則其人不能久待竟擲檻間而去嘻直同兒戲矣士總復上家臣說謊面欺一疏有旨奏內事情著田惟嘉據實回奏不許一毫支飾取咎惟嘉窘極乃疏請罷云士聰之意欲攻陷臣希圖翻案爲推部請臣復謀考選臣一日在部其私心一日不遂乞將臣解任聽勘有旨田惟嘉准解任回籍

大學士張至發罷上復御講筵諸臣於文華殿門鵠立上傳項煜方在議處不准入班講畢復謝閣臣俾項煜回奏越兩日而淄川罷煜亦降三級調外任蓋上將放淄川不欲煜居其功故有此傳諭而淄川之罷則實以洩士聰之疏於惟嘉頗忤聖意云

士聰聖明燭奸疏既下衛內指田惟嘉家人田少峯過付事甚夥衛役初提顏裁縫等惟嘉舉家大驚聞其奴有仰藥自盡者未知卽少峯否也然少峯究竟不出而惟嘉之金珠已捆載入衛帥吳孟明家矣已而衛招上止招盧以岑升主事用銀五百兩係田登弟過付於田敬宗仍謂惟嘉初不知之有旨提田登弟再審已而衛招照舊止認盧以岑一事且云並無田少峯其人奉旨原參事款多端豈止盧以岑一件何得聽其狡飾還著嚴訊確供具奏又衛招顏裁縫徐大章供稱周汝弼用銀八千濫推巡撫係史堯事非大章等經手止增招出武強知縣傅蒙麻差人持銀三百三十兩三百送田尙書三十衆



人分用有旨惟嘉革職蒙麻革任原參六款再嚴鞫確情具奏

衛招再上奉旨田登弟既係伊大子家人五百多金豈有僕役瓜分之理吳孟明不從實根究殊屬執徇姑著再降二級戴罪田敬宗革了職提來并周汝弼事情嚴訊確供具奏

田敬宗牛選授都察院都事至是提到下衛審問供認沈萬春一事得銀六百兩其餘如前招有旨沈萬春提問敬宗再行嚴審奏蓋上所重者延撫事也於是有稱過付非史堽爲張紹先者給事中吳希哲遂具疏參紹先要之紹先預其事不止紹先一人蓋衆人深爲史堽出脫地耳後衛招止仍舊奉旨田敬宗等俱著送刑部擬罪具奏

四月十二日上御經筵畢復召對六部本兵楊嗣昌奏有盈城盈野善戰者服上刑等語上諭今天下一統與孟子列國兵爭時不同今不過一屬夷小醜縱不能伸大司馬九伐之威奈何爲是言耶隨戒以今後勿復言爾時上聲色甚厲嗣昌頓首認罪後又言湖廣巡撫余應桂用將官事既退嗣昌復上疏請罪因言應桂前任御史曾參臣父先國家之急而後私仇等語未幾而嗣昌援立應桂逮問其轉移之機甚祕甚捷人不得而測之也

時火星示變皇上於宮中齋沐祈禱素服減膳并諭各衙門俱角素修省楊嗣昌上疏略曰臣聞月食五



星古今異變史不絕書然亦觀其時勢主德何如今茲月食火星在於前月己酉納音屬主律應中宮然有陰陽之分戊申陽宮主帝座己酉陰宮主后妃其時寅卯適值烹廟成妃發引內外文武百官祭奠郊外其所謂白衣之會在宮已有其應陰無庸致疑一也當食之時火星觸月在于上角不在中亦不在下臣愚謹視明白無庸致疑二也又云臣稽千古月食熒惑不爲大災者蓋亦有之在漢光武建武二十三年丁未三月月食火星其年無事明年匈奴入部人立呼韓邪單于款五原塞事下公卿議者皆以爲不可許五官中郎將耿國獨以爲宜如孝宣故事受之以率屬四夷帝從之明帝永平二年己未十二月月食火星頻年無事皇后馬氏馬援之女也德冠後宮嘗衣大練明帝圖畫功臣二十八將于南京雲臺又益以王常李通竇融卓茂三十二人馬援以椒房之親抑不預焉唐憲宗元和七年壬辰正月月掩熒惑其年田興遂以魏博來歸李絳推心撫納結以大恩宋太宗太平興國三年戊寅七月月掩熒惑其明年興兵滅漢軍駕遂征契丹連年兵敗宰相張齊賢上疏以聖人舉事動出萬全必先本後末安內養外之說進臣愚所聞如此給事中何楷駁之略曰孔子作春秋書災異不書事應其言天道則不可得而聞今嗣昌縷縷引出何典據如探其立言本意則路人咸能指之矣引漢武款塞故事欲借以伸市賞之說也引元和宣慰故事欲借以伸招撫之說也引太平興國連年兵敗



故事欲借以伸不敢用兵之說也其附會誠巧至於永平二年一條所述皇后馬氏等語更不知其意所指斥安在有旨樞臣不必深求嗣昌辯疏止云臣所引皆漢唐信史雲臺圖畫獨抑椒房之親乃以書盛事臣比類言之而科臣以爲指斥豈其昨年聖諭勳戚不知厭足縱貪暴于京畿者科臣獨未之聞乎至于市賞招撫不敢用兵之說則絕不辯蓋當召對善戰上刑之說其機括已陰轉矣故虛虛籠罩支吾了事至雲臺圖畫誠不識其立意何居也說者謂嗣昌爰立之樞要全在此然其邀聖眷者不在此一疏而所謂用心于奧竈之中者可類推矣

四月二十八日上御中式門策試考選各官上自定三等翰林給事御史其餘發部量授各官朱天麟曾就義等爲翰林王調鼎涂必泓李嗣京任溶張爾忠高名衡等爲給事中御史而沈迅張若麒在散數並授刑部主事惟蘇在先陞蘇州同知成勇陞南京吏部主事俱已赴任不及試涂必泓復爲成勇稱屈奉旨成勇改南京御史用

原任兩淮巡鹽張錫命男張沆疏鹽課存解甚明事內云臣父丁艱後共貯庫銀二十一萬兩有奇銷歸何處接管按臣史堃並未嘗爲父代解此二十一萬兩銷歸何處疏入閣中詳擬一旨以進及命下所擬嚴核等語俱行削去止批該部知道就中機竅人不能知也後南京給事張煜芳進疏補糾寺臣貪



汚事內糾史堇侵匿鹽課二十一萬兩又糾堇與中書汪機晝夜酣飲女優侑酒都無官體臨行寄贓數十萬又糾堇知於承祖家貲鉅萬乃因告訐索銀萬兩意猶未足承祖避之南京抑鬱而死其子於道章可證又言堇事發後密使幹僕資金潛往書吏睢承吾之家意圖毀改簿籍而未卽以張沆原揭附之疏入御筆批史堇著革提尋奉旨具奏史堇鹽弊多端贓私狼籍比匪攬利大千法紀與汪機俱著革了職并睢承吾通著提解來京究問是時焜芳有二疏一求改成勇爲科已奉旨議處一卽糾堇疏也史堇提革之旨特出宸裁於是羣情翕然頌聖明獨斷云

真定巡按李模疏監臣貪肆非常事分守太監陳鎮夷貪婪暴虐官民寒心謹昧死特陳具狀舊知識郭名揚先往保定迎接餽銀三百兩一到任卽題充旗鼓關通賄賂倚爲腹心憑聽蕭錢兩主文本章批判盡出其手凡攬受田產小詞盡批解究奸徒得志殷懦股票因關把總何起龍托旗鼓送銀二百兩求管關稅每日抽黃錢二三十千不等單身人過亦索錢二十文怨聲載道工食器用等項不許科派里甲非勅書所載乎乃私用米豆發牌行唐等縣買辦止各發銀一百八十兩計各費過三百四十兩有賄解富戶可問建造衙宇費過工料銀五百餘兩復行趙州等處攤派有督工王省祭可查營兵月餉應問易州餉司支領忽坐下真定州縣本色豆三千石草九萬束是額餉竟可混徵也營兵每月



餉銀二兩二錢乃每名扣除四錢七錢不等五營官總送衙內至領兵上關每名該行糧升半止給一升草每束折銀四分入已馬多餓倒以致兵士憤恨槐樹鋪逃去馬兵三百餘名鎮城又逃去二百餘名伴付不知支糧如舊至其縱兵爲盜也任文秀躍馬截刦于普州箭茅入骨當經馬保印等搜獲賊錢乃文秀不究而赤馬牽入私厰矣王家達司二等行刦官路當經劉均艾等人馬連獲乃偏聽千總王道新曲稟而捕役反問成徒罪矣撞門刦殺賈永先家則有趙標莊應倫等將珠寶衣服對人誇張而失主不敢告官矣刦殺郝三九拋井則有呂世龍于武衆等被尸親認驢喊告而問官不敢直指爲兵矣將官獻餽何一不從扣剋得來乃令郭旗鼓向每營將官索要三千兩各先送過五百兩獨火功營將王震仲素負氣骨不肯應承終日提營中官役呵責仍央郭旗鼓解說送銀爐銀如意各一件羅段潞紬各十匹馬二匹羸一頭尙嫌不足又向龍固營守備白之崑指查賣放撈河軍人要從參處央郭旗鼓送銀四百兩俱從東邊小門交張掌收入合軍皆知更可異者查城上托張中軍傳意州縣一二等各要謝薦儀二百兩且關防何事就中嚇取卽藁城一縣勒送銀壺二把金盤盞四副而曲陽之牙綬一網收盡是爲何體恣意摧辱士類以示威風舉人閻東井縛來庭許生員趙必達徑批黜退甚且控寃之王相嫡兄被兵趙士采王家士等刦殺有案徑行提問賊兵收營寃生下獄顛倒戮士是爲



何法尤可訝者近日鞏固營總練報升當夜二鼓令郭旗鼓向張德昌講話約定銀三千兩題補前缺次日即與發本是大帥可以貨取也一疏拔置三將領是樞部可以不設也不亦廢典制而辱刻章乎至如縱放張家掌等橫擾驛遞倍索乾折嗔怪并陘等縣供應不周凌辱正印典史驛丞動責數十猶具貪戾之餘波已若其接待有司箕踞謾罵稍不遂意開口提參逼致生日餽獻銀鑄壽星鑑爵杯盤及繡段等件充斥衙署有各衙門小報可據儼然自稱軍門而勒送禮物嗟乎皇上有何負於內臣而敢舉朝廷之禮法綱紀將士吏民一旦凌夷暴殄至於此極也奉旨司禮監查議具奏當時所遣內奄在在播惡不獨一陳鎮夷第他處撫按不敢直陳惟模能據實入告耳後鎮夷訪模在任廉謹無可指摘乃訐其與真定同知凌必正營私等情必正李同鄉也事下真定撫按查核具奏而彼此觀望推諉者三載至十四年其事始結模與必正俱降三級調用

六月十八日上召對諸臣出題考試尋改楊嗣昌程國祥俱禮部尚書嗣昌仍管兵部事陞方逢年蔡國用俱禮部尚書范復粹禮部左侍郎俱兼東閣大學士入閣辦事蓋嗣昌上所最注意而國祥以房號國用以牙石若逢年復粹則其偶及者也房號國祥時爲房戶部尚書建議借合京賃居一季之租及京直會館守寓者亦出修理若干其初謂可得五十萬其後戚畹勳臣巨璫概從隱匿所得僅十三萬



而已牙石者立列于崇文宣武兩大街之中以備駕出而除道者時培修外羅城無從取石國用時爲工部侍郎建議用之然用力甚艱工費甚浩得不償失也而二臣之受知皇上則由于此 武陵入閣到任儼然緋袍與江陵同說者謂江陵藉口大婚權從吉服武陵則何說之辭蓋其心已死久矣先文肅以四品少詹超入政府已屬異數後韓城以僉院黃縣以少卿亦俱從四品超擢尤足異云始淄川以刑侍入韓城以僉都入說者謂廷尉中當亦有騰升而上者蓋三法司之驗也今黃縣果以理少入然徒伴食耳無關輕重也 時揆席旣內外兼用館選又從知推考入于是建議詞林亦得于別衙門升用故少詹紹賢升戶部侍郎倪祭酒元璐起兵部侍郎仍兼侍讀學士 司禮監視政府文書房視詞林向來司禮掌印秉筆諸奄皆從文書房入至今上而盡破舊規更改舊章此亦其一徵云



明季稗史彙編卷六

烈皇小識

丙子清騎闖入洪承疇廬象昇俱率師入援事平卽命承疇總督薊遼象昇總督宣大至是上念流賊交訐從廷臣議以承疇專任關外升薊撫吳阿衡總督薊保象昇專任剿賊起升陳新甲總督宣大新甲亦守制家居武陵欲援以自解會推時卽奉有不拘在籍丁艱之旨而後推及之少詹事黃道周連上三疏其一楊嗣昌不當奪情入閣其一言甯錦巡撫方一藻撫賞事與上年俺答不同不得援爲口實其一言不當又奪情用陳新甲於宣大如無人肯往臣願任之時七月乙巳上召廷臣于平臺問道周曰朕聞無所爲而爲者謂之天理有所爲而爲者謂之人欲爾前疏適當枚卜不用之日果無所爲乎道周對曰天下止有義利臣心爲國家不爲功名自信其無所私上曰前月推陳新甲時何不言道周對曰時科道何楷林蘭友皆有疏二臣臣同鄉恐涉嫌疑耳上曰今遂無嫌乎道周對曰天下綱常邊疆大計失今不言後將無及臣所惜者綱常名教非私也上曰清雖美德不可倣自是惟伯夷爲聖之清若小廉曲謹是廉非清也道周對曰伯夷忠孝兩盡故孔子許其仁今楊嗣昌雖有小才然古者惟門庭之寇不得已而以吉禮從金革故有奪情之事今用嗣昌于本兵猶可藉口于金革近用嗣昌于



政府則禮法之所不容天下未有不父其父而可稱爲子者未有不能孝於親忠於君者嗣昌出班奏曰臣非生于空桑豈遂不知父母臣嘗再辭而明旨迫切道周學行人宗臣實企仰之近疏謂不如鄭鄮臣始太息絕望鄭鄮杖母行同梟獍道周旣不如鄭何言綱常也道周曰臣言文章不如鄭鄮非謂品行上怒曰此皆是矯辭飾說顯是朋比道周對曰衆惡必察臣何敢上曰孔子誅少正卯當時亦稱聞人惟行辟而堅言僞而辨不免孔子之誅道周對曰正卯欺世盜名臣無其心今日不盡言則臣負陛下今日陛下殺臣則陛下負臣上怒曰爾讀書多年祇成佞耳道周對曰忠佞二字臣不敢不辯夫臣子在君父之前獨立敢言者爲佞豈在君父之前讒諂面諛者爲忠乎忠佞不分則邪正混淆何以致治上怒甚曰祖訓辯言亂政者當斬道周曰臣若有當斬之罪願就司寇聽陛下處分上曰原不專指佞但辯言亂政者按祖訓當斬隨諭道周且退上復面諭諸臣今後慎毋黨同伐異各恪修職業次日復頒諭申飭時修撰劉同升趙士春合上疏論嗣昌奪情事與道周俱下部議處部覆降三級照舊御札道周票輕處同升士春票重處嗣昌懼上將復用道周也急募人參之於是張若麒應募遂上擁戴不效怨望紛然疏入同升士春降三級道周降六級俱調外矣後嗣昌借邊警調若麒于兵部蓋酬之也



丁丑鼎甲三人劉趙興陳之遴也初上奪情疏擬三人聯名之遴辭不預次年遴父祖苞以失事自盡遴以犯屬閑住則何如列名之爲愈也南海辭列名而得入綸扉之遴辭列名而終歸罷斥同一畏首畏尾而幸不幸有如此者

刑部主事張若麒擁戴不效怨望紛然疏略曰頃者皇上憂軫時艱不憚勞煩召對之後大布王言諄諄然以正人心息邪說爲治天下之大本原舉黨同伐異之隱情招權納賄之狡術無不見其肺肝直爲道破而闢邪一義尤爲千古之聖帝名王所未嘗發一時之端人正士所不能言直如日月當天妖狐莫遁謂宜大家洗心以副明旨何意諸臣之貌旨捏造奸言歸過皇上而無天無地無父無君至此極也以臣所聞數日以來天諭旣頒羣黨藉藉或擲抄傳之邸報而怒視或引不倫之遠事而詆議通霄聚衆信口譏排未已也至有謂召對之日黃道周犯顏批鱗古今未有而皇上爲之理屈者至有道周堅求一死而皇上左顧言他始終無如何者至有謂聖諭注洒何故亦作對偶者甚至有謂聖諭中邪說依經一段不出聖裁者紛紛攘攘日改月增要使古今未有之好語盡出自道周之口凡可以歸過皇上者無所不至蓋倡之者飭六藝以文奸言盡在假託道理以把持朝廷以顯行其呼朋引類之計于是記誦博者附之不博者亦附之甚至不辯菽麥墨汁全無者亦附之興爲怙權納賄之地而特開



皇上下項門之針遂大家喊叫謂老魔之赤幟旣拔山魃之穢態雖藏嚇騙不靈谿壑無幸遂至澠口橫加毫無顧忌倘不亟示前日召對之語宣錄刊傳與新頒聖諭共爲日星之揭則背公死黨實繁有徒或鼓煽以惑四方私記以疑後世致令朋串附勢之史臣徇私載筆皇上正人心息邪說一段治天下之大經大法且爲怨望者埋沒遮掩矣伏乞皇上始終爲世道人心計深思遠慮速賜施行雖備員末秩亦仰荷皇上生成之恩何忍畏其兇鋒雷同不言也

宋林希點制誥凡元祐名臣貶黜之制皆極其醜詆一日草制罷擲筆于地曰壞名節矣若麒此疏何以異是然使此疏出而總憲卽可以力致尙斷斷不可況區區一兵曹耶小人枉做小人千古同

嘆

若麒與沈迅旣授刑部不與諸司官齒本司缺郎中員外某署印奉差辭朝送印于迅迅大怒罵之擲還其印員外懼泣訴于堂委別司署焉若麒旣出疏逐道周嗣昌已許調兵部久不得耗乃親詣職方郎中趙光抃促之次日諸臣畢集揖嗣昌畢光抃出班請曰本司現有缺員聞得老先生要調二人來嗣昌佯驚曰那有此事光抃曰昨日其人親到本司向郎中言老先生要調他並他同部姓沈者四司官俱在所共目擊可詢也嗣昌色變曰這等我要參他光抃唯唯而退



若麒沈迅既營求嗣昌量調有日矣適御史涂必浚疏言刑部所司者民命而人往往厭薄之是以十三司官強半皆鄉科任子偶有一甲科則輒調別部豈司民命者當專用不肖乎請自今著爲令刑部官不許更調別部奉旨申飭若麒憤無所洩乃上平賦役節驛遞一疏謂鄉紳隱匿賦役遺害小民以致民窮爲盜內有鄉紳豺虎等語驛遞謂裁削勘合歲可得百五十萬銀兩有旨本內鄉紳豺虎等語著據實回奏若麒回奏指莊應會范良彥袁宏勳袁范皆地方所最切齒而宏勳尤護持逆黨者有旨俱行撫按逮問初麒之出疏也專爲同鄉侍郎高宏圖而發及回奏卽擬宏圖以入告或語以宏圖立朝大節忤璫去位萬萬不可指及麒不得已乃指應會二人然麒之爲此實激于必浚之疏必浚與楊廷麟同鄉同年咸謂涂疏楊實使之後張沈與嗣昌比而修怨廷麟者禍亦烈矣

武清侯李誠昭慈聖內家也上在信邸時以緩急開罪後借事繩之以法不少貸誠銘卒其子不准承襲房產俱行入宮內一女字嘉定伯周奎之孫嘉定請命于后后諭云人當患難自無絕婚之理可具小婦但取此女歸外慎毋夾帶諸戚晚合辭申請不允後悼靈王臨危親見慈聖於空中上大悔悟卽准其子襲爵房產祿米仍舊頒給焉

上初年崇奉天主教上海教中人也既入政府力進天主之說將宮內供養諸銅佛像盡行毀碎至是悼



靈王病篤上臨視之王指九蓮華娘娘現立空中歷數毀壞三寶之罪及苛求武清云云言訖而薨上大驚懼極力挽回亦無及矣時閣臣皆從外入素不諳文義上既痛悔前事特頒諭內外有但願佛天祖宗知不願人知也等句幾不成皇言矣宰相須用讀書人初年上曾舉以諷諸閣臣者可勝三歎

京師天主教有二西人主之龍華民湯若望也凡皈依其教者先問汝家有魔鬼否有則取以來魔鬼卽佛也天主殿前有青石幢一大石池一其黨取佛像至卽于幢上撞碎佛頭及手足擲棄池中候聚集衆多然後設齋邀諸徒黨架爐鼓火將諸佛像盡行鎔化率以爲常某年六月初一日復建此會方日正中碧空無纖雲適當舉火衆共聳視忽大雷一聲將池中佛像及諸爐炭盡行攝去池內若掃不留微塵衆皆汗流浹背咸合掌西跪念阿彌陀佛自是遂絕此會

史莖疏黨類陷臣已極事內辯周汝弼營升延綏巡撫係太常寺卿許世璽說情奉旨史莖方在究問何得瀆陳奏內說情緣由還著許世璽田惟嘉據實具奏不許游移支飾先是史莖得提問之報隨卽赴京潛入韓城邸中連住三日乃始投部上此疏後世璽回奏隱躍其辭但引陝西巡按王倌相對之言爲證有旨著王倌實奏及倌回奏則事已結案久矣遂奉姑不究之旨然世璽實未嘗說情也

史莖下獄後又上直發朋黨奸貪之狀疏內云鹽課現經內臣楊顯名徹底澄清查之後割沒清楚足見



臣之心跡而楊士聰之誣捏陷臣亦昭然矣又云張焜芳乃內閣中書張炳芳之兄也向來旨意露洩皆炳芳爲之卽焜芳參臣及內臣楊顯名亦恃奧援有人布置關通有炳芳在耳又言炳芳弟煒芳以長史謀陞同知包攬知縣虞國鎮考選騙銀一萬三千兩托余伯和送與科臣馮元勳八千兩令其把持臺省餘銀入己三千伯和二千等云疏上數發改票後擬元勳士聰俱革任煒芳炳芳俱革任提問復發再票御筆批云此案不欲牽累乃止票炳芳俱革職候訊伯和提問此疏實出黃應恩應恩素與炳芳有嫌而較書一事又與士聰有隙故構造此疏以相陷也後士聰上軍興需餉正殷疏有旨史堃事情該部速審具奏楊士聰不許再瀆士聰再疏遂奉不得更端求勝之旨蓋史堃之布置已周聖意亦潛移矣

時史堃旣恃內援復有韓城主之於外獄中連上疏催審且請將楊士聰張焜芳令該部提去與伊面質而淮鹽運使徐大儀與史堃同年相好自奉行查之旨已先諭吏書竭力彌縫不待堃幹僕之來也惟交際六萬兩則不得而掩內監楊顯名回奏事事出脫至交際一項則云臣不能爲諱以故堃久稽獄中不得出竟憤恨以死迨堃死而事敗則實天爲之也

刑部上黃應恩招奉旨黃應恩哆口招搖實有事款何得聽其支飾盡爲開豁該司官殊屬縱徇著回將



話來仍一面嚴訊確擬具奏先是應恩下部黨與甚盛部招搖諸款槩不敢入止引洩一品語律致奉此旨司官再問不得不入事款及贓應恩突出疏參之司官大懼乃上疏乞勅三法司會問夫以罪犯而參司官與史堇請提楊士聰張焜芳到部面質事雖不行而兩人之虎視獄中可知矣後再擬上有旨黃應恩發附近衛所充軍終身

刑部上田敬宗招奉旨周汝弼推撫情由竟未訊明但憑飾抵傳蒙麻衛招已實又聽改口展辯且田敬宗等違法濫受多贓僅擬配徒骫縱殊甚通著研訊確擬具奏及再上擬田敬宗附近田登第等邊衛各充軍終身贓追充餉有旨依擬

十月清騎入犯薊昌總督吳阿衡與鎮守太監鄭希詔稱壽已報清人入口矣猶堅留與鄭公飲百杯取百籌之慶飲畢醉不能師遂死于亂軍中北兵盡入樞輔楊嗣昌上四事機宜疏請于卿寺科道等官不拘常格推補臣部左右侍郎其久推不至者候其到日子別衙填補末云職方一司素冗已極特設協理員外分任其勞而余爵蒞任無期請以武選主事孫嘉績升補而武選車駕主事漆嘉祉等音訊杳然請勅下吏部遴選別部有才望者速行調補次日吏部題補沈迅調武選張若麒調車駕而所云久推不至者吳姓惠世楊也



十一月初八日召對初無詞林而詞林畢集有內閣奏之乃俱召入給事中范淑泰奏今清人臨城尙無定議不知是要款要戰上曰那個要款淑泰奏外邊皆有此議論泰又奏凡涉邊事邸報一概不敢抄傳滿城人皆以邊事爲諱上曰凡關係機密的不許抄傳若行間塘報如何一概不許抄傳蓋是時武陵私謀款局實併塘報一切禁止自是長安始敢言邊事矣是日召對意在憂餉大理寺丞戈允禮倡言借貸欲括城中富人金錢淑泰奏兵事要在行法令法不行而憂餉卽天雨粟地湧金何益於事上曰朝廷何嘗不欲行而微窺聖意若有所躊躇而不能決者先是楊廷麟疏論武陵及高起潛武陵特題改兵部前往盧象昇軍前贊畫是日已謝恩辭朝故不預而款市之議武陵力請于上上許之矣武陵特遣使入清營竟得嫚書乃止

時各道勤王兵至宣大總督盧象昇至都城下與武陵倡言朝端邪正不分清兵何時得靖且云權臣在內邊臣豈能成功武陵云若如此說老先生尙方劍當先從學生用起不樂而罷時清兵越都城西掠破高陽舊樞輔孫承宗台門死難破吳橋縣知縣劉業嶸迎降遂南掠至山東象昇南下逐之坐營副總兵李某請盧札營於李家口戒慎毋動動必敗清兵非流賊比也而李自帥師逆清兵已奏捷矣盧聞捷遽勒兵而前遇清兵於賈村全軍陷沒事聞上以督臣陣亡坐營不行策應逮問論斬邊將祖寬



素以戇直得罪當事與李俱逮問大辟人咸冤之武陵題楊廷麟之贊畫也實欲假手于清兵殺盧未出師之前遣廷麟至真定與陝撫孫傳庭議事不及於難及敗衄報至武陵首先問曰楊翰林死未報者止知贊畫不知翰林爲誰武陵乃再問曰楊贊畫死未報者答以已先奉差不在營中武陵爲不豫者久之嗚呼此卽曹瞞殺禰衡之故智究竟廷麟不死于陣而武陵竟死于兵孰謂無天道乎

時畿內州縣清兵所至輒陷兵部主事沈迅上疏條陳邊務一云州縣無重臣彈壓故清兵所至不能堵禦請與定州蠡縣廣平河間各添設兵備一員一云以天下僧人配天下尼姑編入里甲三丁抽一朝夕訓練可得精兵數十萬其餘條陳別事甚多武陵具覆盛稱迅言之可用非止一端而畿南添設兵備尤爲救時碩畫且請改迅科員用有旨沈迅可改兵科給事中作速到任管事蓋迅時結大璫卞希孔爲奧援故武陵應之於外如桴鼓遂取特旨如寄

沈迅授科後卽疏薦張縉彥等爲兵科都給事中奉旨張縉彥著改任先是姚思孝旣斥屢推未用部議擢復不果至是迅薦五人首縉彥次任濬黃奇遇涂必滋張若麒而所重者若麒也其薦語有云廉則真廉敏則真敏又云其所上平賦役節驛遞二疏皆能言人所不能言云云而不意上竟點用縉彥也縉彥到任旣疏參武陵又因召對及之武陵語人曰沈宙泉到底還不老成如此看來不若從部議用



徐參戎或能相爲也不見得夫朝廷用一人一手握定惟意所欲與旣與而又悔之武陵之橫至此哉是年正月張獻忠假官軍旗號略襲南陽屯於南關左良玉適至北關疑之使人召之獻忠窘逸去良玉追及之兩馬相望一箭中其肩一箭中其指於弓靶獻忠倉惶良玉舉刀劈其面血流被甲部下孫可望直前大鬪獻忠乃得脫逃至麻城良玉進剿獻兩日夜馳七百里至穀城營於王家河夜襲穀城破之出示安民云本營志在匡亂已逐闖兵遠遁本營今釋甲歸朝爾百姓無恐遂拘耆老具揭遣孫可望重賄熊文燦內有西碧玉二方長尺餘又徑寸珠二枚文燦遂一力担当撫之獻忠所部不滿萬人乞餉十萬人又乞襄陽府屯軍文燦遷延不能應獻忠遂據守穀城分屯羣盜於四郊二月左良玉至襄陽與巡按林鳴琳巡道王瑞梅欲誘獻忠來見殺之文燦曰殺降不祥力持不可獻忠恃文燦爲援益無忌穀城諸生徐以顯一見如故教以孫吳兵法私練士卒鑄造兵器雖婦孺皆知其必反二月李自成陷蒼溪時川中諸道兵嚴守險要賊坐困乏食賀人龍以弱卒誘而設伏於梓潼自成遂弱卒卒走伏發殺賊數千級幾殲之自成率殘賊走溪南擬入湖廣依張獻忠不許至竹溪獻忠謀殺之自成獨乘驛馳百里走商雒至浙川老回回營臥疾半年餘老回回授以數百人仍然入陝西剽掠六月建湖廣巡撫俞應桂以方孔炤代之以戴東撫治鄖陽



八月賊曹操會羣賊過天星托天王整齊王小秦王混世王整十萬草里眼於陝州遂南走內鄉浙川犯襄陽九月熊文燦遣副總兵龍在田等邀擊草里眼射場天於雙溝大敗之老回回等俱東走棗陽官軍追逐數十里斬首六千餘級羣賊披靡四竄獨曹操仍留內浙山中十月陝西巡撫孫傳庭帥師入衛諸將先後出潼關曹操謂爲剿已也走均州叩太和山提督太監李維政乞撫維政爲言於文燦文燦乃檄止諸軍曹操九營皆就撫文燦爲具疏請貸其罪令諸將宴之於迎恩寺授官游擊將軍供億甚備曹操者羅汝才也汝才既受撫分屯羣賊於房竹諸縣文燦令散脅從諸衆簡選驍壯從征立功汝才不聽自言不願受署爲官并不願食餉願爲百姓耕種文燦一切羈縻之與張獻忠遙爲聲援奪民禾而食不奉縣官治

十二月己卯正月清兵陷濟州王遇害巡按宋學朱布按道府張秉文翁鴻業苟好善推官陸燦等或死或逃報至舉朝震恐先是沈迅條陳有東撫不許離德州一步之語張若騏力持職方司爲之案呈武陵卽據具覆東撫顏繼祖認定汎地僉謂清兵無越德而南之理至是清兵由東昌而東南渡河破巨縣夏津直趨濟南濟南精兵既盡在德州城中無備當事又無方略民潰遂陷德州聞省城陷兵心恇擾鼓譟挾餉幾至大變繼祖懼卽以數千金塞其望而兵遂不可用繼祖具疏待罪申言原派不許離



德之語武陵特出疏力排其說清兵退繼祖與順天巡撫陳祖苞保定巡撫張其平總兵祖寬太監鄧希詔俱逮下獄大學士劉宇亮罷時清兵縱橫燕齊間宇亮自請督師與陳新甲並轡而南各鎮勤王兵皆屬焉時將卒皆視清兵所向以爲趨避惟蹂踐居民以爲事綿竹至安平偵者報清兵大至上下相顧無人色相擬卽趨晉州以避之知州陳宏緒堅閉城門不聽入而城中士民亦插血而誓不得延入一兵綿竹大怒傳令箭急開門以納師否者以軍法從事宏緒復語督師之來欲剿清兵也今清兵且至正督師建功之會奈何急欲入城若芻糧不繼州官罪也若欲入城不敢聽命綿竹遂疏劾之有旨逮問晉州士民詣闕訟冤願以身代州官死者千餘人宏緒乃得輕降四級調用上始疑綿竹不能禦衆徒擾民矣

時行間大帥俱尾清兵之後不敢擊亦不能擊綿竹具疏言之其末帶參劉光祚韓城與武陵謀欲因此事去綿竹乃票光祚軍前正法旨到之日諸大帥俱分道前去并光祚亦不在軍前況綿竹之參光祚者原不至死適會有武清之捷綿竹乃置光祚於武清縣獄而復請之并上武清捷音於是奉旨倏奏倏敘殊屬乖藐著九卿科道看議綿竹具疏引罪言乖則乖矣藐則萬萬不敢蓋兩人明知聖旨往還之間必致參差必不能正法而逐綿竹知計行矣部覆綿竹冠帶閑住陳啟新言看重議輕沈迅言明



旨森嚴考功之發未盡於是部議革職爲民韓城票旨仍候事平另議嗟乎此案韓城與武陵主謀排擠構陷甚巧故明旨止言看議而加以議處附之者猶以爲未足也啟新不足道彼沈迅者由武陵薦用而顯然出力爲武陵排斥異己誠不識世間廉恥爲何物矣究之五案定而綿竹奉旨免議上亦知其無大罪也彼韓城者獨何心哉

上傳任丘清苑涑水遷安大城定興縣知縣白慧元等貪酷縱肆俱著革職提問撫按官不行糾劾溺職殊甚近畿如此遠地可知著部院申飭 慧元令任丘璫某任丘人也邀慧元飲酒半盡陳諸寶玩以供鑒賞慧元曰我有至寶大異于是璫問何寶慧元笑不應璫固問之慧元曰我腰下有至寶耳璫默然遂羅織其事款入告又慮人議其修私怨也并羅及清苑等縣慧元罷而新知縣李仲熊卽蒞任清兵攻任丘慧元善騎射協同仲熊固守城陷俱死之

山東巡撫缺東省諸人公討泰州兵備鄭二陽蓋二陽于流賊南犯時城守著勞者也往例本省撫道缺本省鄉紳向部公討此相沿舊習間亦有爲私者至是沈迅獨糾太僕寺少卿王萬象私討巡撫以修舊怨遂奉把持亂政之旨萬象大懼回話之辭甚遜然實無私討情弊乃得旨冠帶閑住而沈勢益張後迅與若麒共言于吏部用永平兵備劉景曜巡撫山東自是山東諸事皆由二人握定矣若麒又引



其兄若獬為吏部而以假咨離任事敗則又謀事在人成事在天也

文武官品服色祖制既定奉行已久惟是武弁概服獅子上至是重行申飭武弁三四品俱照制服虎豹至內閣從無定式蓋直擯之洒掃服役之末祖制良有深意雖太監極品止于正四品間有賜蟒玉者亦後來之濫觴非祖制也至是上命取山海經以進採取各種獸名另定服色以天鵲為極品說者謂天子左右環列異獸蓋不祥也

上又將內庫歷朝諸銅器盡發寶源局鑄錢內有三代年及宣德年間物製造精巧絕倫商人不忍舊器毀棄每稱千觔願納銅二千觔監督主事某不可謂古器雖毀棄可惜我何敢私為輕重商人謂宣銅下爐尚存其質至三代間物則質清輕之極下爐後惟有青烟一縷爾此則誰認其咎監督謂聖性猜疑甚重若如公言必增聖款如三代物不便下爐則有監督內官公同驗視罪不在我于是古器毀棄殆盡

凡遇新天子嗣位另造琴百張每張價五百金此相沿舊例其事則御用監司之真金徽玉軫也然有音無文至今上以無文為嫌欲更製琴曲而莫有能應者從父適以謁選入都中書楊崇善係長洲籍稱同鄉即邀至其家為製譜以進韻義咸備上閱之稱善從父已就選州貳矣奉旨文震亨著改授中書



舍人武英殿供事

上御極後周皇后正位中宮復選東宮田妃西宮袁妃而田最有寵其父田宏遇亦最橫后父周奎次之袁父則兢兢自守不預外事上每戒諭外戚必三人同召一日復召袁語二人學生不敏奉陪多次矣今後還求兩先生包容免賜提挈周田不能應皆有慙色

璫某與小襄城及秀水諸人善璫有母稱壽秀水拉諸同人往賀甫登其堂則璫母已巍然端坐璫侍其旁曰太太年老不能行禮小弟代爲答拜卽先下拜秀水輩相顧錯愕不得已頓首再拜而起嗚呼比之匪人不亦傷乎守孰爲大守身爲大雖一舉足間可不慎乎特書之以爲戒

七月戮失事諸臣于市保定巡撫張其平山東巡撫顏繼祖總兵祖寬太監鄧希詔臨刑肆口訕上極其無狀聞者咸爲髮指而順天巡撫陳祖苞預服毒自盡獄中恩縣知縣王應元等亦以失守被刑劉業嶸以迎降故照謀叛律決不貸時妻子入官爲奴家產籍沒父母兄弟流二千里安置而祖苞子編修之遴繼祖弟監事光祖俱以犯屬罷斥先是顏抵東撫任後連疏參劾前撫李懋芳至於逮問衆論咸不直之至是以失事服法所謂還中以機者乎

清兵旣退升陝西巡撫孫傳庭爲薊保總督傳庭佯稱耳聾不能任事有旨責其托病規卸逮繫下獄順



天巡撫楊一雋以扶同欺隱亦被逮

時綿竹進賢相繼罷去復當枚卜上點用黃岡姚明恭費縣張四知滑縣魏照乘三人俱入閣辦事

八月庶吉士鄭鄆凌遲處死先是鄭鄆下獄衛帥吳孟明謂按律忤逆惟父母告乃坐今鄆父母皆亾其事又遠在數十年之前不可究竟烏程乃以特授科道爲餌如陳啟新例于是同里中書許烱應募上疏證其杖母并及姦妹姦媳等事有嚴旨切責吳孟明不能治獄著革任回衛至是獄具遂磔于市科道各官以不行糾發一概議處俱降級有差孟明奉譴後上疏言鄭鄆世遠人亾皇上必欲立置重典以風示天下近常州有錢霖父子戕殺之事遠近駭聞許烱仗義發憤何舍目前之錢霖而追已往之鄭鄆有旨逮錢霖同其子尙賓赴京驗審蓋尙賓以祖尙書春蔭官應天通判霖係庚子舉人相爭一侍女遂揮刃刺其父中腋業已輸重賄求和矣而刀痕儼然無計可掩逮至中途止德州假宿寓草菴夜半縱火焚其菴預藏一尸于灰燼中遂以尙賓失火被焚朦朧入告旨下地方官查明武進知縣馬嘉植以入覲行知府陳瑄申結稱尙賓委係焚死復奏而尙賓竟逃入太湖中馬嘉植物色得之因尙賓家奴歸取盤費遂執其奴爲導引掩而取之申解撫按轉詳法司尙賓決不待時錢霖遣戍陳瑄爲民然馬之爲此亦非能仗義也向以刻薄殘忍見譏于陳故爲此舉以傾陳而洩私恨也陳爲壬戌



進士筮仕合肥知縣崔呈秀巡按淮陽時首薦呈秀敗陳投誠至戚蔡奕琛得以考察薄罰歷升今官與馬不相能馬在任惟趨事要津視監司部郎蔑如也曾以事處鄉紳鄒忠允過當朱大典鄒門人也適來督撫鳳陽鄒持往控訴朱爲具疏參馬馬知之急挽許鼎臣求解許曾巡撫山西朱其屬吏也許竭力調停事得中寢未幾許棄世遺孤幼弱馬視之如陌路陳以此薄其爲人每以刻薄殘忍目之馬故恨之刺骨云

中書朱紳相國國楨子也崑山朱大受爲湖州知府與紳相惡紳特疏參之衆議以鄉紳參地方官不可爲訓且紳又任子咸不直之紳又不達連章疊上第四疏奉旨廷杖遂斃杖下

上之初卽位也編修江鼎鎮疏參順慶知府楊呈秀有旨革職提問鼎鎮四川南充人爲楊部民衆論亦不與之己巳內計鼎鎮例轉福建右參議

歲底上於宮中符召天將宮中每年或召仙或召將叩以來歲事無弗應者以前一召卽至至是召久之不至良久帝下臨批云天將皆已降生人間無可應召者上再拜叩問天將降生意欲何爲尙有未降生者否批云惟漢壽亭侯受明深恩不肯下降餘無在者批畢寂然再叩不應矣

各省俱有督糧道江南則以兵備兼理崇禎元年冬崇明營兵缺糧知府王時和勒捐不發遂鼓譟巡撫



曹文衡查爲守者處死時和劾罷因請于朝欲特設一道臣專理四府錢糧如布政事例吏部不達其意題准設四府督糧道專理漕糧既非具疏本意而增一官卽增種種費徒厲民耳時流賊充斥斬黃間應撫當移鎮安慶以防侵軼四府縉紳又謂江南重地不可無大臣彈壓於是部題添設安慶巡撫以安慶兵備史可法爲之復設偏沅巡撫以河南布政陳睿謨爲之是年二月左良玉大敗河南賊飛山虎劉國能于許州國能降老回回既東奔復糾革里眼射場天等合于混十萬分掠信陽光山河南巡撫常道立削籍以李仙風代之逮總兵張任學辛卯左良玉擊射場天老回回混十萬于河南之鎮城大破之射場天乞撫仍連營百里奪民二麥以自給良玉遣人諭止之不聽戊申良玉率副將陳永福金聲桓等壓賊壘而軍賊倉卒接戰官兵奮擊斬首二千七百賊退保山陝良玉遣降將劉國能招之庚戌射場天率其衆四千詣內鄉降于良玉場天卽李萬慶也良玉爲言於熊文燦文燦署國能萬慶皆爲游擊將軍革里眼等走商城

六月張獻忠住札穀城知縣阮之鈿竭力調護士民賴之至今春叛形顯著左良玉請乘其未備討之文燦不可至是果叛之鈿瀝血書絕命詞于襟仰藥死良玉發兵進討熊文燦故張露其事且強留左良玉飲餞稽延旬日俾獻忠得預爲備獻忠乃得從容運器甲資糧入房山佈署已定文燦始令進兵良



王怒曰督臺縱虎負嵎使我掣之不去必以逗遛罪我令旗至卽冒暑進討獻忠設伏于羅睺山良玉兵度險入伏中賊四合圍之良玉全軍盡沒并失其符印僅收殘兵百人逃歸遂列文燦事于朝樞輔楊嗣昌具疏劾之有旨文燦逮問良玉革職殺賊自贖後文燦逮至戮尸西市嗣昌方以議款不就無以仰副聖眷而文燦又嗣昌所舉也乃請剿自効上爲賜宴賜坐復賦詩以寵其行御詩曰鹽梅今日作干城上將新開細柳營一掃寇氛從此靖還期教養遂民生所以寵之者至矣嗣昌謝恩畢馳至武昌申昉軍令見良玉部下多降將可倚以辦賊特疏請于朝拜良玉爲平賊將軍升永州推官萬元吉爲監軍僉事

十月老回回革里眼左金王等合二萬人分屯英霍濟太諸山犯安慶桐城等處遼將黃得功川將杜先春屢戰却之

十三年庚辰正月大計羣吏湖州知府朱大受屢爲朱紳所劾特行賄于吏科都給事中阮震亨以祈免爲廠役所獲并緝臨江知府胡永清等營賄事款于是震亨等俱下鎮撫司究問

二月會試天下士命大學士薛國觀蔡國用爲考試官取中教諭楊瓊芳等三百名 韓城金谿皆以外僚入閣從無文采楊瓊芳係揭陽教諭而以壓榜此二百年所無者楊卷在某房中同考編修韓四



維見之曰會元在是矣徐簡討汧取文閣之曰此必苜蓿先生也不然必是老貢生及拆號填榜果係教諭合堂愕然韓城俯首無言吏停筆候命韓城躊躇良久仍舊用楊

三月廷試策士賜魏藻德葛世振高爾儼等進士及第出身有差又廷授顏渾等吏部給事中御史等官是日上召對策進呈者四十八人於文華殿上問邊隅多警何以報仇雪恥魏藻德對曰以臣所見使大小諸臣皆知所恥則功業自建孔子論政則曰知恥近乎勇論士則曰行己有恥孟子亦曰一人橫行于天下武王恥之故勾踐豢馬以沼吳燕昭式蛙而滅齊皆知恥之明效也因自列戊寅通州城守功狀上心識之拔爲第一而周正儒宣國柱五人特授給事中吳邦臣魏景琦等五人特授御史顏渾特授吏部主事田有年盧若騰錢志騫陳繡等特授兵部主事時韓城擬無錫鄒式金爲第一上抑置二甲楊瓊芳抑置三甲韓城始失聖眷矣

六月大學士薛國觀免韓城剛愎性成敢作敢爲旣與武陵比而擠去縣竹遂正首揆益無忌憚凡閣中有所票擬中書每于外庭傳示消息已成定例矣至是韓城信任私人王陞彥而怒考中書周國興楊餘洪不爲用特捏洩旨事參之兩人皆廷杖斃杖下兩中書家皆密緝韓城納賄事件以報東廠又上召對時曾語及朝臣貪婪韓城曰使廠衛得人朝臣何敢至是東廠太監王化民在側汗流浹背于是



專偵其陰事而史堇所輦多金爲布置地者皆入韓城之寓適史堇死周楊二家力懲堇家人詣廠出首東廠卽以上聞有旨下錦衣衛嚴究於是錦衣衛提韓城楊馬二長班鞫問供吐過付之臧甚詳而韓城一疏再疏則云楊士聰之參史堇別有緣故又云史堇曾參黨人袁崇煥等爲黨人所忌故乘其丁艱而參之云夫身在事中又恐聖怒方赫不辨己之受賄而亟辨史堇受參之故則真悍真愚矣有旨著五府九卿議處已而議處本上有旨薛國觀著冠帶閑住中書王陞彥著革了職刑部提問韓城等旣去復當枚卜上點用德州謝陞并研陳演先是田唯嘉罷斥陞南京右都御史莊欽鄰爲吏部尙書欽鄰遷延半年不至奉旨詰責欽鄰調用而特召謝陞爲吏部尙書至是陞以原官演以禮部侍郎俱入閣辦事滑縣曾出德州之門具疏讓位於是德州位列滑縣之前

十月行刑御勾決囚十二人原任徐淮中河郎中胡璉預焉胡璉雲南人戊辰進士前年以黃河衝犯泗陵與河道總督劉綎同逮運河者專以運漕艘而黃河則兼護陵寢設有通惠張湫徐淮儀真四河道復南旺夏鎮二泉閘皆以工部郎主之三年一小挑五年一大挑費有編額慮最悉也而徐淮尤稱險要時設打洪之役神廟中葉改濬落馬湖漕艘盡由宿遷收口不復走洪而徐淮始專護陵寢矣承平日久惟俟春夏水潏漲發足以際漕事凡大挑小挑之費俱入上下私橐至是黃河連年衝決直犯



泗陵總督朱光祚周鼎與榮嗣皆被逮朱劉皆斃於獄周後以宜興力庇免死遣戍 逮薛國觀至京  
賜死先是韓城出都資重纍纍用車至數百輛東廠隨具事件密奏聖心益怒而史堉寄頓之臧衛招  
甚明給事中袁愷復疏劾其納賄諸事與通賄刑部右侍郎蔡奕琛左副都御史葉有聲并及吏部尙  
書傅永淳侍郎林棟隆有旨奕琛有聲革職提問永淳棟隆閒住而私人王陞彥雖已下獄尚未成招  
至是特旨王陞彥著卽會官斬決凡招具或斬或絞招內已定奉旨止云卽會官處決今陞彥招未具  
裁自聖斷故云斬決此旨從來所未有也陞彥決而韓城復逮逮至候命私寓而勅下令自盡之命下  
時韓城已臥家人報錦衣賚詔至韓城蹶然曰我死必矣倉卒覓小帽不得取蒼頭帽覆之宣詔畢頓  
首不能出聲自盡後衛帥驗視回奏次日始奉旨准取殮蓋懸梁者兩晝夜真從來未有之慘矣 東  
閣五間夾爲前後十間前中一間供先聖位爲諸輔分本公敘之所閣輔第五員以下則俱居後房  
雖白晝亦秉燭票擬韓城當國特鑿一牖復開門構數椽以通日色說者謂破壞風水故首膺此禍  
雖然韓城卽不破壞風水能免此禍哉

是年二月左良玉進剿張獻忠獻忠出戰墮馬幾被擒復逸去逃入瑯瑤山中良玉令降將劉國能圍之  
獻忠食盡分賊四出抄掠不得者歸盡殺之其未歸者懼殺詣軍門降良玉因令國能將之前行僞稱



糧至獻忠開營延入國能乘不意縱火大戰盡埽其營壘斬首萬餘級擒其妻孥及賊黨徐以顯潘應鰲等獻忠批簾從巖澗逃去捷聞賜楊嗣昌斗牛服是役也獻忠精銳俱盡止存千餘騎走入興安平利山中良玉進圍之連營百里憚險圍而不攻獻忠因得以收散亡養痍傷羣盜往往歸之勢復振而羅汝才過天星等賊復盡入川嗣昌駐襄陽會師合剿以興安一路失期斬其監軍副使殷太白復疏參四川巡撫邵捷春不行堵禦捷春逮問

五月賊羅汝才等陷四川大昌犯夔州石柱女帥秦良玉統兵來援監軍萬元吉率舟師由巫山上三峽賊十三哨過夔門魚貫而進羅汝才爲殿官兵遙望不敢擊賊循河南而行欲渡川西元吉左良玉賀人龍等皆會於夔州羅過諸賊自夔州山後抄掠官兵分扼諸隘賊掠無所得副將羅于萃擊過天星於鄭山寨敗之過天星以百騎走羣賊旣困謀奪尖山西奔賀人龍會四川總兵鄭嘉棟湖廣副總兵張應元汪雲鳳陝西副總兵李國奇之師赴之賊以奇兵攻尖山寨人龍等率諸軍奮呼直入賊陣斷賊爲二賊騎陷泥淖不得馳而川兵奔跳澗谷如猿猱賊潰自相騰踐斬首千七百餘生擒自來虎等七十一人賊退屯羊橋四出抄掠石柱土司邀之於馬家寨斬首六百又追敗之於留馬壩斬賊酋項山虎庚子賊屯譚家坪南北兩山山頭張幕魚鱗相掩疊官兵分道並進南山賊拔寨先走北山賊



下直鑿官軍官軍力戰賊退守山巔官軍分兵繞山後而上前後齊登賊披靡竄走澗谷諸將皆下馬緣山逐賊追奔四十里斬首千二百級賊奔迎仙寺嶺癸卯三省官兵合擊賊于嶺上賊營大亂斬首千餘級秦良玉奪羅汝才大纛擒其老營隊副塌天賊突圍遁走七箐坎入于乾溪丙午羅過諸賊犯夔州下關城謀歸湖廣以瞿塘水漲不得渡總兵嘉棟副總兵應元雲鳳自雲陽出邀其前監軍元吉副將人龍等間道疾走尖山以截之夔城山溪險隘炎暑毒人賊人馬俱病汝才小秦王上天王混世王一連鷹五營走雲陽尖山壩過天索關索二營走雲陽水碓口期同會于開甯戊申人龍等追賊至七箐坎賊簡其銳爲殿以挑官軍潛以老營先走人龍擊殿後賊破之長驅擣其中堅賊大敗追至馬溺溪壓賊壘而軍

六月辛亥昧爽人龍等前薄賊營三路並進大呼騰躍而上賊驚潰官軍逐之斬首千二百人俘六百人赦其俘一桿槍自來虎伍林三人隸爲前鋒壬子官兵躡賊而前虎賊必設伏以相邀參軍李仲興高光榮勒輕騎先往人龍國奇潛以大兵繼之二將入隘賊伏起兩山間圍之數重二將戰方酣人龍國奇麾兵並進聲動山谷圍中亦奮呼以應之賊圍開四潰斬首五百餘級生擒賊渠掠山虎等十六人汝才東走大甯之小嶺官兵控之于夔東己卯過天星關索走開縣屯南壩知汝才東竄而官兵漸迫



因北走丁巳鄭嘉棟率諸將追擊賊于觀音山逐北二十里至於臨江斬首二百餘級張應元窮追至寶山遇賊百餘騎擊賊二十餘騎餘皆大呼釋甲賊首托天王請降托天王卽常國安也應元止兵裂帛作書令國安所部抓地虎往諭過天星過天星曰必托天王身至爲信乃降庚申賊首高守達率麾下二百騎來奔過天星逐之邀去百餘騎來歸者七十五騎皆關西健兒辛酉過天星西走官兵拔營逐之至新甯西關外賊騎三千不戰而走高守達率其健兒當先陷陣賊大亂馬竄禾黍中驚蹏相騰踐官兵感而射之斬首千七百餘級擒賊首流金鍾金狗兒過關二賊東奔達州張應元等追逼之丁卯常國安前驅遇賊官兵並進斬首三百餘級奪其營賊奔袁壩驛設伏溝澗中戊辰應元等前驅搏戰令高世達常國安繞谷中出擣其脇賊伏發方接戰國安世達突出大呼擊賊賊驚墮山澗中者無算斬首九百餘級生擒滾地狼等十七人降其管隊可天虎等四十人庚午賊自袁壩東走開縣諸將分營出戰鄭嘉棟將中軍羅子莘將左軍降將楊旭將右軍戰於城下賊大敗走大昌

張獻忠自興房走白羊山入巫山間川兵躡之益西入深谷中掩旗息鼓若無人參將曹進功率兵入山偵賊不見一人而歸初楊嗣昌以左良玉跋涉難制而賀人龍所將關兵驍勇善戰屢殺賊有功請以人龍代良玉佩將軍印旣而良玉奏瑪瑙山之捷度未可動復奏留左良玉佩印如故別加人龍總兵



銜須 後命人龍驟聞大將之信踴躍動三軍既而報寢殊怏怏良玉知其故意亦懷恨當獻忠之寢伏興房山中也所存千餘騎耳剿之可立盡乃良玉以奪懷慚人龍復以歸印觖望遂互相推諉不復深入以致獻忠復熾皆嗣昌失二帥之心所致也

過天星素與張獻忠有郅聞羅張既合遂詣嗣昌乞降嗣昌令良玉撫其衆七千人簡其精銳隸良玉軍中安其老弱於鄖西以降將掃地王李靖隸監軍萬元吉標下過天星卽惠登相也

七月羅汝才小秦王上天王混世王一連鷹距大甯元吉遣遊擊劉正國降將伍林招之先是汝才與金翅鵬不相能金翅鵬嘗懼爲所併至是小秦王金翅鵬相率降于嗣昌汝才遂殺劉正國伍林東走巫山良玉分兵屯房竹間汝才屢敗黨羽多降勢益孤獻忠時在巫山汝才往會之謀渡川西走諸將賀人龍李國奇張應元汪雲鳳張奏凱等合兵擊之應元雲鳳屯於夔之土地嶺待人龍兵三檄不至癸亥人龍兵譟而西歸獻忠知官兵無後繼悉銳來攻而應元雲鳳所將湖廣兵三千皆新募未經行陣賊驟至二將簡銳卒千人搏戰晨至日中未決賊分兵繞後山而下突衝營中守營新兵皆譁賊乘之前後皆圍二將殊死鬪應元中流矢奮擊突圍出賊方渡也霧河應元赴河上然礮擊殺一賊帥衣緋者賊不得渡雲鳳苦戰久得脫渴甚飲水斗餘臥血凝臆而卒時張羅新合嗣昌命金翅鵬部下飛上



天入羅汝才營招之汝才逡巡不決獻忠懼汝才之再降也日說汝才曰楊閣部已俘過天星獻闕下矣爾慎自爲謀元吉請檄左良玉攜惠登相至陣前招汝才必來嗣昌不聽汝才遂不果降己丑嗣昌屯巫山遣人至關索營中招之先是關索屢敗伏深山中過天星降益懼遂與其黨王光恩號小秦王楊光甫號一連鷹等詣嗣昌軍前頓首涕泣請死罪嗣昌撫慰之給以金幣所部三千人嗣昌簡其精銳赴軍前殺賊羅汝才之入川也凡九股整十萬掃地王小秦王金翅鵬托天王過天星關索惟羅張相抗其七相繼俱降矣嗣昌飛章上聞敘賚文武將吏有差

九月官兵大敗李自成于函谷自成奔漢南李國奇等感之于北左良玉扼武關以南初諸將圍自成嶠函山中分守要害合圍甚密將坐斃之嗣昌曰圍師必缺不若空武關一路待其走而擊之可立盡也自成令軍中盡殺所掠婦女同養子李雙喜乘隙率五百騎突圍而出諸將不能禦遂自武關逃入鄖陽時河南大饑饑民所在爲盜自成乃至鄖陽走伊雒饑民從者數萬圍永甯陷之殺萬安采鏗再陷宜陽勢復大振是日張羅二賊陷大昌進屯夔州山北時賊行營輜重婦女甚重衆官兵多觀望不前但尾賊後所至關隘守將多遠遁遂長驅趨達州

十月壬戌賊渡河入巴西陷劍州甲子過劍閣由廣元走陽平關從間道出百丈山將入漢中總兵趙光



遠守陽平甚嚴賀人龍李國奇復整旆而東賊乃踰昭化走西川丙寅川兵迎賊于劍州敗績賊縛四將去降將掃地王張一川擊賊于梓潼被擒賊副之元吉請卹其妻子於夷陵

十一月庚辰嗣昌元吉大饗將士於保甯以諸軍進止不一立大帥以統之以總兵猛如虎爲正張應元爲副癸未發保甯趨綿州癸卯賊知大兵至走江內乙巳猛如虎選驍騎逐賊元吉應元屯兵安岳城下以遏賊歸路

十二月辛亥賊南陷瀘州瀘州三面皆陡絕臨江止石立站一路可北走賊既走絕地元吉謀以大兵自南搗其老營伏兵旁塞險要感賊北走永州逆而擊之可盡殲也乙卯元吉等至石立站賊先移渡南溪官兵隔水追之不及癸亥賊抵成都副將某統千餘騎夜搗賊營賊預取土像數百置帳中四面懸燈而潛伏暗處千騎望燈而趨大呼直入則所刦者諸土像也急退而賊衆四合殲戮無孑遺自是成都專意固守不復言搗營矣賊趨新都知縣黃岡固守賊復至綿州

是年山陝河南大旱蝗起冬大饑人相食草木俱盡土寇並起開州人袁時中聚衆數萬破開州時壽州有老袁一營時中自號小袁營以別之後官兵復開州時中走河南

江北賊革里眼左金王復犯霍英上命太監劉元斌率營兵六千馳赴江北擊賊于霍山敗之賊走湖廣



陷麻城黃梅

河南鄭縣監李際遇申靖邦張鼎聚衆至五萬總兵王紀禹遣游擊高謙擊之一日三捷斬首二千餘級  
追擊茶園斬首千級



明季稗史彙編卷七

烈皇小識

十四年辛巳逮江西巡撫解學龍布政司都事黃道周下鎮撫司究問學龍陞兵部侍郎循例有薦舉疏內薦道周有學問直貫天人品行無忝孔孟之語滑縣票旨以羣臣結黨標榜欺侮君父屢旨訓誡毫不省改學龍道周俱遣緹騎逮下詔獄鞫訊同黨姓名道周供出編修黃文煥吏部主事陳天定工部司務董養河及從父共四人俱下刑部獄

清兵陷甯錦總督洪承疇總兵大壽降自袁應泰喪遼陽退守廣甯王化貞棄廣甯退守甯錦至是清兵復犯甯錦總兵祖大壽固守告急於朝先是有祖大弼者其勇爲祖氏冠歷官副總兵前是清兵來攻相顧莫敢先進城中大恐大弼戒無動自率銳卒五百直衝清營往來馳擊清兵披靡不能禦遂拔營去及是病不能師報至上命總督洪承疇帥大同總兵王樸等六總兵援兵十餘萬人往救祖寄語于洪謂清兵強甚難與爭鋒可用車營法步步進兵卽步步列營使彼不得逞志逼之出塞乃可洪從其言上以師久無功令職方郎中方若麒往探機宜若麒至不度彼此妄謂清兵一鼓可平屢促進剿承疇不能制清兵偵知之臨夕設伏以待前軍甫發王樸率本部先遁諸總兵至半途聞之皆倉皇西奔



清兵以鐵騎乘之士卒死者大半方若麒及總兵楊國柱等僅以身免所喪器械資重不可勝計承疇大壽皆降事聞舉朝震動若麒逮問下獄王樸處斬國柱等革職充爲軍立功自贖而承疇謬以殉難聞卹贈太子太保蔭錦衣千戶世襲與祭十六壇

召予告大學士周延儒于家先是閣臣雖內外兼周鮮有當聖意者衆推宜興頗有機巧或能仰副而聖意亦及之于是庶吉士張溥禮部員外郎吳昌時爲之經營涿洲馮銓河南侯恂桐城阮大鍼等分任一股每股銀萬金共費六萬兩始得再召庚辰孟冬上祭太廟諸臣先至殿門外候駕時殿門未啟忽聞內有異響衆共驚聳俄見殿門大開有冕旒者十餘位從內走出頃之不見而殿門閉如故衆竊之不敢言駕至行禮之時怪風暴起燈燭皆滅助祭諸臣仆地者久之始能起上亦以驚悸成疾下體軟麻不能行立百餘日始瘳及是孟冬祭廟之日天氣晴和上喜謂近侍曰周閣老畢竟有福人故眷注最深

黃道周之案久不得結一番招上一番嚴駁戶部主事葉廷秀疏救併與廷杖淹留獄中者幾一年宜興再入政府竭力周旋先是部擬學龍道周烟瘴充軍不允至是刑部尙書劉澤清上疏略曰黃道周之罪至瘴戍盡矣進此惟有論死死生之際臣不敢不慎也從來論死諸臣非封疆卽貪酷未有以建言



誅者今以此加道周道周無封疆貪酷之罪而有建言蒙僇之名于道周得矣非我皇上覆載之量也且皇上所疑者黨耳黨者觀諸行事道周具疏不過空言一二臣工其相與者皆從罷斥烏有所謂黨而煩朝廷之大法耶去年行刑時忽奉旨停免今皇上豈有積恨于道周萬一轉圜動念而臣已論定噬臍無及敢仍以原擬請旨依議既而黃文煥等各疏辯有旨該部查議部覆上有旨准各復原官是歲江南大旱自春及夏無雨高區竟未及插時貧民嗷嗷望賑蠲之詔宜興首先輸米三百石爲諸臣急功者倡于是撫按不敢言旱各縣苛徵漕糧如額斗米至三錢民不堪命

爾時當國者不必請蠲請賑取厭帝聽但就內外積弊力爲清查便可寬民命于萬一如光祿寺歲派無錫縣上供白米一千三百三十石零歲用七百餘石則每年多存六百餘石浙直各府歲派分給部堂翰林尙寶科道等衙門白米一萬二千一百餘石歲用共八千餘石則每年多存四千餘石每年衛所運解漕糧入祿米倉者五百餘萬石除文武各官支過俸米外其蠶食其中者則有營兵衛軍衛役三蠹營兵則有冒名之弊如司苑局四驤軍勇神木黑關等廠以中涓爲三窟歲糜餉三十萬石矣衛軍則有造冊之弊今溢額者將及二萬人一軍應支餉十二石是歲耗米二十四萬石矣衛役則有賣票之弊凡官錦衣者虛領十餘票皆托名吏役每票支米六七石不等是歲耗米二



三十萬石矣漕撫標兵五千皆食江南糧衛軍領解止行給八百里行糧不應與解京者同給三千七百里行糧此項釐剔亦可省米三萬石更由此而推之內府收貯香蠟燈草絲綿等項額徵銀五萬餘兩年年委積無用此項不可裁乎薊遼犒賞公費重複支用多至二十三萬兩舉一邊而各邊可知此項不可節省乎又如上供磁器又料價藥料一切不急之需暫停一二年可省金錢數十萬若能逐項清查以佐國用將朝廷不苦于虧額蒼黎咸樂于更生相臣造福豈不普哉不此之圖而沾沾首輸爲天下倡將以是盡臣職乎甚矣其不講於大道也 諸令中長洲知縣葉承光尤酷拔取富室充兌賄入則免有過客問訊其宦況者曰賴有此荒耳衆心憤恨幾激民變巡撫黃希憲曲庇之僅以調簡行復以標兵護之出境

是年正月李自成圍河南府福王募死士逆戰斬獲頗多賊引退賊復以大砲攻城守嚴不動及昏而退總兵王紹禹標兵有馳呼于城上者城外亦呼以應之北兵既執守道王允昌于城上紹禹辭解之諸軍曰賊已在城下卽總鎮其如我何揮刃殺守陴者數人守陴者皆驚散賊緣堞而上叛兵迎之賊遂入城焚福王府福王母子俱縊城走王允昌等各官俱被執俱不死惟一典吏不屈見殺後自成跡福王所在執之并執原任兵部尙書呂維祺遇王于西關謂王名義甚重毋自辱王見自成泥首乞命自



城歷數其罪遂遇害維祺罵賊不屈死世子奔懷慶自成僞稱闖王雄冠諸賊事聞上震怒逮總兵王紹禹磔之籍其家

山東土賊李廷賓李鼎鉉陷高唐州時山東盜起兗屬州縣一時嘯聚響應東平令胥迎賊入城據之巡撫王國賓發六道官兵防兗州檄總兵劉澤清擊破東平賊復其城

河南土賊艾一侯二等嘯聚數千人武邱知縣蘇茂柏擊破之

獻忠潛至巴州乘其迎春襲破之恣掠三日趨達州新甯開縣焚毀驛道人烟絕斷者七百餘里初賊之南竄也元吉欲從間道出梓潼扼歸路以待賊嗣昌檄諸軍躡賊追逐不得距賊遠令他逸諸將皆盡向瀘州賊折而東返遂莫爲堵遏賀人龍頓兵廣元不進己丑猛如虎率諸將追及賊于開縣日暮雨作諸將咸以人馬困乏詰朝請戰參將劉士傑曰自瀘州逐賊馳驅四旬僅而及之今遇賊不戰縱敵失賊誰執其咎乎請爲諸軍先揮戈獨進賊屢却如虎亦率親兵從之獻忠憑高而望見後軍無繼左軍皆遲回不前因簡精銳繞官軍後馳而下左軍先潰士傑反游擊郭關如虎子猛先捷皆戰死前軍已覆如虎突戰潰圍出馬仗軍符盡失賊東走巫山大昌監軍元吉赴開縣收集殘兵祭陣亡將士哀慟三軍嗣昌在雲陽聞開州失利始悔不用扼歸路之謀矣初賊由達州而西也嗣昌策其必入陝檄



左良玉自興山趨漢中及賊東走復檄良玉自夔門進剿使者憚行中途返命曰賊已入漢中矣既又使人諭良玉曰賊向漢中可急援良玉不應嗣昌之使十九返良玉怒曰向從都督命瑀璫山安得給乎遂撤兵去賊下夔門竟無一人相拒者賊既渡險出巫山晝夜疾走入歸興山中羅汝才亦入湖廣惟搖天動留川中元古屯兵八百于白帝以備之

二月李自成以邵時昌爲河南僞知府而席捲子女玉帛入山巡撫李仙風偵賊已去引兵入城收時昌斬之時土賊蠭起一斗穀瓦灌子等諸盜皆合于李自成同攻開封巡撫高名衡率司道官嬰城固守賊攻七晝夜不克周王恭禔出庫金五十萬助餉復懸金募死士能殺一賊者立與五十金兵民踴躍爭先賊死者甚衆賊懼退數舍巡撫李仙風率諸將高謙等馳至開封與總兵陳永福內外夾擊大破之永福射自成中其左目賊乃退既而仙風名衡互相訐奏詔逮仙風以名衡巡撫河南

獻忠汝才復從山中出趨當陽鄭撫王永祚扼之于房竹遂走宜城偵知嗣昌有檄至襄陽要之于途取檄遣賊僞充公差夜扣襄陽城門巡道張克儉見有符驗延之入時二月初八日也先是官兵獲獻忠妻孥及賊黨徐以顯潘應鰲等俱禁襄陽獄知府王承曾素縱飲漁色見獻忠易視之疎其防賊乃入獄與徐潘等相約漏四下徐潘等破獄出殺守門卒開城門迎賊賊盡入先攻襄王府焚端禮門及諸



樓臺合城鼎沸初九日獻忠入城僭坐襄王殿坐王堂下勸之以卮酒曰吾欲斬楊嗣昌頭而嗣昌遠在川今當借王頭使嗣昌以陷伏法王其努力盡此一盃遂遇害宮眷無一存者并殺桂陽王常法時城內守兵數千軍資器械山集盡爲賊有推官鄺曰廣被執大罵不屈死署襄陽知縣李天覺北面叩頭置印于案自縊死左良玉在唐縣聞襄陽陷股票不能起久之與鄭撫王永祚統兵赴援癸丑賊棄襄陽渡江破樊城己未陷當陽乙丑陷新野光州

江北革左諸賊因官軍四集急而議款監軍楊卓然議安插于潛太閭然二賊實無降意公行劫掠卓然每左右之及襄福二藩相繼遇難二賊乘機復熾命朱大典督諸軍討之

河南賊孟三陷河陰據之游擊高謙攻拔河陰斬孟三

三月丙子楊嗣昌自盡嗣昌以連失二郡喪二親藩度不能免遂自縊死監軍萬元吉部署行營令猛如虎駐蘄州防獻賊東軼事聞左良玉削職戴罪討賊鄭撫王永祚知府王承曾襄府長史唐時俱著撫按解京提問

山東巡撫王國賓革職以王永吉代之時東省大饑民間父子相食徐德數千里白骨蔽野行人斷絕饑民相聚爲寇曹濮上賊尤熾上命總兵楊御蕃劉澤清合兵剿之



四月以丁啟睿代楊嗣昌總督軍務 左良玉自襄陽進擊李自成屯南陽自成屯盧氏盧氏舉人牛金星迎降又薦卜者宋獻策獻策長不滿三尺見自成首陳圖讖云十八孩兒兌上坐當從陝西起兵以得天下自成大喜奉爲軍師

張獻忠犯應山知縣章自燁擊却之遂陷隨州知州徐世澹合家死難吏民屠戮無遺隨州爲四冲之地其初陷也知州王燾死之至是三陷矣

五月以東寇孔棘特設津徐臨濟四鎮總兵專護漕運又以河道張國維係工部侍郎銜不便節制四鎮乃改銜兵部侍郎

河南土賊袁時中犯蒙城朱大典擊敗之總兵劉良佐簡驍騎自義門追擊賊大敗奔潰時中以數百騎宵遁入河

泰安土賊掠甯陽曲阜聞青州兵走遂走邳州焚其南郭至沙溝屠戮甚慘遂犯徐州北關轉至南河店燬漕船十六隻

賀人龍破李自成于靈邾山中時保定總督楊文岳屯禹州左良玉屯南陽猛如虎屯德安適疽發于背退屯承天



癸巳出傅宗龍于獄總督陝西兵討賊丁丑宗龍至新蔡會楊文岳賀人龍李國奇大威等共結浮橋渡河合兵趨項城戊寅諸軍畢渡走龍口是日李羅二賊將趨汝甯覘官軍至盡伏精銳松林中楊驅諸賊西渡人龍先走賊追及之于項城執宗龍至城下令呼開城門宗龍大呼曰我已爲賊所執爾等當死守毋墮賊計賊斫其耳目死城下人龍國奇俱西歸賊陷項城屠之詔復宗龍兵部尙書贈太子太保李羅二賊合兵擊葉縣守將劉國能卽飛來虎也誓師力戰賊悉衆來攻國能身被數十槍氣愈厲部下勸暫逸圖復舉國能曰朝廷旣赦我死又加爵命之榮萬死何辭自成羽毛已成不可復制何再舉之可圖盡殺其軍中馬騾饗士黎明分兵爲十隊偏裨各率其屬馳逐大戰至辰復聚則死者過半矣又分爲五隊賊亦分兵圍之更番迭戰以逸待勞國能率殘丁短兵相搏至夜度不能脫仰天呼曰我力盡矣遂自刎死部下無一降者事聞詔贈國能左都督

六月左良玉擊張獻忠于南陽之西山敗之獻忠西走攻南陽知府顏日愉堅守不下遂襲泌陽陷之七月獻忠圍鄖陽守將王光恩禦之多殺傷遂退總兵黃得功標下兵叛去投獻忠令之破鄖西辛卯鄖兵與獻忠戰敗績獻忠將被擒者人斷一手縱歸以辱官軍

八月獻忠乘掠信陽時總督丁啟睿與左良玉俱屯南陽頓兵不進至是良玉始至南陽引兵逆擊獻忠



于信陽大破之斬其渠魁五人獻忠負重傷易服夜遁良玉軍聲大振戊午獻忠收餘衆走鄖陽驟遇官軍不戰而潰還走南陽越十餘日良玉始至則獻忠越南陽而東久矣時羅李方合獻忠因汝才以奔李自成自成方強欲屈之獻忠不爲下自成怒欲殺之汝才陰選五百騎資獻忠令他往獻忠乃晝夜東馳與革回諸賊同入霍

十月太監劉元斌盧九德率京營京兵追賊至壽州及之元斌留四十日不進城門晝閉縱兵大掠殺樵汲者以冒功既而欲攻城州民斂數萬金賂之乃免

十一月總督汪喬年率總兵鄭嘉棟牛成虎賀人龍趨河南先是喬年于陝西發李自成先塚得小蛇卽斬蛇以殉誓師東下抵浹縣襄城舉人張永祺率邑人迎官軍屯于城中自成聞之盡衆來迎戰時喬年安營未定有二將先逃官軍大潰賊乘之一軍盡沒喬年以數百騎入城拒守五日襄城陷喬年自刎未死被執見殺并殺守將李萬慶卽射塌天也自成深恨諸生剽刎百九十人又購永祺永祺遠遁屠其族人九家乘勝圍南陽破之唐王遇害總兵猛如虎死焉鄧州等處皆降知州劉振世死之太監劉元斌統兵救襄城聞南陽陷乃擁婦女北去

十二月自成連陷許州鄢陵等縣知縣劉振之衣冠北向再拜自刎死復陷禹州徽王遇害再圍開封高



名衡陳永福等竭力守禦周王貯庫金于城頭擒一賊者百金殺一賊者五十金戰歿者卹其家五十金被傷者以輕重爲差殺賊者甚衆永福射自成中其左目乃屯朱仙鎮

上以朱大典受命督師縱賊流毒著革職聽勘以高斗光代之

十五年壬午正月元旦上御殿朝賀畢下寶座南面正立顧內侍曰召閣臣來閣臣由殿東門入再奉旨趨至殿簷行叩頭禮畢跪以俟命上曰閣西班來蓋以師席待諸輔也閣臣起立不知聖意擬取東西兩班上又曰閣臣西邊班來隨有一閣下引而前上宣閣臣來諸輔趨進上曰古來聖帝明王皆崇師道今日講官稱先生猶存遺意卿等卽朕師也敬于正月端冕而求聖躬轉而西面向閣臣一揖曰經言修身也尊賢也敬大臣也體羣臣也朕之此禮原不爲過又曰自古君臣志同道合天下未有不平治者上諭至此辭意甚嚴重又曰職掌在部院主持在朕躬調和在卿等諸閣臣跪伏謝罪才不敢當上曰先生正是朕該敬的言之再三隨諭先生起來諸輔臣始起轉下叩頭上還宮後復補賜聖諭一道時諸勛臣不知所以亦相率疾趨上曰東班去

時行取各官待命闕下皆仰祈宜興手援適漕運愆期宜興因言漕艘至今尙未開封南回皆以巡漕未補無人催趲請速下諸科道缺上從之於是馬嘉植等咸授科道無授部曹者滑縣接韓城衣鉢每票



旨輒深文詆謫黃道周之獄皆出滑縣手宜興再召并研鞫事事請教惟謹而滑縣專行自如宜興大不以爲然御史楊學愿具疏將糾之或爲滑縣曾巡撫江西于楊有部民之誼不便乃授馬嘉植上之滑縣一疏引疾宜興卽票旨准回籍調理

大學士謝陞罷德州由外廷入聖眷頗隆去冬上用十一般茶飯禮祭光廟御容諸閣臣陪祭德州最後至糾儀臺省糾之德州疏辯言臣將出門而衣帶忽斷再續再斷以是後朝乞將臣與縫衣者同下法司嚴加訊鞫雖奉旨免議而聖意已移矣時邊塞議款上頗祕其事德州與新咨臺省訟言其不可給事中朱徽首先糾劾謂事關宗社謝陞身係大臣旣知不可卽當極諫乃諫諍不聞而昌言于衆以暴揚皇上之過大不敬無人臣禮上震怒奉旨有朕心甚痛之語將大有所處分而羣臣隨聲附和不下百餘疏聖意遂從輕止削籍爲民

御史楊學愿疏略曰臣伏讀聖諭申飭交結內侍之律因稽太祖高皇帝時初無所謂緝事之令臣工不法正有明糾無陰訐也臣待罪南城所見詞訟多假番役妄稱東廠甚者誣人作奸挾仇首告夫餌人以陷禍擇人而肆喙惟恐其不爲惡又惟恐其不卽罹於法揆之皇上泣罪解網之仁豈不傷哉伏乞皇上先寬東廠條例夫東廠寬而刑罰可以漸省抑臣又有請焉外臣獲罪但敕撫按檻車送詣闕下



未爲不可若緹騎一遣有資者家產破散無資者地方斂餽爲害滋甚有旨東廠所緝止于謀逆亂倫其作奸犯科自有司存錦衣校衛尉毋得奉差需索

五月逮鳳慶總督高光斗安廬巡撫鄭二陽起馬士英總督鳳慶軍務士英先爲王坤所糾遣戍至是會推鳳慶總督士英列名其中上怒甚曰會推大典輒以廢棄竄名其間冢臣欺蔽殊甚刑部右侍郎徐石麒奏曰冢臣豈敢欺蔽實以馬士英會歷邊疆頗有才略禁錮可惜今止開列候皇上裁奪惟是冢臣不先奏明誠爲有罪上怒始霽曰馬士英旣說他有邊才卽著他去遂起陞兵部右侍郎總督鳳廬安慶等處軍務

六月吏部尙書李日宣罷時當枚卜外僚房可壯張三謨宋致預焉先是御史廖惟一并研姻戚也時當考核并研託可壯爲道地不應并研因涉蜚語謂此番枚卜皆可壯三人主持上入其說召廷臣于中左門上青袍皇太子定王永王侍上詰吏部尙書李日宣曰朕屢諭諸臣毋甯背君父不背私交甯嚮職業不破情面今日枚卜大典會聚推舉自當矢公矢慎乃稱託徇情如房可壯張三謨宋致並濫與會推此豈大臣之道並責吏科都給事中章正宸河南掌道御史張暄幾欲重典閣臣力救乃下日宣等于獄時吏部左侍郎現缺右侍郎雷躍龍久不到任上呼禮部左侍郎王錫袞出班曰吏部印著你



署掌王遂改吏部左侍郎署部事卽閣臣以枚卜請上點用晉江蔣德璟黃景昉興化吳甦俱以禮部尙書入閣辦事而起陞鄭三俊爲吏部尙書蔣黃同邑同時極稱盛事

四月中順天三河縣地方半空中忽墮下一龍牛頭而蛇身有角有鱗宛轉呌號于沙土中以水沃之則稍止撫按不敢奏聞如是者三晝夜乃死 東宮田妃最有寵是夏田妃病篤徧走羣望上咸躬致禱焉臨終上適往他殿行香不及永訣回宮大慟喪禮備極隆厚田妃有妹曾入宮上授以花一朵卽令插髻上曰此是我家人也妃薨後上留心其妹甲申春已有旨採擇淑女以備六宮候冬間舉行未幾遇變 金壇盛順者宜興幕客也欲題內閣中書而又欲得科目爲重壬午北闈大理評事李森先已有成約外議頗著給事中楊枝起疏糾之森先降調不及預同考及榜發盛仍列名監場御史徐殿臣力持不可乃抽出 鄉試大典雖曰矢公然實緣未能盡絕至關防潰裂顯行無忌則莫若壬午時宜興弟省儒子奕封以及親識子弟無不入彀衆官效尤成風不復問文藝矣說者謂隱匿災荒濫黷大典上負聖眷下負輿望賜死之禍實自取之後有坐以縱敵之罪者夫力能殲敵方能縱敵不坐以不可逃之律而加以莫須有之案恐反授宜興以口實也

十月吏部題臣父生死蒙恩等事奉旨文某准贈禮部尙書蔭一子入監讀書先文肅以九年六月棄世



十一年二月南京給事中張焜芳疏末有云故輔文某骨鯁性成勁介絕俗以天下爲己任數月揆席正色危言觸忤去輔禍機遽發以致忠憤填膺實志以沒今歷二年餘矣子孫不敢陳乞撫按不敢代題竟與草木同其朽腐皇上恩禮舊臣隆賜講幄而使文某幽光弗耀典禮缺如優卹易名豈可一日緩乎六月淄川請告給事中吳麟徵疏言張至發之歸皇上優禮有加臣知皇上始終優禮大臣也因念故輔文某與至發同蒙特簡兩月政地一語招尤省過責躬溢焉朝露其進也由聖明特達殊恩非藉旁門倖竇其去也由同官意見相左非係納賄徇私今棄世已二年餘矣撫按不敢代題子孫不敢陳乞惟皇上哀而矜之韓城票卹典出自朝廷何得徇私市恩御筆抹去止批該部知道十二年四月吏部驗封司署司事主事胡璇案呈前署部左侍郎董羽宸具題奉旨文某准復原官致仕九月不肖秉上疏請卹臣父生死蒙恩微臣感戴中惴等事奉旨該部知道十三年三月禮部祠祭司郎中劉大垣案呈前事尙書林欲楫具題奉旨卹典必須實蹟這本如何竟請還著再行核奏亦韓城所票也後韓城獲譴宜興再入政府十五年四月祠祭司署司事員外吳泰來案呈前事尙書林欲楫具題奉旨文某准予祭一壇減半造葬仍加祭一壇以示優禮至是吏部驗封司署司事主事張文煥案呈前事署部事左侍郎王錫宸具題奉有令旨 兵部尙書陳新甲處決新甲四川人由舉人歷任本兵蓋楊



嗣昌薦以自代爲款局地上亦知邊防不足恃姑藉款以暫紓目前後以傳宗龍言召新甲切責謝陞獨進曰清果許款款亦可恃于是遣馬紹愉往建州清不表謝而復得大嫚書上大悔恨然自張若麒憤事後舉朝之人無不願款者新甲復申其說上親發璽書加紹愉太僕少卿銜而鄭重遣之乘傳至塞外邊臣張筵宴清使清使一語不答云待國主命及國主至義州責諸人私通中國將殺我使譯事者再四叩頭祈請乃免馬紹愉匍匐歸科道諸臣惡其辱國連疏糾之并盡列新甲奸罪上雖怒甚隱忍未卽發適新甲有疏細陳款事頗末內多援引聖諭此疏誤爲書役發科抄傳兵科某據疏抄糾參上意新甲見責下嚴旨切責且令回話新甲具疏回話絕不引罪反自詡其功有某事人以爲大功而實臣之大罪等語不一而足上愈怒著革了職刑部提問部引失陷城寨律斬宜興并研合詞求免以北兵未薄城爲言上曰陳新甲職任中書一籌莫展致令流賊披猖戮辱我七親藩不更甚薄城乎遂奉旨陳新甲著卽會官斬決新甲去任以馮元颺爲兵部尙書元颺素習占風望氣揣知寇敵交訐剪滅無術乃佯稱病一日在朝班僞稱疾發瞶眩仆地扶曳而出長安班役婦孺皆嗤其爲細人伎倆辱朝廷而羞當世之士也元颺去以張國維代

十一月清兵入犯蓋於今四犯矣越幾旬而南掠山東破兗州魯王南走守道陳之伸逃知府鄧藩錫死



之破莒州知州景淑汴大罵不屈死復闕入南直界烽火及于徐邳沐陽時江浙九省入覲官既陞任差回各官俱鱗集于淮安度歲

是年正月山東賊李青山攻兗州給事中范淑泰魯府長史俞起蛟擊敗之擒青山獻闕下曹濮諸賊亦次第剿散李自成攻開封益急穴城而置砲于中選銳賊披甲以然砲發城崩卽乘勢衝入乃砲反外向銳賊皆死而城屹然不動賊駭解圍去至五月復來用宋賊計圍而不攻以坐困之

三月李羅二賊圍陳州兵備關永傑率士民固守賊周圍四十里更番進攻力竭城陷永傑戰死城下鄉紳崔泌之舉人王受爵等咸手刃數賊被擒大罵被殺賊屠陳州張獻忠攻舒城四月舒城陷時舒城無令參將孔廷訓領兵千人與鄉紳胡守恆率士民固守廷訓降于賊開門納之賊執守恆大罵不屈以刃刺其腹心死隨令廷訓攻霍山李自成陷太康睢州進圍歸德歸德無兵民自爲守賊鱗穴穴城城陷推官王世琰死之

五月復孫傳庭原官總督陝西兵討賊傳庭檄召將于西安聽令固原總兵鄭嘉棟臨洮總兵牛成虎援剿總兵賀人龍坐旗下數之曰爾奉命入山討賊開縣噪歸猛帥以孤軍失利獻賊出柙職爾之由爾爲大將遇賊先潰致秦督師委命賊手一死不足塞責也因命斬之諸將莫不動色以人龍軍分隸諸



將刻期進討襄城之役朝議疑人龍與賊通故傳庭殺之諸賊聞人龍死咸酌酒相慶張獻忠襲陷廬州時督學御史以較士至郡賊數百僞爲諸生應試者潛寓城中甲戌夜三鼓獻忠捲甲趨至城下舉火城中賊亦舉火以應之守城者驚潰遂陷督學某兵備蔡如蘅逃知府鄭履祥死之廬州城池高深賊屢攻不能克至是一夕陷革左諸賊趨壽州潁川參將李詡偵知之伏兵城東南隅而統銳師迎戰于城南樊家店伏兵統其後來擊大敗之斬首千餘級

六月起侯恂兵部侍郎總督官兵剿賊與孫傳庭協力援開封

七月各鎮援兵潰于朱仙鎮時山西總兵許定國援開封先潰于懷慶總督丁啟濬保督楊文岳總兵左良玉虎大威楊德政方國安等各統兵會于朱仙鎮與賊壘相望啟睿諸軍進戰良玉曰賊鋒方銳未可擊也啟睿曰汴圍已急豈能久待必擊之諸將咸懼請詣朝戰良玉歸營卽率軍走襄陽諸軍相繼而走二督營亂啟睿文岳聯騎走汝甯賊逐之追奔四百里喪馬騾七千軍杖糧草無算官兵數萬降于賊啟睿勅書印劍俱失事聞啟睿逮下獄文岳革職候勘張獻忠陷廬江焚戮一空還陷六安州將州民盡斷一臂男左女右總兵黃得功劉良佐來援再戰敗績獻賊遂謀渡江入南京

八月河決開封時開封被圍久周王先後捐庫金金盡再捐歲祿歲祿亦盡城北十里枕黃河巡撫高名



衡推官黃澍等欲引河水環濠以自固更決堤灌賊賊可魚也及決河賊已先營高處其移營不及者亦死萬人河流直衝汴城勢如山岳自北門入穿東南門出出渦水水驟長二丈士民溺死者數十萬高名衡陳永福咸乘小舟至城上周王率宮眷及諸王從後山逸出露棲城上雨中者七日總督侯恂以舟迎王總兵卜從善水師亦至推官黃澍從王舟乘夜渡達堤口城中遺民尙餘數萬賊乘舟入城盡虜以去邳毫以下皆被其災上聞之痛憤下詔優慰周藩授黃澍爲御史孫傳庭兵至南陽李羅二賊西行逆之傳庭設三伏以待牛成虎將前軍左勳將左嘉棟將右高傑將中軍成虎佯奔以誘賊賊逐之入伏中成虎還兵力戰高傑董學禮突出翼之左勳嘉棟左右橫擊大敗之斬首三千級賊潰東走追擊又敗之賊盡棄甲伏軍資於地官軍爭取無復隊伍賊兵卽乘之左軍先潰諸軍皆走喪材官將領百七十人事聞詔傳庭立功自贖

九月黃得功劉良佐復統兵逐獻賊賊走潛山賊將一堵牆爲殿營于山上二將捲甲急趨夜半緣山後噪而登賊驚起失措官軍奮擊賊大奔追逐六十里斬首千餘級獻賊潰圍走安慶執一堵牆焚殺之十月良佐再擊獻賊于安慶敗之獻賊走蘄水

閏十一月李羅二賊圍汝甯將軍孔貞會以川兵屯城東楊文岳以保定兵屯城西與賊相拒一晝夜川



兵潰次日賊四面環攻雲梯如牆而立一鼓百道並登城遂陷執文岳及兵備王世琮于城上皆厲聲大罵賊怒縛二人以砲擊之糜爛死世琮初爲河南府推官禦賊矢貫耳不動號王鐵耳賊屠士民數萬留八日拔營走確山向襄陽掠崇王由棧及世子諸王妃嬪以行

十二月李羅二賊以數萬騎至樊城左良玉營於樊城高阜乘高飛礮擊殺賊千餘賊從間道至白馬渡良玉移營拒之賊分兵陷荆門夷陵逼荊州良玉全師出漢口下武昌次於金沙洲偏沅巡撫陳睿謨棄荊州奉惠王走湘潭李賊遣老回回據夷陵革里眼趨德安荊州士民開門迎賊李賊遂入荊州

十六年癸未大學士周延儒請督師剿北兵又以軍機事密章奏無以爲信用文淵閣印以行說者以閣印不宜移動動必有咎後果罹韓城之禍 大學士吳甦奉命督師剿賊欽給銀五萬兩軍前支賞加萬元吉兵部職方司郎中督輔軍前贊畫

四月北兵盡行出口京師解嚴大學士周延儒仍入閣辦事 大學士吳甦罷興化向巡歷山陝以能折衝名今春督師剿賊與宜興同時受命興化留寓京師料理各項復上疏邀請諸事件迨宜興事竣已復命矣猶未成行奉聖諭輔臣甦受命督師討賊自當星馳受事乃三月以來遷延不進未出都門籌畫莫展若在行間何以制勝還宜在閣佐理不必督師興化具疏引罪乞休有旨准回籍 廷杖行人



司副熊開元給事中姜琛仍下之獄開元由給事中調外既轉司副滿望卽陞京卿而稽遲不遷頗生  
缺望時楚事方盛正媒孽宜興上以邊警廣求直言開元疏請對上召入德政開元訟言羣臣徇私結  
黨皇上孤立無助且奏且目宜興宜興惶悚無地上諭速補疏進覽宜興一面令人邀結開元阻其補  
疏一面進揭言臣孤子寡援蒙皇上寵眷每事不敢避忌羣小非一日矣卽今開元所陳皆無實指因  
言楚中若某若某皆朋謀樹黨其剗刃于臣者皆爲擁戴邱瑜代爲掃除耳上覽揭心動急促開元補  
牘開元已吞宜興之餌遲回不卽具疏嚴旨頻下始具疏言延儒以釋纍囚蠲宿逋起廢籍自謂有裨  
于聖德孰敢起而攻之願皇上徧召羣臣問延儒賢否卽以所論賢否定其人之賢否皇上若不加體  
察一時將吏狃于賄賂雖失地喪師皆得無罪誰復爲皇上捐軀報國者疏入上怒甚下錦衣獄適是  
時密雲巡撫王繼謨奉旨議處甯武兵備錢天錫欲得其缺求援于給事中楊枝起廖國遴二人期以  
事成萬金爲壽楊廖爲懇于宜興宜興許之然未言及爲壽事楊廖出再爲請益復益萬金嗣天錫會  
推俞旨已下時又有匿名書二十四氣之說隱詆朝紳上特爲頒諭一道戒飭言官內有爲人出闕之  
語此蓋皇上破羣臣之積習而告誡之非爲天錫發給事中姜琛探之未真疏言皇上修省罪己又致  
誠言官惟視言官獨重故望之獨切若云代人規卸安敢謂盡無其事臣獨展轉而不得其故皇上何



所聞而云然乎如誹語騰謗必大奸巨惡言官而思中之謂不重言官之罪不能激皇上之怒箴言  
官之口後將爭效寒蟬壅閉聖聽誰爲皇上言之哉疏入宜興激上怒下詔獄根究主使招上俱與廷  
杖宜興必欲致開元于死綈帥駱養性曲爲護持得免開元下獄後始知前之詔諭非爲密撫而密撫  
之更替宜興實無所私乃自悔其多事有南京御史孫鳳髻從獄中視之開元吐其情願一白而無山  
孫山東產直質人也願爲代白先具疏引其端有旨著明白具奏孫正擬暢言其事楊廖危甚急乘間  
酖之其子具揭申究楊廖百計潛消之然其事傳布長安宜興之心跡已明於是王繼謀仍照舊巡撫  
錢天錫革職逮問與楊枝起廖國遴俱革職同下獄 上傳諭黃道周著以原官起用宜興承上深眷  
其應對寶敏捷凡聖怒人莫能挽回惟宜興淡言微中道周之獄人皆以爲不可救宜興業已周旋得  
釋矣上偶言岳忠武事嘆曰今安得如岳飛者而用之宜興進曰飛自是名將然如破女直事史氏亦  
多虛張卽如黃道周之爲人傳之史冊不免曰其不用也天下惜之上默然次日卽有此諭 左都御  
史劉宗周刑部尙書徐石麒左僉御史金光宸同罷時上召廷臣于中左門問禦敵剿寇及用督撫事  
宗周奏曰使貪使詐此最誤事爲督撫者須先極廉上曰亦須論才時西人湯若望等精于火器御史  
若楊喬奏火器爲中國長技當從西人演習宗周奏唐宋以前用火器自有火器輒依爲長城



誤實在此上色不懌宗周又請釋熊開元姜琛云廠衛不可輕信是朝廷有私刑也上怒仰視屋梁曰  
廠衛俱爲朝廷何公何私光宸奏宗周無他意上益怒宗周免冠謝既退各具疏引罪有旨宗周爲民  
光宸調用時開元等已下刑部擬罪尙書徐石麒擬姜琛遣戍開元贖徒宜興大忤遂票嚴旨以進石  
麒再疏乞休有旨著冠帶閑住 下順天府丞戴澳於錦衣獄澳浙江奉化人奉化小邑也澳起家進  
士及官吏部威行郡邑其子尤恃勢縱惡奉化錢糧共二萬餘戴氏居其半歷任知縣皆以錢糧拖欠  
罷官至是吏部特授進士胡昱泰爲奉化令胡下車卽延耆老諭之曰吾知奉化錢糧所以不起者專  
由戴氏吾今先徵戴氏而後徵民戶乃籤提戴氏家人追比而恃頑如故卽提戴子親身赴比戴子怒  
急走京師懇之澳勒澳立刻出疏參胡澳曰胡令初到無款單且以部民參父母官亦覺不便而刦于  
其子姑出一疏天下治亂係於守令守令得人則治不得人則亂有旨奏內所陳必有實據著指名回  
奏澳窘極乃以嘉興推官文德翼入告事下撫按旣而撫按皆爲文訟寃給事中沈迅遂疏參澳謂澳  
之疏專爲胡昱泰而所以欲參昱泰者專爲錢糧拖欠昱泰法追比耳於是有旨戴澳革職爲民下錦  
衣衛究問



明季稗史彙編卷七終



明季稗史彙編卷八

烈皇小識

十四年八月十九日聖駕視學釋奠禮成步至東西廡徧閱諸先儒神位因召禮部左侍郎王錫蓀右侍郎蔣德璟祭酒南居仁三臣諭曰宋儒周程張朱邵六子有功聖門最大今稱以先儒位在漢唐諸儒下禮殊未稱爾部會同詹翰等官議所以尊崇之至於六子格言卽督令儒臣編纂成書以弘聖教三臣承旨卽于九月題請開館編纂六子諸書而尊崇位號時廷議不一不果行

大學士周延儒罷延儒林居時長興周仲璉特往通譜敘叔姪禮事之惟謹延儒之再召也秀水吳昌時爲之效奔走延儒入都仲璉官兵部員外昌時官禮部郎中共入其幕下每朝夕輒便衣直達臥室與侍者交通探聽閣中消息隨在外招搖市權昌時醉心吏部誠得一日稱吏部郎卽死無恨宜興亦擬借此塞其望而遠之遂以郎中調文選司破格極矣往時科道年例在二八兩月科一人道二人間或吏部一人此舊例也昌時爲政例推給事中范士髦等四人御史陳蘊等六人科道羣起大譁吏科都給事吳麟徵掌池南道御史祁彪佳率兩衙門集于公所與昌時面議及是日科道齊集援集例相責昌時怙過絕無引咎意御史某不勝其憤提所坐杌搏之昌時倉皇而出且曰若奚爲待我如此我當



盡例出諸御史諸御史聞之咸怒髮上指與昌時有不兩立之勢矣又宜興自恃聖眷視同官蔑如也并研輩皆有愠心緹帥駱養性有陰事宜興刺得之以挾制駱使爲己用往來傳遞者昌時也養時有厚餽宜興不受昌時竟隱匿焉養性以此飲恨刺骨內奄王之心頗不樂宜興曾向宜興云我們才力有限還求老先生包容聞者危之而宜興不以介意清兵入犯宜興督師逐之總督范志完宜興辛未所取土其人大言不慙無纖毫實用宜興以一切軍情委之宜興之出督師也上注望甚殷刻刻遣人偵伺而宜興駐通州每日幕客攢集午後始開門收文書應故事所謂躬歷戎行鼓舞將士者未之能也清兵出口各路援師尾之而行不敢邀擊厚賄宜興以求敘功宜興諾之襄城伯李國禎與王奄俱有私人欲入敘功疏中宜興不從乃比而揭其短入告謂清兵已驕邀而擊之可隻輪不返宜興私通清兵禁諸將不得一矢相加遺坐是安然出口上信以爲然適給事中吳甘來御史王章疏參本兵張國維而德州兵備雷演祚亦疏參范志完皆與宜興有連奉旨周延儒著府部九卿科道議處閣臣各詞申救得旨內外多艱用人罔效悞國害民皆朕不德所致周延儒著致仕去

特旨修撰魏藻德陞禮部左侍郎兼東閣大學士藻德辭陳演請改少詹事辦事仍照三品用轎上從之

此與劉之綸同一破格然之綸以戎事超授雖未成功猶歿於陣與藻德天淵矣



八月會試天下士上命大學士陳演魏藻德爲試官取中陳名夏等三百五十人時以邊警大計改五月會試改八月閣臣循序應以蔣德璟爲副時上究心天象凡日月見食及星宿躔犯取中國歷驗之不甚應以西歷驗之輒應遂加西人湯若望尙寶司卿專理歷法先是召對德璟奏及之曰湯若望有何好處皇上如此優禮上曰古帝皇招徠遠人湯若望遠夷慕化朕故優待之有如卿言建星屢次內犯震驚宗廟卿何不擢之使去及是遂抑德璟而用藻德而棘闈之役亦止于此藻德離孝廉未三年驟興文場說者謂文脈亦促甚矣

兵部尙書張國維罷逮總督范志完順天巡撫潘永圖下獄時給事中吳甘來疏論國維昔巡撫江南惟以巧言令色爲務有浪子中丞之稱及任本兵寸籌莫展惟首輔意旨是徇打恭作揖便成職業云云上頗知國維罪狀擬加重譴國維捐厚資乞援于內奄乃得旨閑住德州兵備雷演祚疏論志完在山東縱兵標掠及金銀鞍數千兩馬百匹行賄京師等事有旨志完革職逮問永圖以失機亦奉旨革職逮問

范志完伏誅上特召雷演祚入朝與志完面質于中左問疏內所奏事款歷歷有據上又問演祚曰爾所言稱公頌德徧于班聯者誰也演祚對周延儒招權納賄如起廢清獄租皆自居爲功考選科道盡收



門下凡求總兵巡撫者必先通賄幕客董廷獻然後得之上卽命逮廷獻上問志完全鞍馬匹招稱送右諭德方拱乾上併召拱乾拱乾力辯云臣以詞林冷局無票擬招駁之責且甫入都安有此事上卽叱拱乾去志完俱被逮知上方注意封疆決無生理滿載輜重望門投送而不得要領卒置于法永固亦坐封疆失事律決不待時

逮大學士周延儒于家吏部尙書鄭三俊罷先是御史祁彪佳賀登選各疏參吳昌時紊制弄權給事中郝綱疏劾吳昌時周仲璉竊權附勢納賄行私內閣票擬機密每事先知總之延儒天下之罪人昌時仲璉又延儒之罪人至是御史蔣拱宸疏論昌時入延儒之幕與董廷獻表裏爲奸無所不至臧證纍纍萬目共見卽如南場一榜非其親戚卽以賄賂皆昌時爲之過付伊弟肖儒伊子奕封公然中式毫無顧忌以至白丁銅臭汪庶陳咨稷等皆賁緣登榜其貪橫如此尙知有朝廷法紀哉未又指通內一事時緹帥駱養性細刺昌時與延儒通賄諸款具事件上聞諸奄亦盡發延儒蒙蔽狀復遣緹騎逮延儒對勘而三俊以舉用昌時引罪回籍延儒就逮將所居樓閣三楹盡行焚燬蓋生平寶藏咸集於此紫貂帳以十計清河參有一隻重十兩者金珠非最上乘不能登此樓焚時火焰皆作五色云

蔣拱宸疏參宜興及吳昌時內有通內一事爲上所最忌七月二十五日召府部九卿科道廷鞫上角素



率太子與定王同訊呼昌時前詰其通內上聲色俱厲昌時辨祖宗之制交結內侍者斬法極森嚴臣雖不才安能犯此上呼蔣拱宸面質拱宸戰栗匍匐伏不能措一語上愈怒叱退拱宸然上意已有成局不待拱宸之對質也昌時始終不爲屈曰皇上必欲以是坐臣臣何敢抗違聖意自應承受若欲屈招則實不能上卽命內侍用刑閣臣蔣德璟魏藻德出班奏曰殿陛之間無犯刑之例伏乞將昌時付法司究問上曰此輩奸黨神通徹天若離此三尺地誰敢據法從公勘問者二閣臣奏殿陛用刑實三百年未有之事上曰吳昌時這厮亦三百年未有之人二閣臣口塞叩頭而退內侍遂進用夾兩脛皆絕昏迷不省人事乃命下錦衣衛獄昌時已不能行衛役負之以出進見衛帥駱養性曰請受刑養性曰汝甫受刑尙不省人事且俟後審越數日衛審一如廷鞫語不稍屈乃刑其兩家人亦終無所招後有旨送法司咸謂有生機矣不數月而斬決之旨下先是韓城之逮也昌時本無所置力而掠之居以爲功王陞彥臨刑恚恨曰吳昌時殺我也旁人皆爲咋舌而昌時更揚揚自得也及是奉旨吳昌時著卽會官斬決與王陞彥之旨同人以爲有天道焉其實不盡然也

逮張國維下獄時追論其中樞誤國之罪故部擬贖徒有旨張國維中樞溺職一徒豈足蔽辜還著再擬具奏



九月廷對策士賜楊廷鑑陳名夏宋之繩進士及第有差

上點禮部尙書李建泰左副都御史方岳貢俱以原官兼東閣大學士入閣辦事岳貢守松江十五年以錢糧拖欠停俸督徵故久稽不遷今春入覲有以岳貢操守廉潔薦者上特授左副都御史適吏部某以某事奉旨詰責尙書李遇知曰臣正行糾駁岳貢云何不卽行題參一語深當聖意遂同建泰入閣從來閣臣無帶都御史銜者亦變例也

給事中時敏例推金華太守敏求援于岳貢岳貢令急進一條陳疏遂具一套疏忽奉嚴旨下部議處衆相訝不解所謂及例推本上岳貢票旨時敏方在議處何得遽行陞擢員缺另推議本上奉旨時敏著降三級照舊官仍然耶矣

周延儒賜死宜興逮至旅邸候命所挽回者不遺餘力欣欣向榮之念及是夜半而勒令自盡之旨下宜興從襖被扶起聽旨旨內先歷數其罪至姑念句內奄止不卽讀宜興意有非望稽首稱聖恩者再四奄候其稽首畢始宣著勒令自盡宜興悸魄喪魂左右不能自持繞屋而走妄思竄逸緹帥令二緹騎執持之延至四鼓緹帥乃勉強從事又宜興素服參附氣斷矣四肢猶煖潤如生緹帥懼有他虞急以釘釘入腦門始敢復命較之韓城爲尤慘云先是上與閣臣語及宜興曰朕恨其太使乖晉江以告宜



興曰事如此英主不使乖不得也周仲璉費四萬金乃免於難

上特起沈自彰爲文選郎中改四川布政張法孔爲職方郎中加太僕卿銜皆以其有應名也

上禁諸臣服飾袖長不得過一尺宮中盡撤金銀等器俱用陶器並諭誠諸臣不得擅用金銀說者謂黃鍾大呂清廟明堂之器文質彬彬斯爲美矣僊極則鬼君子病之今以玉食萬方之主而降爲汙尊卑飲之事是猶道也何以能久北兵退後京城瘟疫甚行朝病夕逝有全家數十口一夕併命人咸惴惴謀其不免上時令張真人建醮祈安而終無驗日中鬼出爲市店家至有收紙錢者乃各置水一盂於門市者令投銀錢于水以驗真僞民間終夜擊銅鐵器聲以驅厲祟聲達九重上不能禁景色蕭條早知有黍離之歎矣宮中有封庫累朝不開上至是忽欲開閱璫以從來未開爲言而上意甚堅璫不敢逆開進空無所有止後架貯小紅箱一隻捧至預書崇禎某年某月某日開上以其預定也益異之及啟視止盛畫三軸其一則無數軍民相背而立上曰此殆言軍民背反耶其二則無數官吏士民俱若倉皇逃竄之狀上曰嘻亂離不遠矣其三則止有一人被髮赤體其貌則儼然御容也羣璫相顧動容上憮然不樂而出是年正月李賊圍承天知府某開門迎賊巡撫宋一鶴鍾祥知縣蕭漢皆死之巡按李振聲迎降與賊通譜欽天監博士楊永裕亦降請發顯陵忽大聲起山谷若雷震賊懼而止



賊至黃陂知縣某挈印走賊設僞官士民殺僞官賊怒反兵屠之遂陷德安黃州守將王允成棄城東下方國安諸將退屯漢口左良玉亦東下江陵舉人陳萬策李開先爲賊侍郎喻上猷所開薦賊檄下萬策自縊開先觸牆死獻賊襲陷蘄州屠之兵備許文岐狗難復蘄水亦屠之二月湖廣土賊陷澧州又陷武岡州岷王遇害隨合于闐闐賊令老回回守承天羅汝才守襄陽而自攻郟縣知縣李貞率士民堅守殺賊甚衆力竭乃陷李貞罵賊不已賊怒褫其衣冠倒懸于地貞大呼曰高皇帝有靈我必懇之願爲厲鬼以殺賊賊愈怒斷其舌副之母喬氏及妻俱死賊還屯荊州

五月李賊攻常德巡撫陳睿謨逃城遂陷嗣是辰岳相繼俱陷獻賊自蘄水一夕馳至黃州乘大霧攻城城遂陷原任副使樊爲城罵賊賊刺之洞胸死麻城周文江降賊署爲僞知府闐闐賊襲殺革里眼左金王并其衆時羣賊俱奉闐闐賊約束惟革里眼不相下闐闐賊置酒宴左革殺之席上革里眼卽賀一龍也四月闐闐賊突入羅汝才營卽其帳中斬之并殺其謀主袁珪

五月闐闐賊攻袁時中殺之時中初合于闐闐許配以女至是時中通款于河南巡按蘇京又擒闐闐賊零騎請功故而殺之

五月獻賊逼武昌時議募兵守城而庫藏空虛三司長詣楚王請貸數十萬王不應募兵皆謂宜募土著



適承德潰兵東下楚王盡招之號爲楚府兵及獻賊陷漢陽臨江欲渡武昌大震議撤江上兵嬰城而守都指揮崔文榮曰磨盤煤炭諸洲淺不過馬腹縱之飛渡而嬰城坐困非策也議者不從賊果從煤炭洲南渡直逼城下攻武勝門文榮率軍禦之多殺傷而楚府新募兵開門迎賊文榮躍持矛大呼殺賊三人賊攢刺之死舊輔賀逢聖合家投墩子河死長史徐學顏與賊格鬪左臂斷右臂持刀撲之賊鬪之游擊朱士鼎爲賊所執戟手大罵賊去其左右手自沉于江死賊執楚王盡取宮中藏金輦數百車不盡楚人于是憾王之愚也賊沉王于江屠戮士民數十萬沿江積尸千里其幸存民或刖手足或鑿目鼻無一全形者 闖賊陷保康知縣石維壇死之別賊至禹州守將楊芬張朗降

七月總督孫傳庭發兵潼關以總兵牛成虎盧光祖爲先鋒會河南總兵卜從善陳永福合兵雒陽之下池寨檄左良玉赴汝甯夾擊令副總兵高傑將降丁爲中軍總兵王定官撫民率榆甯二鎮兵爲後勁總兵方國安合副將徐懋德馬士秀等由蘄州進發夜擊賊於大冶斬首千級前鋒旣勝左鎮諸軍並進獻賊令賊將守武昌爲浮橋於金口悉衆西渡向岳州

八月孫傳庭師次閬鄉闖賊亦進盡發荆襄諸賊會于河南牛成虎前驅遇賊于雒陽擊敗之再擊于河岸又敗之追走至汝州成虎以孤軍無繼退屯澠池 丙寅方國安等復黃州斬僞官癸酉諸將進次



楊邏堡距武昌三舍監紀推官吳敏師聯絡斬黃義勇萬人與師會總兵常國安以舟師先進轉戰金沙洲奪賊百艘丙子諸將齊至武昌獻賊出戰大敗遂西走陷咸甯蒲圻距岳州百里湖南巡撫李乾德總兵孔希貴盡移居民遠徙而伏兵於內開門迎賊賊入伏兵盡發盡殲之留四賊各割一耳貫箭縱回獻賊怒益來攻乾德虛立營壘下伏大礮而積薪其上賊以火攻之大礮發殺賊數千賊愈怒悉衆圍岳州百道並攻遂陷乾德希貴走長沙戊寅賊至湘陰城已一空獻賊登舟南渡忽大風起覆舟溺死賊數千復還岳州盡殺所掠婦女焚其舟陸行抵長沙士民空城走乾德奉吉王惠王走衡州守將尹先民迎降推官蔡道憲不屈殺之健卒林國俊等解衣裹尸葬道憲于南郊俱自縊

九月孫傳庭次汝州僞都尉四天王李養純率所部來降知賊在寶豐傳庭進圍寶豐賊堅守不下闕賊以輕兵來援白廣恩高傑盧光祖逆戰于城東敗之次日復以精騎數千直攻官軍復擊走之傳庭曰寶豐不急下而賊救大至則腹背受敵矣親督諸軍悉力攻城拔之斬僞官陳可新等千餘人遂以大兵搗唐縣時賊家口盡在唐縣官兵入城盡殺之甲辰傳庭復邾縣縣甚窮官軍乏食闕將將精騎萬餘逆戰官軍擊斷闕賊坐纛三戰三勝闕將奔襄城官軍進逼之時河南所在饑荒官軍深憂糧不繼壬子兵噪于汝州降盜李際遇陰通賊癸丑賊率精騎大至傳庭問計于諸將高傑請戰白廣恩曰師



老矣宜分據要害步步爲營以圖萬全傳庭恐賊遁曰將軍何怯也獨不如高將軍耶廣恩不擇引所部八千人南走賊設伏以待官軍官軍接戰陷賊伏中大敗高傑乘嶺上望之曰不可支矣磨衆急退官軍大奔賊驅大隊來追至孟津是役也士卒死者四萬餘人盡喪其軍資甲仗傳庭與傑走河北戊午闖賊向潼關白廣恩擊走之傳庭亦回軍潼關衆尙有四萬人 獻賊襲陷衡州桂王及吉惠二王走永州獻賊復追之湖南巡按劉熙祚遣兵護三王入廣西而自入永州拒守奸人內應熙祚不屈遇害戊戌官軍復岳州盡誅僞官獻賊東犯江西萍鄉

十月辛酉朔副總兵沈萬登復汝甯是日賊將軍司尙志蒞任萬登擁衆突入誅尙志并殺諸僞官時襄雒豪傑並起萬登與毛顯文劉洪起皆起布衣聚衆數萬各保塞以逐賊闖賊僞授萬登威武大將軍不受鳳督馬士英承制授爲副總兵 闖賊遣姪一隻虎陷闕鄉遂攻潼關闖賊問道緣山崖出潼關後官軍大驚遂潰賊盡入關掠傳庭白廣恩退屯渭南賊合衆十餘萬陷渭南傳庭陣亡知縣楊暄死之隨陷商州商雒道黃世清死之直抵西安巡撫馮師孔督兵出戰被執不屈死西安陷按察使黃綱自盡長安知縣吳從義指揮崔爾達秦府長史章世炯俱投井死鄉紳右都御史焦源溥御史王道純禮部主事南居益都司邱從周俱罵賊死宣府巡撫焦源清山西參政田時震俱不受僞職死磁州兵



備祝萬齡自經學宮山東僉事王徵七日不食死舉人席增光朱誼泉俱投井死而左布政陸之祺總兵白廣恩俱降闖賊據秦王府授秦王偽將軍世子妃劉氏曰國破家亡願一死闖賊遣歸母家秦藩富甲天下盡爲賊有賊分兵徇諸縣蒲城知縣朱一統抱印投井死中部知縣華堞與一妻一妾俱自縊賊改西安爲長安府榜掠巨室助餉按令爲朱新譔乃晉宗不知諸本何以皆作華堞華堞爲楚宗時爲宣諭楚豫江北一帶義勇使非令也人習知其名而輒書之耳

獻賊陷袁州令賊將邱仰賓居守左良玉遣兵攻袁州參將高山奮身先登斬賊數百級擒斬邱仰賓遂復袁州 獻賊至長沙突至吉安官軍驚潰兵備岳虞蠻逃城復陷賊復入袁州

十一月闖賊命賊將田斌守西兵而自往延安大會羣賊分五百騎按行鳳翔守將誘而殺之闖賊怒親攻鳳翔陷之屠其城遂逼榆林兵備都任及原任總兵尤世威王世顯侯世祿惠顯侯拱極等斂各堡精銳入鎮城歃盟誓神推世威爲主協力拒守賊誘說三日不聽賊四面環攻城上强弩疊射賊死尸山積賊攻益力逾旬日不克賊以衝車環城穴之城崩數十丈賊乘勢擁入城遂陷都任各家自縊死尤世威縱火焚其家百口揮刀突戰死諸將各率所部巷戰殺數千賊至死無一降者合城婦女俱自盡無一受辱者賊攻甯夏總兵官撫民迎降賊攻慶陽堅守四日力屈城陷守巡二道段復興董琬鄉



鄉紳太常少卿麻禧俱死之賊屠慶陽執韓王 獻賊知官兵陷岳州沿江設伏而令賊千人以巨艦載輜重順流下副將王世泰楊文富邀擊之賊佯走以誘官軍官軍溯流爭上盡奪輜重賊伏發四面夾攻官軍大潰賊復入岳州左良玉令馬士英趨長沙馬進忠等趨袁州士秀等復臨湘進逼岳州賊將混天龍統萬人乘輕舟迎戰士秀三分其軍繞賊舟後反擊之賊大敗趨入城士秀麾諸軍登岸急攻之賊突門出走長沙遂復岳州馬進忠等進薄袁州賊西走遂復袁州盡誅諸僞官總督呂大器亦統兵復吉安 殺太監劉元斌元斌監軍討賊賊在陝雒元斌留歸德不敢進縱兵大掠殺樵汲者冒功及論辟未得旨卽奏辯上怒誅之

十二月闖賊徇西北莊浪涼州二衛俱降遂圍甘州乘夜雪登城巡撫林日瑞總兵郭天吉同知藍臺等皆死之殺軍民四萬七千餘人餘者俱投降惟西軍衛固守不下

十七年甲申正月庚寅朔大風震屋揚沙咫尺不見占曰風從乾起主暴兵至城破癸丑夜星入月中占曰星入月中國破君亡時闖賊僭僞位于西安僞號大順僞元永昌宋獻策僞軍師牛金星僞丞相設僞六政府僞吏政宋企郊僞戶政楊建烈僞禮政鞏精僞兵政喻上猷僞刑政陸之祺僞工政李振聲皆明臣降賊者 上因寇氛孔棘臨朝向閣臣歎曰賊勢如此閭外無人承認府庫殫竭將如之何李



建泰奏主憂如此臣敢不竭駑力臣家曲沃願以家財佐軍臣請提兵上大喜慰勞再四曰卿若行朕當訪古推轂禮親餞卿郊外不敢輕也建泰退卽具揭題用衛貞固凌駟又題郭中傑加副總兵銜管中軍事又請馬兵五百及旗牌等項遂于二十六日啟行上預傳至期行遣將禮朕御正陽樓宴餞督輔并召內閣五府部院掌印官侍坐鴻臚贊禮御史糾儀大臣侍衛應用法駕宴桌該衙門預備上又命查大明集禮中遣將授鉞告廟禮看議酌行是日乙卯上御正陽門樓親餞之曰先生此行如朕親征建泰受餞叩首謝恩旣去上目送久之返駕復大風沙占曰不利行師

二月闖賊統衆四十萬從禹門渡黃河陷絳州曲沃臨晉河津破蒲州舊輔韓爌死之破平陽知府張謙然迎降巡道李士煜逃總兵高傑退至澤州沿途大掠賊遂薄太原時初六日也巡撫蔡懋德遣標下驍將牛勇朱孔訓出戰孔訓傷礮死牛勇陣亡一軍皆沒城中奪氣懋德知事不可支寫遺表令賈士章走京師上聞中軍盛應時先殺其妻子誓將死敵初八日風沙蔽天賊夜乘風登城懋德應時赴鬪死布政趙某副使毛某及府縣鄉紳等官共四十六員皆死之晉王遇害 上傳工部尙書范景文禮部侍郎巨瑜俱以原官兼銜入閣辦事 上御書親勅督輔朕仰承天命繼祖宏圖自戊辰至今甲申十有七年矣兵荒連歲民罹干戈流毒直省今卿代朕親征鼓厲忠勇選拔雄傑其驕怯逗玩之將貪



酷倡逃之吏當以上方劍從事行間一切調度賞罰俱不中制卿宜臨事而懼好謀而成真剿真撫早  
蕩妖氛旋師奏凱勒名鐘鼎須代朕至意徧行示諭 建泰甫出都師次涿州營兵逃歸者三千人過  
東光兵不戢士民閉城拒守建泰怒留攻三日破之至廣平紳衿城守不納亦留攻三日破之殺紳王  
佐等及知縣張宏基 闖賊至忻州官民迎降進攻代州總兵周遇吉固守連戰十餘日殺賊萬餘賊  
悉衆來攻遇吉退守甯武關賊復攻甯武遇吉連發大礮殺賊近萬人會火藥盡有請款者遇吉曰三  
日內殺賊且萬若輩何怯耶能勝之一軍盡爲忠義若不支縛我以獻于是開門奮擊殺賊數千人賊  
懼欲退或爲賊謀請分爲十隊更番迭戰且去帽爲識有帽者輒殺之賊乃引兵復進去帽以自別官  
軍不能支城陷遇吉縱火焚其家而自揮短刀力鬪身中流矢牙兵俱盡遂見執罵賊甚厲賊怒縛于  
市磔之屠甯武太常寺少卿吳麟徵請棄關外甯遠前屯二衛地徙總兵吳三桂入關屯兵近郊以衛  
京師廷臣皆以失地非策莫敢主其議 上諭吳昌時著卽會官斬決其財產并罪輔周延儒貯產籍  
沒充餉上又諭周延儒見賄忘法本當全沒家產今量追十二萬著周尙儒周奕封完納吳昌時量追  
五萬俱免籍沒 上命太監閻國輔等齎餉往薊甯等處給軍時始聞山西全陷 上分遣太監監制  
各鎮盧維甯往通津臨德方正化往眞保杜勛往宣府王夢弼往大名廣平閻思卬往順德彰德牛文



炳往衛輝懷慶楊茂林往大同李宗化張澤民往蘇鎮中西二協 上特陞兵部都給事張晉彥爲兵部尙書又令兼翰林學士 闖賊至大同軍民皆降總兵朱三樂自刎巡撫衛景璣兵備朱家仕糧儲徐有聲皆死之庠生李若葵合家九人俱自縊先題曰一門完節代王遇害賊殺代府宗室殆盡 上召忻城伯趙之龍撫甯侯朱國弼中左門面對乃命國弼總漕淮安之龍掌南京中軍都督府印管守備事 闖賊陷真定先是知府丘茂華聞賊警預定令家眷出城巡撫徐標下茂華于獄標中軍某伺標登城指畫守禦時乘不意掖而投之城外殺之從獄中擁茂華出茂華遂檄所屬州縣預備迎賊數日後賊始以百騎來受降時二十二日也二十三日 上召諸臣面對先是左都御史李邦華密疏請擇大臣奉太子南行臣等輔皇上固守聖意頗以爲然大學士陳演微洩之是日召對庶子項煜面具小疏極言當南巡者八上曰國君死社稷正也朕死決矣大學士范景文同邦華擬申前請給事光時亨大聲曰奉太子往江南諸臣意欲何爲將欲爲唐肅宗靈武故事乎二臣乃不敢言已而上命魏藻德陞兵部尙書督師津德方岳貢陞戶部尙書督漕臨濟意疑從范李二臣之請矣既而復撤前命或云時傳闖賊已南下故止之

三月大學士陳演蔣德璟罷演以多貲不敢出京遂及於禍 上召張國維于獄同庶吉士史可程舉人



朱長治中左門面對 昌平兵噪焚劫城中巡撫何謙以聞有旨何謙帶罪供職 初四日壬辰欽天監奏帝星下移 詔封各總兵吳三桂平西伯左良玉甯南伯唐通定西伯黃得功靖南伯俱給勅印劉澤清竇陞一級劉良佐高傑馬科姜瓖孔希貴葛汝芝許定國王承允劉芳名李棲鳳曹友義杜允登趙光遠卜從善楊御蕃馬岱黃蜚高第各陞一級督撫馬士英王永吉黎玉田李希沆各加陞二級詔總兵吳三桂劉澤清唐通帥師入援三桂澤清不奉詔惟通以二千人至陞見上慰勞再三命同太監杜之秩守居庸 太康伯張國紀進助餉銀萬兩晉封爲侯 上召文武大臣及科道於中極殿問禦賊之策有言守門乏人請考選科道餘皆練兵加餉套語駙馬鞏永固面奏賊勢猖獗官兵畏賊如虎祈簡才望大臣重守都城聖駕南巡徵兵親討臣號召京畿義勇可得十萬衆扈從起行上意不決諸臣皆言其誕妄既退議分守九門稽察出入召見庶吉士於中左門特命陳名夏陞修撰兼戶兵二科給事中 闖賊陷宣府叛將白廣恩先移書約總兵姜瓖降太監杜勛出城三十里迎賊入城執巡撫朱一馮殺之巡按霍達逃 命給事中韓如愈馬嘉植催解浙直京邊正項并改折贖贖及周延儒朱大典吳昌時等贓銀督解時賊信已急諸臣咸思南竄故二人營謀此差如愈曾疏論劉澤清過東昌澤清遣人殺之 晉封嘉定伯周奎爲侯上遣太監徐高宣詔求助謂休戚相關無如賊臣務宜倡



自十萬至五萬協力設處以備緩急奎謝曰老臣安得多金高泣諭再見其堅辭拂衣起曰老皇親如此鄙吝大事去矣廣蓄多貲何爲奎自具疏勉助一萬金太監王永祚曹化淳等有助三萬五萬者王之心富第一上面諭之對以家計消乏僅獻一萬後之心爲賊拷掠現銀十五萬兩金銀什物稱是因奎抄出現銀五十三萬兩什器段疋無算上命張國維仍復原官總督浙直兵餉初國維就逮輦揣知庫藏空虛朝廷首急軍餉乃倡開事例一法殺人行劫者皆得輸金贖罪謂國維一至江南數百萬可立致上惑其說先諭刑部張國維附和罪輔蒙蔽君上本當重治念方士亮等輕擬著免罪候用至是有總督浙直之命時賊警已逼遂連夜疾趨中途已聞變矣過蘇州時江南尙無所聞應撫已移鎮鎮江紳衿共留國維卽于蘇州抵任以資彈壓國維自揣皇上已徇難大位未定事不可知決意南歸俟宏光卽位諸事就緒始抵蘇州莅任臨清總兵劉澤清虛報大捷賞銀五十兩又詭言隨馬被傷再賞藥資四十兩命速赴保定剿賊澤清不從卽于是日大掠臨清統兵南下所至焚劫一空闖賊陷保定賊至城下李建泰迎降中軍郭中傑縋城降兵潰遂陷同知邵宗元佩府印被執不屈死之鄉紳御史金毓峒分守西府賊執之謁僞將毓峒奮拳毆賊投井死妻王氏自縊姪振孫係武舉人登城射賊應弦立斃賊攢殺之毓峒媳陳氏年十八尙未嫁與其祖母張氏母楊氏嫂氏同時投井張氏抱



其孫于懷同下侍婢亦從而下知府方文耀見城破卽自殺

十三日各城門分設紅夷大礮給守城軍每名黃錢百文連日日色無光是夜風色陰慘沙塵刮天上命襄城伯李國禎團練京營兵又命太監曹化淳督理城守

十五日癸卯日色益晦正陽門外伏魔廟杆忽自中劈又南京孝陵夜哭 闖賊叩居庸關總兵唐通太監杜之秩迎降 總督王永吉兵敗陷賊賊縱之歸本兵張縉彥爲請召對閣臣疑之叩縉彥以永吉來意縉彥初不言固問之乃云李自成有二策請上擇之一如漢楚故事劃地爲界一解兵歸誠以大將軍輔政閣臣大駭遂票旨王永吉喪師辱國不准召對 闖賊至昌平軍民爭降總兵李守鐸力格殺數賊賊攢刺之乃拔刀自刎鄉紳張羅彥自殺巡撫何謙南奔

十六日上御殿召考選各官問以治餉安民滋陽知縣黃國琦對曰裕餉不在搜括在節慎安民繫于聖心聖心安則民心安矣上首肯卽面授給事中餘遞奏本半忽祕封呈進覽之色變卽起入內久之諭各官退始知爲昌平失守也闖賊破昌平將十二陵享殿悉行焚燬隨分兵掠通州糧儲

十七日上召文武各官上泣下諸臣亦相向泣束手無計上書御案有文臣個個可殺語密示近侍隨卽抹去是日襄城伯李國禎領京營兵出城立營城下數萬人一時潰散夜漏半曹化淳開廣甯門迎賊



入守城勛衛皆逃御史王章賊呼之降不應遂殺于城上給事中光時亨卽長跪迎降 賊軍師宋獻  
策占十八無雨則京城不可破有雨則一攻卽下至是日黃沙障天忽而凄風苦雨良久冰雹雷電交  
至時賊已屯西城下火礮飛入城中西城竟日無人敢行近暮定武橋南火起始知外城已陷闕走告  
上上曰京營兵何在李國禎練兵何在闕曰皇爺安得有兵京營兵皆散今惟有勸皇爺走耳先是十  
五夜上復召鞏永固問以前策永固對曰賊前尙遠人皆畏賊六龍南幸從者必多今賊已逼近人心  
瓦解從行者臣不敢誤陛下也上頷之及是夜叛闕杜勛至城下呼王相堯綽城入講或欲留之勛曰  
我家萬歲爺爺威勢盛強不反命者立屠京師矣遂縱去一鼓上召新樂侯劉文炳及鞏永固令速帶  
家丁護駕二臣曰臣等何敢私蓄家丁所有家人豈能當賊上亟退召太監王承恩入密語移時急令  
出部署丁爲巡南計又別傳硃諭至內閣命成國公朱純臣提內外諸軍夾輔東宮留守京師已而呼  
酒與周后袁妃同坐痛飲慷慨訣絕妃先起行上拔劍砍之斃后急返坤甯宮自縊上視之曰好好坤  
儀公主在旁哭不已上叱之曰汝奈何生我家亦刃之公主以手仰格臂斷悶絕于地上又令太子定  
王出避民間盡去本等冠帶戒諭今後慎毋露帝皇家形跡時承恩復命上卽微服雜內閣出東華門  
至朝陽門托言王太監奉旨出城守者請以天明請驗扈從者奪門守者反礮擊之不得出朝陽係朱



純臣所守急詣純臣第聞人辭以赴宴未回上歎息而起復走安定門門閤堅不可舉天將曉矣乃返厚載門散遣內丁隨以永王定王分送外戚周田二家手攜王承恩入內苑是夜閣臣方貢直宿精微房科四鼓中涓口傳聖諭內閣諸先生速赴行在亟叩之云聖駕已同輦駙馬王太監出宮矣太子叩嘉定門周奎高臥不起門役不納乃走匿內閣某外邸

十九日丁未陰雲四合城外烟焰障天宣武門守門太監王相堯領內丁千人開門迎賊僞將劉宗敏整軍入軍容甚肅張縉彥守正陽門朱純臣守朝陽門一時俱開二臣迎門拜賊賊登城殺兵部侍郎王家彥于城樓刑部侍郎孟兆祥死于城門下兆祥子進士孟章明同母何氏妻王氏自殺于寓尙衣太監何親見公主仆地未起曰賊已將入恐公主遭其辱且至周府中避之乃負之出宮人魏氏大呼曰賊入大內我輩必遭所污有志者早爲自計遂躍入御河死頃者從死二百餘人羣賊入城取道演象所羣象皆淚下如雨殉難者大學士范景文投井死戶部尙書倪元璐從容自縊左都御史李邦華自縊于先文信國祠中左副都御史施邦耀大理寺卿凌義渠太常寺少卿吳麟徵太僕寺丞申佳允給事中吳甘來御史陳良謨妾時氏陳純德趙譔吏部郎中劉廷諫主事許直順天推官劉有瀾兵馬姚成錦衣衛指揮李若珪王國興中書宋天顯俱自縊庶子周鳳翔于二十一日自縊中允馬世奇與



妾朱氏李氏同縊修撰劉理順同妻萬氏妾李氏子舉人某婢僕十八人俱自縊檢討汪偉全妻耿氏左右縊於堂中武庫司郎中成德金鉉同母章氏妾王氏弟生員金鏞俱投井死光祿署丞于騰蛟服冠服呼妻亦服禮服同縊生員曹文耀妻張氏生四子一女城破張氏率子女哭於家祠同文耀庶母姜氏二媳李氏鄧氏及乳母孟氏八人同縊居民田某合家自焚李小槐全妻杜氏二子一女一婢俱自縊內官白某亦自縊 新樂侯劉文炳集男婦共十六人登樓自焚其弟劉文耀同祖母瀛國太夫人投井死時年九十餘 彰武侯楊崇善自縊惠安伯張慶臻合門自焚宣城伯衛時春率妻孥同投大井中無一存者都督周鏡自盡 駙馬鞏永固公主柩尙在堂同子女四人坐堂中縱火自焚 逆闖入宮問帝所在大索宮中不得僞尙璽卿黎志陞進曰此必匿民間非重賞嚴誅不可得今日大事不可忽也乃下令獻帝者賞萬金封伯爵匿者夷其族至二十二日庚戌得先帝遺魄于後苑山亭中興王承恩對面縊焉先帝以髮覆面白紵藍袍白紬褲一足跣一足有綾襪紅方舄袖中書一行云因失江山無面目見祖宗于天上不敢終於正寢又一行云百官俱赴東宮行在

二十三日辛亥殮先帝先后於東華門梓宮二先帝用丹漆先后用黝漆加先帝翼善冠滾王滲金靴先后袍帶亦如之同移庵內主事劉養貞以頭觸地大慟諸臣哭拜者三十人拜而不哭者六十人餘皆



睥睨過之叛閹某獻太子逆闖留居西宮封爲宋王太子不之屈 宮人費氏年十六投簪并賊鉤出之賞賊將羅某費氏給曰我帝家人也義難苟合惟將軍擇吉成禮死生惟命賊喜卜日置酒極歡費氏懷利刃候賊醉斷其喉立死費氏卽自刎 從賊者大學士李建泰兵部尙書張縉彥戶部侍郎党崇雅禮部侍郎楊汝成工部侍郎葉初春少詹事楊觀光項煜諭德何瑞徵楊士聰修撰楊廷鑑陳名夏編修梁兆陽高爾儼李士瀉薛所蘊趙玉森庶吉士呂崇烈成克鞏張之奇楊明朗張端黃燦張元琳劉餘謨魯梁魏天賞劉廷琮何九雲劉肇國張元錫李化麟姚文然高珩胡統虞傅學禹羅獻文白允謙何允光龔鼎孳趙頻李呈祥傅鼎銓劉世芳周鍾魏學濂朱積吳爾壘楊棲鶚王自超史可程梁清標右通政趙京仕通政參議宋學顯尙寶卿吳家周太僕寺丞李元鼎給事中劉昌戴明說孫承傅振鐸申芝芳時敏米徽翁元益郭充高翔漢金汝礪介松年楊枝起御史柳寅東朱朗榮衛貞固傅景星蔡鵬霄裴希度徐必泓韓文銓陳羽白熊世懿吏部沈自章左懋泰熊文舉王顯侯佐楊元錫吳肇昌郭萬象戶部王鳳林金震出衛周祚程之璿劉顯績禮部黃熙允湯有慶吳之琦張琦劉大鞏朱芾煌工部潘同春繆元鄒魁明方允昌黃徽允李登雲呂兆龍秦汧馮秉清司務孫節大理寺正錢位坤行人胡顯李丕著張元輔吳允謙李之奇許作梅王于曜沈元龍國子博士李森先學正王臯光祿監



事林銘球順天照磨龔彝侯以頭考推官施鳳儀知縣彭三益黃國琦孫以敬王孫慈進士武愨徐家麟吳剛思逆闖入都首先勸進者陳演朱純臣也向賊叩頭求用指斥先帝爲無道者魏藻德也從獄中出而爲賊策下江南者張若麒也其頌賊爲救民水火神武不殺者梁兆陽也代賊焚燬太廟神主者楊觀光也大負先帝委任終以拷掠死者李國禎也先帝求金不應東宮出亡不納終賣盜糧盡爲賊有負君辱國貽恨千古者周奎也至叛閹曹化淳王相堯輩不足誅矣

二十七日平西伯吳三桂如清乞師三桂以清兵至山海關先是三桂聞京師失守先帝殉難統衆入關投降而三桂父吳襄故遼東總兵也逆闖李自成執襄誅求金寶索詐甚酷三桂知之卽時返師出關適清攝政王統兵將入大同中途相遇三桂卽剃髮詣營叩首懇寬願假大兵復仇歃血立誓攝政王爲撤兵西行逆成聞三桂之來而復去也急統馬步兵四十萬追之劉宗敏李過等皆從并挾太子二王東行追及三桂于關外三桂見賊甚盛不敢迎戰入啟攝政王攝政王令三桂先與交鋒而自登高望之待三桂將敗卽揮英王豫王分左右翼以進時逆成亦挾太子登高岡督戰賊衆三面圍三桂勢危甚忽有白標兵二隊繞出其後如發風湧潮所到之處無不披靡逆成頓足歎曰此必北兵也三桂真挾北兵來耶急策馬走賊衆大潰次日令降兵部郎張若麒奉太子如三桂營請罷兵三桂留太子



而益治兵破逆成于關內逆成驅賊連營進發三桂悉銳出戰清兵助之賊衆大奔自蹂踐死者十餘萬人殺其渠帥五人逆成走永平三桂又追敗之逆成奔還京師時四月二十四日也三桂同清兵壓城而軍逆成遂殺吳襄並殺其家口三十八人二十九日逆成出阜城門西走縱火燒諸宮殿又燒九門雉樓火光燭天三桂遙望城中火起知賊已走追至保定奮擊敗之再敗之于定州北逆成憤極復勒勁卒返擊三桂三桂以清鐵騎衝堅突入斬其渠帥數人首萬餘級逆成中流矢墮馬掖而騎疾馳還營卽拔營歸陝西三桂復以清兵掠陝西逆成盡出銳卒迎戰大敗劉宗敏田見秀等皆死逆成乃棄西安由商雒入鄖襄渡江趨武昌逆成屢敗之後每行軍大隊在前已率數十騎在後一夕大風飛沙對面不相覩逆成同二十八騎趨通山登九宮山鄉兵遇之亂刃交加遂剝逆成于馬下逆成旣斃賊衆無主乃謀向何總督投降時何騰蛟總督五省軍務駐長沙賊黨大隊投誠皆虞其詐不敢應相持兩日長沙知府某挺身而往甫至爲賊所殺賊閔曰我等降何總督耳知府卑官來何爲不得已乃自往賊衆望見知爲總督也列隊羅拜歡聲動地何諭之曰若等來降自當題請受爵爲國家建立大功但苦無糧餉奈何賊衆曰我等所儲甚裕毋貽軍門憂何又虞賊衆甚夥狠心未測于是下令願歸農者聽又分蒞其衆賊黨散者大半說者謂何爾時撫有其衆激以忠義鼓行而前



當必能下江南畫淮而守而邊巡顧忌坐失機會良可惜也

皇后諡曰孝烈皇后

時擬諡號者大學士高宏圖也後卽有借此以攻宏圖者復改爲毅宗按諡法思

與毅于先帝俱無取也孟子曰世守也非身之所能爲也效死勿去傳所謂國滅君死正也今先帝俟兩宮畢命後始自爲計義也初擬從權徐圖後舉旣慨然知天命之不可爭不難身殉以謝天下智也業已身殉矣猶曰因失江山不敢終于正寢禮也從容殉難合乎大道仁也夫當變起蕭牆禍介俄頃而仁義禮智俱全而無失焉可不謂正乎按諡法殺身成仁曰烈臨難不屈曰正愚意修史者當具疏特請更上先帝諡號曰烈宗正皇帝先后諡號曰孝烈正皇后

附逆闖伏誅疏

總督湖廣川貴廣東廣西五省軍務兵部尙書何騰蛟奏闖死確有實據闖級未敢扶同謹據實回奏事痛自闖逆肆亂逼我先帝陷我神京罪通于天一旦被戮九宮山差紆神人之憤奉旨何騰蛟著吏部先行議妥速敘仍著將殲賊情形闖賊首級真否該撫察奏解若果的真照格敘賞以昭大信欽此竊惟人臣之訓義在勿欺如闖死非真而臣謬以爲死且居之以爲功是欺也欺則臣罪也當闖死果真而闖之首級已化爲異物如首級物化而假托以明闖死之爲真亦欺也欺則臣罪當死然闖勢實強闖夥實衆




何以死于九宮山團練之手誠有其故闖逆既死則宜留首級示信何以首級竟不可得亦有其故請爲皇上陳之臣自遭左變投身江濤遇救得生臣揣闖逆知左兵南逞勢必窺楚卽飛檄道臣傳上瑞章曠推官趙廷璧姚繼舜咸甯知縣陳鶴齡等聯絡鄉勇以待闖果爲清所逼自豫秦奔楚霪雨連旬闖逆困於馬上者踰月此固天亡之也闖逆居鄂兩日忽狂風驟起對面不見闖心驚疑懼清之躡其後也卽拔賊營而上然其意尙欲迫臣盤踞湖南耳天意亡闖以二十八騎登九宮山爲窺伺計不意伏兵四起截殺於亂刃之下相隨僞參將張雙喜係闖逆義男僅得馳馬先逸而闖逆之劉伴當飛騎追呼曰李萬歲爺被鄉兵殺死馬下二十八騎無一存者一時賊黨聞之滿營聚哭及臣撫劉體仁郝搖旗於湘陰撫袁宗第蘭養臣於長沙撫王進才牛有勇於新牆無不衆口同辭營內有臣晉豫舊治之子衿氓隸亦無不衆口同辭也張參將久住湘陰郝搖旗現在臣標時時道臣逆闖之死狀嗣後大行剿撫道阻音絕無復得其首級報驗今日逆首已誤死於鄉兵而鄉兵初不知也使鄉兵知其爲闖氣反不壯未必遂能剪滅而致弩刃之交加爲千古大快也今而後逼君破都之氣燄遂成烏喙獸嚙之肉餅亦可以謝先帝矣自逆闖死而闖二十餘萬之衆初爲逆闖悲號旣而自悔自艾亦自失遂就戎索於臣逆闖若不死此二十餘萬之衆僞侯僞伯不相上下臣亦安能以空拳徒手操縱自如乎伏乞皇上祭告九廟祭告先帝使天



下後世知數十年之劇寇首逆乃一旦天亡於九宮山以慰二祖列宗之靈以快普天率土之願臣志足矣至如明旨所云察實照詔格議賞是徒滋舉朝之議而重微臣之罪臣惟有灑血於先帝而已回奏委無一毫欺飾不勝惶悚待命之至隆武元年月日奏




















明季稗史彙編卷九

聖安本紀

聖安皇帝神宗顯皇帝第二子福恭王之長子諱由綏母曰某氏初封德昌王進封世子崇禎十四年正月李自成陷河南府恭王薨世子出走懷慶十六年七月嗣封福王十七年三月京師失守四月己巳烈皇帝凶問至南京其時南京參贊機務兵部尙書史可法督師勤王在浦口南京諸大臣聞變倉卒議立君未有所屬而王與潞王以避賊至淮上大臣意多在潞王總督鳳陽兵部右侍郎兼都察院某都御史馬士英遺書南京言福王神宗之孫序當立甲申守備南京魏國公徐弘基提督操江誠意伯劉孔昭等南京戶部尙書高弘圖工部尙書程註都察院右都御史張慎言掌翰林院事詹事府詹事兼侍讀學士姜曰廣等南京守備掌南司禮監務太監韓贊周等集朝內兵部右侍郎呂大器署禮兵二部印不肯下筆吏科給事中李沾厲聲言今日有異議者死之時士英握兵于外與大將靖南伯黃得功總兵官劉澤清劉良佐高傑等相結諸大臣連兵駐江北勢甚張大臣畏之不敢違于是以福王告廟乙酉弘基等迎王于江浦丙戌王舟次燕子磯丁亥百官迎見于龍江關王素衣角帶哭五月戊子朔王乘馬自三山門





外至孝陵從臣請自東門御路入王遜避自西門入至饗殿拜謁畢次謁懿文太子陵自朝陽門入東華門步行謁奉先殿出西華門駐蹕于內守備府己丑羣臣勸進王辭讓遵景帝故事以福王監國是日清鑾勒根入北京庚寅王行告天禮升殿百官行四拜禮魏國公徐弘基跪進監國之寶王受訖再行四拜禮乃退大赦天下其新加練餉及十二年以後一切雜派並各項錢糧十四年以前實欠在民者悉免之以張慎言爲吏部尙書壬辰以史可法爲東閣大學士兼兵部尙書高弘圖爲東閣大學士兼禮部尙書並入閣辦事馬士英爲東閣大學士兼兵部尙書都察院右都御史仍總督鳳陽等處地方軍務時朝廷草創大僚無通曉故事者以學士兼尙書非制也發銀一萬兩遣職方司郎中萬元吉往犒得功等軍以張應元充總兵官鎮守承天等處地方癸巳爲大行皇帝舉哀哭臨甲午以姜曰廣爲東閣大學士兼禮部尙書前禮部尙書王鐸爲東閣大學士並入閣辦事曰廣辭改禮部左侍郎入直以工部某侍郎周堪廣爲戶部尙書乙未召前都察院左都御史劉宗周復官遣御史祁彪佳等安撫江南北等處地方可法請分江北爲四鎮以黃得功劉澤清劉良佐高傑四人分統之傑駐徐州轄徐州及鳳陽之懷遠五河虹泗州盱眙宿州靈璧蒙城亳州十四州縣經理河北河南開歸等處招討事良佐駐壽州轄鳳陽之鳳陽臨淮定遠壽州霍邱潁州潁上太和廬州之六安州九州縣經理河南陳許等處招討事澤清駐淮安轄



十一州縣經理山東等處招討事得功駐廬州轄廬州之合肥巢無爲州滁和二州應天之江浦六合十州縣經理各路援剿事一切軍民皆聽統轄州縣有司皆聽節制營衛原本舊兵皆聽歸併整理荒蕪田土皆聽開墾山澤有利皆聽開採仍許各于境內招商收稅以供軍前買馬置器之用每鎮額定三萬人歲供本色米二十萬折色銀四十萬其體統照山海經理鎮各處提督鎮行事所收中原城池卽歸統轄寶字恢復爵爲上公與開國元勳同准世襲其鳳陽舊有總兵官應罷改副將一員又言操江舊兵單弱請添設九江京口兩鎮以操江總督文臣協理並從之而得功等方各擁兵爭江北諸郡傑圖揚州縱兵大掠且欲渡江而南可法乃奏設督師于揚州節制諸將馬士英以麾下兵至江干上疏勸進丙申召士英入京戊戌羣臣勸進至再三箋王乃許之己亥可法自請督師江北詔以便宜行事各鎮並聽節制撫甯侯朱國弼請裁漕鎮從之召兵部尙書張國維以原官回部佐理戎政召前刑部尙書徐石麒爲都察院右都御史以

原闕四字

鄭鴻逵爲後軍都督府署都督僉事充總兵官鎮守九江等處地方

原闕四字

黃蜚以原官鎮守京口等處地方以韓贊周爲司理監秉筆太監壬寅王卽皇帝位大赦天下以明年爲弘光元年在京文武各官普加一級無級可加者進勳階一級并給新銜誥命在外督撫監司守令並依見任官銜給與誥命在籍閣臣及六部堂上官年六十以上者存問其遺配及間住者並復原官三品以



下先行釋罪分別酌用其北直隸山東河南山西陝西遼東等處文武官生義不從賊在南者文官察明起用生員赴禮部報名取印結寄應天府學考試武官指揮千百戶等赴兵部察驗附在京各衛寄俸弘光元年糧免十分之一北直隸山西陝西全免五年山東河南全免三年江北湖廣免十分之五四川免十分之三以盧九德爲司禮監秉筆太監提督京營癸卯以馬士英掌兵部事仍入閣辦事以禮部右侍郎顧錫疇爲禮部尙書兼翰林院侍讀學士分應天蘇松爲二巡撫以太常寺少卿左懋第爲都察院右僉都御史巡撫應安徽甯池太廣德等處地方提督軍務兼理糧儲甲辰以忻城伯趙之龍總督京營戎政以前都察院右僉都御史田仰巡撫淮揚等處地方提督軍務兼理海防進封黃得功爲靖南侯左良玉爲甯南侯仍各廕一子錦衣衛千戶世襲封高傑爲興平伯劉澤清爲東平伯劉良佐爲廣昌伯加馬士英太子太保廕一子錦衣衛指揮僉事世襲乙巳以大理寺左寺丞祁彪佳爲都察院右僉都御史巡撫蘇松等處地方總督糧儲提督軍務禁北來逃官不許入京丁未可法出京督師給銀二十萬兩密諭參將王之綱等迎母妃于江北郭家寨李自成遣僞制將軍董學禮等率兵南下至宿遷己酉總督漕運巡撫鳳陽等處地方都察院右僉都御史路振飛遣兵擊敗之擒其僞防禦使武懷張慎言薦前東閣大學士遣戍吳姓命召之庚戌朝劉孔昭廷訐慎言薦誤國罪臣且定策時有二心聲色俱厲御史王孫蕃



等亦劾孔昭交爭于上前上諭之乃退明日孔昭具疏論劾慎言乞罷上兩解之弘圖曰廣各上疏乞罷不許以萬元吉爲太僕寺少卿監江北軍命御史周一敬護送潞王于杭州居住設勇衛營以御馬監太監李國輔監督王子進魏國公徐弘基南和伯方一元誠意伯劉孔昭撫甯侯朱國弼安遠侯柳祚昌靈璧侯湯國祚東甯伯焦夢熊成安伯郭祚永各官銜二級歲加祿米五十石弘基仍進左柱國賜韓贊周廢弟姪二人盧九德一人錦衣衛指揮僉事世襲仍賜蟒衣及銀癸丑可法奏先帝已封劉澤清伯爵命加廢一子錦衣衛正千戶世襲甲寅遣督師大學士史可法祭告祖陵皇陵甯南侯左良玉祭告顯陵先是賊陷京師定遠總兵官平西伯吳三桂降于清引之入關大敗自成于一片石自成走西安清乃僞稱太子與三桂合軍入京及至則清九王也遂據京師爲先帝發喪傳檄河北山東皆下之而道路相傳以爲三桂借兵克復又言巡撫遼東都察院右副都御史黎玉田與三桂合謀德州生員謝陞殺賊所署僞防禦使吳徵文奉香河知縣宗室帥鋤爲濟王率士民城守而傳以爲前東閣大學士謝陞及前御史盧世濯於是可法以聞己卯封三桂薊國公世襲命發銀五萬兩漕米十萬石饋之太常寺少卿李沾劾吏部左侍郎呂大器定策時懷二心上曰朕遭時不造痛深君父何心大寶直以宗社攸關勉承重任當日効忠定策諸臣朕已鑒知餘不必深求大器乞罷不許六月庚申以福府千戶常應儔爲某軍都督府左



都督壬戌上大行皇帝諡曰紹天繹道剛明恪儉揆文奮武敦仁懋孝烈皇帝廟號思宗大行皇后諡曰孝節貞肅淵恭莊毅奉天靖聖烈皇后思字大學士弘圖所擬也以都督同知楊振宗充總兵官鎮守安慶癸亥以右軍都督府都督僉事趙光遠爲都督同知充總兵官提督四川陝西軍務光遠時鎮守漢中命未至已降于賊甲子工部尙書程註致仕丙寅吏部尙書張慎言致仕士英薦前光祿寺卿阮大鍼可任樞貳予冠帶召見戶科左給事中羅萬象御史詹兆恆王孫蕃陳良弼應天府丞郭維經等交章言大鍼以逆案發配不宜召弘圖請下九卿議與士英不合各疏求去不許呂大器遂劾士英以入朝爲名橫據國中縱兵劫掠賣官鬻爵諸罪御史黃澍入對廷劾士英司禮監太監何志孔助澍言之上怒士英更爲志孔請得不死先是張獻忠自楚入蜀己巳陷涪州壬申士英劾從逆諸臣光時亨龔鼎孳陳名夏項煜周鐘等先是周王薨于淮安舟中命于安吉孝豐擇地卜葬丙子劉澤清劾呂大器前巡撫甘肅以私忿殺總兵官柴時華及受賄事大器連疏引疾致仕朝議遣大臣北行使清訪先帝梓宮併賞敕與吳三桂而士英言有職方司員外馬紹愉者曾爲陳新甲使清昔之下策今之上策也澤清傑並舉前總兵官太子少師左都督陳洪範召見以陳洪範提督下江定海水師駐瓜洲會左懋第以母喪在山東請北行遂定使清之議丁丑張獻忠陷重慶府瑞王遇害戊寅封常應儻襄衛伯食祿米一千石世襲劉宗周在



籍自稱草莽孤臣上疏請上親征又言四鎮不宜封有旨宣付史館而宗周復連疏言中外諸臣皆可誅於是四鎮皆怒己卯忻城伯趙之龍論先帝廟號忠宗爲下謚弘圖疏辨上是之辛巳以徐石麒爲吏部尙書工部左侍郎何應瑞爲工部尙書以巡按淮揚御史王燮爲都察院右僉都御史贊理軍務巡撫山東壬午以江西按察司副使程世昌爲都察院右僉都御史巡撫應天等處地方加謝陞上桂國少師兼太子太師禮部尙書黎玉田兵部尙書盧世濯工部右侍郎俱充山陵使王燮奏皇太子定王永王俱遇害是日督師標下總兵官于永綬等兵及浙兵鬪于鎮江西門焚居民數百家癸未顧錫疇奏奪故少師兼中極殿大學士溫體仁謚甲申以

原闕五字

邱磊充總兵官鎮守山東大學士高弘圖等奏北使事宜

一於天壽山特立園陵厝先帝梓宮并太子二王神櫬一割山海關外地與清一歲幣以十萬爲率一清已僭號勢成敵國或稱可汗或稱金國主前代多有之乞下廷臣集議一洪範給銀三萬兩爲山陵及道里諸費秋七月丙戌朔命魯王于台州府居住添設兵部侍郎二員加張慎言程註太子太保戊子追尊皇考福恭王曰貞純肅哲聖敬仁毅恭皇帝皇妣某氏曰孝誠端惠慈順貞穆皇太后皇祖妣貴妃鄭氏曰孝甯溫穆莊惠慈懿憲天裕聖太皇太后皇太后生稱也沒而加之非名也遙上母太妃鄒氏尊號曰恪貞仁壽皇太后謚先妃黃氏曰孝哲懿莊溫貞仁靖皇后繼妃李氏曰孝義端仁肅明貞潔



皇后追復懿文皇太子廟諡曰興宗孝康皇帝懿敬皇太子妃常氏曰孝康皇后上建文帝諡曰嗣天章

道誠懿淵恭覲文揚武克純

一作仁

篤孝讓皇帝廟號惠宗建文帝后馬氏曰孝愍溫貞哲睿肅烈襄天弼

聖讓皇后追尊恭仁康定景皇帝諡曰符天建道恭仁康定隆文布武顯德崇孝景皇帝廟號代宗貞惠

安和景皇后汪氏曰孝淵肅懿貞惠安和輔天恭聖景皇后庚寅以左懋第爲兵部右侍郎兼都察院右

僉都御史經理河北聯絡關東軍務馬紹愉爲太僕寺少卿兼兵部職方司郎中加陳洪範太子太傅往

北京癸巳以巡按四川御史劉之勃爲都察院右僉都御史巡撫四川罷貴州總督以前屯田道參議范

鏞爲都察院右僉都御史巡撫貴州命田仰仍總漕務專管江北漕額并催江北各標應給漕米甲午以

前兵部尙書丁啟睿安撫河南賜

原闕四字

李際遇劉洪起各總兵官敕乙未依北京更定營制爲五軍

神機三大營各一營至十營以團練總兵官六人分統之庚子萬壽節癸卯命禮部尙書顧錫疇祀海甲

辰追賜故穎國公傅友德宋國公馮勝諡乙巳李自成遣兵至保甯府降之庚戌中旨以吏部右侍郎張

有譽爲戶部尙書弘圖封還爭之不聽辛亥釋高牆罪宗故唐王聿鍵等三百餘人壬子諭曰朕遭九六

之運車書問阻方資羣策旋軫故都乃文武之交爭致異同之日甚先皇帝神資獨斷彙納衆流天不降

康咎豈在上爾諸臣尙鑒於前車精白乃心匡復王室若水火不化戈矛轉興天下事不堪再壞且視朕



爲何如主祖宗成憲弗尙姑息各宜欽承朕言不再改正閣銜以尙書兼大學士萬元吉奏有清平西王吳三桂牌至濟甯州稱奉大清攝政王旨兵將南侵執政謂款使已行不以爲意八月丙辰朔日食戊午罷偏沅巡撫以前都察院右僉都御史楊鶚爲兵部右侍郎兼都察院右僉都御史總督四川湖廣雲南貴州廣西軍務兼理糧餉辛酉加可法少保兼太子太保進武英殿大學士廕一子錦衣衛指揮僉事世襲弘圖太子少保進文淵閣大學士曰廣太子少保進文淵閣大學士士英太子太師進武英殿大學士鐸太子少保進文淵閣大學士改戶部尙書各廕一子中書舍人以刑部左侍郎賀世壽爲戶部尙書兼都察院右副都御史總督倉場以前薊遼總督丁魁楚爲兵部右侍郎兼都察院右僉都御史總督河南湖廣軍務巡撫承德襄陽等處地方兼理糧餉癸亥贈傅友德特進光祿大夫左柱國麗江王馮勝特進光祿大夫左柱國甯陵王祀功臣廟敕左良玉充提督官開藩武昌甲子張獻忠陷成都府蜀王遇害戊辰皇太后自儀鳳門入宮遣靈璧侯湯國祚告於南郊命惠王于廣信府居住壬申以前甯夏巡撫樊一喬爲兵部右侍郎兼都察院右僉都御史總督川陝等處恢剿軍務兼理糧餉前原闕按察司僉事充爲事官越其杰爲都察院右僉都御史巡撫河南兼轄潁亳二州提督軍務傑澤清良佐各疏劾劉宗周激變軍情動搖聖駕又與得功合疏言羣臣謀危社稷指大學士姜曰廣會有建安王府鎮國中尉米統鎭



候考吏部因奏曰廣定策時有異謀并劾前山東按察史僉事雷縝祚儀制司員外周鑣結黨亂政下縝祚等獄于是吏科右給事中熊汝霖劾統額誣詆大臣通政使劉士禎禮科給事中袁彭年劾統額違制越奏請究問不聽曰廣求去益力癸酉命修西宮之西花園第一所爲皇太后宮丁丑贈吳三桂父故原闕總兵官吳襄遼國公母祖氏遼國夫人戊寅以前總督薊遼軍務爲事官王永吉戴重罪總督山東河北等處軍務庚辰命選淑女辛巳賜北京死節諸臣工部尙書兼東閣大學士范景文等二十二人贈諡祭葬有差建祠鷄鳴山賜額旌忠癸未封

原闕六字

鄭芝龍爲南安伯以前福建布政使司左布政使申

紹芳爲戶部右侍郎兼都察院右僉都御史督餉江北以前太子太保禮部尙書兼文淵閣大學士王應熊改兵部尙書總督川湖雲貴等處專辦蜀寇賜尙方劍一口便宜行事仍給銀三萬兩乙酉以皇太后至京加可法少傅兼太子太傅弘圖曰廣各太子太保士英少保兼太子太師鐸太子少保誠意伯劉孔昭等太監韓贊周等各廢陞有差阮大鍼入對稱旨疏陳江防甚悉安遠侯柳祚昌復薦之以爲兵部右侍郎巡閱江務都察院左都御史劉宗周劾奏不聽自李自成敗走山東諸州縣並殺其僞防禦使牧令復爲明而朝廷無一兵一卒出河北清遂安置官屬至濟甯以南皆降于清惟濟甯州不下是月清將楊方興以兵數千趨濟甯下之九月戊子封皇太后弟千戶鄒存義爲大興伯庚寅以都督僉事張福成充



總兵官前往河北山東辛卯上徽經筵壬辰裁各布政使司右布政使甲午曰廣致仕乙未宗周致仕命黃斌卿移屯九江黃輩屯蕪湖梁石鄭鴻達屯鎮江丁酉以中軍都督府都督同知王之綱充總兵官挂盪寇將軍印鎮守河南己亥三法司奏定從逆六等條例大逆陵遲處死凡五條凡從賊攻陷京師及爲賊毀宗社易門榜者凡倡率勸進及爲賊草僞詔者凡部院詹事翰林三品以上大臣從賊受僞官爲之親信用事者凡文武封疆大吏如督撫總兵降賊者凡京堂翰林科道部等官爲賊畫策規取地方者以上如本犯不歸歸而又逃者收繫其妻子籍沒其資產斬決不待時凡三條凡四五品京堂及翰林科道官受賊僞命居要地比原職加崇者凡方面分巡分守知府等官降賊者凡文武封疆大吏聞變先逃者絞凡六條凡獻銀獻女獻婢以媚賊求免者凡內外衙門官但受僞命者凡職在巡方遇變而逃者及布按三司分巡分守知府等官遇變逃者凡被賊夾打不能自回仍受僞官者凡受僞官爲賊疏遠者凡各衙門奉差如管屯管河權關司餉等官雖無封疆之責而逃者流凡二條凡內閣重臣及部院寺三品以上詹事翰林五品以上卽不從賊偷生潛逃者凡旣受僞職後自疏遠先賊未敗脫身南還者以上斬絞流及遠戍共十一則如各犯認非自投議減本罪一等如遁歸匿形蓄謀叵測議于本罪加一等仍收繫其親屬徒凡二條凡候考候選卽無官守卽未受僞官乃浮沉賊中賊奔乃還者凡遇賊變偶不逃爲賊



脅留未受僞官者杖凡一條凡初爲賊所拘未受僞官乘間先歸者上曰北都淪喪帝后升遐巷戰死綏者遂無一人且反面事仇甘心降賊爲之指斥先帝規並海宇人心已喪法紀何存所奏旣已會議允當並先奪職其絞罪以上三法司行撫按官逮至京訊之流罪以下撫按官依律卽訊具奏其有身雖陷賊而能改圖歸正擒殺賊首及以兵馬城池來歸或爲我內應克建大功或爲我內間効忠本朝者仍從優陞賞不用此例辛丑以通政司右參議王潔爲都察院右僉都御史巡撫登萊東江等處備兵援遼恢復金復海蓋贊理軍務兼管糧餉以

原闕四字

牟文綬充總兵官鎮守荊州總理漢土官兵時荊州未復命

文綬自施州衛收集土兵出夔州以圖之癸卯以後軍都督府都督王允成充署總兵官鎮守岳州土英請定童生納銀經送學道收考免府縣二試其銀以充兵部招練軍器之用從之乙巳給越其杰銀十五萬兩令募兵屯田追賜國初諸臣陶安等先朝諫死諸臣蔣欽等謚丙午召萬元吉還以右軍都督府左都督杜弘域提督池太等處軍務丁未上皇考陵名曰熙陵己酉進封朱國弼爲保國公爵一等辛亥加李沾都察院左都御史命法司逮問呂大器以中軍都督府右都督盧鼎充總兵官武漢團練正紀甯南營務開納助工事例癸丑命刑部逮問黃澍是月高傑率兵赴鎮戶科給事中陸朗例出爲福建

原闕五

特旨留之御史黃耳鼎例出爲江西按察司副使與朗并疏攻吏部尙書徐石麒冬十月乙卯朔石麒



致仕耳鼎復爲御史以中軍都督府左都督李成棟充總兵官挂鎮徐將軍印鎮守徐州

原闕五字

李世

春充總兵官鎮守泗州

原闕五字

賀允昌爲中軍都督府都督僉事充總兵官鎮守揚州併巡上下江御

史爲一差故周延儒子奕封乞免追贓時有舉人汪庶者與延儒弟舉人正儀嫺連中有欲移坐之而不

詳其名以爲曙也遂坐曙贓六萬而免奕封所坐六萬之半丙辰以鄭芝龍充總兵官鎮守福建以黔省

援楚副將羅聯芳爲前軍都督府都督僉事充總兵官鎮守貴州己未以逃官前兵部尙書張縉彥戴罪

總督北直隸山西河南北軍務便宜行事庚申大學士高弘圖致仕遣司禮監太監孫元德察催直隸浙

江福建金花歲改段價九庫一應錢糧仍督兩浙漕糧鹽課洋稅并一切修練儲備事宜甲子加何騰蛟

兵部右侍郎兼都察院右僉都御史仍巡撫湖廣全屬地方賜北京死節太監王承恩等九人贈諡祭葬

賡有差丙寅命于杭州選淑女旨下有校尉人役突入民家搜索女子有投水自盡者巡視京城御史朱

國昌等以聞及選入又不稱旨上怒命各城推戶舉首隱匿者罪及地方隣右各官重處而或言天下美

女及妝飾精妙無過蘇杭於是訪求之使四出矣壬申中旨以吏部右侍郎張捷爲吏部尙書癸酉改丁

魁楚以原官總督兩廣軍務兼理糧餉巡撫廣東等處地方追復代宗生母賢妃吳氏上諡曰孝翼溫惠

淑慎慈仁匡天錫聖皇太后惠宗長子文奎曰恭愍皇太子弟允熲爲吳悼王允熲爲衡愍王允熲爲徐



哀王追封惠宗子文圭爲原懷王並附祀孝康陵復江都宜春南平等四郡主爲公主耿璿于禮爲駙馬都尉甲戌以逃官前左春坊左中允衛允文兼兵科給事中監興平伯軍命鄭鴻逵挂鎮海將軍印乙亥以江西按察司副使張秉貞爲都察院右僉都御史巡撫浙江提督軍務丙子命以來年正月上辛合祀天地於南郊士英請發欵單于各撫按分給所屬司道府州縣官凡贖錢自杖以上俱注單貯庫解部充餉其不注單者以贓論從之丁丑以兵部左侍郎解學龍爲刑部尙書前太僕寺少卿楊維垣爲通政使司通政使命王永吉且駐河上擇險要地方暫料理山東河北戰守事宜俟陳洪範等還日奏請進止戊辰加左良玉太子太傅壬午命停今年決囚以原闕監太監孫呈琇爲山東總監同王濬行事濬至安東不能前有旨令駐淮上賜故巡撫大同都察院右僉都御史衛景瑗等五人贈諡癸未以前吏科都給事中劉安行爲都察院右僉都御史提督直隸浙江沿海開墾屯田市舶魚鹽等稅兼理海防軍務通政使司右參議劉若金爲都察院右僉都御史提督福建廣東沿海開墾屯田市舶魚鹽橋稅珠池兼理海防軍務授朱統鐔行人司行人鑄弘光通寶錢是月漳州賊破雲霄城據之官兵討之賊走大埔十一月戊子西宮成賜名慈禧殿續封鄧文克爲定遠侯辛卯令生員納銀充貢邱磊在安東與劉澤清不協可法奏其有異謀遣右鎮總兵官柏永馥執之下淮安獄自盡癸巳命遼王于台州甯海縣居住乙未夜端



門外火時山東及豐沛並入于清分清兩道一入宿遷一破海州澤清等以聞請沿河築牆與王燮等畫地分守從之丁酉祁彪佳予告庚子以兵科右給事中李永茂爲都察院右僉都御史巡撫南贛等處地方提督軍務丁未以兵部右侍郎張鳳翔爲兵部尙書兼都察院右副都御史總督直隸浙江水陸軍務兼理糧餉巡撫蘇松等處地方以浙江按察司副使盧若騰爲都察院右僉都御史督理江北屯田巡撫鳳陽等處地方以江西按察司副使耿廷錄爲太僕寺少卿調雲南臨安府土官沙定洲兵馬從建昌入川剿賊庚戌以原闕軍都督府左都督許定國充總兵官挂鎮北將軍印鎮守開封辛亥士英請于金山圖山築城從之壬子復逃官御史蘇京官駐廟灣聯絡海上先是徐州土賊程繼孔擒至京聞變逃歸高傑擒斬之加傑太子少傅可法太傅士英太保鐸太傅自五月不雨至于是月十二月乙卯朔命荆王于九江府居住丁巳進封劉孔昭爲誠意侯劉澤清爲東平侯孔昭辭許之禁巡按御史不許拿訪庚申賜建文死節諸臣贈諡辛酉以何騰蛟總督四川湖廣雲南貴州廣西等處軍務兼督糧餉專理恢剿召楊鶚回部癸亥續封徐洪爵爲永康侯甲子命程世昌兼督上江漕務丙寅改上孝宗后張氏曰孝成靖肅莊慈哲懿扶天贊聖敬皇后大閱京軍命士英代先是李自成遣兵攻鄖陽撫治都察院右僉都御史徐起元分守監軍原闕四字高斗樞原闕四字王光恩等出戰敗之固守數月不下命左良玉率兵救之戊辰



以斗樞爲都察院右僉都御史巡撫湖廣己巳陳洪範還奏於十月十二日至北京夷官剛林等語甚諄慢懋第抗詞不屈二十九日至河西務遙祭先帝十一月四日至滄州清遣騎追執懋第等去國書未投因言閣議主于抗節使臣將命不敢委曲上曰國家艱難之際費十餘萬金錢遣使外庭亦欲得當并力滅賊如何閣議止以抗節爲不辱命我當自強清之款否原不足恃爾文武臣工當益切痛恥秣厲兵乘時恢復以申大仇洪範又密奏聞黃得功劉良佐皆陰與清通二人疏辯上曰此清中反間不足信命洪範往督師軍前尋給假去楊維垣上疏追論三朝黨局上曰宵人躁競不難矯誣君父以逞其私安知忠孝之道王之案等已經大赦姑不追究三朝要典民間尙有存者禮部訪求一部送入史館以存列聖慈孝之實又奏逆案多枉命吏部察明分別復職起用有狂僧大悲至京自稱齊王又稱潞王下錦衣衛訊王申加士英少師改命王永吉總督防河鎮將癸酉復逃官前左春坊左諭德韓四維官工科右給事中戴英劾之改別衙門用甲戌遣士英視牲乙亥復逃官兵科給事中時敏官開屯浙江大瞿等山丁丑諭吏部自天啟以前詞臣有勞績者察明贈官不得與廢刑部尙書解學龍等奏從賊諸臣獄宋企郊等十一人凌遲光時亨等四人斬秋後處決陳名夏等七人絞王孫蕙等十五人充軍宋學顯等十人徒潘同春等八人杖自絞以下皆聽贖其在原何瑞徵等二十人俟二三年後定罪翁元益等二十七人存疑



及已用張縉彥等七人奉旨未用姜堃林等三人已故吳家周等二人俱不在六等之列上以諸臣擬罪太輕命三法司再議開納文武職官誥命分防河汎地王之綱自永城至甯陵許定國自甯陵以西至蘭陽劉洪起自祥符至汜水李際遇專防河南一府曹友義防邳州以西張士儀防邳州以東時清豫王兵自孟津縣渡河李際遇迎降縉彥等並走沈邱命高傑率兵進屯歸德以備之戊寅上御興定宮是日傑自徐州進兵己卯加徐起元兵部右侍郎高斗樞都察院右副都御史辛巳罷南郊改於明年冬至御史沈宸荃諫不聽壬午以應天府丞瞿式耜爲都察院右僉都御史巡撫廣西

原闕六字

馬乾爲都察院右

僉都御史巡撫四川命張縉彥以總督兼巡撫歸德開封河南三府督諸將防河恢剿河北瀋關等處地方越其杰巡撫汝甯南陽貴州三府恢剿河南湖廣等處地方士英奏請權酌從之癸未以參將署川東鎮守事務賈登聯爲中軍都督府都督僉事充總兵官前往四川



明季稗史彙編卷九終



明季稗史彙編卷十

顧炎武讀

聖安本紀

宏光元年春正月乙酉朔大雪免百官朝賀以殿工成加應熊太子太保可法太保兼太子太師進建極殿大學士士英少師兼太子太師進中極殿大學士鐸少保兼太子太保進武英殿大學士各賜蟒衣一襲廕一子尙寶寺丞以士英掌文淵閣印充首輔辦事可法辭太保許之以吏部左侍郎蔡奕琛爲禮部尙書兼文淵閣大學士入閣辦事癸巳命得功良佐率兵進屯潁亳二人受命不行許定國陰送款于清傑至睢州乙未定國伏兵享傑於城中殺之明日傑部將攻睢州定國引兵走考城圍之定國走降於清壬寅命在京諸臣自陳保國公朱國弼及御史張孫振劾刑部尙書解學龍賣法庇賊丙午奪學龍職丁未召前都察院左都御史唐世濟復官壬子加衛允文兵部右侍郎總督興平標下鎮將兵馬經略開歸防剿軍務是月清入西安府李自成走襄陽二月甲寅朔命于嘉興紹興二府選淑女左良玉薦太僕寺卿王驥可任巡撫丙辰以驥爲都察院右副都御史巡撫湖廣提督軍務兼理糧儲命高斗樞回京另用己未以阮大鍼爲兵部尙書兼都察院左副都御史協理部事仍管巡閱江防事務以工部左侍郎高倬



爲刑部尙書人有上書言廣信建甯衢州之間有雲霧山爲先朝封禁開之可以助國命太監李國輔往視之甲子謚皇太子曰獻愍定王曰哀永王曰悼乙丑命于蘇州製造大婚冠服丁卯禮部尙書顧錫疇免官廕方孝孺裔孫樹節爲翰林院五經博士高傑妻邢氏有子元爵尙幼在揚州可法請以標下原闕四字李本深提督軍馬與諸裨將分屯梁宋間上曰興平創立軍府以忠死事身肉未寒兼有嗣子朕豈忍以其兵馬信地遽授他人可令其妻邢氏同元爵照舊統轄元爵年幼督師輔臣代爲料理示朕不忘忠臣至意李本深仍領前鋒俟有功優敘良佐上書追論傑罪請別委一人統其衆不許又言本深庸弁恥與爲伍朝廷亦以提督體統尊難之已而邢氏上書請以本深爲提督允文亦具疏如邢氏言從之命未下先是四鎮之南來也以揚州富實各思據之傑兵先至揚州人不納遂圍之得功引兵至天長欲爭揚州朝廷遣萬元吉諭之得功奉詔可法至揚州爲傑所要奏許其家屬居揚州而功在廬州山瘠又新破嘗怏怏不平聞傑死又引兵向揚州士英以聞上曰大臣當先國事而後私仇黃得功若向揚州使高營兵將棄信東顧狡闕躡之而南誰執其咎朕於諸藩鎮恩禮有加諸藩亦當恪守臣節無得輕舉以誤國家可法在徐州安插高兵聞之馳還會上遣太監盧九德高起潛李應昇諭得功得功奉詔李本深等聞得功向揚州棄信引兵還上命起潛駐揚州安撫將士乙亥追封皇弟由渠爲潁王謚曰沖禮部請朝



日命待南郊禮成行之丙子更上先帝廟號曰毅宗封慈煥爲崇王命於福州府居住時廷論多及先朝舊事欲追罪當日建言三案之人並及門戶諸人上優容不許而科道交章引繩批根日益深切羣臣多不自安袁繼咸以總督在九江疏言三朝要典爲先帝所焚之書不宜存已而左良玉亦上疏論之上曰此朕家事列聖父子兄弟之間數十年無纖毫間言當日諸臣妄興誣構卿一細閱亦當倍增悲憤但造禍之臣物故幾盡與見在廷臣功罪無關朕已悉從寬宥不必疑猜黃澍之被收也倚良玉不至繼咸爲之請許回籍聽勘御史左光先被收亦奔良玉與呂大器皆不至御史袁弘勳劾繼咸庇護三案繼咸疏辨上曰袁繼咸身任封疆自有本等職業賊信方急當一心料理軍務不得借題尋釁然自是失職之臣屢屢有挾藩鎮以抗朝廷之意矣兵部職方司主事彭遇驥召對中旨改御史巡按浙江以家丁數百人行至杭州不戢杭人踣署門逐之改巡按淮揚己卯續封張承志惠安伯禮部右侍郎管紹甯署部印失之士英爲之請盡易南京各衙門印去南京二字癸未大悲壩市鴻臚寺少卿高夢箕奏先帝皇太子自北來今往杭州上遣內臣蹤跡至錢塘江上得之三月甲申朔至京都人傳言太子至人人色喜又言上未有子且以爲子京城內外一日中告語幾徧太子在興善寺中發勇衛營兵五百人守之夜五鼓傳上旨移太子至錦衣衛掌衛事後軍都督府都督同知馮可宗邸舍乙酉上御武英殿命府部九卿科道官



及左春坊左中允劉正宗右春坊右中允李景廉前詹事府少詹事方拱乾等審視正宗等皆前東宮諸官於是百官公服獨拱乾有罪便服趨上太子曰方先生及問正宗等皆不識又問講書何地講何書習何字答多不符兵科給事中戴英進曰先帝十六年冬御中左門親鞫吳昌時太子侍旁憶之乎不對羣臣環詰之遂供出姓名王之明爲故駙馬都尉王昺之姪孫曾侍衛東宮家破南奔遇夢箕家丁穆虎聲乃詐稱太子拱乾則於侍衛日識之也奏上丙戌下之明中城兵馬司獄以禮部尙書兼翰林院學士錢謙益掌部事丁亥復故少師兼中極殿大學士溫體仁謚戊子命司禮監隨堂內官監太監喬尙總監兩淮鹽課嚴察兵馬糧餉命督師大學士應熊兼制雲南貴州湖廣廣西鄖陽偏沅各督撫應熊劾馬乾涇掠不法奪官下督撫逮訊壬辰命百官會審王之明於午門外河南有婦人童氏自稱上藩邸時元妃巡按御史陳潛夫信之具儀從送至京上大怒下童氏錦衣衛獄并逮潛夫至京訊之以耿廷籙爲都察院右僉都御史巡撫四川提督軍務兼理糧餉癸巳遙祭諸陵戊戌以黃斌卿充總兵官挂征蠻將軍印鎮守廣西三法司以王之明獄上上曰此必姦人密謀授意圖爲不軌非高夢箕一人可辦法司其嚴行究訊兩月以來往來踪跡及主使之人於是人情益懼民間流言指馬士英王鐸共謀戕害太子黃得功上疏言先帝之子卽皇上之子眞僞未辨乞多方保留若驟處死卽果詐僞天下必以爲眞東宮矣上乃命



養之獄中勿遽加刑俟布告天下愚夫愚婦皆已明白然後申法而劉良佐上疏並言太子童氏二事謂上爲羣臣所欺將使天倫絕滅上曰朕元妃黃氏先朝冊封不幸天逝繼妃李氏又已殉難登極之初卽追封后號詔示海內卿爲大臣豈不聞知童氏不知何處妖婦詐冒朕妃朕初爲郡王有何東西二宮據供是邵陵王宮人尙未悉真僞王之明是駙馬王昺之姪孫避難南來高夢箕家丁穆虎聲令冒認東宮正在嚴究若果真實朕于夫妻伯姪之間豈無天性況宮媵相從患難者頗多朕於先帝無纖介之嫌因宗社無主不得已從羣臣之請勉承重寄豈有利天下之心忍加毒害於其血脈至於舉朝文武無非先帝舊臣甯不如卿肯昧本心害其元子朕夫妻之情又豈羣臣所能欺蔽但太祖之天潢先帝之遺體不可以異姓頑童淆亂宗祏宮闈風化所關豈容妖婦鬪國有大綱法有常刑卿不得妄聽妖訛猥生疑議因命法司先將二案審明情節傳示中外以釋羣疑然而流言日甚己亥上懿安皇后諡曰孝哀慈靖恭惠溫貞偕天協聖哲皇后更上皇考諡曰孝皇帝壬寅先帝忌日上於宮中舉哀百官于太平門外設壇遙祭甲辰封原闕六字黃九鼎爲雒中伯己巳以殿工成加可法太師士英太保鐸少保宏圖曰廣各太子太傅李際遇許定國既降於清清盡得河南開封之地引兵南下王之綱走宿州是日清陷歸德府巡按御史凌嗣死之丙午罷安慶巡撫以兵部右侍郎宗大典爲兵部尙書兼都察院右副都御史提督



廣昌靖南池皖等鎮軍務巡撫應天安慶等處地方總理糧儲兼督上江漕糧丁未命後軍都督府右都督總兵官方國安挂鎮南將軍印駐防池口己酉以光祿寺少卿錢繼登爲都察院右僉都御史總理兩淮鹽法兼理江防軍務贈高傑太子太保廕一子錦衣衛百戶世襲左良玉在先帝時已擁兵跋扈及上卽位數上書侵撓朝政聞有太子事具疏言大臣蔽主危害皇儲時良玉且病其子挂平賊將軍印總兵官中軍都督府右都督夢庚性凶狡一時失職諸臣在軍中者又爲春秋與趙鞅之說以贊成之遂舉兵反以奉太子密旨誅姦臣馬士英爲名壬子加李本深太子少保闕軍都督府左都督提督興平標下兵馬夏四月丙辰良玉陷九江府丁巳追卹三案諸臣劉廷元等二十人並復原官仍各贈脩有差良玉兵自九江而下所至焚掠乙未陷東流京師戒嚴以公侯分守長安等門及都城十三門徵靖南廣昌東平三鎮兵入衛命可法至江北調度命阮大鍼率兵巡防上江上諭三法司附逆一案日久不結殊非法紀朕新政之初姑從寬貸光時亨力阻南遷致先帝蒙難周鍾以詞臣降賊乘馬不下梓宮武愔爲賊僞官任事三人卽便會官處決其於擬斬者發雲南金齒等衛永遠充軍擬絞者發廣西地面充軍終身責令地方撫按官拘解軍罪以下並宥爲民永不敘用周鏞雷縉祚結黨亂政招引外兵圖爲不軌於獄中勒令自盡此外當日有挾持異議者都與大赦朕爲天子豈計匹夫夙嫌並案內曾得罪皇祖妣皇考者俱



勿問文武諸臣不許再提往事屢汗奏章違者治罪是日戮時亨鍾懷於市鑣續祚自盡以光祿寺卿祁逢吉爲兵部右侍郎兼都察院右僉都御史總督倉場續封劉允柱爲甯晉伯庚申續封張國材爲安鄉伯是日良玉陷安慶府初興平所將皆秦人於四鎮中最彊朝廷以衝地委之自李本深等引兵還關自大梁以南如入無人之境而提督之命久不下將士無固志因留揚州不進於是清自歸德分兩道一趨亳州一趨碭山徐州李成棟奔揚州壬戌封常澄爲襄王命于汀州府居住是日都督黃斌卿等與良玉兵戰于銅陵之灰河敗之明日復戰沉其船三十艘上命齎銀幣至軍中勞諸將是時勤王之兵四集軍勢稍振良玉尋死于九江然淮南單弱清自此益進而南事不可爲矣己丑清陷泗州內寅渡淮丁卯選淑女於元輝殿潞王在杭州上書請移僻靜一郡戊辰命移于湖州府賜勅獎諭且命移周魯二王於江西廣東時河南盡入于清獨劉洪起尙在光黃之間己巳以洪起爲提督汝甯開封等處援剿總兵官庚午命王永吉總督防河兼巡撫鳳淮廬三府錢繼登兼巡撫揚州一府召田仰回部繼登辭命王永吉并撫揚州時上流梗塞王驥未行而言者以湖南多警命楊鶚仍爲巡撫駐常德澧州於是興平兵盡棄信還挈其家眷至瓜洲掠民舟欲渡江有旨令鄭鴻逵扼守京口敢有一兵渡江者以大礮擊之日有斬獲報捷而清遂長驅南下辛未清圍揚州甲戌加得功左柱國廕一子錦衣衛指揮僉事世襲丙子以御史霍



達爲都察院右僉都御史巡撫蘇松常鎮四府提督軍務兼理糧儲丁丑清陷揚州屠之督師太傅兼太子太師兵部尙書兼建極殿大學士史可法不知所在戊寅追封于謙爲臨安伯五月壬午朔以山東布政使司右參議李彬爲都察院右僉都御史巡撫河南癸未命移惠王于嘉興府得功率兵進擊夢庚敗之丙戌進封得功靖國公世襲加六鉞大典太子太保廕一子錦衣衛千戶諸將各陞廕有差遣司禮監太監王肇基齎銀幣往勞丁亥封鄭鴻達靖伯分蘇松常鎮爲二巡撫以兵部職方司郎中楊文驄爲都察院右僉都御史巡撫常鎮二府兼轄沿海揚州等處地方提督軍務兼理糧儲己丑夜清以小舟自七里江渡庚寅旦抵南岸鴻達以水師奔福建清陷鎮江府辛卯夜二鼓上出通濟門幸太平壬辰未明士英奉皇太后如杭州日加已有百姓數百人破中城兵馬司獄出王之明稱皇太子奉之入宮宮中金帛器玩搶奪一空吏部尙書張捷刑部尙書高倬戶部江西司郎中劉成治山西司主事吳嘉允中書科中書舍人龔廷祥欽天監博士陳于階國子監監生吳可基皆死之癸巳上至蕪湖命大典大鉞兼東閣大學士督師以揚州府同知李繼晟爲都察院右僉都御史巡撫安慶時無紙亦不及用寶各以一幅紙書其官銜姓名京城百姓相聚搜殺士英故所部黔兵及其姻黨破人家劫財物總督京營戎政少保兼太子太保忻城伯趙之龍捕斬數十人閉城門遣人具啟於清清兵自丹陽趨句容乙未夜前隊至郊壇



門內申豫王至營于郊壇北之龍及諸勳戚文武大臣皆迎降清執之明廣昌伯劉良佐率兵入援次上新河降於清己亥豫王入南京上將幸杭州命大典國安以所部兵先發都督杜弘域扈從得功率兵斷後未行癸卯良佐率清兵犯駕左柱國太師靖國公黃得功死之其將田雄等奉上如營丙午上至南京九月甲寅上北狩



明季稗史彙編卷十終



明季稗史彙編卷十一

行在陽秋

隆武丙戌二年冬十月十四日丙戌永明王監國肇慶以明年爲永曆元年

御諱由榔 神宗孫也 皇考桂端王生四子 長由 次由 俱爲獻賊所害三由 封安仁王以

病薨四永明卽王 上也天資聰明仁厚 皇考自衡徙梧以病薨上居苦次會隆武蒙塵報至兩廣

總督丁魁楚廣西巡撫瞿式耜等謂天下不可一日無君乃迎桂嗣王至肇慶立之以府署爲行在頒

詔楚滇黔蜀

閣輔蘇觀生自南雄撤兵還廣州閣臣何吾驥自閩遁歸青山加丁魁楚東閣大學士兵部尙書瞿式耜

東閣大學士吏部尙書

魁楚原任兩廣總督兵部尙書右副都御史兼吏部右侍郎賜券劍進平粵侯今以吏部右侍郎入閣

攝尙書事兼戎政式耜原任廣西巡撫兵部右侍郎今以禮部尙書入閣兼兵部尙書掌銓事

封李明忠武靖伯鎮南詔

以許德生爲潯州推官監明忠軍 明忠江西人狼兵帥也初奉隆武詔協剿江西八月率潯州兵大



千至肇慶九月至三水聞隆武汀州之變返肇慶預推戴

原任兵部尚書東閣大學士呂大器自閩赴行在

仍用原官辦事旋以病致仕

原任兵部尚書守制李永茂赴行在

上隆武帝尊號曰思文皇帝后曰思文皇后

擢原任福建布政吳炳爲戶部尚書

督師兵部尚書右副都御史何騰蛟等公疏勸進

隆武朝騰蛟進定興侯賜劍駐軍長沙楚撫兵部右侍郎右副都御史堵胤錫受隆武命督雲貴師會

聞汀變騰蛟胤錫公疏進行在

補馬吉翔郭承昊嚴雲從吳繼嗣等爲錦衣衛使

吉翔北真人繼嗣涿鹿人崇禎十六年獻賊陷衡州 皇考皇兄及 上僖宮嬪自永州奔粵西行李

蕭然過道州州人不納且羈縻行駕以索賂及賊入城賴繼嗣夫婦以肩輿衛 上及國母於難 上

失金冊繼嗣亦失所佩州印賊踞城四十餘日無兵衛繼嗣密約粵西鎮楊國威引兵復城國威過道



州覓得州印繼嗣亦獲金冊獻之

進武崗伯劉承胤武定侯鎮寶慶

以王坤爲司禮監秉筆太監

坤故北閩自閩來奔

十一月癸卯朔日有食之

進何騰蛟武英殿大學士加太子太保

得贛州敗報司禮太監王坤請駕移蹕梧州大學士瞿式耜諫止之

唐王自立於廣東改元紹武以蘇觀生爲大學士

觀生過三水不赴肇慶而行在諸臣以觀生無推戴意拒之適唐王與淮王航海而至觀生遂奉唐王監國

遣兵科給事中彭耀入廣州諭唐王去帝號不從耀遇害

故大學士陳子壯廣州人移書瞿式耜請興師東向以靖唐藩式耜以聞上曰先遣官諭之俟其拒命討之未晚也蘇觀生既殺耀曰集兵向肇慶而清兵因得乘間窺潮惠矣兵科給事中陳邦彥同耀



受命入廣州聞燿死乃還

以林佳鼎爲總督兵部侍郎剿唐藩

十八日庚申 上卽皇帝位於肇慶追尊 皇考桂端王爲興宗皇帝追母王太妃爲皇太后立妃王氏爲皇后大赦天下進瞿式耜文淵閣大學士

以朱容藩掌宗人府事

遣錦衣衛嚴雲從護送三宮居桂林敕靖江王防守

授陳子壯中極殿大學士兵部尙書節制兩廣江西福建湖廣軍務賜尙方劍便宜行事

二十日壬戌清李成棟入潮州遂入惠州

進蕭琦兵部尙書晏日曙工部尙書周光夏都御史李用楫等爲各道御史

補原任少詹兼侍讀朱天麟翰林院學士

二十九日總督林佳鼎捷於三水

唐王遣督師陳泰歐陽

闕

等軍於三水城西將犯行在武靖伯李明忠自韶州入援戰於三水大捷俘

斬八百餘級陳泰遁去



十二月初三日總督林佳鼎兵潰於海口

監軍夏四敷赴水死佳鼎不知所在或曰與四敷同赴水死三水之捷佳鼎有驕色督兵晝夜兼行唐王兵僞降誘其水師至海口適東南風大作唐王兵以火攻之佳鼎等盡登岸列營泥淖深三尺餘人馬盡陷兵大潰李明忠二三十騎奪路去許德生被獲至廣州繫獄明忠尋降於清後復返正

特授王化澄兵部右侍郎兼都御史總督粵師周鼎瀚兵科給事中

化澄原任以御史巡粵加大理卿鼎瀚原任戶部郎中 上以林佳鼎失事也化澄鼎瀚皆以內批用瞿式耜奏內批用人非興朝舉動 上不允

進原任兵部尚書李永茂東閣大學士知經筵

永茂以守制不入直專知經筵永茂疏薦鄉望十五人御史劉湘客與焉太監王坤啟視不悅於十四人悉塗抹其名湘客被黜永茂怫以去爭之瞿式耜奏大臣論薦固其職司禮輒去取其間何以服御史何以安大臣坤復疏薦海內名卿數十人式耜曰司禮抑人固不可薦人更不可後湘客改官編修充經筵講官

加王化澄兵部尚書

明季稗史彙編

卷十一 行在陽秋

三



旨杖御史童琳奪科臣劉鼐等職大學士瞿式耜疏寢之

琳劾都御史周光夏私亂臺規

旨下廷杖式耜曰新政未布何可杖言官 上從之鼐等以劾司監

王坤落職賴式耜疏救得賜環

中允方以智棄官去

王坤疑劉鼐疏出以智手故以智力求去

十五日清陷廣州

清將佟養甲李成棟遣遊擊龐起龍僞爲援兵求入城城內信之遂蜂擁而入內兵登城戰一晝夜擒斬清遊擊王士選清兵欲退會有內應遂陷唐王被獲自盡周益諸王俱遇害蘇觀生自縊死許德生降於北紹武守臣忠惠伯王之臣大學士何吾騶及顧元鏡洪天擢潘曾瑋李綺曹煜耿獻忠毛毓祥等俱降其在籍剃髮降者爲李覺斯王應華梁應材伍瑞隆等又葉延祚曾道唯陳世傑關捷先等俱降

清徇東莞新會等縣

二十五日行在得廣州陷報

上乘輿出城駕小舟如西峽傳幸梧州大學士瞿式耜從駕而西丁魁楚



走岑溪王化澄走潯州

清兵薄廣城且急式耜方典選請視師督戰駐峽口王坤復趣上西避之式耜夜乘小舟留駕曰我兵水陸彙至三水可上下搯也爭之不得請身留肇慶宗人府朱容藩奏曰左右所恃惟式耜一人式耜留守則上行益孤上舟西式耜部署五日疾趨梧上西行又五日矣魁楚惑於姦弁蘇聘從耜入岑溪化澄攜中樞印走潯州西上護蹕者惟式耜一人兵部尙書李永茂工部尙書晏日曙太僕卿田芳走博白

清以降撫曹煜仍巡撫廣西煜歙縣人

進士

改廉州知州陸世廉於梧州

授熊兆璽兵主事兆璽廷弼子也原任容縣知縣旋棄官去

授孫順則辰州分守道

清兵犯湖湘命督師何騰蛟率楚師禦之命大學士瞿式耜轉粵西餉濟師

駕至梧州封王國璽武靖侯王維恭華亭侯以國戚故也

元年丁亥春正月癸卯朔駕在梧州時戶部尙書吳炳翰林學士方以智朱天麟文選司郎中吳貞毓給事中唐誠張起御史程源中書舍人吳其雷洪士彰錦衣衛馬吉翔等俱從



命魯王總理南北直省錢糧軍馬恢復事文武爵賞俱聽便宜行事 封陳邦傳思恩侯焦璉新興伯

駕發梧州 上自梧州北幸桂林閣部瞿式耜從行 上欲府江達桂林兵衛寥寥梧州知府陸世廉惟

募舟夫以進式耜扈駕西行夜昭平 板灘

原任右都御史兼巡撫廣信張家玉起兵東莞兵部職方司主事陳邦彥起兵復順德縣

丁未日食

山東鄉兵攻莒州

十六日李成棟陷肇慶

駕幸桂林兵部主事陳邦彥招降甘竹灘余龍等水師焚清艘百餘於東莞直抵廣州境李成棟返救故

乘輿得達桂林劉湘客曰 上於正月幸桂林式耜肅堂陛敕守禦誕告楚蜀各路征鎮粵西居山川

上游清不能仰面攻明矣兵士雲屯湖南北立需戰粵南大通滇柳慶出黔左右兩江四十五洞土痕

悍勇讐國家惠威三百年撫粵悉受銜縻足支內侵桂城爲明辟都疏請道里之可達行在者

加瞿式耜太子太保駐梧江

二十三日虜陷高雷廉三州 東莞張家玉聚衆入海 潮惠二州林舉賢陳耀起兵衆至萬人



二十九日虜陷梧州

潯州守將李明忠平禦守將李承忠俱以兵降北 承忠或作承志

叛將杜永和犯岑溪平粵公丁魁楚督戰墮水死 魁楚有兵千餘屯岑溪李成棟遣副將杜永和招之 不至永和亦陸兼進魁楚與戰於藤江中矢走死

二月壬申朔潮州賴天肖起兵叛將文貴陳虎余成隆來戰擊敗斬之

韶州陳順簡信起兵惠州蘇來起兵新會鄉紳黃奇策起兵 清遣沙遠勉撤奇聖來招撫奇策斬之 進吳炳方以智東閣大學士同入直以智旋罷去

以原任吏部侍郎王錫衰禮部尙書文安之爲東閣大學士以周堪廣郭都賢劉遠生等爲各部尙書以 毛壽登吳德操等爲御史丁時魁禮科給事金堡禮科都給事中兼職方員外 補萬六吉爲給事中蔡 之後翰林簡討

初八日己卯海師攻福州叛將張應夢出戰海師遁 鄭彩周崔芝合兵攻漳平不克總兵陳國祚力戰 死之

十一日壬午月掩歲星於東井 孫守法屯兵長安鰲谷 陳邦彥師次高平邦彥遣馬應房以舟次攻



順德 鄭彩克漳浦擒斬虜官計國男 海師攻興化叛將張應元逆戰而走 晉劉承胤安國公曹志

建永國公焦璉新興侯郝永忠南安侯盧鼎宜章伯

十五日丙戌駕幸全州敕新興侯守桂林 上幸桂林復謀移蹕大學士瞿式耜力爭弗聽竟出全陽

二十二日癸巳海師攻福清不克圍城三日叛將陳心裕兵出北門遂走

二十四日乙未林舉賢陳耀攻廣州不克陣斬清將劉朝用周一鳳而去

丙申清陷長沙知縣王宸縣丞楊日新降

丁酉清陷湘陰王進才大掠湘陰而遁清兵遂入城縣丞扶雲鳳迎降

督師何騰蛟師次衡上騰蛟檄張光璧黃朝宣等援長沙俱不至朝宣走衡州

是月安國公劉承胤朝行在

詔幸永州 駕至全州楚將劉承胤欲擁入桂林 太后不允遂幸永州

三月壬寅朔犁虜伯孫守法復甯州 大學士瞿式耜自梧州還桂林時警報猝至 上念式耜元臣諭

趣治裝從行式耜謝曰君以仁臣以義臣奉命守此土得與此地共存亡於是從官皆行式耜獨守

甲辰李成棟再陷順德敗余龍於黃蓮焚舟數百馬應房戰死



丁未賴熊攻復建陽 清兵逼梧州陳邦傳棄平樂走 敕大學士瞿式耜留守桂林賜尙方劍節制諸軍王坤趣 上幸楚式耜泣諫不能挽無已請身留桂故有是命式耜仍疏請 上暫蹕全州以扼楚粵之中內外兼顧

戊申瀏陽伯董英降於清自瀏陽出降

壬子清以耿藩伯爲廣西巡撫

乙卯清兵薄桂林攻文昌門守將焦璉禦却之 初平樂不守清兵直上至是乘虛數十騎衝入文昌門

城中大驚式耜急呼璉出璉自全州歸休息未定從數人披弦挺刃與清兵遇清兵上城樓式耜署在樓下亟緘之璉矢無虛發應弦而斃者半餘者走璉短兵接追殺數人且盡清隊遂不敢近城城中始定是時清兵自東上昭澤省會逃奔虛無人跡 上在全州念首輔且馳驛召還而留守堅誓與清兵角拒尤急時清兵衝陴而式耜出守文昌門調度自如也是時督師何騰蛟治兵衡湘老將重兵悉屯湖南北聲援弗及式耜獨毅然誓衆嬰城而守親帥大將焦璉掩其不給礮矢夾發虜鋒大挫

安國公劉承胤遣兵援桂林 虜陷陽朔遍野薙髮式耜與璉危城孤守疏請徵承胤兵承胤初從武崗入護猶尊朝廷遂司禮監王坤弄權面叱周鼎瀚爲奉奄寺鼻息故推重式耜發兵數千援桂 雜錄



云北來高副將入桂林掠瞿留守資裝爲總兵陳邦傳焦璉所殺邦傳遂出兵破貴縣入潯明忠州走邦傳破興業劉鴻烈圍鬱林焦璉據桂林破陽朔

戊午張家玉克東莞

己未周崔芝攻閩安 兵部尙書詹兆恆攻開化叛將李榮逆戰兆恆兵敗死之

壬戌張家玉克新安家玉至新安西鄉與陳邦策屯兵白石

癸亥督師何騰蛟破清兵於辰州

一作庚申

甲子林質破德化

乙丑林質破建陽叛將蔡應科以兵逆戰質戰敗被執死之 監軍陳邦彥復清遠不守

夏四月壬申朔清撫耿藩伯兵入梧州耿至梧州攻取陽朔而西失藤縣北敗於桂林不敢進前

江西大旱 詔進張家玉兵部尙書提督嶺東軍務聯絡漳湖兼副都御史

江西清陷衡山總兵陳四明降北

乙亥清陷衡山瓊州 叛將閔可義陷之

封錦衣衛郭承昊馬吉翔嚴雲從爲伯革御史毛壽登等職劉承胤挾上如武岡從劉承胤請也御史毛



壽登駁之曰金吾無矢石功何得援邊鎮例晉五等爵也古翔等疑疏出劉湘客之手周鼎瀚遂造蜚語爲董卓僉汜之議激承胤逼上立下廷杖旨縛壽登湘客及御史吳德操給事中萬六吉於行在午門外會諸臣申救得免壽登等俱落職承胤自桂陽挾上遷武崗式耜疏請留蹕全陽曰聞郊祀禮成卽圖移駕不知將回桂林耶抑幸武崗辰沅耶夫皇上原以恢復兩粵爲心則不徒西粵未恢未可移駕卽東粵未恢亦當駐全爲得策故承胤等嗾杖壽登等四臣主還蹕桂林之議也

乙卯清兵入興安州犁虜伯孫守法戰死 李明忠攻潯州

辛巳叛將孔有德沈知祥耿仲明尙可喜兵犯湖廣 孔耿尙俱降清封王是稱三王

癸未清兵入衡州殺黃朝宣父子

甲申白虹貫日 清兵陷永州守將盧鼎走道州督師何騰蛟駐白牙市兵部侍郎副都御史章曠駐東安

甲申王允成馬進忠走辰沅郝永忠走道州曹志建走永明

癸巳加盟式耜武英殿大學士少師兼太子太師臨桂伯 以守桂功也式耜疏辭

岑本高等敗沒於浦城

癸巳岑本高王思春江中英江中元張文耀朱國貞劉國球等同攻浦城有原



任監軍吳承吳徐元毛文俊張裔元約爲內應至是本高等四人敗死國貞被執叛降遂供承吳等謀清皆殺之

己亥叛將徐勇破安化遂入新化 王光泰克襄陽擒斬虜官 劉承胤兵掠桂林承胤兵至桂林挾餉不出與焦璉兵主客不和譁變擊闕掠市而去

五月辛丑朔清陷新安縣 高雷廉三州俱降於清

壬辰王光泰等克勛陽擒斬虜官

庚戌揚州地震

甲戌改武崗爲奉天府以周鼎瀚爲東閣大學士同劉承胤入直

壬午福建江西大水

壬戌鄭彩破長樂縣

癸亥清陷龍陽縣總兵楊國棟戰死全家被殺

甲子清陷常德

乙丑清兵攻桂林焦璉擊走之翌日又追敗之 清偵兵變積兩城壞猝薄城環攻文昌門式賴與璉分



門嬰守用西洋銃擊中胡騎璉出城戰擊殺數千人自辰抵午不及餐璉曰枵號奈何式耜括署中米蒸飯分哺士益樂用命向晡雨未息收兵明日復出戰清衆棄甲仗而奔式耜先令路將馬之驥伏於隔江清衆從栗木嶺遁之驥疾馳渡江運槊提鞭連斃三人復追殺二十里而還璉久駐桂得桂人心式耜國士遇璉故得其死力

戊辰清陷和平縣知縣李信死之 晉驪式耜少師兼太子太師臨桂世伯爵 上賜璽書褒嘉式耜疏辭新命復請苦自劾

是月副將周金湯率壯士二百人夜復永州城 金湯莆田人武進士原任永州都司復均州

六月督師何騰蛟朝行在 上慰勞之命滇將趙印選胡一清統兵數千人從騰蛟歸守白牙敕諸鎮扼守寶慶辰永 晉何騰蛟世侯爵駐衡州堵胤錫世伯爵駐長沙章曠駐常德

十七日李成棟攻陷新安西鄉陳御策戰死於日石 是月福建張興龍謝志良擁衆入海 廣東英六吉劉良機擁衆入海 海師攻破興國州擒程文袞

秋七月初五日督輔陳子壯率舟師攻廣州不克



初十日兵部尙書張家玉克復轉羅龍州等縣駐博羅 督輔瞿式耜率宣國公焦璉攻復陽朔平樂  
遣司禮監龐天壽催廣西兵援梧州 兵部侍郎兼僉都御史章曠卒於永州松江人崇禎丁丑進士  
陳邦傳復梧州 興陵在梧州督輔式耜奏梧州既復宜昭告 陵寢請 駕還桂林言甚切至  
八月給督輔瞿式耜新銜誥命

以嚴起恆爲東閣大學士 起恆浙人面闊身高有異相原官戶部管錢法試侍郎

二十日清陷高明督輔陳子壯監軍麥而炫被執不屈死之

二十三日 駕發奉天傳幸廣西督輔瞿式耜請繇古泥道維容蹕桂林

二十四日清陷奉天劉承胤以兵降清 奉天之陷也守兵先敗遂斫北關棄壺殮而遁駕三宮無不徒  
行者中宮嫡妹與王皇親母肩輿出城閣臣吳炳不及出幾被獲踉蹌走慶遠嚴起恆王化澄吳貞毓  
馬吉翔出重賞僱三小舟奉 上宮眷西行時乘輿閒出不知所之榮王在辰州督師大學士堵胤錫  
巡按御史熊 麟等共議擁戴時隆武閣臣熊開元在保靖司因檄保靖奉開元書以中興元輔相期  
開元答書略曰今日所急在討賊不在立君乘輿所向未卜萬一或有參差魯唐近轍何可再尋

二十六日清陷博羅



九月李成棟破清遠陳邦彥被獲殺之

二十五日清陷鄭陽王光泰走竹房

清陷沅州巡撫傅上瑞降於清 後清攜上瑞至江西會金聲恆起事疑有變殺之

駕幸沙泥潭

庚申海師破羅源縣又破連江 是月海師掠得山鶯龍門高公島

冬十月戊辰朔 駕幸柳州督師何騰蛟來朝 駕在沙泥潭督師何騰蛟率滇兵來會遂從駕至柳州

大學士嚴起恆亦從萬屯來會

督輔瞿式耜三疏請駕還桂林 時督師何騰蛟嚴起恆及劉湘客咸在桂林南安侯郝永忠兵驟至疑

主客不相安式耜加禮撫慰永忠信服爲之用宜章伯盧鼎亦至自楚式耜因疏請躡極言柳州搖蕩

雜處地瘠民貧不可久駐慶遠壤鄰黔粵南甯地逼交夷不可遠幸又言桂林可都云 騰蛟與永忠

鼎璉等俱分防汛會 武崗之變 乘輿南粵紆道入苗蠻朝官星散不復存上下綱紀式耜西望而

泣散布金錢多遺壯士閒道迎求乘輿適報駕抵柳城乃益增發將吏裹餼糧備車馬表請 上幸桂

林臣躬掃行宮以待於是 上敦諭相國西陲朕根本地先生竭力守此待朕駐車使朕不至顛沛異



日國家再造先生功實多

庚午王光泰奔蜀

辛未太白經天

丁丑兵部尚書張家玉兵敗死

癸未清陷永州攻徐州 清帥耿仲明佟代陷永州遂遣將王燦董英等攻全州王蔣二鎮名失其禦戰黃

沙河失利清兵遂渡西河浦督師何騰蛟遣總兵何有奇援之

清陷全州岳陽伯王允成總兵唐文曜全州道馬鳴鸞俱降於清 清攻辰州榮王遇害 清遣降鎮田

起鳳率兵千人守沅州

甲午清兵入興安白土關

十一月戊戌朔 駕幸象州

官軍捷於全州 土司覃裕春子鳴珂與龍文明搆兵驚移聖駕次象州式耜再疏迎請與騰蛟起恆籌畫調和主客集永思璉誓於神刻期出師宜章伯盧鼎與滇鎮趙印選各分路駐全式耜輸餉轉運不絕全州復大捷獲名馬駱駝而還諸帥連營而軍互三百里清衆退出楚



詔幸南甯 駕自象州欲往南甯忽爲焦璉亂兵阻道文武諸臣皆微服而行馬吉翔左右御舟力撐淺水閒 上見之揮淚乃命閣臣王化澄吏部尙書吳貞毓閒道護三宮往南甯馬吉翔嚴起恆翼 上仍遡十八灘還桂林

十二月丁卯朔日有食之

己巳駕幸桂林靖江王亨甄留守輔臣瞿式耜郊迎 上念式耜功高賞薄慰勞備至進見上殿賜坐給贊元經體不治細務以比諸葛武侯裴晉公先是七月司禮監龐天壽奉敕催兵不語久在桂林舊司禮王坤被承脣逐復入自武崗至柳州至象票擬皆金吾吉翔手也式耜勸 上攬大權明賞罰威德並行以服遠近

授原任禮部右侍郎郭之奇東閣大學士 在庚寅年駕幸梧州時

督師何騰蛟出師全州 各營兵不和焦璉走平樂郝永忠駐興安

清帥孔有德等攻銅仁思恩有德沈知祥耿仲明尙可喜合兵而攻

以劉遠生爲刑部右侍郎丁時魁萬六吉等爲給事中是歲錦江伯楊展據嘉定

二年戊子春正月丁酉朔駕在桂林 遣大理寺評事朱宿垣資詔宣諭粵西左右兩江及雲南土司令各



發兵勤王 宿垣所至諭以大義土司無不感激願効復命遷江西道御史

封趙榮貴定隨侯駐白水 榮貴以保甯來歸故

以詹天顏巡撫順慶潼綿 以總兵皮勛守平溪 屬辰州

乙丑清江西提督金聲桓以南昌內附 聲桓與總兵王得仁以南昌等九郡之地來歸詔封聲桓豫國

公加太子太傅兼吏兵二部尙書左都御史得仁建武侯其餘大小文武進秩有差聲桓志存匡復每就故閣臣姜曰廣進士萬翔私相深計二人極力贊成各欲以身殉國聲桓志遂決會清撫章于天貧唐上下咨怨且與聲桓有卻時以會宴演劇聲桓曰畢竟衣冠文物好看于天曰如此便當代爲疏請聲桓自知失言深自引謝翌日于天遂上疏劾聲桓有反狀而撫吏與督吏兄弟也潛以其事告之聲桓發飛騎追獲其疏遂與得仁合謀殺于天傳檄江省州縣共圖反正

督師堵胤錫駐申家渡袁宗第駐松滋金家場

二月鳳陽地震

清廣東提督李成棟以肇慶內附 成棟遣洪天擢潘曾緯李綺等賁奏請 駕幸端州

清蠡章京線國安遣降將出起鳳攻平溪 總兵吳尙慮率副將三人迎戰三人俱敗死



清攻永甯縣

線國安遣徐爾先等攻永甯寨貴溪王嘗澎總兵項登韋被獲苗兵萬人俱死

初八日崇陽王攻黎平敗於清鎮陳友龍

崇陽王率苗兵十二營攻黎平爲清制津鎮陳友龍所敗諸

營俱潰降獨興化土司迎奉國將軍暉奎入寨以兵千人守之友龍復破寨暉奎死

十五日鎮江地震

十七日金聲桓率兵攻贛州

十九日清孔有德入全州

二十一日永成伯郝永忠擁兵入桂林

二十二日駕發桂林留守大學士瞿式耜次樟木港激各鎮援桂林

清兵薄嚴關駕復南幸鎮將敗逃

過省撞塘呼號屠燒邑屋殺賊不辜欲以無禮犯式耜式耜端坐廳事不可動清乘間來窺突騎薄城

門式耜率典兵宿將歃血定盟申約束晝則閉門固守夜則銜枚襲殺視丁亥春尤加奮勇西省賴以

復全 永忠營被襲疾至關欲撤兵時左右近臣卽勸上移桂林式耜以爲不可若以走爲上策桂可

危柳益可危彼今日可到桂明日可到南太及反復千言淚下且沾衣屢起恆曰遲至厥明式耜備御  
用銀三百兩將進而乘輿已發式耜疾出送駕數千兵遮之不得行式耜署中冠服束帶箱籠圖書咸



被掠聞其主將以令箭護式耜署者反擄其署式耜裸坐署中持令箭逼登舟或曰無以復主將令乘主將先行而亂之耳滇營亦自靈川撤城內煙火高樓櫓城外不可停泊式耜寢一小舟家大啟舟三里樟木港黎民司寇遠生給事中時魁六吉湘客至先以兵與閩民被殺掠聞上命湘客安撫亂亡及勸餉糈出遠生時魁以召將入遇式耜於樟木港遠生僉謂兵潰倉卒不及瞬息難下手請下朔平間催焦璉入援檄遠近無內恐式耜然之舟下三十里至豆豉井式耜入民舍集遠生等立草檄分路四發明日仍返桂城下俾知留守在也旋經陽朔璉兵續上援楚鎮周金湯熊兆佐亦入桂城式耜命簡討蔡之俊大理寺評事朱盛灝先入桂宣式耜令檄按察司僉事邵之燧部璉兵

見劉湘客紀事

孫可望請駕幸南甯許之

詔封李成棟惠國公遣吏部侍郎兼副都御史吳貞毓賫敕入廣東勞成棟封成棟惠國公并封佟養甲襄平伯

詔督師何騰蛟入守桂林清破興安時騰蛟自守巖關遣將守興安及奉詔守桂林清遂破興安破巖關傷軍官萬人興安總兵三人及副將參游以下四百人俱死

是月辛卯白虹貫日



三月丙辰朔督輔瞿式耜入守桂林 時太常卿黃太玄斃於兵式耜棺斂之

乙巳駕幸南甯大學士嚴起恆王化澄同入閣辦事起恆攝吏部尙書以龐天壽掌司禮監 西學新書云隨駕止嚴起恆馬吉翔科臣吳其靈洪士鵬許兆進尹三聘大司馬蕭琦七人

贈陳子壯東閣大學士忠烈侯諡文忠予祭葬廕一子中書舍人錦衣衛世襲 贈張家玉少保太子太師武英殿大學士吏部尙書增城侯諡文烈予祭葬追封三代廕其弟家珍錦衣衛僉事

十三日清兵攻順慶 安南入貢報李成楫之聘也

十五日大學士嚴起恆請開選邕城受二十四土州貢賦從之 邕城屬南甯 時陳邦傳守潯柳二州不能供億故有是請

二十二日清攻桂林薄北門督師何騰蛟擊走之騰蛟師攻榕江 初騰蛟曰永甯至桂滇鎮胡一清亦統兵至桂清人尙疑城虛直抵桂北門騰蛟督兵三面出追殺三十里清人北渡甘崇去督師列營榕江瞿式耜輸餉百石督師出關與留守相慰勞

二十三日甘州蘭州兵起 晉荆江伯張先璧爲侯 督輔瞿式耜檄諸鎮攻取金州 督輔瞿式耜檄廣西巡撫曾可藻下梧州 可藻銜自署兩廣舊例東撫稱制兼粵西西撫稱撫式耜曰方今武人多自



署撫軍輒自命貽遠人笑因代疏請改銜

大學士周鼎瀚罷 當武崗之亂言官彈鼎瀚以附承膺入直式耜司票擬獨不可謂鼎瀚既係大臣應聽自謝免賜督輔瞿式耜銀幣金圖書 篆曰精忠貫日

清攻潼州綿州

以朱天麟爲大學士晏清爲吏部尙書張起爲戶科給事中張鳳翼以兵科掌翰林院張佐辰掌文選司童雲驤爲行人潘駿觀爲職方郎中 守制御史顧之俊亦隨駕

陳邦傳自請世守粵西督輔瞿式耜奏止之

閏月丙戌朔皇子生冊爲太子頒萬喜詔大赦天下

督輔瞿式耜進八箴 式耜以經筵無講官無由聞得失書八箴於扇進之

十八日荆江侯張先璧克靖州遂克沅州 津沅州道戴國士以沅州來歸先璧題授都御史巡撫偏沅召四川巡撫毛芝瑞爲吏部左侍郎芝瑞旋卒 初芝瑞留劉承膺謀立武崗芝瑞力折之幾被害走廣

東病踰年漸劇而所善黃嘉卿知養利州以書迎之遂移居萬年城至是行在以吏部右侍郎召之既拜命遽卒



五月乙丑朔日有食之

二十日清陷潼州

二十二日清陷綿州

二十七日督師何騰蛟復全陽 騰蛟奏捷疏歸之留守曰爲皇上以信臣用臣者式耜一人也

陳友龍以奉天來歸

清援江西 五月七日清譚泰兵至石頭分其兵一路從饒州一路九江一路從進賢並入圍進寶順化

二門十七日聲桓等兵自贛州下越二日入城先是聲桓命大廳宋弘宇以兵三萬守南昌十三日戰

敗譚泰兵於鐵綿巷七里街在德勝門外泰兵於二十三日接戰聲桓敗守德勝章江廣順王得仁守進賢

順化濬臺七月清築長圍二十以後以浮橋柵斷章江

六月甲子朔有流星入于箕尾 督輔瞿式耜勞師全陽

遣刑部侍郎劉遠生入粵東勞師 初成棟表至舉朝歡呼科臣張起請先遣方正大臣觀其虛實吏部

侍郎吳貞毓拜命行使還力言成棟忠誠迎駕初無虛僞因請幸廣遠生奏人久節鉞有威名爲成棟所重信式耜請充此選



督輔堵胤錫兵入常德辰沅 清官程時登余必躍逃

清副將馬進忠以兵來歸屯守蘆溪 進忠故流賊號混十萬

官軍復均州 清官李鳴謙走脫清官之守衡永寶慶柳陽者多遁

是月駕發南甯幸潯州

秋七月晉陳邦傳慶國公留守潯州兼守南甯等郡 駕至潯州適宮眷有疾留數日邦傳以扈從新功

擅劄授官始於慶國自劄繼而部劄後則御劄亦曰欽劄欽劄與吏兵部不相涉其銀則分散兵需及

沿途賞資取足於此 邦傳浙人原任廣西總兵隆武二年挂征蠻將軍印永歷改元封思恩侯

慶國公陳邦傳請世守粵西如黔國故事閣臣朱天麟票擬不允其請邦傳恚甚令武康伯胡執恭至天麟舟中傳語云勳公欲將劍印擲公舟令各營兵聽公發付等語詞甚厲天麟不爲動

佟養甲伏誅 成棟遣養甲代祭興陵密令李元胤殺之元胤成棟養子本姓孫

八月朔駕幸端州即肇慶 賜惠國公李成棟建元勳府第以元胤爲左都督 式耜面奏駕勿東興陵兩載

風塵成棟令地方官修葺陵殿巍然天壽展謁畢龍舟宜卽返灘灘而上成棟備法駕進御用嚴護衛甚威具移山超海之力非有所宜但事權宜專號令宜一茲軍功爵賞文武署置決于成棟若歸之朝



廷徒虛拱且楚黔雄師百萬騰蛟翹首威靈駕旣東軍中將帥謂 皇上樂新復之地成棟亦有邀駕之嫌號令旣遠則人心渙散請上一幸粵東俾瞻仰天子音容面爲慰勞指屬然後責其盡意于東刻期出師一切決於外不中擾也式耜先後遣簡討蔡之俊給事中蒙正發迎駕 上竟由梧入肇式耜再疏言前日粵東未復 上宜住桂以視楚今日江廣反正則宜住桂以出楚事機所在毫釐千里吏部侍郎吳貞毓請 上幸廣城式耜乃促遠生入朝遠生見朝後成棟適自欲還師修行營迓乘輿上命遠生詣廣勞成棟遠生謂成棟曰今乘輿駐北甯賞征伐人疑有私不可不嫌成棟然之遂罷修行宮止遣官迎駕蓋遠生承式耜意欲駕返桂林也

召大學士瞿式耜赴行在式耜疏辭

戊戌督輔何騰蛟復衡州永州師次湘潭

庚子復寶慶 張先璧唐姚陳友龍等所復

以袁彭年爲都察院左都御史洪天擢爲吏部侍郎潘曾緯爲大理寺正卿李綺爲提學副使 從李元楨薦也

補陳世傑翰林學士吳以連驗封司李貞給事中高賚明御史王應華光祿卿楊邦翰太僕卿唐元楨職



方司 從元膺薦也世傑等皆廣人

陞曹燧兵部尚書耿獻忠毛毓祥通政使 從洪天擢薦也

大學士嚴起恆王化澄朱天麟吏部尚書晏清吏部侍郎吳貞毓科臣吳其靈洪士彭雷得復尹三聘許兆進張起等俱赴行在所

副都御史劉湘客禮部侍郎吳璟卽吳文瀛吏科給事中丁時魁戶科都給事中蒙正發兵科都給事中金堡

禮科都給事中李用楫文選司郎中施召徵光祿卿陸世廉太僕卿馬光儀制司徐世儀等皆赴行在所  
以上八則見兩粵新書事多未核處劉湘客撰瞿留守傳實未嘗赴行在

九月癸丑朔有火星自東隕有聲

清陷寶慶 陳友龍復降

冬十月壬午朔惠國公李成棟入朝 成棟五日一朝時政無巨細 上悉委之成棟亦必請旨後行

督輔何騰蛟檄馬進忠李赤心會師取長沙 南雄知府凌犀渠遇害潮州

二十二日請再陷常德

左都督李元膺署吏部尚書 元膺旣殺佟養甲于德慶道上威權愈赫會其誕日饋送稱觴達于佟杪



通政司疏陳乞官日以千計閣臣票擬只有著議具奏四字文選雖掌銓衡之權空名而已廣省非從元膺轉奉成棟劄咨不得擅為除授桂林平樂則瞿守為政廣遠柳州則焦新興為政潯南思泰則陳慶國為政慶國先有降表至廣為成棟所鄙承成棟旨咸思擊之

洪雅兵亂 是冬洪雅鎮湯國聘與團練花漢將熊振生治兵相攻洪雅之境無甯宇

十一月朔李成棟請出師南雄與金聲桓合攻贛州 督輔何騰蛟遣兵復安化醴陵益陽湘鄉攸縣

初二日馬進忠李赤心兵至長沙 清大同鎮姜瓖以大同內附

二十六日清吳三桂兵至保甯 永國公曹志建駐永州

十二月朔李成棟師次南雄 清援長沙李赤心大掠湘潭而遁

三年己春正月朔駕在端州罷大學士朱天麟召舊輔黃士俊何吾驥入直 科臣金堡等疏劾陳邦傳

邦傳疏請即用堡為監軍以觀臣十萬鐵騎十一日大學士朱天麟票擬有金堡從來朕亦未悉之語

十二日早朝科臣丁時魁等率科道十六人進丹墀挂冠而出 上不得已賜諭帖於李元膺收回原

旨天麟即日放還田里金堡丁時魁等仍舊供職時魁等又劾天麟結太監王坤求陳邦傳特薦得以

入閣又令其長子為御史掌河南道次子為中書弟為行人得旨一門盡黜



十九日清再陷南昌金聲桓敗沒一作廿九日 南昌有湯副總守進賢門獻城王得仁被執死之

曰廣自經

二十一日清再陷湘潭督師定興侯何騰蛟被獲不屈死之馬進忠走靖州 諸帥望風奔潰却地數百

里省會震撼老幼竄走內外數十萬不復舉烟火

清陷衡州

二十八日大學士黃士俊何吾驥乞罷許之

嚴起恆王化澄同入閣辦事 詔敕中書張立光崑山張魯傳之子陳邦傳致金珠祈改敕中一字因去

秋駕過潯州邦傳留守潯州如瞿相例中書寫敕遂以世字易居字科道疏論立光擬罪

袁彭年求入相不得上疏云儻臣向者以三千鐵騎西來今日君臣安在 上持其章示羣臣舉朝大駭

時肇慶有假山五虎圖謂元膺以賈冒李也元膺本姓孫又姓賈五虎者爲總憲袁彭年爲虎頭丁時

魁爲虎尾戶科蒙正發爲虎脚兵科金堡浙人隆武初爲延平知府疏激 上殺同卿尹文燧施璜二

人人畏之號爲虎爪副都劉湘客陝西布衣來自瞿相又爲成棟同鄉號爲虎皮見兩粵新書

二十八日定隨侯趙榮貴戰沒龍安柏峪口隨一作遠



二月朔張先璧率水陸兵數萬攻辰州不克

初五日清入撫州次日破建昌

初九日樂安縣殺姚大使

二十五日破蠡縣 陷長沙 破嶧縣

是月清陷信豐惠國公李成棟歿于陣

正月成棟踰嶺攻贛州適金聲桓戰不利全師退去成棟勢單

清將高進庫乘機拒戰成棟復不利退至信豐兵潰不可制成棟親爲斷後乘馬渡河負鐵甲馬不勝

水溺成棟遂卒時中軍杜永和代領其衆清兵復追敗之兵部侍郎缺調鼎監軍道姚生文爲亂兵所

殺

三月初七日行在得督師何騰蛟惠國公李成棟敗績方中湘之報陷也羽檄達行在公卿震駭會政

事堂議所以代定興侯者僉曰惟留守公望尊德鉅足以節制諸將議欲舉大事招討湖南北莫留守

公宜奏上 上曰俞惟留守式耜作朕柱石朕悉其才是必能爲朕任闡外釋北顧憂者於是賜式耜

彤弓鐵鉞特遣郎官一員捧詔詔式耜從此沅湘永寶鄂岳上下三軍之在行間者皆得生殺予奪惟

命式耜辭不獲乃戒期誓衆建元帥旗鼓申號令親出入行間令且環師全永跳盪捷擊刻日可獻俘



誠

初八日兵至湘潭

夏四月初三日清再陷寶慶

初五日太白入月

初八日犁虜伯孫守法敗沒于興安 沒于藥箭寨

十四日故科臣沈迅自焚于萊陽

二十六日清破長山 孫可望據雲南自疏求封秦王不允以安東封之可望不受 可望遣龔彝之弟

鼎獻南金三千兩名馬四匹求封親王名號金堡以祖制無有阻之廣西南甯府與滇之廣南府接壤龔彝乘書有不允卽殺出等語陳邦傳大懼卽具疏爲可望請封秦王大學士嚴起恆以爲不可止封安東王可望因拒命未幾可望密遣人擊起恆于鄧州之濱幾殆

五月朔以兵部侍郎張同儼總督湖廣軍務 授瞿昌文中書舍人昌文式耜孫也自海至

督師堵胤錫辭朝旋病卒于潯州 胤錫將滇南過宜章圖入粵東因割據者強觸相凌乃不果行遂以

偏師會曹志建于永明孤軍無援遂爲所制兵將瓦解胤錫單騎夜遁走閒道覲闕至潯陽卒 劉湘



客曰脩錫移瞿公書云 上有密敕云東人握君子掌一朝不戒生刳入舟朕不復有中土之望惟卿與瞿先生圖之瞿公得書大驚知斯語非上意函簿諸臣欲外鎮與東諸侯鬻則從中可攬權故詭爲上敕使脩錫聞於諸鎮上方蹕東鼓厲征討詎意內外生鬻書四年朝事始未致脩錫我輩不力視封疆聽人舉牢而啟鬻非社稷之福也忠貞營勛國公高必正諸勳咸偉其議

六月朔左都御史袁彭年以憂去 自五月乙亥雨至于六月乙丑大水寒

秋七月朔遣內侍持敕獎南雄守將閻可義杜永和 副將楊大甫與李元脩不協先燒營東下南雄單弱可義斷指自誓軍心始固

十四日楊展破遂甯旋潰回嘉州 永州再陷興甯侯何一青退守榕江督輔瞿式耜檄一青出兵屯全州 召廷臣集議於慈甯宮發東餉萬兩

八月初八日督輔瞿式耜生日遣官賜金幣

十八日姜壤敗沒於大同 袁韜武大定等誘殺楊展遂據嘉眉 明年春葛佐明倚九溪之險糾衆與袁武相拒期年始定

是秋清帥尙可喜攻陷潮州 大學士郭之奇禮科都給事中郭朝薦相傳殉節



冬十月贈何騰蛟中湘王李成棟甯夏王金聲桓南昌伯設壇祭之

大學士王化澄致仕嚴起恆入直 自黃士俊何吾騶去位有疏未拜而先商票擬落旨不符則與化澄相仇故化澄罷去惟起恆耐之故得獨相

十一月朔德化王被獲遇害 鄭芝鵬踞石榴城清兵至隨遁去劉中藻在福甯勢窮自縊福建盡失惟

延漳汀三郡界連江西而延平所屬皆處萬山中清兵既去德化王慈熿踞將軍寨先陷大田繼破龍溪攻順昌將樂十一月清兵復陷之王被獲兵部尚書羅茂生等降

十六日清入

原缺

州巡撫鄭愛陣歿于燕子窩 副將陳勝彭昌高勝談玉等戰于白虎關俱被獲死

十一月十二日興甯侯何一青率粵兵數萬攻永州不克退入山 曹志建復永州 并復桂陽擒清官

李亨

潮州守備郝尙文降清 孫可望大掠貴州殺富順王平鼎 是歲封李建捷安肅伯 建捷北直真定

人成棟養子從信豐歸守廣州

四年

庚寅

春正月駕在端州 清陷南雄屠之閻可義力戰而死杜永和以餘兵守清遠峽

初六日清陷韶州寶豐伯羅成耀預遁 賜李元胤復姓爲孫 上以成棟死難晉元胤車騎將軍封南



陽伯元膺力辭 詔固不許乃勉受車騎印而章疏多不改元銜冬去清以精騎破南雄韶鎮羅成耀  
棄城走元膺聲其罪與蒼梧棄督師鎮楊大用咸伏誅人咸服其紀律時督廣州杜永和退走海外保  
瓊州

初七日復以王化澄爲大學士

初九日駕發端州

十三日命李元膺留守 上聞韶鎮羅成耀遁去遂戒舟西上 駕至德慶

二月朔駕至梧州 戎政劉遠生奏自請行守清遠峽給事中金堡奏留駕爭之不得適大學士瞿式耜  
疏至言粵東難得易失且韶去肇數百里強弩乘城堅營固守亦可待勤王兵至何乃朝聞警而夕登  
舟疏再上而蹕移德慶向梧州矣

下給事中丁時魁金堡蒙正發詹事侍郎劉湘客詔獄從御史 程源奏也大學士瞿式耜七疏救金堡  
等時 上至梧州百官請修行臺 上欲以舟爲家有旨命陳邦傳統兵護駕馬吉翔護三宮舟先行  
五虎失勢報仇者羣起獨袁彭年以憂去得免時魁等奉旨逮問于梧州照廠衛故事榜掠招賂以數  
十萬計盡以充餉拷訊時惟堡大呼 二祖 列宗餘則乞哀殊甚



十五日清攻奉天總督劉祿監軍御史毛養登戰死馬進忠走靖州

二十六日清攻廣州 清陷惠州 惠州總兵黃應杰道臣李士璉知府林宗京等以惠州降清并執趙

王由棧以獻

三月二十四日清破永州鐵柱關次日破龍虎關總兵向明高姚得仁陣沒永國公曹志建奔瀘陽

二十八日硃敕發內閣榜袁彭年金堡丁時魁劉湘客蒙正發等罪於朝堂追贓遣戍以昭法紀

夏四月朔再行考選 朱士焜考選第一

常州靖江縣人

補吏科給事中以代丁時魁補童雲驤御史潘駿觀職

方主事雲驤謝恩時伏地不能起殞於御舟

初八日清兵至黔陽

二十日王光恩駐巫夔閒行屯政 清兵至郴州興甯縣巡撫黃順祖總兵林國瑞戰死其衆二千人被

屠

二十四日興國侯李赤心擒永州清官李茂祖余世忠送行在誅之 茂祖陝西布政署巡撫事世忠乃

鎮將也

六月朔清入清遠峽 清遠參將鄺文龍東莞總兵張道瀛參將張善南雄副將覃養志等俱降



秋七月朔湖南巡撫

原缺

總兵白文明自郴桂出降于孔有德

八月十五日御舟泊繫龍洲

在梧州之東自春至秋王嚴二相隨駕逍遙河上有民謠云漢宮秋也昭

陽愁也起恆字秋冶化澄字昭陽

上與太后三宮置酒樓船簫鼓于梧州繫龍洲之上下起恆手書

水殿二字挂小牌於御舟前

上飲至中宵不樂而罷以清遠峽及惠莞間有敗報也

九月清破瀧陽知縣李遇昇被獲死

曹志建奔恭城

冬十月朔日有食之

上不怡嚴起恆疏請修省

大學士瞿式耜遣其孫昌文入覲於梧州授昌文翰

林院簡討

十一月駕幸藤縣陳邦傳自潯江迎駕

初二日清陷廣州屠之

李元胤攜重貲入廣州城中人亦嬰城自守男子上城婦女饋餉清兵環圍城

外自八月至十一月初二日五鼓北門觀音山紫雲梯遂入城城中驚惶相蹂踐礮銃相擊城門築塞

難開百萬人民盡死于內杜永和自清遠敗後退還端州尙有兵萬人知不能守遂奔恩平高雷以扼

高雷廉

上與太后三宮移駕西上至藤縣遂分爲兩陳邦傳自潯州來迎駕諸臣與之合者皆往石

江不入者則入容縣溝赴北流陸州高化境兵多散敗肆行劫掠戶部尙書吳貞毓失一妾刑部尙書



毛毓祥子身遁聞 上往南甯向交趾及二十四土州爲援相隨有王化澄嚴起恆馬吉翔龐天壽等  
陳邦傳尙據潯江爲殿後其兵尙萬餘

初三日清孔有德入全州 衛國公胡一清撤守榕江兵

初四日孔有德犯興安 四日有德兵至興安次日辰刻大舉入巖關開國公趙印選衛國公胡一清甯  
遠伯王永祚俱以分餉入桂榕江空壁武陵侯楊國棟甯武伯馬養麟方馳出小路軍榕江兵未戰而  
回清發使趙印選印選已出城城中大亂沿道驅掠式耜令戢之不得城中潰兵各鳥獸散一清永祚  
從城外去式耜衣冠危坐署中適總督張同敞自靈州回過東江不入 泗水過江入桂林願與式耜  
同殉國

初六日孔有德破桂林 劉湘客作初正日用厯異也

清江王及其世子長史李 被獲不屈死 留守大學士瞿式耜兵部侍郎張同敞被執不屈羈于別

室 大學士王化澄戶部尙書董天閔廣西布政朱 俱降于清 桂林平樂全州 原缺 東安永甯臨桂

靈川興安義昭平甯灌陽永福恭城陽朔荔浦修仁富川平樂等十七州縣俱陷

閏十一月十七日留守大學士瞿式耜兵部尙書張同敞死之 劉湘客曰瞿公執去見有德公云事已



至此一死足矣夫復何言有德雅重公安于別所防衛嚴而不失禮焉公賦詩與張公廣和邏卒得公與胡一清書知公死心社稷而志未灰也十七日辰刻請公出笑謂張公曰我二人多活了四十日今日事畢矣張公亦謂曰今日得死所矣遂南面被害十六日之夕十七日之辰雷霆冬發遠近皆曰徵在公也瞿公從容賦絕命詩云從容待死與城亡千古忠臣自主恩澤久頭絲猶帶滿天香其詩原闕時給事中金堡已爲僧有德請葬二公遂瘞北門園

十二月駕幸南甯入土州朱天麟嚴起恆王化澄馬吉翔龐天壽等俱從行 權兵科給事中張起爲副都御史巡撫南甯

南陽伯孫元膺被獲于欽州赴廣州 五日之內兩廣陷駕離梧州爲陳邦傳所刦百官星散元膺身率散卒護蹕憩南甯身至南海檄舊旅至欽州爲土兵王勝常所刦械送廣州見有德不屈膝有德不遽殺留之以招杜永和

是冬高李二將率衆數千渡瀘自黎州掠嘉眉

五年

辛卯

春正月朔駕在南甯尋幸安隆州

二月十五日清陷梧州及蒼梧藤縣



二十五日清陷柳州及象平馬平

三月端州羅定州降于清

清陷高州 高州提督李明忠兵潰吁口清兵追至電白縣明忠預遁清遂陷高州道臣郭光祖吳人龍知縣文振義副將王邦友等俱降清

新泰伯鎮守潮州總兵郝尙文潮州道沈時知府王朝鼎俱降于清 尙文尋內附

夏五月秦王孫可望遣將賀九儀總兵常榮將兵至南甯護駕并請移蹕雲南 上亟召隨從諸臣議之時閣臣吳貞毓御史王光廷徐極等勸駕幸欽州依李元胤閣臣朱天麟力請幸滇言元胤屢敗之餘衆不滿千棲依海濱其不足恃明矣雲南山川險阻雄師百萬北通川陝南控荆楚亟宜移蹕以堅可望推戴之心以慰中外臣民之望吳貞毓魏光廷等堅執不可遂寢其議

秋八月慶國公陳邦傳與其子文水伯陳曾禹遣將至梧州降于孔有德 潯州總兵李時方有聲副總兵鄧景監軍遣楊兆文潯州知府何允中俱降于清 陳邦傳殺宣國公焦璉 璉與邦傳有兒女戚邦傳說降不屈遂爲所誘殺又甯端伯茅守憲爲邦傳所脇繳印降守憲尋悔恨遂卒

冬十月撫南昌劉文秀率兵五萬攻保甯不克 文秀自滇入蜀與文韜武大定等相拒數月



十四日靖南侯于大海率兵于荊州降于清 大海初據夔州之巫陽孫可望所敗故降

定川侯李占春被執 占春僞降卽爲僧遁去尋復被執

是歲永州諸生鄧光遠不屈死之

孫可望殺大學士楊畏知 畏知故衡滄道也永曆改元擢部院是年入覲安隆晉大學士尋滇可望忌而殺之



明季稗史彙編卷十一終



明季稗史彙編卷十二

行在陽秋

六年壬辰正月

朔駕在安隆州

二月二十五日吳三桂破嘉定州總兵白文選預遁

清耿繼茂兵入欽州開國公趙印選預遁

杜永和守瓊州降清

三月初八日湖北晝晦大風揚沙至持燭而行

官軍復沅州又復平遂衛藍田縣

清破佛圖關遂陷重慶

夏四月二十日清入敘州總兵王俊臣白文選退守永甯

故四川提學任佩弦降于吳三桂

十一日德州雨雹大者如瓜殺三人沉漕舟一

十三日清殺南陽伯孫元胤安肅伯李建捷



元膺聞杜永和之降慟哭三日夜清遂殺之投尸江中時前鋒將周彩安肅伯李建捷亦成棟養子與元膺義兄弟也建捷嘗從杜永和先登廣州敗走蒼梧與元膺同護蹕亦隨海內欽州作難已登舟出海聞元膺被執遂願與同死

十八日官軍復清州擒斬清總兵楊國勛

二十一日孫可望自靖州率眾攻湖南清帥沈永忠遣張國柱禦戰可望擊敗之

六月荆江侯張先璧朝行在封沅國公

晉馬進忠鄂國公

吳三桂破石泉縣巡撫詹天顏及曹洪等俱被獲天顏福建人

秋七月庚午朔復寶慶

初四日安西王李定國平東王孫可望復桂林孔有德陳邦傳曾盛祖祕希孔承先孫龍孫延世董英袁道先等伏誅

可望自行在出寶沅定國帥偏師輕騎扼有德于桂林旬日下數十城有德自刎已獲其幼子置軍中至十三年己亥春殺之



十一日庚辰黃霧四塞

復永州

擒斬清紀國相鄧胤昌姚杰等數十人

八月十六日復夷陵

十八日建極殿大學士朱天麟卒于廣南府予祭葬廕一子中書舍人諡文靖

孫可望敗清于靖州

可望駐長沙善安縣

博望侯張月降于清

九月清再陷梧州

杜永和張月執提督李明忠降于清

詔授文日章爲攸縣知縣

吳三桂兵至龍安邊堡

冬十月撫南王劉文秀攻保甯不克

明季稗史彙編

卷十一行在陽秋



文秀自緜州出攻保甯十日吳三桂至文秀撤圍退

十一月十三日官軍復衡州擒清辰州總兵徐勇及劉升祚等

十九日清兵至湘潭馬進忠退守寶慶

二十三日清再陷衡州

總兵馬闕敗死

十二月初五日清陷藤縣總兵羅超戰歿再陷賀縣

二十九日清兵入平樂縣平彭俊陣歿

是歲封莫宗文安仁伯

七年癸巳春正月

朔駕在安隆州

二月李定國馬進忠兵入永州

二十八日永州陷李定國走龍虎關

孫可望駐靖州總兵馮壯力駐奉天

清帥耿繼茂破廉州道臣王道光被執死



道光江西庚午舉人初任雲南太和知縣

三月武陵侯楊國棟安仁伯莫宗文攻常德不克

十七日孫可望禦清兵于周家堡敗回寶慶

安西王李定國敗于肇慶退駐柳州

夏四月郝尙文復以潮州內附斬清知府薛信辰

五月封楊時清征定侯

六月初四日潮陽再陷

閏月初九日安西王李定國出師廣州攻肇慶

二十六日總兵周金湯攻復遂溪降其守將陳琪

秋七月李定國復化州吳川信宜石城定國以施尙義守化州

初九日李定國離肇慶

十三日李定國遣兵入賀縣樂平

二十一日李定國率兵二萬攻圍廣西賊不克



定國圍七晝夜清兵自奉天至定國解圍

總兵王之邦卜甯張蓋陣歿于陽朔

叛將趙文貴執四川道孫膺乾至保甯獻于清

孫可望駐奉天

李定國兵擒新清廣西巡撫王荃司

八月初五日石城遂溪陷

化州陷

九月十四日潮州再陷新太侯郝尙文父子投井死潮州道李兆京被獲死

以王立功內應也尙文一作尙久以功厯陞總兵守潮州清至以城降附戊歲李成棟內附尙文復正

朔詔以爲將軍仍駐潮州李敗復降清爲潮州總兵尋加銜管水師中疑不肯越省城癸巳復奉正朔

自稱復明將軍挾諸鄉紳入城盡反清所署官屬願從者仍與原銜不願者拘留之惟教官以下聽下

各邑追印多挾印去空城以待惟龍溪知縣焦某舉城歸之至是清以重兵壓之尙文父子投井死曰一

自縊死



冬十月清師尚可喜陷吳川縣 陳彝典陳其策被殺

十一月二十日清督祖澤遠援鄖陽

十二月十三日清破郴州桂東縣黃蠟潭巡撫朱俊臣陷陣死總兵羅念等降

是歲官軍擒斬清廣西右江道參議金漢蕙樂平知府尹明廷廣西副將溫如珍降清

八年甲午春正月朔駕在安隆府以吳貞毓爲大學士 孫可望駐靖州

二月安西王李定國帥兵入高州張月來歸

夏四月初十日李定國兵至雷廉遣將攻復羅定新興石城電白陽江陽春等縣

六月李定國遣將攻梧州不克 官軍擒斬清湖廣湖北道右參議劉鼎祚辰州知府王仕珽

秋七月遣內臣至廈門島册封朱成功爲延平王

二十六日平遠再陷

冬十月初三日官軍攻圍廣州

十一月詔改安隆州爲府改都康萬承安平龍安諸州爲府

十二月朔延平王克復漳州



初六日李定國攻新會縣

十四日清援廣州官軍解圍

十六日李定國攻肇慶不克還廣西 南甯巡撫張起致仕起與孫可望標將賀九儀不和故也

是歲予大學士吳貞毓自盡殺張鐫十餘人 詔曰朕以藐躬纘茲危緒上承 祖宗下臨臣庶閔今八

載險阻備嘗朝夕焦勞罔有攸濟自武衡肇梧以至邕新播遷不定茲冬瀨湍倉卒西巡苗截于前虜迫於後賴秦王嚴兵迎扈得以出險定蹕安隆獲有甯宇數月間捷音疊至西蜀三湘以及八桂海歸版圖憶昔封拜者纍纍若若類皆身圖自便任事竟無一人惟秦王力任安懷毘于一人二年以來漸有成緒朕實賴之乃有罪臣吳貞毓張鐫張福祿全爲國徐極鄭允元蔡宿趙廣禹周允吉易士佳楊連任斗樞朱東旦李順蔣乾昌朱議昶李元開胡士端包藏禍心內外連結盜竄矯敕擅行封賞貽禍封疆賴 祖宗之靈奸謀發覺隨命朝廷審鞫除賜輔臣吳貞毓死外其張鐫張福祿等同謀不法蒙蔽朝廷無分首從宜加伏誅朕以頻年患難扈從無幾故馭下之法時從寬厚以至奸回自用盜出掖廷朕德不明深自刻責此後凡大小臣工各宜洗滌廉法共守以待昇平 附孫可望奏爲行在諸奸矯敕盜竄擅行賞大爲駭異隨奉 皇上賜書將諸奸正法仰見乾綱獨攬離照無私首惡吳貞



毓張錦張福祿也爲從者徐極蔡宿等也 皇上立賞重典以彰國法矣蓋李碩臣弟也剿虜失律法自難寬方責功以贖前罪而敢盜寶行封是臣議罰諸奸反以爲應賞矣且臣所部諸將士比年來艱難百戰應賞應罰惟臣得以專之故名器宜重早已具疏付楊畏知奏明卽畏知之服上刑亦以晉中樞旋晉內閣之故原疏具在可復閱也因憶兩粵並陷時 駕蹕南陵國步旣已窮感加之叛爵焚劫于內虜首彎弓于外大勢岌岌卒令駝隊潛跡晏然無恙不謂非賀九義等遵王朝令星馳入衛之力也又憶瀨湍移蹕時危同累卵諸奸惡力阻幸黔堅請隨元胤敗死使果幸防城則誤主之罪寸磔遂足贖乎茲蹕安隆三年矣纔獲甯宇又起風波豈有一防城一元胤可以再陷 聖躬乎臣累世力農未叨一命之榮升斗之祿亦非原無位號不能自雄者也沙定洲以雲南叛臣滅定洲而有之又非無屯兵難于進攻退守者也總緣孤憤激烈冀留芳名于萬古耳卽秦王之寵命初意豈能覲此哉故楊畏知之齎奏疏中有云今之奏請爲聯合恢剿之意原非有意以求封爵也臣關布西衣據彈丸以供駐蹕願 皇上臥薪嘗膽毋忘瀨湍之危如 皇上以安隆辭隅錢糧不敷欲移幸外地惟聽睿斷自當備辦夫馬錢糧護送駕行斷不敢阻以蒙要挾之名

前南甯知府顧祖奎卒祖奎吳江人祝髮爲僧卒于肇慶之白雲寺



九年乙卯春正月朔駕在安隆府

二月孫可望駐貴州以部將朱養思守南陵 安西王李定國自賓州入南甯 撫南王劉文秀駐川南

三月二十九日昭平陷 屬平樂倪志倫歐光大袁啟祕徐麟俱降清

夏四月二十六日李定國兵敗于新會 標將王成張士祿領西道陸士瑞 道李昇東安知縣羅大經

俱降清

五月二十三日劉文秀馬進忠與武大定等攻常德不克

冬十月蜀鎮胥登榮降于吳三桂 一作胥發榮明年正月降

十年<sup>丙申</sup>春正月朔駕在安隆府

夏四月安西王李定國迎 駕入雲南 定國兵至 州詭爲清兵戰敗孫可望部將關有才之兵遂奉

詔入安隆州執可望家屬以去

六月潯南恩恭俱降清

秋七月義甯伯龍韜駐柳州 韜與李定國爲應援旋被獲死

十八日延平王攻福京



九月十九日清入辰州

冬十月夔州巡撫鄧希明總兵張元凱降于吳三桂 希明白獻賊亂後與元凱同屯壘開縣入覲安隆

授官

十一年丁酉春正月朔駕駐滇都 進李定國爲晉王

秋九月秦王孫可望謀叛移師犯滇晉王李定國蜀王劉文秀奉命討之師次曲靖府十九日戰於交水可望奔潰

二十一日叛藩孫可望遣賊將張勝聞道襲滇中書科中書舍人朱斗垣遇賊不屈死之 先是可望謀逆其部將白文選將所屬來歸 上嘉之封文選爲鞏昌王遣尙寶司楊楨幹中書朱斗垣齎敕往曲靖軍中途遇賊兵遂爲所害

二十二日晉王李定國班師援滇擊張勝於渾水塘擒之斬於市 保國公王尙禮卒於滇中 以馬吉翔爲大學士李國爲司禮監 進撫南王劉文秀爲蜀王 是年文秀遣總兵王俊臣姚之貞等統兵三萬人攻保甯爲吳三桂所敗俊臣之貞俱死喪卒千餘

萬翱彭萬夫李春秀等降于清 翱原任兵部尙書萬夫爲某官春秀舉人降于清偏沅巡撫袁廓宇



十一月冬十五日孫可望降于清 可望爲定國所敗率家卒數千人詣保慶降于清 封可望爲義王 後隨出獵被射死初可望部將桑某者降歸定國故可望窮蹙奔降桑某後爲清兵獲械 至北京入見桑慷慨自若竟釋之

十二月清兵攻雲貴 泗城州土官岑繼祿降清爲嚮導引清兵從閒道直抵安隆時晉王李定國守盤江聞報自統精兵三萬人倍道趨戰我師敗績

十二年

戊戌

春正月朔駕在滇都

二月原任總兵鄧凱朝行在 凱江西吉安人初同楊廷麟劉同升萬元吉龔葵等奉隆武正朔起兵江西其父某死國

夏四月官軍克橫州

秋八月十七日延平王克復台州 授鄧凱爲隨扈總兵守大明門 是年冬十月初七日上遣內臣李崇貴召凱入朝 上曰爾忠義老成可卽隨護東宮賜銀一百兩賜銀鼎盃一隻

冬十二月十五日 駕離滇都傳幸永昌 新津侯譚宏仁壽侯譚毅總兵譚憲譚大圖俱降于清 文臣方峙等同降



肇昌王白文選以兵二萬人守貴州七星關敗于清

曲靖知府蓋祿世降于清 世祿貴州畢節衛選貢生也

十三年<sub>己亥</sub>春正月初三日清兵入滇都 提督總兵劉之扶許大元總兵王宗臣王有德副將朱文彩朱

文盛提學道徐心箴光祿寺少卿管雲南分巡洱海道黃復生等俱降于清復生仍管洱海道心箴署

### 臨沅道

初四日 駕幸永昌吳兵已入貴州 上在雲南倉卒聞報羣臣束手無措太僕寺正卿辜延泰<sub>仁壽人</sub>請

駕即日幸蜀開荒屯練以圖便利 上意未決晉府中書金公社<sub>雲南人</sub>極言入蜀不利是時文武臣僚

滇人居多皆思保妻子弗欲遷勸 上寢之吳兵分道前進一從火洪龍元安龍入一自率諸將從烏

蒙入 上聞警卒起行先至永昌 沅江知府那燾起兵戰敗登樓自焚父子夫婦闔門皆殉義死

泰安伯竇民望力戰不克死之 時晉王兵駐磨盤嘴先遣大定營泰安伯竇民望領步兵三百人前行

與吳兵遇民望誓將士爲殊死戰自持靈刀殺吳騎將數十員騎步兵三十餘人益畏縮欲退是夜民

望復謀文勝捷擊吳軍將行爲小子所洩吳知之別遁得免明日民望復殊戰死三百人且盡尙存一

小子奔吳營降吳詢知民望令槍礮齊發民望受數百槍彈從脇穿透戰如故持刀潰圍走尋 上所



在行三十里血湧仆地死吳遂整兵前進

晉王李國退入交趾

閏月十八日 駕幸騰越州二十日遂行以靳統武爲護駕總兵 其兵卽孫可望之衆也二十一日統武竄去

二十八日 駕入緬關緬人來迎

二十九日 駕留蠻莫次日遂行 初上在永昌大學士馬吉翔編修貴州塗數功吏部左侍郎四川鄧士廉大理寺正卿齊環沐國公天波左衛將軍四川徐鳳翽等二百餘員及家口二十餘人不俟大軍齊發先入緬界

是月雅州伯高承恩及諸土司據兵守境

二月朔文武諸臣自騰越齊奔緬境

初四日馬吉翔李國禔太后東宮先奔井梗

初五日鞏昌王白文選遣兵至啞哇城迎駕不值而去 禮部侍郎潘琪卒

十七日清兵入永昌騰越州



十八日 駕幸井甍是晚文武諸臣會于御舟前議遣總兵鄧凱行人司任國璽使緬馬吉翔止之吉翔恐二臣先行言其過也

二十八日遣馬雄飛鄔昌琦使緬 緬王請大臣過河相議乃遣二臣惟通事傳說皆 神宗時事所去敕書彼出 神宗敕相對分寸不符疑以爲僞出沐國公印相對乃信緬因 神宗二十二年因亂來滇請救本朝不允遂絕貢

三月通政司朱蘊金總兵姜承德自縊死總兵潘世榮降于緬 沐國公天波綏甯伯蒲纓晉王總兵王啟隆等集于大樹下天波曰緬酋待我日疎可就此處走護勒撒孟良等處爲善吉翔與李定國有約力阻之十七日陸行者到啞哇對河離城五六里而營緬酋疑我圖吳國發兵圍之有被傷者餘各星散晉王總兵潘世榮卽降于緬通政朱蘊金吉翔中軍姜承德各縊死

夏四月馬吉翔舉錦衣衛丁調鼎考功司楊生芳使緬國

二十六日大理寺卿徐環卒 安隆所總兵周文龍降於清 文龍自田州遣弁赴肇慶納降

光祿寺少卿盧桂生降於吳三桂授大理府知府 時晉王遣應奇說桂生歸正應奇被執送吳三桂殺之



五月初四日緬王遣官以龍舟迎駕

初五日駕離井梗

初八日緬王霸駕於孟坑城外地居者梗 緬王接駕見中國男女財帛心利之欲圖害 上遂謀奉駕

安置孟坑城外四面皆海人不得通初七日駕至啞哇城對河結營初八日進者梗卽前陸行者所札地也構草房十大間 上居依然以竹爲城每日百餘兵守護

初九日緬人進貢 上優賜之 相傳緬婦每日貿易如市諸大臣皆短衣洗足混入緬婦貿易據地雜坐談笑緬官乃曰天朝大臣如此規矩安得不亡

行人司任國璽請設廠衛

十六日儀制司 朱冲卒 朱冲係江西宗室

以使緬功楊生芳文選司郎中加丁調鼎五級又敕緬隘官截止追駕官軍 馬吉翔與緬隘官敕一道內云朕已航閩後有一切官兵都與截殺

六月安德侯狄三品執馮雙禮獻於清授杼城侯 三品雲南建昌總兵雙禮已封郡王

二十一日安南臣武公姿降于清 武公姿官宗國公遣人至雲南獻降表



二十二日延平王舟師克鎮江圍南京旋退入海總兵甘輝等死之

高承恩爲弟承裔所殺 部將爭立自相攻擊

清獻馬湖敘州

原缺

伯提督總兵陳希賢等降 鄭中郝永思等固守

秋七月清陷成都總兵趙友鄴等降御史龐之泳主事賀奇俱繳印降 清道川南道高毓蒼招降原任四川巡撫萬任

八月滇國公沐天波使緬甸入其城 緬俗以八月十五日各蠻來貢欲張大聲勢天波至彼令跣足以

緬臣禮見天波不得已從之歸而泣告於衆曰我故屈者爲保全 皇上計耳禮部楊在行人任國璽各疏劾天波屈節於緬夷疏留中

上不豫以患足故

九月緬人進稻穀 緬進稻穀給各官窘迫者吉翔據爲己物私其所愛者鄧凱不平于朝內大罵之時有吳承曾者乃吉翔之旗鼓猝仆凱於地損一足

光澤王巖鐵大學士郭之琦總兵楊祥被獲不屈死之 時雲南既陷之琦等避入交趾交夷懼縛送廣西被害之奇絕命詩云十載艱虞爲主恩居夷避世兩堪論一聲平地氛塵滿幾疊幽山霧雨翻曉潮



哀泉添熱血暮烟衰草送歸魂到頭苦節今方盡莫向西風灑淚痕成仁取義憶前賢異代同心著幾鞭血比萇弘新化碧魂歸望帝久爲鵑曾無尺寸酬高厚惟有孤丹昭簡編萬卷詩書隨一炬千秋霜管俟他年祥蜀人不識字以忠義自許臨難神色不變望西叩首謝恩危坐就刑觀者無不流涕

命造曆日 從鄧凱請也

冬十月郝承裔以嘉定邛眉等州叛降于吳三桂 未幾承裔反正至辛丑年被獲死

蜀鎮甯侯王友進遣官降于吳三桂 安南都統使莫敬耀入貢于清 是冬嘉靖州陷

十四年庚子春正月駕在孟坑城外 德陽王至濬降于清 至濬初奔交趾與太監王應遴同匿高平境

內自安南莫敬耀入貢于清後勢益孤危故至濬亦降

三月初一日穎國公楊武叛降于吳三桂 三桂令陽武招降貴州布政司朱企昺帳藩宗室武靖侯王國璽

兵部侍郎尹三聘編修劉司蒞尙寶楊楨幹知府范春鰲等六人大人遂繳印降赴北大學士方端士

降于清 禮部司務王應偉卒

秋七月緬人邀滇國公沐天波再入其城不允 緬使曰此番可冠帶而去天波終不允

八月郝承裔以雅州內附



九月晉王李定國出孟艮與白文選入緬關次日同具疏請迎駕不果 定國迎駕疏內言前後三十餘章不知曾到今與緬王相約何地交遞而諸臣在內只圖安樂全不關節出險緬官求敕一道去了外倭久無消息乃拔營而去

以湖廣道御史鄔昌琦改陞河道掌六科 從馬吉翔所薦也

授烏撒知府王祖望禮部主客司 祖望晉王藩前人能醫中宮有疾用其藥而愈

太常寺博士鄧居詔疏陳時事 居詔疏爲停止不急之務仰祈修省等事內侵吉翔及各員自謀自衛等語蓋指行人任國璽欲轉江西道而言也吉翔怒奉 旨該衙門知道旨方下而國璽回道及各陞轉 旨旋下矣居詔不平卽劾國璽國璽亦劾居詔一日 上召面質不果惟吉翔國泰傳旨云鄧某當學好免杖

碎國寶以給各員 吉祥奏外有大臣三日不舉火者 上不信次日吉祥國泰復合奏 上怒擲皇帝之寶命掌庫太監李國用碎之國用叩頭辭不敢又次日吉翔國泰碎之以散給各員 上怒曰你們要收門生特把朕作人情耳

十五年辛丑春正月 駕在孟坑城外



二月吳三桂破爲乃麻衣

原缺

龐吉兆吉佐等俱被獲

咸陽侯祈三昇降于吳三桂

三昇與定國不和獨走戶臘三桂遣官招之遂率兵七十餘人涉遠而降

孟津伯魏勇總兵劉芝林王有功邵文魁等俱降勇旋病歿

鞏昌王白文選齋奏迎駕

二十八日白文選遣緬民齋奏至云不敢速進者恐爲所害必令彼送出爲

上策璽書答之曰不五六日離本處止有六七十里已搭浮橋來矣數日後緬兵斷浮橋而去吉翔國泰挾駕自重不思出險或欲暗相糾結擁東宮因殺吉翔國泰奪路而出卽爲吉翔國泰所覺密奏其結盟投緬旨命錦衣衛搜獲爲首者殺之

夏四月郝承裔被獲死

御前總兵馬寶降于三桂

五月朔大學士馬吉翔司禮監李國泰入宮講書賜之坐

江西道御史任國璽奏爲時事三不可解謂

上年本請開講期年不行今勢如累卵不思出險尙然如此講書必須科道侍班議軍務則有沐勳臣王皇親等豈翔泰之獨君也言詞切直次日旨下著任國璽獻出險策國璽奏能主入緬者心能主乎出緬今日事勢至此乃卸肩于建言之人平時王祖望鄧居詔各疏劾翔泰有內官曰爾上千本萬本亦何用其擅權若此禮部楊在講書賜之坐典璽李崇貴以爲非禮次日亦賜崇貴坐崇貴辭曰今雖



亂世禮不可廢每講崇貴出外一日東宮問楊在曰哀公何名在不能對

初五日瑞昌王薨于緬甸州

二十二日緬酋莽猛白弑其兄 先是御前總兵馬寶降于吳三桂即使爲閒至緬王備言吳三桂所以遣之故且曰苟能送帝出則富貴可立至也緬酋于是令寶至孟坑居 上左右 上以寶爲舊臣弗之疑也緬酋既受三桂命遂決計出獻其親兄知之謂曰不可因人之危而爲之利不義且彼兵至也天之所立中土之所戴我不能助而反爲之害是逆天也逆天不祥不如且全之任彼後圖酋即縛其兄弑之

六月十八日緬酋僞請盟馬吉翔李國泰等從之緬使來云我王初立怕你們立心不好請去吃咒水等你衆人走動好去作生意不然日用亦難云

十九日緬酋殺我文武官僚三十餘人 吉翔國泰聽信緬酋之謀不論大小官員俱攜去與緬酋盟已刻緬酋以兵三千圍所扎處乃曰爾等大漢可出吃咒水一個不出來即亂槍殺死諸臣良久乃出出俱被執而死松滋王已下馬吉翔馬雄飛蒲纓鄧士廉鄧居詔楊在鄔昌琦任國璽王祖望裴廷謨楊士芳學錄潘璜郭璘典簿齊應選總兵王自全安朝位陳謙龔勳吳承爵張宗位錦衣衛大堂任子信



張拱極劉相來宗宰劉廣銀宋國柱丁調鼎司禮監李國泰秉筆字茂芳楊宗華李崇貴又周某盧某曹某沈某俱失名

駕幸黔國公沐天波署緬僧進食 黔國公沐天波靖來將軍魏豹總兵王啟隆等俱遇害 上與中宮

將自縊鄧凱勸之曰 太后年老將誰爲依 上乃止緬兵入宮搜取財幣貴人宮女及各官妻孥自

縊者甚衆 上與太后等二十五人俱聚于一小房經險二時忽通事引守護緬官至乃喝曰不可害

皇上與沐國公彼時尸橫遍地緬官請 上移出沐國公房內大小二百四十餘人恰住一樓母子啼

哭聲聞里外閱三日幸緬僧私進飯食且悲哀不已乃知早去各臣悉被殺時有沐天波王昇魏豹王

啟隆各傷緬兵數人而死有皇親家小子名來安年甫十三兵擒之乃曰有銀與你抵腰假作取銀乃

拔小刀刺傷緬兵而死

吉王自縊薨 吉王同妃入宮自縊皇親標下總兵姚文相黃華宇熊惟寶馬某秦某錦衣衛趙明鋒王

大維王國相吳承胤朱文魁鄭文遠李旣白凌雲尹表朱議添千戶吳某百戶嚴某內官陳德遠劉楊

二貴人松滋王妃皇親任國璽姜承德妻楊氏俱于十九日自縊死 又起陸諸人先後遇害者通政

朱蘊金姜承德潘世榮面鼎忠范存禮溫如珍副總兵高陞李勝武崗用岷王馬九功王皇親標下劉



興隆戴某張某陶某內府劉九臯劉衡汪國泰段能忠謝安祚 施氏曰緬酋既弒其兄遂以次殺上左右從官緬酋將天波至城上木板鋸解以示城外 上遣人登城遙諭曰事已不可爲矣從朕文武各官均已見害城上所居解者卽沐上公也朕亦萬無生理可致謝管王各自爲計否則城外富有變矣王及諸將事皆下馬羅拜大呼痛哭聲振天地 上遙聞亦哭次日晉王憤恨悲號遂大剽孟坑城外雞犬不留而去自是人心無主兵多散去

秋七月緬人貢物 二十一日緬人乃修原所請衆人安住貢米銅器等物二十五日又進獻鋪蓋銀布等物甚厚乃曰我王子實無他意因爾各營在外殺害地方遂恨入骨乃衆民所爲也 上不豫

冬十一月初八日吳三桂兵至木邦 白文選遣副將馮國恩至木邦偵之中伏被獲國恩遂降于三桂爲嚮道

十八日 上召總兵鄧凱入宮 是日午刻召凱入宮諭曰 太后病矣而賊信又急爲之奈何白文選朕欲封他爲親王馬寶欲封他爲郡王

吳三桂兵至錫波白文選奔茶山 二十日三桂發兵追文選于茶山

二十四日吳三桂入緬甸境 初三桂在騰越宋腮兩兩人通緬酋使送駕出降否則加兵緬酋益決計



謀逆

十二月朔吳三桂兵駐舊晚坡 舊晚坡在緬城之東是日緬相錫真持貝葉緬文降于三桂其文有願送駕出城但祈來兵退扎錫坡猶慮三桂之襲其城也

初三日緬酋內叛來 上及 皇太后皇后皇太子公主如舊縣坡緬酋殺華亭侯王維恭 是日未刻二三緬官來見曰此地不便請移別所你們兵將近我城我處發兵必由此過恐爲驚動言未畢數蠻子將 上連杌子擡去 太后等悲聲震天行至二百步乃有轎三乘至 太后等上轎大小男女毫末收帶步行約五里渡河到岸暗黑不識何地二更到營始知爲吳三桂營矣初四日歸老營初五日曉鄧凱簡副 上帳前曰今日事至此 皇上當行一烈使老臣得其死所 上曰固然有太后在且洪某吳某世受我家恩未必毒及我母子初六日拔老營復轉啞哇欲攻緬城未遂初九日長發還滇一被大小俱與馬匹進御膳用金碗不用銀碗 上與東宮俱進鮮服鋪蓋內官宮女各官妻妾均與衣被

吳三桂以車駕還南 施氏曰吳三桂兵亦出境將入緬路遇鞏昌王白文選是時文選兵尙強因山路窮僻斥堠不通猝遇無計不敢戰遂降自是三桂無所忌憚矣緬恐遂令馬寶誘 上曰晉王兵去此



未遠臣欲從閒道奉駕奔其軍 上從之緬使人從 上所至則吳軍矣

十六年壬寅春正月十三日駕還滇都 三桂日進膳服等物俱倍前

夏四月 太皇太后王氏不食崩 三桂令人奉 上居滇故都督府等嚴兵防守八旗兵皆集 上屢

欲見三桂三桂不肯見 皇太后不食缺日遂崩

原任戶部尙書襲彝死之 彝永州人天啟乙丑進士也具酒殺進謁 上所守者不許彝厲聲曰此吾

君也我爲其臣君臣之義南北皆然我祇一見耳何拒我爲守者往啟三桂三桂許之彝遂入堂上設

宴請 上出朝禮畢進酒 上稍謝痛哭不能飲彝伏地痛哭亦不能起再勸 上飲 上勉飲三爵

彝再拜不止遂觸地而死 上撫之慟幾仆

上崩 皇太子遇害 施氏曰從官扶 上進八旗諸將士皆望而呼萬歲曰此真主也我等雖有主今

知其安在不如奉此以成不世之功事將成滿漢諸大臣皆割辮而起爲下所洩三桂知之大驚卽令

輦 上及皇太子出以弓弦絞于市時太子年十二臨難大罵曰黠賊我朝何負于汝我父子何仇于

汝乃至此耶是日天大昏黑風霾並作人影不見 上旣遇害三桂使人炙尸揚灰傳賜諸將前所謀

奉 上八旗諸將共二千餘人皆殺之令沒其妻子 雜錄曰吳三桂標將有商于吳者問以舊晚坡



之事據云十二月初二日三桂至舊晚坡檄緬送駕緬亦遣人相聞薄暮緬人送人首十七至三桂營中訛言駕崩及三鼓謹言駕至矣隨衆出迎見二艘渡江來一爲上及太后中宮東宮公主一爲遇害諸臣家屬有緬相及蠻兵二百餘人俱至三桂送上及宮眷于公所上南面坐達旦三桂標下各官相繼入見或拜或叩首而退少頃三桂進見初甚倨傲見上長揖上問爲誰三桂噤不敢對再問之遂伏地不能起及問之數至始稱名應詔上切責良久三桂緘口伏地若死人上卒曰今亦已矣朕本北京人欲還見十二陵死而爾能任之乎對曰臣能任之上令之去三桂伏不能起左右挾之出則色如死灰汗浹背自後不復敢見

吳三桂以總兵鄧凱隸滿洲鑲黃旗不受爲僧去

秋七月吳三桂遣藩下蝦護送皇后公主至北京奉旨命禮部養贍于別室仍撥宮女二人奉侍

是月二十九日晉王李定國薨于景線定國薨後以世子嗣典託靳統武統武奉嗣典爲晉王有馬斯

夏者定國之表弟心忌統武遂勸嗣典降于三桂附記壬寅隨駕回滇諸人吳師相炳一子一女同

妾名宏猷南京人鄔昌琦一子三歲魏豹一子宗臯南京人姜承德三子北京人丁調鼎二子

趙明鑑一子一僕黎應祥千戶廣東人王祖望小子新兒鄧居詔家丁鄧玉前府都督康晉



生一子 總兵鄧凱

缺

東昌李君調云緬酋送駕舊晚

在庚子十二月而龍馭賓天


皇太子遇

害則辛丑三月十八日也君調時在三桂營中目擊者此云壬寅未知何據
















明季稗史彙編卷十三

嘉定屠城紀略


明烈皇帝殉國之次年

乙酉五月初九日南都破弘光出亡

明禮部尙書錢謙益率先降附欲樹德東南以自解於吳人士郡人周荃謙益客也有口辯密受謙益旨謁清帥豫王言吳下民風柔軟飛檄可定無煩用兵王大悅卽日拜官使降人黃家鼐佐荃單騎安撫吳中甫出都門郡邑長吏望風解印綬士大夫皆草間求活所過輒降至吳家鼐南面自若荃獨微服出沒市廛郡人多爲之用數日後明監軍道楊文驄率兵五百人入郡城執家鼐等戮於市發取庫銀滿載去莫知所之荃匿民間免間行歸豫王王聞文驄襲殺家鼐等始發兵入吳三吳旣本實基於此云

五月十三日嘉定縣聞維揚陷留都將不守

十五日不肖子衿羣集縣治索廩糧鄉試條編盤費及私贖卷資諸雜項分毫不遂攘臂大呼奸胥亂卒乘勢劫奪城中鼎沸舊令錢默本執袴子錯愕不知所爲盡發公帑置堂上恣其所取潛出重賄明





嘉定總兵官吳志葵求遣卒衛送出境并疏倡旤數十人姓氏欲悉抵於法隸卒聞風悉遁去三十日錢令得間出亡

六月初一日吳志葵遣兵執諸生十一人去

褫衣就縛徒跣行烈日中窘辱備至緣中軍官力拯釋之初四日清大將兼刑部侍郎李延齡副將總兵官署督撫事王國寶率大兵入郡始聞改南直隸爲江南內閣爲內院十四日安撫周荃單騎至邑邑中縉紳皆出避百姓無主因結綵於路出城迎之競用黃紙書大清順民四字揭於門旋緘邑篆并冊籍上於郡

清授新邑令吳郡張維熙至

時六月二十四日也是日亭午志葵以百人用白布裹頭伏時侍御墓旁晡時入民家亂索酒食聲言欲取張令人定後各刈蒲葦一束然其端持之以行其光燭天城中大震乃厚集民夫鳴鑼發礮東向大噪志葵兵亦羣噪應之維熙恐倉卒亦遁士民狼狽出奔遺棄嬰兒失散婦女者無算天明閭巷一空卒無他二十七日志葵復發兵來城內外百姓謂志葵恢復之師懸綵執香較迎周荃時十倍志葵用南都逃將蔣若來爲前導若來本市并無賴以膂力遭逢權貴得爲兵官不三載陞南京後軍都督



聞維揚不守棄其軍仍作微裝脫走至是從志葵入城據趨庫僅存銅銃數十急使人舁之行過徐家行大掠寸縷無遺至雞豚菽麥亦席捲而去貧民婦子哭聲震天志葵若來欣然有得色因重載入海明淮撫田仰等奉義陽王以舟師駐崇明沙

是時淮撫田仰監軍荆本徹總兵張士儀張鵬翼與宦官李國輔等合兵共奉之志葵乃率妻子從之旋舍去

閏六月初六日維熙復入縣

初八日清將李成棟偏裨將梁得勝等以百餘艘載步騎二千鎮守吳淞是夕泊東關外恣百姓聚觀傳令索取婆子維熙以角妓應之成棟大喜坐二妓於旁笑謂觀者曰今與爾爲一家人勿畏我也黎明從陸路往吳淞不甚剽掠惟初七日騎兵先至者過新涇鎮大肆淫虐婦女不勝其剽斃者七人時大旱水涸兵船悉泊東關外梁得勝以三百人守之城外居民與貿易如平時黠者或撫其背相與嘲笑如舊識維熙議使人屏水運東關外得勝大喜已刻期至吳淞行有日矣十二日城內外喧傳有薙髮之令人情始懼遂有變志是日志葵遣馬軍俞飛熊賚牌至略云初十日郡中民變殺北兵過半餘皆躲入府庠已列柵圍之本鎮卽刻統大兵入縣仰附近百姓於今晚俱用白布裹頭雜插柏枝竹



葉紅簪鵝毛爲號共剿東關兵事成有重賞各路鄉兵久爲邑諸生支益國子生須明徵等訛言扇動一聞有牌持兵蝟集謬傳志葵自劉河東過外岡矣頃又云抵青岡墩矣未及一瞬又云暫憩察院矣時卽在城居民亦以爲志葵已入城矣門遂撤下不閉以待遠近鄉兵集者漸衆王家宅鄉兵最稱完整其首許龍於客歲縛誅閩邑叛奴威名頓著至是首犯清兵與戰頗力時漏下數刻不辨誰爲志葵膽氣甚壯競舉人擲得勝船成棟自下維揚金陵京口毘陵諸處所獲精金美玉名劍寶刀無算悉付一燼未及毀者盡爲鄉兵所擄舡中多載婦女已悉被焚一少婦最姝麗呼曰我翰林公女家在揚州被掠至此列公哀憐救我鄉兵云速投水中水淺尙可活婦曰我是被鎖在船語未竟烈焰燒其身矣得勝急據高岡使兵三五作隊自上射下皆應弦而倒許龍亦中流矢死鄉兵大潰始知志葵固未嘗至也天明計首級殺清兵八十四人得勝率餘衆奔吳淞狼狽得達初成棟至吳淞策馬周視四境駭曰此絕地也張令誤我矣及聞得勝敗兵船悉盡終夜繞船不敢復寢十五日精選營中得四十騎皆驍捷善戰募吳淞居民朱宇及其子香爲前導往婁東求救至羅店被圍奮死突出馳而西過三官堂殺一僧有四騎失隊鄉兵從馬後掣其佩刀刀落卽取而連斬之人馬俱斃二騎奔鄉兵追及攢稍刺死惟一騎苦戰得脫前隊至時家墳遇鄉兵復馳而東鄉兵急追漸近羅店鄉兵復大出兩路急攻



諸騎窘極隨朱香白間道過蔡家橋繞出鎮後扶創而歸過月浦復爲鄉兵截殺落荒而走望見吳淞城猶大呼救命救命至丁家橋人馬氣息僅屬一綫成棟窘迫無計惟縱兵大掠西至月浦羅店南至江灣楊家行北至錢家樓施家巷居人遷徙略盡城中風聞不一憂怖彌甚望志蔡眼穿始悟見棄皆號哭棄家而走是夕月蝕倏忽食既時天無纖雲色暗如漆占曰食盡無光主奸人誤國百姓死城邑空其兆成矣

明都察院觀政進士黃淳耀及弟邑諸生淵耀入城

時閏六月十七日淳耀及弟淵耀與前通政使司左通政侯峒曾二子邑諸生元演元潔倡爲守城計初淳耀避兵石岡有同科孝廉丹陽葛麟與二力士至鰲貌甚雄武絕不類文人叩淳耀門大聲問曰年翁在否淳耀父家柱出迎答以在鄉麟攢眉良久曰我憂之甚年翁純儒未諳世故恐不免思一相見故迂道今不及矣家柱乃固止之爲停留飲食及淳耀兄弟歸與之同訪志蔡於雲間共論當世事出謂淳耀曰志蔡庸奴耳其言夸誕欲使他人幹事彼坐享其成必誤國事年翁何故信之天下事尙可爲然君儒者非其倫幸勿鹵莽遂掉臂去不言所之後追尋其語若明鏡著蔡云

成棟悉銳攻羅店屯兵馬橋

明季稗史彙編

卷十三嘉定屠城紀略

三



時十八日也與鄉兵隔水而語佯言成棟等奉命守吳淞與羅店初無仇讐今假道歸婁東並無侵擾幸寬其一面鄉兵支洪陸文等戢手罵曰汝曹豎羊牢豕耳莫作癡想成棟怒率兵混戰陰遣銳卒東渡練祁塘西渡荻涇繞出陣後鄉兵大潰退屯來龍橋接戰良久大敗入鎮時日未出居人方爲市聞變急升屋步兵亦升東西馳逐屋瓦亂飛騎兵四面殺人大呼唐秀才何在百姓縛出者有賞唐秀才者景耀也初與吳宏宇爲鄰宏宇降成棟景耀面數其罪肆言極罵且曰歸告李成棟汝是明朝人何投降速反正可免大戮宏宇銜恨切骨悉以告成棟景耀復大書一白牌立馬橋南諭成棟降至是爲清兵所得磔於市

邑諸生唐培率鄉兵巷戰而死

唐培誓不反顧清兵銃箭並發培被殺鎮已破時有諸生朱霞者尙張小蓋登屋鳴金冀集衆復戰清兵四集身被數創墮河號呼竟日乃死成棟知鎮民支廉爲鄉兵首支家橋一帶房屋焚毀略盡男婦被殺者一千六百四人是日城中百姓共殺須明徵毀其室明徵故尙寶卿須之彥之猶子也素無行爲鄉里所擯一聞南都破卽冠帶乘軒謁成棟稱署嘉定營守備事仍通志葵復稱監紀推官勢刻維熙取官銀數千招家丁六十名悉衣錦綺懸佩刀招搖街市間時率之至安亭鎮訪其奸豪與促膝



密語每揚言遣人赴各鎮請鄉兵分守諸要害時城守頗嚴有夜半叩關者稱爲明徵請兵人特啟關納之問鄉兵何在慢應曰城主性慳不肯發糧已散去矣衆口請問語極支離始大疑之十八日薄暮城中競傳明徵家窩藏奸細復私造都督牌印并冠帶盔甲數十副謀盡殺滿城百姓迎成棟兵合城擾驚有頃西關外獲奸細嚴刑鞫之供爲須黨一時大譁真假莫辨明徵倉卒出亡至南關受縛步稍遲大槌擊之疾呼稱冤莫爲置辨驅至察院前斬首刳腸斷四肢分置各城門捕其家丁悉誅之家室糜碎十九日溱耀等相與謀曰今事成騎虎無主必亂乃令元演作書急促其父峒曾入城鄉兵亦列幟往迎既至集衆公議畫地而守東門峒曾爲主邑諸生龔孫玪佐之西門溱耀爲主其弟邑諸生淵耀佐之南門孝廉張錫眉爲主前秀水縣儒學教諭龔用圖佐之北門國子生朱長祚爲主鄉裏唐咨禹佐之處分已定各率衆上城巡邏嘉人士爭縛袴執刀以從人情頗覺鼓舞東北二門俱用大石疊斷街路惟西南二門稍安時啟閉仍用庫木亂石橫塞道塗以遏兵鋒二十日立挨門出丁法分上中下三等上戶出丁若干衣糧自備仍出銀若干備客兵糧餉并守城頭目燈燭之費中戶出丁若干衣糧自備仍出銀若干下戶止出一丁分堞而守每丁日給錢六十文衣糧燈燭悉自備城上分四隅自某地起至某地止分屬各圖每圖擇一人爲長日入後當事者親自巡歷以稽勤惰其大事專屬峒曾



淳耀處分是日一都鄉兵縛一投牒者至稱爲間牒鞫之實志葵送書人繼而有吳門之兵斬馘殆盡  
杭州之兵貝勒云亡之語當事者深信不疑不虞其見罔也二十三日志葵復遣牌至許遣游擊蔡喬  
督兵協剿當事者議云新令張維熙係清兵所署難與共守驅出城推明原任儒學訓導萬達攝縣  
事巡司俞尙德充捕官是日復有健兒四人持志葵牌至來文與原牌互異嚴鞫之供爲婁東諸生浦  
學浦嶠僞造將乘我不備襲取縣城既得實立梟四人於市爾時聲勢岌岌人不自保然恃侯黃諸耆  
紳協力守城避難士民扶老攜幼而歸不絕於路城上揭白旗大書嘉定恢剿義師奈兵餉兩缺所仗  
惟城外鄉兵乃設計四布流言云清兵驅百姓薙髮髮訖卽臨以白刃逼令自殺其妻子籍爲兵使  
居前隊當矢石必無活理與其客死他鄉何若集衆禦之可僥倖獲免也鄉民聞之大震怖弱者終日  
鍵戶與妻子對泣强者斬木揭竿擊金鼓集衆然百姓騷然不遑甯處矣因念燒薙一事雖志葵首禍  
使非支益扇動其間不至敗決如此且益在閣部史可法標下聽用領胖襖銀五千兩南都破悉飽私  
橐衆欲取爲義兵餉競往攻之勢如轟雷父子祖孫死者五人悉斬其頭與明徵並頭懸城上頃之南  
翔獲明徵妻子斬割屠戮一如明徵鎮中著族李氏自世廟以來蟬聯不絕貢士李陟少有雋才知名  
當世居於城閭南都破於勸農公署起鵠立傳籤巡更與何淩虛等招集義兵號匡定軍議於南翔諸



富賈戶派出餉諸賈人皆銜之誅明徵之夕陟方會飲南城聞變遽擲杯走犯夜南翔里兒怪之妄言李氏潛通於敵有洪濱者暴起諸生問阿附李氏爲衆所賤指爲奸細濱恐匿李氏宅鎮中諸惡少羣擁之門陟與其從叔抗之濱等對衆猶嫚罵自若里兒素憚李氏懼事定後必正其罪因遂破其門直入無少長皆殺之分投捕殺諸李赤其族各路聞風競相盤詰路人單行稍涉疑似卽縛去亂槍戮死棄尸河中甚至一言忤意白刃驟加其人方欲置辯身首已離窮鄉僻壤自相仇殺三四人聚黨拔刃至人家往往滿門受戮遠近殺害無算時正亢旱災威逼人道旁乞丐爭挾毒投井中以扼鄉兵事露引頸受刃無一言莫知所使橋道扼要處皆設廠晨夜共守雖五家之聚亦起鄉兵以無餉故一再至城中卽絕跡不來當事者懼張榜四門此後鄉兵來者集護國留皇光慶寺中爲首一人入城領餉於是來者漸衆二十四日成棟遣其弟統精騎數十奪路往婁東求救涕泣與訣曰我軍成敗在此一舉汝不勝勿復見我矣諸騎奮死衝殺一路搏戰至北門鄉兵大集諸騎前後受敵以漸逼入倉橋街鄉兵兩路夾攻將舉火焚之諸騎窘冒死突出鄉兵合圍殺獲五騎餘騎將過倉街諸王朱元璋出新炭數十簍熾火橋上用酒醋潑之橋石頓毀城上發火礮殺三人一馬連橋擊斷一人手撒佩刀被創死路旁蓋成棟弟也從騎急下馬取首級掛鞍後馳而東復返吳淞哭於路也曰我等皆高鎮勁兵自隨



邢太太降後所過風靡嘉定縣何物蠻子來數日殺我副將六員幾日無援我軍生路絕矣成棟聞弟死日夜與諸副將相對涕泣奈鄉兵本村農鳥合初無將領乘興一聚卽鳥獸散郊外無一人往來孤城蕩蕩僅存一白旗迎風招颭而已成棟於軍中選黠者二人去其辮作僧人服潛至城下偵得實歸報成棟舉手加額曰天也天也始謀身自率合婁東兵共破嘉定云爾時城中束手無策惟連請志葵星馳赴救時志葵已貳於義陽王以計脫其妻子遁歸雲間斂諸鄉衺暨富貴金建牙泖河矣許卽日遣游擊蔡喬率兵來援當事者大喜用白旗大署游擊將軍蔡督令精兵十萬鄉兵三十萬刻日會剿云云冀聳動老營使爲內應募急足齋至吳淞境上成棟謀者早伏近郊纖悉畢知二十五日城中以書幣迎蔡喬於塗其兵不滿三百皆癯弱不振惟喬頗勇健使鐵簡重二十五斤差以可用所攜火藥糧儲在舟中求姑置城內自率兵營於城外議者皆曰宜許之被戰而勝軍資在我其心益固不勝留以爲質勢不敢棄我去峒曾淳耀等以喬素微賤心不可保乃遣人饋問令泊舟南關外二十六日五更方遣人市羊豕祭旗傳令於東關外安營次第引舟前成棟遣諸將銜枚疾走已嚴陣以待蔡兵不知所措爭赴水奔逃追騎以槍尖貫其胸若刺魚鼈喬尙臥舟中聞變驚起持鐵簡躍登岸步行衝陣頗有殺傷奪一馬乘之孤身獨戰力盡敗回 清兵圍之數匝東關有徐福者奮力往救與喬俱死其



兵初無紀律一時潰散峒曾瀆耀等扳堞而望見喬敗惟連呼高皇帝烈皇帝在天之靈慟哭相向而已成棟遣十餘騎若將薄城者城上連發大礮傷二人遂引去過新涇鎮縱火焚屋雞犬悉盡成棟至吳淞分遣步兵於月浦楊家行等處捉人剃頭且云助我破賊財物恣汝取之時吳淞老營已降順因沿村擄強壯益之兵勢復振二十九日成棟悉衆過東門迤邐以北當事者懸十金募人渡濠焚倉橋一帶民居成棟至龔塘紮營磚橋鄉兵預於鎮之東偏駕木爲高臺用作偵探出弓箭手二十餘人立宣家墳鄉兵環集左右成棟使騎兵分左右翼自將中軍衝殺而前鄉兵力戰以步騎不敵死傷略盡會日暮成棟吹螺收兵入村落淫殺無度取其雞豚夜縱飲不輟各村鎮猶傳 清兵自吳淞來一路爲鄉兵截殺所存不過十數騎令力竭勢窮願獻精金百鎰買路歸婁東矣未幾又傳二十三都鄉兵夜負豆葉一大捆於背伺 清兵熟睡入其營誘致羣馬驅之南騎兵恐獲罪逃逸者過半矣諸鄉兵未諳兵勢爭裹糧厲兵而來峒曾瀆耀等親自臨城勉以忠義言與淚俱人皆感奮因下令諸鄉勇能鼓衆赴敵者每人先給白布二疋仍每日頒折餉銀二錢有能得敵人首級者每顆給銀十兩七月初一日會兵磚橋東不下十餘萬人排擠擁塞紛呶如聚蚊多適爲累 清兵每戰必分左右翼鄉兵不識陣勢呼爲蟹螯陣每發挑戰多不過十餘騎皆散落不集一處諸鄉兵遙見兵出擁擠益甚手



臂相摩曼軋軋作聲瀟耀聞事急呼其僮壻諸生徐文蔚慰勉之使率西門鎮鄉兵疾馳赴救拜而送之杭家村安亭鎮一小聚落也亦集衆赴義獨揭一紅旗在前諸鄉兵因言紅旗者宜作前鋒執旗者杭文若也其人曾習舉子業少年銳氣率爾獨出其降人毛玉佩揮斬馬刀直前亂砍殺騎兵二人戰良久復殺一人將奪其馬清兵攢稍刺之玉佩文若並死於陣西門鎮鄉兵馮滿龐瑞許臣等猶奮死血戰大呼併力卒無應者乃曳兵反走徐文蔚被殺清兵乘勝直前走者不知所爲相蹈藉而死抉眼流腸不計其數前阻大河欲退無路殘兵競投戈赴水時正溽暑數暴雨河水驟漲尸骸亂下一望無際成棟大陳兵仗踞鄉兵所架高臺麾兵入鎮肆行屠戮共殺一千七十三人擄去婦女無算選美婦室女數十人置宣氏宅慮有逃逸悉去衣裙淫蠱毒虐不可名狀分部括取金帛滿載往婁東城中猶訛傳鄉兵大捷戶派煮酒飯若干以犒勝兵頃之聞敗悉括城中老幼驅使上城連日夜莫敢交睫於西東南北荒落處各設層臺一座集衆守之因所獲奸細藏詩謎於衣領間有女牆無樹不棲鸞之句疑於此處有內應也是日東關外傳入成棟榜文有開門降誓不殺一人之語或謂大勢已去諸公宜爲十萬生靈計瀟耀拂然推案痛哭峒曾錫眉等亦悲不自勝取榜共裂之急遣人焚沿城一帶民居烟焰張天累日夜不息於烈日中督促民夫搬運磚石置城上莫敢暫休視城外一望曠蕩鄉兵



無一置者每近黃昏風景慘淡鬼聲啾啾城中掩淚相視共知必死矣

### 清兵至婁塘

解甲韜戈寂然不動初三日會同婁東兵擁大眾至盡銳攻城礮聲轟轟不絕守城百姓股慄色變當事者懼分投慰勉曰我與爾曹室家婦子盡在是少有蹉跌萬家同命矣百姓哭應曰諾復懸重賞募人渡濠焚西關外河南一帶民居莫肯應先是錢令去時開庫盡給羣胥軍器火藥惟人所取四門城樓扁鎖甚堅尙有存者鄉兵至乃悉取之至是徒手應敵而已嘉定本泥城嘉隆間倭奴屢攻不能克自邑令楊旦築磚城最稱完固清兵發大礮衝之頽落不過數版乃多舁板扉至東北城下以禦矢石使數十人伏其下穿大穴腰間各繫長繩有死者卽牽去復用壯丁補之穴遂透諸生馬元調侯元演元潔等督民夫急用金汁灰瓶盡力防禦陷處下巨木塞之清兵乃佯攻東門潛遣卒至北門欲從水竇入城中復連下大石不能克是夕有赤氣起於北方俄變成黑其長亘天守陴者喧傳有神人披髮仗劍立馬雲霧中皆曰元武神也望空羅拜曰神人相助我屬無患矣然瞰城下兵益衆攻益力舉礮益繁終夜震撼地裂天崩礮硝鉛屑落城中屋上簌簌如雨嬰兒婦女狼奔鼠竄雖至窮苦必以一簪一珥繫肘間曰此買命錢也挨至初四日五更大雨守城百姓露立三晝夜兩眼泡爛瞢騰欲仆



復遇暴雨舉體沾濕食飲幾絕不能自支漸有去者時當事者與諸孝廉青衿悉仗劍立雨中見守城者將散大驚分投勸勉然不能禁矣 清兵見守城者漸弛攻愈急多縛軟梯至城下一將以大桌覆其面躡梯而上勢如飛鳥城上磚石如雨悉中桌上一躍而登遂斧斷東關縱兵大入峒曾猶坐城樓指麾自若二子侍遠呼曰事急矣何以爲計答曰有死而已復何言所恨者枉送一城百姓耳語未竟守陴者過而大呼城已破峒曾急呼二子去不從復大聲訶之走數步復還峒曾怒叱曰我死國事分也祖母在若輩應代我奉事戀我何爲二子慟哭而去至孩兒橋皆被殺峒曾溺宣家池不死立水中嘆曰人死亦大難事回顧見一伍目乃其兵憲時隸也隨峒曾在城因使抑其首冀得速死隸泣不從固命之乃兩手抑其首入水啾啾有聲復不死爲 清兵引出斬之競奪其首獻之成棟梟示四門一日復懸門左旗竿上大署逆官侯峒曾首級示衆初六日 清兵棄城去繩絕墮地眼鼻已潰鬚髮猶赫然可辨國子生朱之熙識急捧歸篋送廠頭里覓尸身不得其僕哭於路曰主君殉難時下體著黃紗袴用綠絲帶結襪有童子指之知其處驗之良是得就木若有神助云方城破時西門尙未有兵城中男婦悉西走街路俱有亂石走壘顛頓得達號哭求啟關瀘耀堅握鎖鑰不應其同榜進士王泰際適至爲百姓請命語甚哀懇不從復以年誼動之瀘耀大怒曰若欲獻城請自爲之我頃刻死人不顧



年誼矣泰際急走南門縋城逸去俄聞城破方聽啟關城門爲巨石堵塞僅容一人往來然鼠竄而出者尙數十人及清兵至悉從屋上奔馳通行無礙難民在下者反阻絕不得路悉投河死水爲不流瀟耀兄弟知事不可爲方下城遇其紀綱僕急問我父安在謬應曰死亂兵矣瀟耀痛哭仆地不能起時大雨溜甚淵耀自控一馬至趨瀟耀共乘至一庵乃平日與其同年友陳俶讀書處也主僧號無等者尙在獻茶啜茶畢諭僧無等曰大師急避某兄弟從此辭矣因啟鍵戶取筆書云遺臣黃瀟耀於弘光元年七月初四日自裁於西城僧舍嗚呼進不能宣力皇朝退不能潔身自隱讀書寡益學道無成耿耿不滅此心而已異日寇氛復靖中華士庶再見天日論其世者尙知予心書罷顧視淵耀已赫然梁間矣瀟耀仰屋而嘆遂縊其側初瀟耀精心理學於書無所不窺著述甚富既連綴巍科布衣徒步不異秀才時嚴勅家人勿預外事居常鬱鬱恨所志不遂自國變益復無聊淵耀每臂解之一日淵耀自外入見幼弟戲於庭撫其背曰六郎汝豈子何知國事至此汝大兄必死節兄死我不忍獨生汝將來未知流落何處尙爾嬉笑耶時清兵未至衆人詫爲不祥至是果驗云

明張孝廉錫眉守南城度必破死之

於六月二十六日先作絕命詞大書榜上云我生不辰僑居茲里路遠宗親邈隔同氣與城存亡死亦



爲義後之君子不我遐棄及聞城破謂其友曰宜速死對曰城破之原不由我輩空死何爲君若獨斷於心無所不可錫眉先驅妾入水方自溺龔教諭用圓抱其兄邑諸生用廣大慟相謂曰我祖父清白自矢已歷三世今日苟且圖存何面目見祖宗於地下因共溺兩尸浮出水面猶握手不解其弟邑諸生用厚攜妻子出避亦自溺蓋兄弟三人同殉云城之被破在東關北偏第一鋪成棟尙在東關外小武當廟中辰刻乃開門入下令屠城約聞一礮兵丁遂得肆其殺戮家至戶到小街僻巷無不窮搜亂葦叢棘必用槍亂攪知無人然後已兵丁每遇一人輒呼蠻子獻寶其人悉取腰纏奉之意滿方釋過他兵脇取如前所獻不多輒砍三刀至物盡則殺故僵尸滿路皆傷痕遍體此屢砍使然非一人所致也予隣人偶匿叢篠中得免親見殺人情狀初砍一刀大呼都爺饒命至第二刀其聲漸微已後雖亂砍寂然不動刀聲剗然過於遠近乞命之聲嘈雜如市所殺不可計數其懸梁者投井者斷肢者血面者被砍未死手足猶動者骨肉狼籍彌望皆是投河死者亦不下數千人三日後自西關至葛隆鎮浮尸滿河舟行無下篙處白膏浮於水面岔起數分婦女寢陋者一見輒殺大家閨彥及民間婦女有美色者皆生攜白晝於街坊當衆奸淫毫不知愧有不從者用長釘釘其兩手於板仍逼淫之嘉定風俗穢重婦節慘死者無數然亂軍中姓氏不聞矣初六日成棟拘集民船裝載金帛子女及牛馬羊豕等



物三百餘艘往婁東財物木棉悉委棄不取初十日後士民倖脫者始絡繹入城見室家零落里井蕭然無不放聲大哭十四日城內外喧傳明大將左良玉已復南都清將李成棟等俱遂歸揚州或云成棟悉輦金寶置高郵州俟秋高後復謀大舉今崑嘉雖被戮清兵業已解散爾時人心惶惶聽不根語莫敢甯居二十三日江東朱瑛自稱游擊將軍率五十人入縣行牌督百姓守城莫肯應諸生張有光自郡歸從衆薙髮過察院前見門啟偶入閒觀朱瑛立使人縛之叱使北面跪數其罪戮之於市民間競傳明兵至瑛出西門就護國寺給已經薙髮者免死牌百姓爭取之葛隆鎮外岡馬六楊家行等鎮鄉兵復聚薙髮者輒亂殺因沿路燒劫烟焰四起遠近聞風護髮益堅有徐元吉者明吳淞所諸生徐鳴鹿之子向爲本鎮中軍成棟使署坐營把總事嘉定破每丁一名勒令納紬衣五領銅錫器五件積資巨萬以薙髮爲名日出行剗割人腹啖人心肝動以百計雖遇親戚朋友無所擇其父鳴鹿素長厚每聞元吉殺人輒仰天大號元吉怒毒殺滋甚與朱香曹壽趙五哈百章等分部殺掠數十里內草木盡毀時城中無主積尸成坵惟三四僧人於被焚處撤取屋木聚尸焚之民間炊烟斷絕忽婁東浦嶂率兵至有郭元者街市細民也不勝憤登城數之曰浦六我嘉定太倉一水之隔嘉定被屠未出十日汝人面獸心公然來作賊剗取煨燼狗鼠不食汝餘汝速去不去將磔汝於市嶂掩面反走歸



愬成棟曰嘉定恃其壽頑將復叛矣成棟怒二十四日遣婁東降將萬國昌等率兵至葛隆鎮屯織女廟本鎮劉敖正憲等集衆得千餘人椎牛共盟誓不反顧因會合外岡鎮鄉兵紮營薛市門橋吹角鳴鑼連發大礮挺刃奮呼乘銳疾戰清兵少却鄉兵奮死追擊且戰且行有清將一失其姓氏身長八尺餘面色如鐵乘馬壓陣隅失隊鄉兵朱六於道旁登溷適清將軍騎過其前不意中突出抱之因墮河中清將倉卒拔刀未及出鞘朱六用兩手緊束之疾呼求救鄉兵聞喚聲甚急反視見朱六正與清將相搏濺水如濤山浪屋大笑爭下水擒之立刻梟斬首級大幾如五升槃復鼓衆急追及於南馬頭復大戰共斬首七十二級鄉兵懽聲動地以爲此後不敢正眼覷葛隆鎮矣遂稍解散二十六日五更清兵大至鄉兵未集惟孫小溪父子四人守南橋小溪被殺清兵入鎮居人尙未起肆行屠戮流血沒踝乘勝屠外岡鎮二十七日浦嶂等知外岡葛隆二鎮已破道路無梗且嘉定初被屠雖有存者勢不敢抗然不剿絕後必有變因力勸成棟再屠其城是日逢嶂者齟齬不留嶂既據縣治作令自念本婁東人距嘉定不四十里與嘉人士素通聲氣非刑殺無以示威於是邑諸生朱衷恂以留髮故梟首東門諸生婁復聞嶂友也於南門外被縛尙呼嶂字曰浦君屏我好友釋我當厚報語未脫口并其妻子及姊及外甥悉斬首婁氏血脈遂絕遺民重足而立嶂乃安意肆志發兵入村落打糧



鄉里男婦悉用亂草蒙頭伏水中以避害蓋數十里無甯居者嶂日夜與其鄉里兵丁共分財帛并括取木棉器物滿載妻東於是邑中貧富悉盡未踰年清部院廉知嶂罪下郡獄受笞無數旋伏誅嗚呼孰謂天道遠哉初成棟至吳淞明百戶哈伯章首獻軍器火藥三科武舉馮嘉猷獻吳淞遠近地形本所攻圍守禦之法及成棟攻吳淞松江府以嘉猷署吳淞總鎮事嘉猷於地方多所寬貸遠近百姓甚倚之惟徐元吉甚肆荼毒嘉猷反憚之原任陸營把總吳之蕃者父斗南於崇禎朝奉命討流賊死事之蕃常自謂忠孝之門聞手下百戶降怒曰奴輩皆世職降何容易俟大明兵得汝定當抉汝眼剖汝腹抽汝筋鑿汝骨今日且莫喜也

八月十六日把總吳之蕃起兵江東被獲死之

之蕃於江東起兵至吳項橋登岸嘉猷聞報聚老營兵涕泣曰汝曹聞之蕃前日語耶猝有不利我與汝皆碎骨矣老營兵踴躍用命先遣人焚之蕃舟之蕃兵皆烏合見火起一時潰散之蕃連殺數人不能定呼天哭曰我父子並死王事分也所恨心力殫盡得起義師未戰而潰我目弗瞑矣於是挺槍欲赴鬪死居民汪三素與相識以好言誘之陰謀竄取之蕃素抗直不疑與同行至水旁三忽推之墮水爲所擒嘉猷兵呼之蕃及其父祖名大罵以所得首級懸其項困辱萬端嘉猷大陳鼓吹取花紅羊酒



犒得勝兵卽於其地縛之蕃推入陷車競指罵曰吳之蕃之父本吳淞牧兒僥倖得一官何足指數敢作此事豈非沒福之蕃大笑罵曰奴輩自謂得福我懼滅門不久乃是禍徐元吉腹目顧之之蕃復罵曰我朝廷世臣父子忠節汝曹逆賊狗彘所不食何敢以面目向人元吉以糞穢塞其口之蕃唾而大罵解郡城殺之遠近始薙髮稱大清順民云是役也城內外死者二萬餘人搢紳則有侯嗣曾黃滔耀龔用圖李廉張錫眉貢士則王雲程青衿則黃淵耀等七十八人其時孝子慈孫貞夫烈婦才子佳人橫羅鋒鏑尙不可勝計設縣以來絕無僅有之異變也予目擊冤酷不忍無記事非灼見不敢增飾一語間涉風聞亦必尋訪舊寮口相符然後筆之於簡後有弔古之士哭冤魂於悽風慘月之下者庶幾得以考信也夫



明季稗史彙編卷十四

幸存錄

明吏部考功郎夏允彝敬述

予少鈍劣讀書數百過僅得上口十五以後心稍開不數過亦時能記憶弱冠名浮應酬日劇久困公車不能舍帖括技強仕始第又困簿書失恃而還三年崩壞北都南陷遺弓痛憤生理已訖鎬京再興宮隣金虎內憂外患交至而潰予也應死之人也生平未暇多讀書時有著述隨手淪散今待死耳又復何云然於國家之興衰賢奸之進退敵寇之始末兵食之源流懼後世傳者之失實也就予所憶質之言乎言之或幸而存後世得以考焉失之略者有之失之誣者予其免夫跳身出潛卷帙無所攜偶所遺忘無可詢質筆墨時缺蠅頭書之後之覽者或亦重悲予志也

國運盛衰之始

其論有極正者有極偏者不足盡信存之可也

神廟冲齡踐阼睿質夙成慈聖內訓甚肅輔臣張居正擅權而才以法制天下朝令夕行雖多苛察人奉法惟謹尤留心邊事初與高拱合策撫俺答邊鄙不聳宣大以西桴鼓凝埃矣用大帥戚繼光於薊鎮譚綸爲督撫一切用舍興建惟繼光言是從繼光建城堡墩台制度皆精絕烽火精明又調素練浙兵雜邊



兵練之車馬步雜用東人聞而畏之匹騎不敢入者二十餘年迨烈皇帝登極磔魏璫亟召袁崇煥以大司馬經略邊事慰勞倍至詢以東人何日可滅崇煥以五年爲期及賜食出至午門羣臣問可奏續否崇煥謂上期望甚迫故以五年慰上心云爾時有識者訝其不成功再入對崇煥以吏部用人兵部指揮戶部措餉言論俱以邊臣相照應乃方得成功爲請上卽命各部及言路如崇煥言崇煥無可卸責一至甯遠遂爲講款計蓋自崇煥甯遠奏捷之後卽令番僧往吊東人以講和以罷歸未就再出無以塞滅東人之命遂以平東人自歸慮島帥毛文龍洩其計遂身入島誘文龍斬之文龍當遼事破壞之後從島中收召遼人牽制舍伏海蓋時時襲東人有所斬獲頗有功但漸驕恣所上事多浮夸索餉又過多朝論多疑而厭之者以其身權重兵以居海島中莫能難也崇煥初斬文龍上亦甚喜之褒諭倍至不嫌其矯詔未幾東人闖入遵化撫臣劉策大司馬王洽俱不習邊事倉皇無以應敵東人長驅迫都城急召崇煥入衛宣大各鎮之兵亦先後至崇煥固以滅東人自任一旦縱東人至此惟死戰庶足贖罪乃與東人相值輒避去及入對先以危言悚滿朝冀朝臣懼而從款議也顧上英明終不敢以款上奏第力請率兵入城休養上不許已深疑崇煥矣都中人又喧言崇煥實導東人入犯上益切齒再召崇煥入卽下詔獄而擢滿桂爲武經略以祖大壽黑雲龍輩俱爲統帥遼兵素感崇煥桂與大壽又互相疑大壽輒率兵歸甯遠遠



近大駭亟用孫承宗言置大壽擅歸罪不問仍鼓勵之大壽之母亦以忠義責之得不叛去滿桂合各鎮兵與東人戰桂戰沒雲龍被擒兵大潰幾殲焉幸東人亦得志歸都城危而復安於是磔崇煥誅王洽用承宗鎮關門梁廷棟爲大司馬臣民仰撫甯遠劉大訓撫薊州孫元化撫登萊布置一新東人所陷各城亦皆恢復然秦撫耿杞如入衛之兵中道潰去爲亂貧民附之而流寇之患起矣承宗未久亦罷去臣民仰與大壽不合梁司馬劉大訓以中朝水火事相連俱罷此後用人亦皆草率塞責東人一犯宣府一入山西兩由薊入燕而壬午之入直走青齊及淮而止所至屠掠一空禍爲至劇我之兵力每以討寇寇急則調邊兵以征寇東人急又輟剿寇之兵將以防東人卒之二患益張國力耗竭而事不可爲矣闖寇逼都城欲輟關外之兵入關禦寇議久不決而寇已破都門而入烈皇帝身殉社稷普天痛憤吳三桂父陷寇中不之顧務報國仇但力不能當借兵於東人與寇一戰大勝寇卽棄都城西走而東人晏然以爲得都城於寇非得之我也傳檄三齊迅掃秦晉旣得河北復取江南一時迎降恐後者以爲寇爲先帝之仇東人能爲我滅寇非爲仇也嗟乎寇之發難以何事起天下嗷嗷皆以加賦之故然賦加於何年皆以東人發難也且河北爲寇所攘猶曰取之於寇江南何罪而奄有之耶我謀不臧將不擇兵不練廷臣邊事於度外邊臣以尋端卸患爲得計至南都之政賄賂滋章如狂如醉使高皇帝之開辟烈皇帝之憂勤一



朝宗社坵墟大可痛也

遼事雜志

申大司馬立渚嘗語余曰爲少司馬時嘗一晤李成棟成棟以其文定公子也待之極恭叩以邊事云爲費甚多凡所育健兒恣其所好凡衣服飲食子女第宅及呼盧狹邪之類俱曲以從之有求必予但令殺敵建功而已立渚叩以費從何出曰非能自給之也當其窮時則貸予之或責以零剝刦帳或責以禦敵先登計級受賞卽除前貸故人皆樂爲之用此李氏功名所由盛也當是時天下皆疑李氏有異志兵莫強焉然李氏之費以養健兒者漸移以給朝貴凡撫按出都必預有以結之至則相與雷同任其欺蔽凡山人墨客求朝貴書出游者必以李氏爲利藪李之子弟恣意聲色婦人出遊騎若雲錦而功名衰矣余嘗叩之遼友曰此天也當成梁如松之貴與之語皆娓娓精當及如柏輩旣弱且蠢與言皆憤而其父兄之風無一存者一見而知其必敗也嗟乎李氏之盛衰卽遼事之興壞係焉豈非天哉後之論者又往往以通敵罪李亦屬太苛如柏敗後如標卽以大金吾出鎮不過以孝廉五六人以計偕寓其家上疏舉之卽因而用焉已太草草廷弼至卽糾廷標十大罪下獄擬辟旨亦太過然人皆以李氏素有富名積謗所集無有一人寬之者如柏旣殞死如標自分死無日矣忽中夜奉烈皇帝旨宥之出獄如標夜出圍圍家



寓城外久不相通忽而叩門家中駭以爲夢中事也後遂續其甯遠舊封古人云記人之功忘人之過宜爲君者也烈皇帝之謂乎遼事之起三十年矣每當破城殺將天象必徵靡不彰明較著也當戊午發難彗星亙天四五年前地生白毛鬼哭於空近在簷際遠則數丈之高如俗所稱鬼車鳥者民間鳴鑼發礮以駭之去則旋來竟夜乃止尤爲史籍所不經見己未二十九日四路發兵京師大風霾余以計偕出飲友人家坐小輿中兩壯夫舁之震蕩若在危濤中掀播不已雨沾衣皆黃土也旣抵席忽睹庭中火光赫然咸謂設庭燎耳實天色如頽下照也酒散歸衣巾皆染雨土滿矣閏兩日報至遼東之破余館於鄒平張師家是日忽大風蔽天地覲面不相睹廣陵之破余亦計偕在都連日風霾東望但見黑氣蔽天而已癸未甲申之期天變尤多其最異者雷擊奉先殿雷火下焚銅鐵皆融而下注擊死內侍若干甲申二月寇漸逼都余姪永遊北雍遽歸至中途遇大風不止拔木飛瓦行人皆偃仆焉天之示戒爲何如也惟南都之破無甚外徵豈天以爲不復可做故置之耶

自有遼事所用人鮮能有勝任者當時所望成功惟熊廷弼袁崇煥孫承宗爲庶幾而武臣如劉綎杜松滿桂祖大壽吳三桂其最著也廷弼剛而驕唾罵一世謂皆出己下此雖成功亦不能居況功未成乎吾鄉朱本洽爲永郡守平

嘉興錢士晉爲真定郡守熊一見賞其才且云遼事將興將與共功名兩公意其



能成功也譽以公至必能滅敵而固遼廷弼握手與密語云公解人也何爲亦作此語遼事豈可爲但當尋一散場耳意謂怒罵人以圖逐歸也此其言豈意在國家者乎當其督學江南行法極嚴然嚴而不當如郡邑一概徇私致孤寒壅塞或有不平之鳴但知嚴處士子而已不能一破情面也卽此亦見其不足有爲矣崇煥少好談兵見人輒拜爲同盟肝腸頗熱爲閩中縣令分校闡中日呼一老兵習遼事者與之談兵絕不閱卷或問之則曰士子宜中者自有命在隨意抽取可也斯豈執事必敬者乎甯遠一捷實爲有功遂自矜爲東人已破膽必肯獻地講和召對自言五歲滅東人了無成算給諫許譽卿面叩之崇煥自言聊慰上望云爾給諫亟言上英明豈可浪對異日按期責功奈何崇煥亦自悔失言遂以用人措餉等事再請於上倘有不相應卽可借爲卸擔地不意上之威從所請也赴援都城召見卽請統兵入城休息上不可以三千騎入城請上曰三十亦不可上之所以疑之者至矣而崇煥絕不悟也閣臣錢龍錫嘗問以遼事答以當從東江做起錢謂舍實地而問海道何也且毛帥未必可得力崇煥云可用用之不可用殺之此吾所優爲錢固庸人也不以其言爲意及斬文龍疏中卽入錢語及敵闕入朝論遂以殺文龍爲崇煥罪而并及龍錫以崇煥爲逆督而以龍錫爲通逆一凌遲一擬辟蓋以逆璫一案爲附逆者所切齒欲借崇煥亦起一逆案以相報因龍錫以羅及諸名賢其事且成矣欲自兵發之而大司馬梁廷棟始



與謀旋悔不肯任且賴上聖明不能據起大獄也龍錫賴詞臣黃道周疏救後以天旱肆有言路屢以爲請釋戍定海而崇煥先置極刑妻子流數千里刑浮於罪多矣承宗練而才凡軍中利弊每發言洞中能令諸帥心服且部曲器用亦精嫻諸帥咸服之但謂其不能無欲其所推轂大帥馬世龍貌甚偉而無將略也承宗以爲韓白復出人亦訝之兩鎮關門俱無事然幸不與東敵值耳歸居里中城陷合家被難傷哉劉杜世將有名杜勇而疏劉爲尤勝其所招致奇材劍客之屬實甲於羣帥劉敗後無有及之者矣大壽家富而勇曾犯法幾被戮於承宗賴崇煥力救故相得甚懽及爲大帥子弟皆貴家丁皆東人遼人多善戰都下擅歸以崇煥下獄激之使然而其母痛責之其妻故妾也亦持之甚堅故仍爲國用永平恢復錦州力守皆有功但攻圍既久糧以竭而援兵不赴遂以城降而身自逃歸或云已輸誠於東人已謂吾歸卽舉八城盡降故東人縱之然歸而卽爲國固守雖其子在敵中不之顧也亦非有意負國者力守松山杏山與洪承疇被圍年餘力竭而陷遂致失節三桂卽大壽甥也其父吳襄向爲大帥三桂少年勇冠三軍邊帥莫之及闖寇所以誘致之者甚至三桂終不從都城已破以殺寇自矢包胥復楚三桂無愧焉包胥借秦兵而獲存楚社三桂借清兵而清兵遂得我中華豈三桂罪哉所遭之不幸耳滿桂勇而廉然起自行伍不解文墨拔爲統帥羣帥不之服也況各鎮之兵紛紜而集桂未得稍撫循之也亟驅以戰兵



不與將相習且將與將亦多不相識者一戰而覆非桂之罪也數人而外卑卑不足論矣遼人守遼亦策之得也而廷弼以爲遼人必不可用爾時遼俗富而奢莫肯力戰故廷弼云然然數戰之後遼人實可用也如浙兵川兵秦兵皆可用但問用之者何如耳嗟乎勝敗得失但當擇將乃云兵惟某地最良古豈有此論哉 督撫莫能勝任將士莫能敵愾是固然矣政府中樞尤皆庸庸遼事所以益壞也當張江陵柄國時九邊之事如視諸掌如某虜令將往某地防其犯某邊江陵必先知之戒諭邊臣無敢敗事後鮮繼之者矣一邊撫嘗語余曰葉臺山相國固不可及也每邊臣上書必手答之此後止發一名柬而已中外不相應安望成功哉然猶未極壞也周宜興當國或以庇邊臣奏許之周力辨謂向來不與邊臣通書若謂邊事非閣臣所與知者其敗不亦宜乎崇禎朝凡爲中樞者無不被戮雖上之用法嚴亦下多負國耳其稍可者梁廷棟似明暢余大成李繼貞兩職方未必知邊事而守甚潔債帥之風賴以少改亦庶幾云

### 門戶大略

自三代而下代有朋黨漢之黨人皆君子也唐之黨人小人爲多然亦多能者宋之黨人君子爲都然朋黨之論一起必與國運相終始迄於敗亡者以聰明偉傑之士爲世所推必以黨目之於是精神智術俱用之相顧相防而國事坐誤不暇顧也且指人爲黨者亦必有此此黨衰彼黨興後出者愈不如前禍延



宗社固其所也國朝自萬厯以前未有黨名及四明沈一貫爲相以才自許不爲人下而一時賢者如顧憲成孫丕揚鄒元標趙南星之流蹇諤自負與政府每相持附一貫者言路亦有人而憲成講學於東林名流咸樂趨之此東林浙黨之所自始也國本論起一時名流俱以倫序有定早建爲請此亦一定之理言者無可居以爲功聽者亦無可指爲罪也而上以爲有意擁力乃冀他年富貴必欲自發之而不使羣臣上請然羣臣不之請上亦竟不行也使旋請旋得不獨上無骨肉之猜井下無氣節之目矣乃初請不許再請嚴斥後遂廷杖累累務仇言者而痛懲之卽上慈愛無他意而欲靜議論議論愈煩實國家之大不幸也於時政府諸臣惟山陰王家屏沈鯉與言者合力請不允卽忤旨放歸餘自一貫以及申時行王錫爵輩皆以調護爲名未嘗不宛轉力請於上而心亦以言者爲多事上以爲激聒政府亦以激聒目之此其意亦未必有他也不過欲上憐其意而不之疑或卒從其請耳然言者逆耳而難居調停者言甘而無患宜至相體而不宜兩相難也不意調停者曰言者爲黨人斥逐不能救時行性寬平所黜必旋加拔用而一貫頗持權求勝受斥者身去而名益高東林君子之名滿天下尊其言爲清論雖朝中亦每以其是非爲低昂交日益廣而求進者愈雜始而領袖者皆君子者繼而好名者躁進者咸附之於是淮撫之論起矣淮撫爲李三才家居三輔年少早貴所至有赫赫聲但負才而守不潔及爲淮撫垂涎大拜多結



游客日譽於憲成左右憲成因而悅之亦爲游揚糾三才者卽以爲東林玷三才挾縱橫之術與言者爲難公論益絀之而東林并受累不小未幾妖書之獄而清流有累卵之危挺擊之案起而兩黨益相水火妖書者所謂續憂危竝議也不知出自誰手大抵言奪長之事雖難然有當世豪傑如沈四明某某輩輔成之必成無疑其言若出於清流之口將以傾四明輩者或云此奸人造爲之以陷郭正域者郭時有清流領袖之目政府所最忌也時上震怒甚羅織甚嚴搜郭寓并偵其左右危迫之至卒無迹歸獄於讞生光而終不得其實也挺擊者張差持梃以闖青宮據稱欲訟二璫於上璫乃貴妃所遣建佛寺者巡視御史劉廷元報疏云觀其狀一似風癲窺其情大爲叵測於是劉光復輩皆主風癲之說而刑部主事王之案入獄中鈎得其言以爲主使出自鄭戚舉朝喧然以國戚殆有專諸之意貴妃亦危懼訴於上上命自白之東宮貴妃見東宮遂奏懇上出見羣臣爲之昭白上與東宮俱諄諄剖明之遂以二璫及張差成獄而餘置不問劉光復倡言上甚慈愛太子甚忠孝其言固將順也而聲甚壯且越班以言上未聽其所言云何卽逮下獄當張差事起中外不能無疑因事發於貴妃之璫而又直闖東宮若巧合也之案疏稱差言甚鑿鑿或差恨二璫已甚故以主使挺擊誣之亦不可知而廷元輩恨之案特甚之案素守亦不潔廷元與韓浚輩遂於計典重處之然操論與之案合如竇子儒陸文瀛皆至清而亦爲所掠遂不少恕此則



其曲在浚輩也蓋東宮侍衛蕭條至外人闖入漸不可長諸臣危言之使東宮免意外之虞國戚懷惕若之慮亦斷斷不可少顧事聯宮禁勢難結案則田叔燒梁獄詞亦調停不得已之術也二說者亦互相濟而不當兩相仇乃必斥逐執法而後已是何心歟若主使挺擊原未必然卽令國戚懷凶謀固不用鳩而用挺不使中官而使外人皆情之所無第不虛妨平言之至重怒執法吏而必加一網及啟後世之疑則誰之咎也當是時兩黨遂爲不並立之勢有辛亥之京察孫丕揚主之曹于汴湯京兆佐之而所處湯賓尹王紹徽輩則攻東林者也紹徽有清望而賓尹負才名故秦聚奎直糾其不平有丁巳之京察鄭繼之主之徐紹沅韓浚佐之而所處皆東林也世之所謂清流者一網盡矣是時葉向高去而方從哲獨相庸庸無所主持上於奏疏俱留中無所處分惟言路一糾則其人自去不待旨也臺省之勢積重不反有齊楚浙三方鼎峙之名齊爲元詩教韓浚周永春輩楚爲官應震吳亮嗣輩浙爲劉廷元姚文宗輩其勢張甚湯賓尹輩陰爲之主於是有宣黨崑黨種種別名宣謂賓尹崑謂顧天峻也天峻高亢自喜而賓尹淫汙無行庚戌之榜如韓敬錢謙益王象春鄒之麟皆負才名急富貴而相妬軋之麟附元詩教韓浚求銓部不得遂反攻之於是之麟之友皆爲時貴所抑禮部主事夏嘉遇初亦爲時貴所推重因與之麟交亦被抑而遼東四路失事之報至趙興邦時爲兵垣仍入禮闈嘉遇遂糾之并及詩教言路合糾疏嘉遇興



邦遽升京卿其勢愈張而公論憤矣御史唐世濟助夏政趙而元趙之焰漸衰神廟殂落光廟首召葉在  
高而閣臣劉一燝冢臣周嘉謨俱以召用名流爲首輔自鄒元標趙南星曹于汴之屬皆爲銓憲大臣卽  
附麗東林者亦無不由田間起相次爲顯官齊楚浙前此用事之人俱放斥一時以爲元祐之隆不過也  
然附麗之徒惟營躁進京卿添註累累已不滿人意而南星爲冢宰時高攀龍楊璉左光斗皆爲憲臣魏  
大中爲吏垣長鄒維璉夏嘉遇程國祥爲吏部司官咸清激操論不無少苛人益側目大璫魏忠賢陰持  
國柄初亦雅意諸賢而諸賢以其傾殺王安彌恨惡之周宗建侯震陽等相繼糾彈并及客氏客氏者熹  
廟之乳母而與忠賢私爲夫婦者也上於庶務皆委不問宮中惟忠賢客氏爲政向高故欲調停之而諸  
賢必欲逐去爲快楊璉二十四大罪之疏上遂爲不共仇向高亟去事而大變矣初廷杖工部主事萬燝  
以威慌廷臣後遂因嘉遇大中與御史陳九疇相詰遽行斥降旋盡斥諸賢且起大獄竟成清流之禍國  
祚幾危雖小人崔呈秀輩陰害諸賢不可謂无咎也議論高而事功疏名位軋而猜忌起異己者雖清必  
驅除附己者雖穢多容納雖領袖之賢謬謬可重而蠹之者衆矣忠賢一得志盡用邪人崔呈秀輩舉國  
如狂銀璫四出自楊璉左光斗魏大中周順昌周宗建李應昇輩皆下詔獄備受毒刑以死天下痛之而  
稱忠賢功德請爲祠祀者滿天下凡羣臣上疏必以上與廠臣並稱一門封公侯者三人其勢視劉瑾輩



且十倍天下重足而立斯時憂國者已駸駸有易祚之勢特以呈秀輩雖凶惡實庸陋無足數烹廟賓天忠賢呼呈秀語移時竟不能有所圖而烈皇帝一登極神明自操國柄忠賢之黨內外林立不覺其自屈部臣錢元愨陸澄源貢士錢嘉徵先後糾忠賢忠賢呈秀皆自縊死其黨皆放廢凡忠賢所逐者無不召用上復定逆黨之案勵精求治數數召對每發言羣臣皆不能及天下欣欣望太平是時東林諸臣魏瓚所羅織甚慘其尙存者人無不以名賢推之爲忠賢拔用者自屬下流無可復爭衡以謂君子小人之分界至此大明諸賢之死而生皆上恩也宜同心憂國以報上恩然急功名多議論惡逆耳收附會其習如前上久而厭之心疑其偏黨及枚卜事起而錢謙益與周延儒才名相軋謙益必欲抑延儒不得上溫體仁乘其隙疏糾謙益科場舊事上爲震怒面加詰問吏垣章允儒憤爭甚力上逮而黜之謙益亦斥歸黨禍且再起而諸臣亦泄泄不思圖實績以回上意惟疏攻溫周無虛日攻愈力而上愈疑敵入薊鎮逼都城上視諸臣無一足仗者史堃袁弘勛之屬糾閣臣韓爌錢龍錫罷之龍錫旋以崇煥事逮下獄延儒首輔體仁亦相繼入政府而門戶之譏爲上所深惡幸上神聖知兩黨各以私意相攻不欲偏任故政府大僚俱用攻東林者而言路則東林爲多時又有復社之名與東林繼起而其徒彌盛文采足以動一時雖朝論苛及之不能止也周溫以權相軋旋又自相傾周罷去而溫秉國又引薛國觀繼其後大抵周明敏



而貪溫潔清而險薛才不如兩人而傲與偏同之敵寇之患日迫而終無能爲上建一策者溫去而薛遂敗以貪賜自盡亦屬太甚且其事發於東廠僉云部臣吳昌時實發其機要亦薛之偏狹上自心厭之非下所爲也未幾再召延儒與張至發賀逢聖等至發辭不出逢聖不久以病歸延儒乘上悔赦遣負有罪斥諸臣多收用之救詞臣黃道周之獄一時有賢相名蓋延儒罷相時其門人張溥馬世奇時以公論感論之昌時又與深相結延儒每納其言故其所舉措盡反前事向之所排更援而進之然性素貪又見羣論之相推也益自恣納賄益廣上亦虛已聽之溥遽沒世奇欲違權勢不入都延之左右皆小人所趨日下若敵圍杏山寇圍開封竟不能設策救援敵闌入邊自燕及淮縱橫二千餘里無一禦者延儒偵敵歸將請出視師上以裴度目之然意已移矣及在軍中未嘗鼓勵一戰惟與幕客私人納賄縱酒喧傳敵輸銀於延儒買歸路以出邊其說虛妄而上以此懷怒彌甚亟放之歸親訊昌時置之死仍提延儒至都勒自盡如所以待國觀者延儒雖寬厚再出所行多善政及死而人莫憐之者以大纜權及婪賄也其時名流尙多在列要皆負虛聲無濟國事寇一入都烈皇帝以身殉國而羣臣從死者寥寥以是益爲世詬罵然如范景文李邦華倪元璐劉理順馬世奇成德輩皆烈烈就死日月爭光雖仇口不能不推重也南都再建國事累卵宜盡捐異同專心憂國尙恐難支而相仇益甚當擁立之始鳳督馬士英移書商之樞臣



史可法有擇賢之語可法意士英有所謂也遽與姜曰廣呂大器輩移文士英言今上失德事而錢謙益雖家居往來江上亦意在潞藩若以福邸向有三案舊事與東林不利也士英得移文卽與大帥黃得功高傑輩持爲口實力主今上其所操倫序之說自當但與初時移書意不相合可法輩實爲其所賣上旣立可法爲首輔亟召天下名流以收人心而士英一入可法卽出爲督師士英首以阮大鍼薦舉朝爲爭之卒以中旨起爲少司馬大鍼一出日以翻逆案處清流爲事憲臣劉宗周以疏爭士英大鍼內用羣瑞外用藩帥并收勛臣爲助其意不過欲逐宗周輩而內瑞勛藩遂不可制賄賂大行凡察處者重糾敗官者贓迹狼籍者皆用賄卽還原官或數加超擢時以擁立懷異心并三案舊事激上怒上實寬仁不欲起大獄故清流不至駢首若平心言之三案原各有曲直但當光熹以至烈皇帝未嘗稍以前事有歉於福邸諸臣亦未嘗以奪長之謀必欲鋤異論者以厚法也今上旣立自當以國本持論無他概置舊事不問卽上啟其機羣臣亦當力解之而一時柄臣務以離間骨肉危動皇祖母欲中諸名流以非常之法如楊維垣袁弘勛張孫振者不啻人頭畜鳴又擁立操異論者不過數人而柄臣欲自侈其功凡人糾必欲以此誣入之如妖僧等事幾起大獄卒致左帥以衆憤有清君側之舉士英盡撤勁兵以防左帥敵已至維揚而滿朝俱謂敵必無虞且欲用敵以破左一時有識者謂亂政亟行羣邪並進莫過於此敵一渡江國



事瓦解其死難者有張捷與維垣兩人亦攻東林之黨獨全大節者不可以其生平持論之偏少抑之也馬阮之徒身統重兵望風奔竄不亦痛哉二黨之於國事皆不可謂無罪而平心論之東林之始而領袖者爲顧鄒之賢繼維揚左又繼爲文震孟姚希孟最後輩如張溥馬世奇輩皆文章氣節足動一時而攻東林者始爲四明繼爲元趙繼爲魏崔繼爲溫周又繼爲馬阮皆公論所不與也東林中亦多敗類攻東林者亦間有清操獨立之人然其領袖之人殆天淵也東林之持論高而於籌敵制寇卒無實著攻東林者自謂孤立任怨然未嘗爲朝廷振一法紀徒以伎刻可謂之聚怨而不可謂之任怨也其無濟國事則兩者同之耳東林附麗之徒多不肖貪者狡者俱出其中然清議猶得而持之間亦以公道拔人其行賄者尙恥人之知之也攻東林者納賄維日不足至崔魏之時南都之政則明目張膽以網利爲事以多納賄爲榮而不以爲恥者東林初負氣節每與內璫爲難卽賢璫王安亦與諸賢往來乃璫之慕賢非諸賢之通璫也及其衰也求勝不得亦有走險之士與璫結交崇禎之季往往有之矣攻東林者當神廟之時羣璫無權未有內通者自呈秀輩奉忠賢爲主而所以媚璫者無所不至無異誦莽功德誠天地間一大怪事也迄於南都而通璫者揚揚驕語惟恐人不知之也若兩璫之之最可恨者專喜逢迎附會若有進和平之說者旣疑其異己必操戈隨之雖有賢者畏其鋒而不能自持又有因友及友并親戚門牆之相



連者必多方猜防務抑其進而後止實有和平無競公正無偏者亦不之信者也激而愈甚後忿深前身家兩敗而國運隨之謂皆高皇帝之罪人可也但後世之論必一賢一邪有難渾者余亦以前輩所愛重欲推而入之清流禍中然余不以此稍懷偏忿特平言其實庶鬼神之可質也

### 門戶雜誌

神廟仁聖非常雖御朝日希而柄不旁落止以鄙夷羣臣之故置庶務於不理士大夫益縱橫於下故國事大壞兩黨相攻亦未嘗一剖其曲直聽其自爲勝負而已然東林所持如國本樞機等事皆忤上旨而攻東林者譏東林爲好名爭國本爲離間骨肉固上之所喜也故東林之徒雖盛而其勢不得不屈惟是國本之說謂神廟欲以愛易長神廟仁聖之主未必有此但是時中宮賢而多病羣疑上操立嫡不立長之語意在中宮病不可知貴妃即可爲國母故欲欲於立嫡也御史詹仰庇因宮病上疏諷及此廷杖八十舉朝益皇皇然公論愈激上雖心厭惡之亦見衆論之堅立長之意亦定矣錫爵一貫皆負氣錫爵之意謂上意俱定不欲歸權於羣下但令羣臣無亟請卽册立然三王並封之諭下而錫爵卽爲票擬施行至大宗伯馮琦力爭之而始自知其誤不可謂無咎也一貫於相比之臺前錢陳輩已經吏部計典處分而特擬旨留之大爲公論所非於建儲事亦大指如錫爵言李廷機清而勤自負甚高顧於國本之爭輒



謂羣臣不可過爭過爭或激而有變遂僉以奸邪目之及上年高中宮以賢見重而東宮益長及中宮薨  
虛位數月貴妃不進位至賓天之時乃命光廟加封皇后此則神廟善處骨肉原無奪長之意久而彌著  
矣惜乎羣臣力請時何不早行以自啟天下之疑亦國家之氣運爲之也李三才自貢才名爲山東藩臬  
極有名余嘗館於山東李去已二十年矣民歌思之不忘謂大盜大猾皆爲李所掠治殆盡民得安生也  
錫爵蒙特召時手疏言上於章奏一概留中特鄙夷之如禽鳥之音不以入耳然下以此愈翳稱神稱鬼  
成何國體此疏甚祕密而三才求得之洩言於衆謂錫爵以臺省爲禽獸臺省益攻錫爵其詞甚醜三才  
多取多與結客遍天下憲成之左右譽言日至意其真足以幹國矣然余嘗見其辨疏謂相傳上於宮中  
請仙二語以三才爲聖人故羣臣益妬之此其言亦是不根大抵才而不羈非純臣也其豪華之習宜不  
爲清流所喜或言三才初請憲成時止常蔬三四色厥明盛陳百味憲成訝而問之三才曰此皆偶然耳  
昨偶乏卽寥寥今偶有此故羅列憲成以此不疑其侈靡又聞一孝廉貢才名者當計偕時與一孝廉偕  
謁之留兩日不過贈數金而已所偕孝廉頗以爲愠及至都旅館甫定而三才之使者已至贈孝廉二百  
金所與偕者亦四十金其操縱類如此使以其才智盡用之職業亦非常人也

金壇于玉立者東林中用勝于體之子也於諸生中獨愛韓敬之才托丁元薦與結婚姻相與至密及敬



爲鼎元而元薦首攻之玉立實發其機此又人情之不可解者敬于賓尹往來素密取之爲元未必無故但敬之才亦不愧耳敬好縱橫之學恣色貨之欲則自非治平之臣要不如賓尹之甚每奪人妻而壞人節也

妖書之事甚怪一夕間自宮門以迄衢街間皆遍厥明舉朝失色莫敢言搜索無不至其揚揚自得者不過書中所指孫丕揚輩數人而已所冤陷甚多卽高僧達觀因上所素重亦死獄中噉生光素固凶狡無賴於妖書亦無實迹竟坐以浚遲夫見怪不怪其怪乃敗當初發時倘上令焚去置不問不亦可乎而當局者欲借以傾清流故激上怒至此可嘆也

梃擊之事王之案所訊張差語謂兩璫實說之云苟打了小爺吃也有官也有其言甚悉刑部各司官與之案語亦多相合而攻東林者言上於貴妃寵盛時曾許以立愛至對關真君立誓晚而媿言之不符也因勸貴妃廣爲佛事且助其費遂發銀十萬建寺於通州二璫以爲用磚瓦甚多不若置窖自造利甚奢居民多鬻薪於璫張差非通州人也乃粥田貨薪亦往市於璫土人忌之焚其薪差訟土人於璫璫復嚴責差以產破薪楚訟又被屈不勝憤憤遂持梃入宮欲告御狀不意闖入東宮二說者未知孰是總是不祥之徵謂之人妖可也其處分之法不過始則嚴訊之繼則以二璫及差結局所謂化大事爲小事也一



時擾擾紛爭其曲豈可偏坐哉

爭論之囂莫如辛亥京察御史金明時於察前上言察出勢必及某某其意固在已察非所宜言也而於汴北京輩以阻撓察典嚴糾之明時辨以阻撓何迹北京謂俟察典竣宣言之於是察典尙未下而民時先爲民然北京所謂阻撓者不過前疏頗覺太甚秦聚奎舍死報國之疏人亦有稱之者但疏中自稱今年算命該死故舍生爲此亦可訝也時稱察典冤處者七人總爲賓尹盛才名一時重處或以爲駭然繩其品行實不冤也至丁巳京察不平彌甚竟無一人起而爭之者則在朝清流驅逐已盡矣

余師張華東總憲固齊人與韓浚輩皆至戚然嘗謂余曰當丁巳察典韓浚嘗問以如何對以必翻韓詢其故張曰王之案題目甚正何爲重處之韓驚愕半日不語嗟乎吾師可謂不阿矣世皆謂吾師不韓之友而持論平恕每怪諸公之太甚又如吾友徐石麟家宰侯峒曾銀臺馬世琦太史陳子龍給諫皆所指爲東林也其言亦甚公平每病東林之雜而偏不盡公忠然世於張師必曰攻東林者也於吾友必曰此東林也物而不化不亦誤乎齊楚浙三方之貴者相與甚密也忽而相疑是時山東趙煥爲家宰元詩教爲方從哲門人操其權故齊勢尤甚鄒之麟倡言張鳳翔爲選必以年例處宗文廷元輩而齊與浙漸漸離矣之麟旣黜其友夏嘉遇魏光國尹嘉賓鍾惺輩皆才名盛一時久擬臺省銓司俱改冷曹此其持局



其固然適所以自敗也如嘉遇之瀉和清潔而亦與衆俱擯不亦誤乎

韓錢王鄒才既相伯仲又爲同籍而相仇至甚殆不可解王象春自述云與鄒同游西山鄒爲對偶云敬字無文便是苟思其對不可得王忽云林中有點不成材以賓尹號霍林故也此皆輕薄之尤韓鄒固爲世詬矣王居鄉最爲鄉人所疾其族人亦多恨之錢聲色自娛末路失節此皆國運所關生此輩以致朝野紛紛也

熹廟之初羣賢並召其勢甚盛而敗於汪文言文言之起甚微或以爲新安門役也而向高南星輩愛之彌甚言必移時兩公卽以病避客文言直入臥內所言必納楊左輩均重之傅魁首彈文言下獄廷杖放歸愈以慳通內訊之慳亦彈忠賢以自解未幾大獄起首彈文言連及楊左諸公而搢紳之禍靡天矣諸公所以及禍皆以忠賢相仇此固君子本色而狎昵文言授人以口實殆不可解余與向高之仲孫交言及此仲孫謂余曰當熹廟時條召諸名賢此誰力哉文言向客於王安所每爲安言天下某某皆清流也故一朝召用皆文言所爲文言雖遊諸公卿間未嘗自私嗟乎諸賢之出而謂得一文言力安得不爲所累始之終之宜哉古人云小人不可與作緣又云不輕受人惠誠有以也

楊副院二十四大罪之疏上政府韓爌亟稱之而首輔葉頓足以爲事從此不可爲矣然忠賢無外應亦



未敢遽自閣臣魏廣微以頒歷失朝臺臣李應昇糾其應杖脊而廣微憤甚先是南星自以老病請時免其入朝得專心職業於是廣微謂冢臣自請免朝不之罪而閣臣一失朝卽杖脊何不平至此挾憤與忠賢通盡逐諸臣及忠賢興大獄坐楊左諸公以多職仍命鎮撫司五日一比廣微亦駭愕上疏爭而不可得矣引賊入門而欲其不掠不殺詎可得乎若顧秉謙輩庸劣不足數不過爲忠賢奴役耳不足論也

當忠賢盛時舉國若狂最盛者爲五虎五彪然皆由崔呈秀進或以謂李夔龍不應在五虎之數尙有甚焉者如周應秋爲十狗之首其貪鄙不可言其罪亦不在虎彪下也此時與之合局而不思與同污者亦自有人如高弘圖首言詔獄削奪之非王志道召用不肯出王永光上疏力言淫刑以致天變王業浩張捷赴召卽忤黨斥歸此皆能自振拔者崇禎之朝諸賢卽宜與之捐成心偕大道而終亦落落不合此則諸賢之過也惟崔呈秀窮凶極惡其致死於清流因巡鹽淮揚時總憲高攀龍特糾其貪幾致之死故計不反顧因呈秀之縱惡愈成攀龍之知人矣

諸賢之遭璫禍也慘絕一時名高千古然亦有向來攬權好事自致此禍者其高攀龍不齊也最高惟周順昌生平至清亦獨立無黨當魏大中盛時順昌未嘗與之合也見大中逮至吳門時向來交好皆星散撫臣毛一鷺素奉大中惟謹至是不與大中通隻字順昌憤甚遂以女許嫁大中孫且呼緹騎而罵之曰若



歸與忠賢此亂臣所爲受譏萬代向來未有正人端語之者故至此當以我言告之每見人輒痛詆時事遂及於禍使順昌稍默默必不及此此真鐵漢也緹騎至時吳中士民發憤擊之十存一二擁順昌不令去以夜跳身入都既下詔獄受刑至酷詞不少撓刑已極卽痛罵忠賢輩加刑時則呼高皇帝同時入獄者語或少異順昌卽怒罵之忠義所激遂至王恭廠異變舉朝駭愕合疏諷諫忠賢之黨亦多畏而逡巡者忠賢以不殺順昌則威中絀故終不免偉哉其清中之清忠中之忠乎



明季稗史彙編卷十四終



明季稗史彙編卷十五

明吏部考功郎夏允彝敬述

幸存錄

是時士大夫下詔獄者俱五毒備至惟高忠憲聞逮卽自溺園池中死而不仆其絕命詞曰大臣受辱則辱國謹遵屈平之遺則聞忠憲生平學道得力死生之際泰然文閣學嘗語余曰生平止服一忠憲事事合道繼此者惟華鳳超然勉強與自然尙有分也忠憲嘗自言少年以氣節自許以此一念受譴亦不念及行遠竄阻風雨困臥舟中數日餘遇晴霽登岸入旅店中推窗忽睹桃花爛然遽有悟從此事事有異并氣節之想亦永融矣觀其遺書真有得者獨於門戶異同之際持之斷斷終不化也

四月請祠忠賢者其言皆絕醜不復知廉恥事而最甚惟太學陸萬齡直比之先師謂孔子作春秋而忠賢定三案孔子誅少正卯而忠賢黜東林請祀之學宮更有一張生者欲上疏以忠賢如先師並尊入國學遽殛死自稱見子路怒擊之陸當崇禎初亦伏誅小人所得幾何而甘爲此可恨亦可怪也

忠賢凶惡非常國史當備載之余見一術士徐姓者言遊都下五人共飲於旅寓忽一人倡言忠賢之惡不久當敗餘四人或默或駭諷以慎言此人大言忠賢雖橫必不能將我剝皮我何畏至夜半熟睡忽有



人排門入以火照其面卽擒去旋拘四人並入內地見所擒之人手足咸釘其門板上忠賢語四人曰此人謂不能剝其皮今姑試之卽命取漚清澆其遍體用椎敲之未幾舉體皆脫其皮殼儼若一人四人駭欲死忠賢每人賞五金壓驚縱之出嗚呼惡貫古今矣

三案者梃擊紅丸移宮也梃擊已識其略矣二案亦當平言之光廟病亟遍體皆冷勢已不起李可灼請以紅丸進是日上召諸大臣入并召兵垣楊漣因漣上疏欲上慎起居防意外也羣臣至上言病已危殆諸臣言皇上一月之內善政甚多必蒙天祐無虞上語以病勢難挽且言立東宮要緊又云李選侍奉侍勤勞嘗生子女宜封皇貴妃朕在內亦安卽呼皇長子宜出與羣臣一言熹廟出遂將上諭再爲口傳李選侍忽從簾內手挽熹廟入傳以宜封皇后宗伯已唯唯時有言皇上命封貴妃非皇后也宗伯再奏明之上再以封皇貴妃命因呼可灼進藥羣臣待命於外藥進少時上遽稱可可灼諸臣速命再進藥凡用藥三丸厥明上賓天矣仍賞可灼銀幣加等於是羣臣謂可灼進藥懷不軌心閣臣故賞之此其言亦太過但不宜于賓天後復擬賞耳是時一月之內連遭大喪朝中洶洶楊漣率衆排闥入奉東宮登極衆見東宮卽羅拜選侍時在乾清宮以母禮待東宮左光斗遽疏言乾清非至尊不可居欲速其移宮自當但中書武氏之禍立見於今且慮有垂簾視政之事此亦過當楊左卽拉閣臣揭請卽日移宮選侍頗受逼



追御史賈繼春遂言先帝於羣臣至厚何至一妾一女不能遺庇其言亦不可謂盡非然宮之應移仍屬定禮楊左不可居以爲功他人亦不可誡之爲罪也楊與賈互相譏諷賈以楊必將與大璫共受封拜譏之楊遂挂冠歸中旨切責賈賈惶遽自辯詞頗哀高弘圖張慎言出疏兩解之其言至平且確乃賈終斥爲民而楊不久優擢至副院則亦東林失平之事也後遂以此殺楊左則冤彌甚卽賈亦心憐之東林操論不失愛君而太苛太激使人難受攻東林者言瘋癲言可灼無他意移宮太亟不失調停然以此規諸賢之過則可以此罪諸賢而加以一網不亦誤乎當東林極盛時其重處惟一繼春耳餘不過年例外轉而已受處者卽以爲不堪而崔魏之時諸賢重者備受酷刑死謫戍遠配者累累至輕者亦必爲民盡追奪其誥命誰敢殺機日甚一日則攻東林者之罪不可言也

當忠賢盛時雲間奸人徐姓者上疏言士民願爲立祠實絕無其人也惡生有周姓者與徐爲姍相附麗借此索詐恣行其所營祠地逼余居後欲攘余地廣祠基所以相逼者多方余終拒之余時布衣徒步以待禍之至幸聖明御宇徐周立敗余乃得免嘉善錢繼登爲蘇松道枷責徐周以示衆仍戍之

熹廟病亟時閣璫張甚中外危懼意天下事不可爲矣熹廟召烈皇帝入見卽諭以吾弟當爲堯舜之君烈皇帝惶恐不敢當但云陛下爲此言臣應萬死熹廟再以善視中宮爲托又言忠賢宜委用烈皇帝益



惶恐求出燹廟賓天忠賢自出請烈皇帝入宮烈皇帝亦自危甚袖食物以入不敢食宮中物也當是時羣臣無一人得見烈皇帝者皇帝秉燭獨坐久之見一璫攜劍過卽取視其劍留之凡上許給以賞聞巡邏聲勞苦之間左右欲給以酒食安從取乎侍者以宜問之光祿寺傳旨取給之歡聲雷動羣臣俱在寓問卜懼入朝之有他變生死且不可知矣厥明至殿門宦者持門不令入告以宜用喪服旣改服又謂未成服宜如常服羣臣奔走出入者三氣喘且不續哀訴宦者乃放入旣哭大行皇帝見王魏兩璫在喪次是日皆王璫發言各部備喪禮而魏璫目且腫矣默默矣羣臣出少頃獨呼呈秀入屏人語移時祕不得聞或云魏欲自篡而呈秀以時未可爲止之也從此諸奸失勢憂懼不知所出而烈皇帝不動聲色逐元凶處奸黨宗社再安旁無一人之助而神明自運較之世宗之中興爲更難矣時在朝者皆魏黨莫能發其奸楊維垣寶首糾呈秀始自相攜貳然於璫仍不敢致訊也陸澄源錢元愬乃直指璫罪至錢嘉徵所言十大罪乃詳盡璫不勝憤哭訴於上愈觸上怒始放之出至中途言者益甚璫知上必重處之遂自縊於旅店中呈秀列姬妾并羅列珍異酒器縱飲三杯卽擲壞之飲已乃自盡天地再闢皆上獨斷也言者特知其機已就故發之速嘉徵與余交循循大雅人其子孝廉夙有至性情早天嘉徵以貢爲縣尹元愬擢司銓澄源旋與東林反唇所行亦多不簡以京察錮之爲善不卒惜哉



上既疑忠賢卽因臺諫言定逆案閣臣韓爌端而厚錢龍錫和而謹亦不欲廣搜樹怨僅以四五十人列案以請上大不然再令廣搜且云皆當重處最輕者爲民閣臣又以數十人上上怒其不稱旨諭以稱頌贊道速化爲題皆當列入且云忠賢一人在外苟非外廷逢迎何遽至此其內廷同惡者亦當入之閣臣以外廷不知內事對上曰豈嘗不知特畏任怨耳閣日上召閣臣入先有黃袱包裹者累累指示閣臣曰此皆結璫黨實迹也當一一按入之閣臣知勢難遺漏乃云臣等職掌惟司票擬三尺法非所習也上呼吏部問之冢臣王永光以吏部止習考功法不習刑名對上乃令法司同事又云張瑞圖來宗道何以不處閣臣以無事實對上曰瑞圖以善寫爲璫所愛宗道爲呈秀母祭文稱在天之靈可惡何如又問賈繼春何以不處閣臣言其請善待選侍不失厚道後雖改口覺反覆其持論亦多可取上曰惟其反覆所以爲真小人於是案所羅列甚廣幾無一遺矣其不妥者如楊維垣首參呈秀不宜入也以其力扼韓爌文震孟之出遂處以謫戍虞廷陞曾參孫居相者於趙南星原無彈章以糾南星誤處之呂純如雖有訟璫之疏疏至熹廟已賓天霍維華取其疏稿削去之矣竟據邸報以入之此何等而草草羅入致被處者屢思翻案持局者日費隄防糾纏不已迄南都再建逆案翻而宗社墟矣此則當局者之咎矣烈皇帝登極以王永光爲冢宰永光亦清執王恭廠之變其所獨侃侃或云此司馬張履端王陞所勸爲然亦永光矯



矯之徵也乃東林諸賢必欲逐而去之致永光憤激爲難引用袁弘勛張道濬輩再啟玄黃之爭實已甚之故耳卽枚卜一事錢謙益必欲首推而慮周延儒方以召對得上意懼同推必用周力扼而止之不知上果意在用周不推適啟上疑耳安能力止耶於是黨同之疑中於上者愈深溫體仁發難而周爲之助或云內廷已有爲之應者共賞銀八萬兩宮府同聲以排東林而謙益輩揚揚不知也條發召對謙益且自以爲枚卜定於此日矣及入朝方知有溫疏溫與錢廷辯溫言如涌泉而錢頗屈因事出於意外也先是錢已與韓敬爲仇韓固浙人錢欲典試浙中文震孟曾諷止之錢不之納及應召北上文又勸以緩緩枚卜而錢又不納其科場一事實寃而溫以爲非此不足以扼之觀錢立身本末原不足惜而溫已首發難端與滿朝爲仇勢不得不自結於上及入政府專意逢迎惟以苛急爲事未嘗敢於上前救一人爭一事上彌信其公忠而天下元氣凋殘盡矣其操守亦能自勵故上始終敬禮之盧杞之清忠強介固其倫也周再出頗反溫之所爲而操守濫甚敗壞國事實在兩人而實在東林過激以至此遂致天下左衽痛哉痛哉

當溫之秉政臺省攻之者後先相繼皆以門戶異同其言非盡由國家起見也平心言之不納苞苴是其一具其庇私黨排異已亦未嘗爲之有迹但因事圖之使其機自發而發上不疑也無識者遂謂溫於各



輔自勝然其伎刻陰險自非端人始而與周深相結周固力助而且援之以進及周爲大璫王坤所排舉朝爭之而溫無片言相助及科臣陳贊化糾周去之凡與周爲難者溫皆援之以進助周者皆屈焉蓋周之去實溫擠之也當袁崇煥之獄起攻東林之黨欲陷錢龍錫以逼織時賢周溫實主之後因黃道周疏救周意頗回久旱不雨言路復言及錢得減辟爲戍初出獄周卽相過極言上意怒甚有可恨甚多卿等豈能盡知之語挽回殊費力錢極感之未幾見溫錢因述周語謂非公等力救何以再生溫第曰上原不甚怒也於是聞者遂謂溫爲質實而周多虛僞然特溫之巧於擠周耳嘉善錢士升生平端謹爲東林所推重而龍錫其座師也聞溫語頗重溫而輕周溫遂與相結士升之入政府溫凡有所爲每推之令先發而後繼之如用冢宰謝陞總憲唐世濟皆溫意也而錢成之及溫攻去文震孟頗引錢爲證錢亦有助溫語及溫所欲進者已進溫所欲退者已退而視錢爲贅物也因有詰奏錢之弟滇撫士晉者溫卽擬嚴旨仍囑同事林釭毋得洩言蓋欲借弟以逐其兄耳錢旋上四箴疏語多諷上又爭搜括江南富戶事遂去也其去也頗光明而中間爲溫所用幾受擯於公論受溫累不小溫棄之如遺也其立心概如此國家元氣剝喪良多至於敵寇交訐不展一籌則凡居政府皆如是不得獨責溫也

烈皇帝太阿獨操非臣下所得竊用而每當大舉措則內璫每發其端似陰中而不覺也若滿朝之用舍



榮枯則一視首揆之趨向亦似爲所陰移而不覺者當初政時不許內璫與廷臣交一私語廷臣遂忽璫輩不之顧而攻東林者默結之日以朋黨之名申於上其時以通內自詡者史塗也輔臣錢之入獄皆史擠之及其得出錢自云大璫王實心寬之不然必無生理溫之陷錢謙益於獄也謙益去死如髮大璫曹化淳憤而發奸棍陳履謙張漢儒之陰謀陳與張立枷死溫逐而錢釋矣薛之死也廠璫王實爲之而周之死也則又小璫怒之也廷臣通內者漸亦不以爲醜曹璫之喪其父也大臣與言路多往致祭焉小王璫喪母大臣亦多往送甚有倡爲傳單者揚揚不之諱其九卿不往者鄭三俊程國祥耳廉恥道喪國事安得而不敗然此時璫輩特陰爲播弄耳其畏上英明實甚也若南都之事則攘臂揚眉內外交相市以爲卽聞之上無傷也票擬銓除羣黨人人可言卽大璫自好者亦嘆以爲繩閑盡裂知敗極之不可救也視先帝朝天淵矣

周延儒之承上眷也最深其應對敏絕凡上怒時莫能挽回惟周能談言微中如黃道周之獄人皆以爲必不可救周自能微諷挽之已得減戍歸矣上偶言及岳武穆事嘆曰安得將如岳飛者而用之周進曰岳自是名將然其破女真事史筆多虛張卽如道周之爲人傳之史冊不免曰其不用也天下惜之上默然甫還宮卽傳旨還以原官矣此周所長不可沒也



烈黃帝之英明勤敏自當中興而卒致淪喪者以輔佐非人也庶幾如范景文之博大好賢方岳貢之清勤憂國不失賢相惜用之少遲謝陞不徇物情亦不違公論三公者於二黨皆公虛不滯謝時合時離或以其機智少之其糾許譽卿也實逢迎溫意未幾又推鄭三俊爲總憲似亦善補過者但闖寇之難范死節最烈可照耀千古方以直精微房入內閣難卽自縊爲僕人所釋欲再縊而寇已入擒之矣受刑至慘已搜其寓蕭然無一物欲釋而大用之方終不屈以死或惜其死之少晚然大節終無玷也謝不免於臣清又未幾死或云爲清所疑也惜哉出方下遠矣

馬士英素以才望稱其闊大不羈或亦邊材之選而用之政府則乖甚矣初爲王坤參之謫戍周延儒再召阮大鍼實以士英託之遂起爲鳳督與大帥黃得功劉良佐善曾一敗袁寇募其鄉黔兵爲親丁頗能戰高傑之南來也士英厚待之劉澤清初至淮士英與通殷勤頗自任德而歸怨於南樞史可法以爲我固願公等來而史公不喜也及擁立之舉馬遂聯絡二劉高黃爲己助馬入政府而四鎮皆開茅土馬入輔而史公出鎮卽國事敗壞之始也蓋四鎮驕悍馬尙可以向來交誼籠絡之史則與之相水火焉肯聽其驅使一至維揚卽爲高傑所困史竭力調劑僅得相安久之高與澤清皆欲渡江而南且縱其軍士大擾維揚瓜步間殺人無算莫敢聲其罪者劉宗周以總憲召首疏直糾之謂二鎮皆可殺輔臣姜曰廣擬



優旨下史館記錄於是澤清忽然欲與姜劉爲難馬遂因而用之四鎮遂合疏攻姜劉其詞皆凶悍甚史詢之四鎮皆以不知對史遂疏言此疏乃黎丘之巧混劉澤清又上疏攻史謂疏實其所上因史偶問故偶混答之至尊之前倏僞倏真此卽大怪事而馬方快於逐姜劉用大鉞不復顧大柄之委去也史從此展布益難大鉞一出凡海內人望無不羅致巧詆貪夫任人無不湔洗拔用馬立心疎闊原無殺人之意故不至遽興大獄而每上疏一曰奸黨再曰奸黨總以擁立二心爲題殊不思擁立懷二者不過錢姜數人與諸臣何與而欲一網及之乎未幾有妖僧者自稱爲先帝又自稱爲某王殆類病狂者而張孫振與大鉞欲借以起大獄流傳有十八羅漢五十三參之名海內清流皆入其內如徐石麒徐汧陳子龍祁彪佳之屬咸列焉卽余未嘗一日爲京朝官楊廷樞一老孝廉而羅織俱欲首及之馬意頗不欲殺人故中止又未幾而有贗東宮之事據聖諭謂以孟春至留都留之不肯止直由嘉興武林至紹興上密遣人召之乃還而言貌多可疑欲羣臣識認馬亦先有揭言其必僞及羣臣往察王鐸首言其僞舊東宮講官劉正宗李景廉亦以爲所言講讀事皆非實眉目亦不符方馬之揭請遣羣臣識認也謂講官方拱乾現在當令阮大鉞密諭之往認拱乾入馬許以卽復原官且加超擢及識認之日僞東宮指方以爲此固講官也方不敢應及劉李具疏方亦不肯列名仍出都都民藉藉不平皆以爲真中官言亦如之而搢紳皆以



爲僞阮張輩又欲借以起大獄而黃得功首上疏不得遽加害劉疏繼之左良玉袁繼咸遂上疏力爭左遂詆馬阮輩稱兵犯闕馬盡遣上江都下勁兵往禦之是時清已逼維揚有言及清事者馬輒以爲必無虞且欲用清以剿左四月二十五日揚州城破可法死之或云遁去未死也清左逼江而都城終不以爲意五月初九清渡江無一矢相向者馬擁兵出遁大鍼孫振輩或遁或降惟張捷楊維垣死難上至得功營中得功戰沒上亦陷清如士英者本無意於誤社稷而社稷爲墟本無心於斂賄賂而賂門大啟本無心於剪清流而清流盡逐及其遁也既不守城又不衛上第云奉皇太后以行所至縱兵大擾卒未嘗與清一戰謂非天下罪人安可得哉方諸奸欲起大獄肆誅鋤之時卽余亦賴士英知其無辜得免陷阱誼當私感然不可以廢公論也萬世而下亦以余言爲無私否

南都之政咄咄怪事殆不勝書其大者如僞東宮其一矣又有僞皇后自稱上之元配且已生有子初在河南按臣陳潛夫爲之疏聞奉旨以爲僞託著逐出境而必欲自請至京及至上震怒下之獄備受拷訊終無變詞此古今未有之異也更其真僞總非臣下所能測又有市人忽聞空中語令其入宮認子遂儼然排闥闔爲狂言諸奸每借一事卽欲爲羅織之案賴上寬平士英亦素無殺機故得以幸免然庶務乖張如狂如醉無一官不用賄以入其價倍苟破費多金雖身負至垢立致要地權要與中官勛臣藩鎮皆



得操用舍之權中官向冢臣徐石麒居間用一縣令爲吏部石麒怒拒之奏聞於上上亦不之問又有給事外轉者費銀數千得中旨留之石麒質之內璫內璫云此以進御遂無敢言者而給事反彈石麒去位矣要以進御固妄言但諸璫與馬阮輩相表裏或偶聞於上竟以從龍而來貧苦無資實對上憐之不之罪也票擬前後相反銓政濁亂無章至樞部爲尤甚凡白棍至部者卽日可爲大帥凡前官未出缺而後官遽復陞授者累累皆是及至任互爭乃令舊者仍任而新者候缺於是舊者欲固其位也不得不輸賄新者前費難退更加賄以求舊官之速去大抵武官之揚揚罔忌莫甚於此時而囊橐盡傾以奉權要亦莫若於此時也都城有滿街都督一部職方之謠嗚呼始於宮闈卒於金虎豈不痛哉羣臣之負烈皇帝也上事事焦心而羣臣無一忠公羣臣之負弘光帝也上事事虛己而羣臣無不恣肆者其負固同也水落石出蓋棺論定北都覆而范景文李邦華倪元璐馬世奇申嘉胤成德金鉉劉理順許直自盡於官南都覆而徐石麒劉宗周侯峒曾徐汧黃澹耀殉難於家不可以其東林也而詆之若其臣清臣寇如錢謙益李建泰輩自不得以東林也而恕之又如張捷楊維垣之死難不得以其攻東林也而少之如蔡奕琛唐世濟鄒之麟張孫振陳子鼎劉光斗輩之失節亦不得以攻東林也而恕之也北都死難如孟兆祥及其子章明汪偉夫婦死節凌義渠施邦曜周鳳翔陳純德吳甘來朱之馮衛景琰吳麟徵王家彥勛臣襄



城伯李國楨惠安伯張慶臻戚臣新樂侯劉文炳及其弟都督文耀太康伯張國紀駙馬鞏永固舉家焚死武臣周遇吉及內臣王承恩南都死難如高倬劉邦弼何剛錢棟祁彪佳吳嘉胤陳于階勛臣靖南侯黃得功魯之瑛侯承祖父子陳天敘等皆爭光日月與二黨皆中立故附記於此成德之自盡也先語其妹云爾尙未嫁留此何依妹請先自盡德哭而視其縊其妻請繼之德痛不及視入別其母哭盡哀出而自縊母見子女及媳皆已殉亦慟而自縊當德之屢糾溫體仁也廷杖拷訊備受慘毒其母多力冒體仁於途且欲擊之體仁訴於上逐之出都謫戍遇敵變家屬盡沒又以流離顛沛其妹年二十餘竟未及嫁甫召還卽合門殉難最爲烈烈理順盛德士也亦合門自盡寇在中州知其厚德亦往哭之世奇二妾皆先自盡汪偉與其妻對飲自盡妻誤在左卽曰誤矣夫宜左也仍易位而沒南都之覆敵勢甚盛人皆以爲無可爲矣惟石麒麟矢死必圖興復禾城殺僞官後衆情紛紛互相猜忌出石麒麟於外及城垂破自請入城死慷慨賦詩自縊二義僕從死焉侯峒曾倡義守城殺敵最多故敵最恨之城破已自投池中仍出而取其首指爲元凶其子玄演玄潔少年高才自聞南都破卽發憤求死與父同守城至是兄弟爭死俱爲敵所殺溇耀初登第卽知時勢已非不受職而歸布衣徒步蕭然高隱及與侯同守城城破及其弟淵耀同自縊仍題壁以不能謀國爲歎陳于階官止欽天監博士聞難衣冠謝國恩首自縊吳嘉胤已奉差出



都聞敵渡江仍服回車寓於城外僧寺中欲上書求復明社稷屢請不達及書上卽自縊侯承祖守金山衛殺敵五百餘力屈被擒罵賊而死此數公者尤死難中最烈凡生平美行不勝書計異日史臣當各爲立傳也凡死難者皆烈烈千古未知其詳又南都破後起義而死卽草野間亦多其人俟再爲詳記

### 流寇大略

流寇始於陝西潰兵皆耿如杞入擾之師也陝西連年饑饉民窮賦重遂從寇者日衆其始固易剪除也楊鶴爲三邊總制欲撫安之旣撫復叛鶴逮謫戍洪承疇爲陝撫剿之甚力洪廉而勤將士愛戴之剿寇幾盡僅遺三千人渡河入晉晉撫許鼎臣不能禦漸猖獗遂至河南四川蹂躪彌廣用陳奇瑜爲總督寇入川而袁幾爲川兵所盡奇瑜再主撫衛而遣之入秦至秦又叛逮奇瑜下獄用承疇總制陝豫楚蜀賊聞承疇來大懼盡避入終南山中官兵圍之大帥曹文詔勇而驕遽入山搜寇爲所敗沒賊復突出豫楚間用盧象昇爲總督與承疇共剿孫傳庭爲陝豫撫象昇身先士卒以善戰稱而傳庭父爲邊將亦習行間事雖與洪不合而其才自優象昇用關外兵一破寇於豫而承疇傳庭亦時時以捷聞寇且衰矣因東兵入邊亟召三公入援敵退卽用象昇於宣大承疇於薊遼傳庭於保定而寇又復盛傳庭以稱病不實逮下獄是時楊嗣昌爲中樞疏薦熊文燦爲總督議增天下餉初以溢地爲名蓋言額外之地此或楚中



塞關偶有之而四方實無是也於是有上疏爭者輒被處遂總加之額田中特設一少司農理剿寇餉俾文燦專心兵事然文燦向在閩中幸以撫鄭芝龍成功遂謂寇必可撫專意招降初寇之起也紛紛無主名久之有老獬獬闖場天滿天星番山鷄等名亦未著姓氏至是有張獻忠李自成小袁銀輩漸并各寇爲雄長熊招獻忠降之處於鄖襄肆其兇悍日侮居民熊每伸寇而居民獻忠旋颺去其勢益張文燦逮論羣寇旣復叛而東兵又闖入燕齊殺掠無算嗣昌乃自請剿寇贖罪上爲賜坐設宴賦詩寵之雖大帥及司道皆得以賜劍自戮之權莫重焉楊至楚申軍令鼓將士一時赫然旋敗獻忠而圍之瑯琊山中獻忠出戰墜馬幾被獲楊謂剿功必可成先是嗣昌在閣時議練兵十餘萬於各鎮用以破敵特加練餉更浮於遼餉之數至是卽撥練餉以充剿寇之用餉足而民怨已極獻忠被圍久鑿山徑走入蜀嗣昌彈蜀撫邵捷春逮論辟蜀民爲訟寃不之釋也獻忠遣奸細入襄陽城與獄中大盜相通又遣寇僞作商人運車入城兵器皆藏車中至夜內外相應城遂立破襄王被難自發難以來未嘗破藩封傾重鎮也自襄陽破後勢遂滔天闖賊李自成又破河南府福藩不屈被難闖賊得珍寶無算其勢益強嗣昌旋沒或云服毒或云病歿其罪固應誅死矣而上終心憐之有言其服毒者輒譴責闖賊再圍開封府前後且百餘日城中斗米十餘金草木皮筋盡人相食上令各路進兵救援皆不能至初次圍城賴大帥陳永福及其子



德力戰却之至是永福父子亦被困按臣任潛與司李黃澍輩矢死力守周藩所費不貲左良玉來救爲寇所擊去城已不支而河忽大潰城沒焉周王與守土諸臣皆走高處得免而百姓死且盡矣或謂城中諸臣自決河以便出走然河堤向高於城賴年年修隄以得無潰寇旣圍城堤久不修治其潰固宜也上爲之痛惜拔澍爲御史優詔慰周藩出孫傳庭於獄擢總制悉發秦晉兵從之傳庭大治兵自謂必能破寇上亦屢趣之出關傳庭銳而疎寇屢僞敗以誘之深入一戰而敗軍資悉蕩寇遂入關據有長安傳庭走死先是寇所破城邑兵弁多失節文臣未有降者至是秦中方伯陸之祺輩多蒙面屈降矣寇遂由秦入晉所向風靡上先遣閣臣吳甦出督師甦逡巡未行而獻賊已破武昌舊閣臣賀逢聖死節上怒黜甦旋提問謫戍獻賊所至殺戮無孑遺而闖賊稍愚民競以闖賊爲不殺人至卽迎降幾不留行惟榆林力守與賊殺傷相當破城之日皆鬪死無一降者榆林多世將故也寇渡河而東閣臣韓爌撫臣蔡懋德皆死之郡守張嶙然迎降且爲之用上遣閣臣李建泰督師躬送之出城待以殊禮然兵餉皆缺選京兵從行中途多散去李至真定不能前而寇已逼近李爲寇得不能死傳聞寇以同姓稱之爲叔要以不死卽爲失節不待其臣寇而後知之也李生平頗負重望至此殊可恨惜寇一支從真定來一支破居庸關而入京師尙傳捷報詞臣李明睿建議南遷科臣光時亨疏阻之又有言東宮宜出撫軍於南亦不果上已



遣閣臣魏藻德方岳貢屯田練兵淮揚間復以寇迫留之羣臣建議者紛紛而城守卒無料理十五日尙館課庶常十六召對考選而十八寇已從通州至都一到卽破彰義門矣而內城尙未覺也城守皆中官爲政百官無一上城者銃聲不絕實皆空礮守堞者亦寥寥奸細已滿城有二瑯懸城而入以寇勢報上不知所云聞皆寇使之內間也上遂令中宮自盡刀劈公主一臂不能殊上憐而止馳騎至城門不能出復入宮自縊於天壽山自以身失天下不欲以衣冠見祖宗裂冠毀冕而崩猶書襟以不殺百姓爲戒聞者莫不痛絕而寇已馳騎入城矣其所以破城者城中人亦莫之知聞齊化門內有寇內伏大呼曰城破矣爲兵者卽殺民皆免城兵遂棄甲走復從齊化遍走各門大呼所至兵皆潰遂開門納外兵居民見兵入皆倉皇走寇慰之曰大兵不殺人毋用遁走爲也李自成入至大明門自恃善射祝曰我得天下如安平則箭中其中間箭發入瓦楞中或以爲射及空虛殆空名耳自成入宮舉皇后之靈出置通衢梓宮莫能具傳聞敝棺置蓆棚下有僧以麥飯爲供萬姓無不感慟而羣臣無有拜哭者自死難二十餘人外皆寥寥自成卽勒各官報名出見羣臣皆趨至庭中立候竟日不許見押至藁街又留之押至空舍中巡邏守之備加頓辱羣臣至此求死亦不可得矣其無恥者遂用關節通其用事者再呼見遂分別用舍用者令出東華門押至吏部受職不用者押出西華門至各營追取金帛夾而暴之庭中所獻金帛不足則再



加酷刑不能早致自死以致此辱恥莫大焉然較之求用諸奸揚揚自得者尙天淵也如魏藻德方岳貢皆先求死爲人所釋再三請死終無屈詞亦有潛身得免者其志亦皆可亮但先帝神聖憂勤身殉社稷千古所希而諸臣死難者寥寥大可恨也大抵野史所記降寇諸臣鮮不實者而南都初定六等之案總以賄賂出入及門戶相仇讐者則陷入之案屢定屢移蓋恐一定則無從索賄故爲出入游移不及之案卽死難最烈者亦必索賄乃爲題請而刑死諸臣則有優贈者有醜詆者惟視賄之有無耳寇初索金帛於百官繼及大戶無不騷然不過寇刦故態自成每登御座卽昏眩人皆知其無成而自燕及齊過設僞官所至靡然從之僞官至地方亦惟以搜求士官金帛爲亟亟百姓始有悔悟意自淮而南僞官方不敢至以淮撫路振飛與按臣王燮取僞官呂弼周等戮之也寇未破都城時傳言吳三桂已降舉朝驚懼上召其父襄問之襄言三桂忠孝必不至此三桂旋斬寇使奏聞上爲大喜寇破都城寇發兵萬餘往關外三桂殺之幾盡自成憤甚帥衆以往三桂僞敗誘之出關適清兵至三桂前後皆勦敵不得已乃與清合自成大敗其步兵無一存者騎兵亦潰自成亟奔還取所掠宮中珍寶以及金帛子女西馳三桂率清兵追之至真定而返寇至陝發重賂於西敵市馬西敵復奪賂殺其人寇遂不振清再令三桂西伐寇不戰而死走傳聞剽寇止千餘嗟乎清稱天驕其蠶食中華無足怪也寇皆歷朝長育之赤子乃墟我宗社使



聖主蒙難以崩中宮從焉東宮二王皆爲所獲此其罪萬刃不足刺也破都城不滿四十日每欲僭位受朝擇於四月二十七日而迫於三桂倉皇出走自古大寇敗亡亦未有如是之速者誰謂天道無知哉二王至陝中尙無恙吾鄉人有親見之者是或神靈所呵護也

### 東人大略

東人之先甚衰微以李成梁奏授官積功爲龍虎將軍甚恭順李成梁初以力戰起後日貴至封甯遠伯子弟皆爲元戎奴隸無不金紫盛極而衰既驕惰其長子如松頗勇竟以戰沒諸子如樟如梅如柏遠不逮其父兄惟以納交朝貴窮奢極欲爲事於是兵備日虛健兒甚寡內臺又惟與李氏交好得賄爲樂遼事日已甚矣已午之間東人發難於清河李永芳以城降東人以女妻之上書言七宗惱恨大抵言邊臣侵侮寡信之事當承平之餘驟聞東人之變舉朝倉皇時撫臣李維翰貪而寡謀奪職去起楊鎬爲經略杜松劉綎馬林李如柏爲大帥鎬固庸人且老矣治兵年許無所經理朝論欲其速戰輔臣方從哲兵垣趙興邦皆不知邊計發紅旗催戰鎬匆匆發兵分爲四路兵分則弱已爲失算而師期豫宣東人得預爲備曰憑爾幾路來我只一路去偵知杜松最勇兵先至渾河沙壅上流伏兵山下杜至河催軍速進渡未畢伏兵起凡火藥利器俱未渡水大至兵多沒焉已渡之兵陷伏中杜登山巔呼飲飲已出戰不能支我



兵內擁至不能舉手咸殲焉馬帥尋亦敗惟劉綬深入營亦堅東人假杜旗幟馳報之令亟來合戰劉啟營而一騎闌入不復可止綬與其下養子劉招孫喬一琦等力戰不支得脫者無幾惟李如柏不遇敵得以全師歸一時朝議喧然謂李實通敵鎬庇李而以劉杜陷危地此其說或太苛然鎬之寡謀李之怯避皆其罪也鎬與如柏先後逮下獄起熊廷弼代鎬廷弼向爲遼左巡方力糾李氏且向以才幹稱故以御史起用爲經略既至勇於任事號令嚴肅身自偵探將士多畏而服之遼事幾振然性好自矜多怒罵人鄙夷朝貴原其隱情亦欲罵人以冀人之相攻得卸肩去顧一時邊材無出其右者朝貴皆碌碌專以臺省之炤陵人不復念國事姚宗文以科臣往關視邊與廷弼不相得贊化主事劉國縉者舊臺中以攻道學與熊姚皆同類也熊以獨立自許姚劉皆以夙好望之彌相失劉主用遼人而熊謂遼人不可用此其說亦各有得失咸負氣相冒過甚姚歸朝而逐熊之局定矣省中魏應嘉臺中馮三元張修德與姚連章力攻熊熊亦恨四人卽請魏馮張三人出勘遼事上允之而臺省又以爲非體力爭不可熊遂有原告脫逃之議改命省中朱童蒙往勘童蒙疏稱廷弼無大失但不宜悻悻求去閣臣劉一燝擬旨申熊臺省方起而攻劉而遼東陷矣熊之去也姚宗文輩力舉袁應泰代之是時余方館於鄒平座師張華東家師頗謂袁必敗遼事以其人好名鮮實余詢之遼人大抵好收物情旣爲經略乃理詞訟細務以悅人心爲主



殆循良之選也而以主兵不亦左乎於是亟詔起廷弼廷弼辭優詔勉以君臣大義甚有哀切之詞而熊氣益甚顧其再出也撫臣王化貞蒞治廣甯與敵相逼而熊乃處關內熊未至王已自許必能剿敵朝論俱向之蓋臆王之必能成功而厭熊之侮人過甚也王之爲人亦壯而寡智遼人每愚以敵必可破王遂欲渡河剿敵而熊以爲敵未易破惟當慎守熊向自誇舍我無可當敵者王遽以此自任亦不相得互詆之章日上朝論多左祖王欲削熊經略銜而仍責以與王相照應不得膜外視余時以計偕至都偶言於所交一二臺中謂王未足恃欲責熊以任事不應削其銜朝貴皆以爲不然此論未及定而廣甯陷矣化貞幾爲磨下將縛送東人狼狽遁出城廷弼時在甯遠方幸化貞之敗自驗其言又以衙門在關內亟馳入關不知薊遼之責與王共之廣甯雖失甯遠尚可守也委而去之詎得無罪化貞旋被逮廷弼解任候勘大司馬張鶴鳴亦負氣自矜廷弼向慢罵中朝無敢與抗張自以撫黔定亂負豪傑聲與廷弼互詆不少遜至是力排廷弼謂化貞功罪相等廷弼有罪無功朝貴亦多恨廷弼者廷弼懼歸而被傾陷也自請入都與化貞廷勘既至並下獄遂與化貞同擬大辟化貞固當死而廷弼似太重云時廷臣無可任遼事者臺臣方震孺特舉閣臣孫承宗出視師以王在晉爲經略承宗旋上疏欲自任遼事以在晉輩俱未可恃也清聞承宗以閣臣出任邊事頗爲悚動年餘不犯邊而魏璫之亂起承宗幾不能容有爲之游說以



解者得請歸以王之臣爲總督而袁崇煥以道臣治甯遠未幾東人又大舉深入前此東人所攻必破無不望風潰者甯遠孤城外懸忽聞東人警舉朝大駭以爲必不可守崇煥泣血誓守啖草以勵衆曰苟能同心死守我爲牛羊以報是所甘也衆感其意爲取西洋大礮置之城頭爲堅守計東人至數里而近一望無際衆皆懼謂一至城下便不可敵欲發礮擊之而未有習者惟崇煥一庖人嘗聞西人之發礮而無害也姑試爲點放礮一發而數里之外見東人狂奔不止其被擊殺者數百人於是東人懼不敢以大隊薄城而城中亦以礮爲可恃大小間發殺東人無算東人遂罷歸崇煥軍聲大振擢爲撫臺大帥滿桂亦受優擢中國之敢議戰守實自此始也崇煥旋又與王總督及大帥滿桂不合朝議曲調之終不諧東人又犯錦州至甯遠城外皆不得志而去會東人有喪崇煥亦不爲魏璫所喜罷歸烈皇帝登極魏璫後凡璫所用邊臣咸廢不用遂召崇煥以大司馬經略遼事上虛已委用之召對之日慰勞倍至崇煥銳而輕每易言天下事上詢以東人何日可滅崇煥浪應以五年爲期及賜食出至午門羣臣有問以五年果可奏績否崇煥謂上期望甚迫故以五年慰上心云爾時有識者卽訝其不能成功再入對崇煥遂以吏部用人兵部指揮戶部措餉言路持論俱與邊臣相照應方得成功爲請上卽命各部及臺省如崇煥言崇煥無可卸責一至甯遠遂爲講款計蓋自崇煥甯遠奏捷之後卽令番僧往弔東人以講和以罷歸



未就再出無以塞滅東人之命遂以自詭慮島帥毛文龍洩其計遂身入島誘文龍斬之文龍當遼事破壞之後從島中收召遼人牽掣金復海蓋時時襲東有所斬獲頗有功但漸驕恣所上事多浮夸索餉又過多朝論多疑而厭之者以其握重兵又居海島中莫能難也崇煥初殺文龍上亦甚喜之屢諭倍至不嫌其矯詔未幾東人闖入遵化督臣劉策大司馬王洽俱不習邊事倉皇無以應敵東人長驅薄都城急召崇煥入衛宣大各鎮兵亦先後至崇煥固以滅東人自任一旦縱敵至此惟死戰庶足贖罪乃與敵相值輒避去及入對先以危言聳侍臣冀朝臣懼而從款議也賴上英明終不敢以款上奏第力請率兵入城休養上不許已深疑崇煥矣都中人又喧言崇煥導敵入犯上益切齒乃召崇煥入卽下詔獄而擢滿桂爲武經略以祖大壽黑雲龍輩俱爲統帥邊兵素感崇煥桂與大壽又互相疑大壽輒率兵歸甯遠遠近大駭亟用孫承宗言置大壽擅歸罪不問仍鼓勵之大壽之母亦以忠義責之得不叛去滿桂合各鎮兵與敵戰桂戰沒雲龍被擒兵大潰幾殲焉幸東人得志歸都城危而復安於是磔崇煥誅王洽用承宗鎮關門梁廷棟爲大司馬邱民仰撫甯遠劉可訓撫薊州孫元化撫登萊布置一新東人所陷各城亦皆恢復然晉撫耿如杞入衛之兵中道潰去爲亂貧民附之而流寇之患起矣承宗未久亦罷去邱民仰與大壽不合梁司馬劉可訓以中朝水火事相連俱罷此後用人亦皆草率塞責東人犯宣府一入山西由



薊入燕而壬午之入直走青徐及淮而止所至屠掠一空爲禍至烈我之兵力每分以討寇寇急則調邊兵以征寇東人急又輟剿寇之兵以禦東卒之二患益張國力耗竭而事不可爲矣關寇入都城欲輟關外之兵入關禦寇議久不決而寇已破都烈皇身殉社稷普天痛憤大帥吳三桂借兵於清與寇一戰大勝寇卽棄都城西走而清晏然以爲得都城於賊非得之我也傳檄三齊迅掃秦晉旣得河北復取江南一時迎降恐後者以寇爲先帝之仇清能爲我滅賊非我仇也嗟乎賊之發難以何事起天下噉噉皆以加賦之故然加賦於何年皆以東人發難也且河北爲賊所攘猶曰取之於賊江南何罪而奄有之耶我謀不藏將不擇兵不練廷臣置邊事於度外邊臣以尋端卸擔爲得計至南都之政賄賂彌彰如狂如醉使高皇帝之開創烈皇帝之憂勤一朝宗社邱墟大可痛也



明季稗史彙編卷十六

雲間夏完淳存古著

續幸存錄

南都大略

北都之變也以倫以序本宜立 福邸其次則惠瑞桂三王也潞邸比四王爲疎 福邸素有異議三王又在邇於是有推立潞邸之說鳳督馬士英擁強兵挾四鎮以恫喝南都諸大臣諸大臣懾不敢逆南樞史可法實司擁立事私問諸士英士英遣其私人口傳立君當以賢倫敘不宜固泥可法信之答書極刺弘光帝藩邸諸不道事意在潞邸士英得書竟奉 上至龍江關廷臣錯愕可法始知爲士英所賣已無及矣勉強出迎嵩呼定策而可法書已入士英手從龍諸內臣俱得見之此兩輔之分左右也然可法所答士英者不過南都部院公移及十三大臣擁戴議耳可法列名而已爲首者掌禮部之姜曰廣也五月三日 上卽監國位廷臣尙紛紛論不一推上者不過李沾等三四人後皆以不次貴十六日登極用可法曰廣及南儲高弘圖爲閣臣從物望也再用士英及南禮王鐸士英因定策功鐸則藩邸舊恩雖五相登庸而苑枯固有別矣然可法實秉中樞高姜居中票擬張慎言爲冢宰劉宗周爲總憲九卿大臣各得



其任士英豪宕有將材四鎮俱其心腹督師淮左有臂使之便亦未爲失人既而士英擁兵入朝遂假中官之援請留輔政於是有內外均勞之議而可法出督師士英兼揆樞矣士英之入也其心亦欲爲君子而可法一去天下皆斥爲奸雄呂大器等羣起而攻之迫薦阮大鍼而舉朝唾罵矣大鍼之阿璫也仍無實迹致以落拓不羈之才久躡田間不爲不屈且其欲得者不過遠方一撫臣耳廷臣謂大鍼一出則逆黨盡翻逆黨一翻則上且駸駸問三朝舊事諸君子將安所置足乎於是一呼百和衆論沸騰士英見滿朝異議愈結內宦及外鎮爲援士英之力本可鉗制內外一假其力遂橫不可禁士英自謂得計亦失計也大鍼所求不得其毒愈張故佐樞命下斥逐空庭惡遂不可遏未必非廷臣激之使然可法之出實與四鎮爲隔膚之交興平伯高杰遂困可法於軍中舉動不得自展初四鎮分藩可法本以廬州屬靖南侯黃得功淮安屬東平侯劉澤清鳳陽屬廣昌伯劉良佐興平則屬鎮徐州留揚州爲宰相迴翔之地徐州苦寒揚富麗甲天下杰遂挾可法以求揚可法調停宛轉竟與揚州杰遂解其困從此綢繆王事可法開款布誠杰恭謹受命反成握手之交杰跋扈非常一變而爲忠勇亦良將也四鎮調停就緒方議北征而宗周之疏作宗周謂澤清等可斬也澤清固可斬也處南都之勢發此危言不足以壯國威且速其禍於是四鎮合疏糾宗周去曰廣繼之曰廣之去竟與士英言於殿陛之間幾至老拳相向尙謂有法細乎



兼之得功杰兩鎮水火幾成克用全忠之禍朝堂與外鎮不和朝堂與朝堂不和外鎮與外鎮不和朋黨  
勢成門戶大起清兵之事置之蔑聞當清之初入也我一旅北征山東河南人心響應歲幣之供清可去  
也士英漠然不問但與大鉞等章賄賂樹彼此而已迨清已有南下之志始遣陳弘範左懋第北行洪範  
與清合謀賁夜逃歸遂成秦檜之奸計懋第竟不屈死亦何益於國事哉士英雖有用小人之意而無殺  
君子之心大鉞一用小人連比而進慎言去國徐石麟代爲冢宰石麟介直不阿虛公無我觸怒羣小挂  
冠而歸遂以魏公徐弘基之請用張捷捷雖偏執亦介而廉以錢謙益請用楊維垣爲副院謙益素稱儒  
林之望至是有使過一疏名節掃地謙益不過欲得揆席爲此喪心之事士英借謙益以用羣奸而愈疑  
謙益反絕揆望秋冬之季朝事一變天地元黃顛倒錯亂無所不至而清兵和戰僅委之可法一人可法  
諭四鎮渡河親督其行逼除不得歸內廷之上以曇明爲厝薪絕無任邊疆一事者李沾以七品小臣超  
遷總憲用劉應賓于文選張孫振于掌道其間大小名流相繼告罷卽宦寺之有人心者如韓贊周四十  
疏乞休盧九德殿前慟哭僅僅屈田張三秉筆及外廷大臣不以國事爲憂日夜娛樂上端拱宮中後宮  
子女以千計入春改元清遂下逼河南高杰拜表北行尅期西濟當時見可法掃陵杰渡河二疏草野痛  
心而當事但答以優旨而已自以江南天塹飛渡無繇盡其心力追秦韓史賈之遺風始也議和遣使士



英曰和則和耳旣而和議不成士英曰不和則不和耳戰耶守耶我不見廟堂之上有道此二策者也二月中而妖僧大悲之獄起大鍼等借此爲名欲盡殺諸君子大悲自稱先帝旣歸法司復言潞邸之弟羣奸竟鍛鍊以合擁戴一案於是有十八羅漢五十三參七十二菩薩之說士英義形於色奮然阻之遂僅以大悲口中所供謙益申及紹芳二人上聞二人疏辨亦旋解二月晦日斬於通衢三月朔而王之明童氏兩獄俱發一稱故皇太子一稱上應妃其真其僞草野小臣不敢仰度天家總之處置無術斧燭之疑難免千古遂致靖南有揭廣昌有疏定南侯左良玉遂以清君側爲名舉兵向闕建領而下士英大恐遂檄得功良佐以抗上游而杰已爲許定國所害矣河上之師盡歸瓜揚定國導清直下可法死守揚州不支而死左氏復下破安慶盡殺阮氏大鍼等遂謂與左氏之來不若清來我且用清以殺左氏并殺王之明以絕其望清信日急遂不得行杰潰卒渡江靖鹵伯鄭鴻逵掩而殺之且也露布告捷璽書褒封潰卒遂轉降清引之以南鴻逵連報虛捷五月八日清遂南渡破鎮江矣初九夜上遂與屈張二內臣單騎奔靖南營平明士英入朝車駕已先出矣遂以黔兵五千奉皇太后幸杭州良佐憤兩朝倫典不明遂叛降清得功力戰不屈自刎而死其將士遂縛上出降南都因上之出也獄中擁王之明爲主十三日清獻王至諸大臣開門迎款潞邸監國杭州復遣陳弘範請割江南四郡以和洪範陰與清疾趨武林潞邸



手足無措爲清所縛與上及之明同以檻車北狩而士英由廣德與鄭東伯方國安兵二萬奉魯邸監國於是有江東之事鴻逵自清渡江後海道奔還奉唐邸卽皇帝位改元隆武除弘光年號於是有閩中之事日月雙懸錢塘天險唐與魯皆孝陵之後也

### 南都雜志

弘光帝之入南都也有兩黃星夾日而趨此太白與辰星也新主肇元太白晝見夫孰爲祥哉神木者此係高皇帝建殿之餘材積在南工部庫中且朽矣一時遂稱爲嘉瑞致興土木之功迨三殿落成國運從之以畢當時大臣處天崩地坼之變不思祥桑之修省徒引禎祥以愚庶民不學無術亦一至於此我不見光武建元先言河清嘉穀也 史道陵清操有餘而才變不足馬瑤草守己狼藉不脫豪邁之氣用兵將略非道陵所長瑤草亦非令僕之才內史外馬兩得其長此易之泰所以外小人而內君子也今兩睽焉宜其流於否也再道陵爲馬所擠渡江時止三千騎首與高英吾遇維揚爲英吾所欲得揚人懼其焚掠嬰城不納英吾全師圍之且陷矣聞史公且至急斂兵退十餘里揚之望史如父母不意一見爲英吾所輕史之左右皆分屬興平麾下僅以子身寄命軍中且諭揚人亟納高兵史之聲望自是大減英吾於是竟逼城下史亦困於福緣菴一應章奏書問必先呈英吾然後得行一舉手足皆不得自專矣後微服



爲道者得脫賴黃虎山助之稍能自立英吾懾服史開款披誠泣陳王事反成至交甲申之冬史率四鎗  
列守河外迄歲除不能反顧勤勞王家鞠躬至死有武鄉之遺風焉 姜翰及馬瑤草朝堂大興姜辭朝  
上御殿羣臣陪列姜曰微臣觸怒權奸自分萬死聖恩寬大猶許歸田但臣去後皇上還當以國事爲重  
上曰先生言良是馬憤言姜曰我爲權奸汝且老而賊也因叩頭言臣從滿朝異議中擁戴皇上願以犬  
馬餘生歸老貴陽請避賢路皇上留臣臣亦但多一死姜厲聲曰擁戴是人臣居功之地耶馬曰曰廣定  
策時意在潞藩上曰潞王朕之叔父賢明可立二先生無傷國體內廷之爭不可向外人道也姜出馬從  
之復於朝堂相詬詈一時謂二相鬩朝良可怪也此間之陳撫軍軼符陳爲姜之門人馬之年家子去國  
諸大老高硯齋之老成練達張藐姑之大度清操徐虞求之休休廉潔劉念臺之淫昏獻姜李沾之搖尾求  
五朝元老贊襄中興庶幾無媿宗臣降清諸大老王鐸之奸媚害儲錢謙益之淫昏獻姜李沾之搖尾求  
生蔡奕琛之歡呼飲酩四大臣者皆亡國之材得之必敗所進者如此所退者若彼夫烏乎不敗 中旨  
用人自張靜涵爲大司農始當時臺省力爭皆言爭其事非爭其人也迨阮張之用絕無言者道消復長  
可見一班 阮圓海之意十七年間居草野祇欲一官其自署門曰無子一身輕有官萬事足當事或以  
責撫或以豫撫任之其願大足矣圓海原有小人之才且阿璫亦無實指持論太苛釀成奇禍不可謂非



君子之過阮之阿璫原爲枉案十七年田野斤斤以十七年合算一疏爲楊左之通王安呈秀之通忠賢同爲通內遂犯君子之忌若目以爲阿璫烏能免其反擊乎 瑤草薦阮疏以爲在廷諸臣無出其右爲阮任怨任咎無所不至阮旣得志遂欲奪其樞席瑤草遽以協理處之馬是小人中之君子阮是小人中之小人其他蔡奕琛陳盟又不如阮有爽朗之氣可與言大義者矣 顧瑞屏爲宗伯其所表揚數事皆有益於國體如尊惠代二廟旌靖難北變諸忠臣追謚傅馮二王俱有條理但非大變後所宜急行者耳景皇帝廟號稱代以其類唐代宗且代爲天子也唐諱世故易世爲代本朝自有世宗復有代宗非矣或襄或桓不爲過襲於典制亦協惠宗讓帝無遺議焉 烈皇帝之謚始爲思宗其德可思其功可思其死社稷也可思特以周思之後絕無此謚周思又非賢主故耳改爲毅宗毅是武宗微稱不宜復用當事以烈皇中絕故以武宗相擬但聖德懸殊終屬未安恭皇帝之改爲孝也何孝之有 楊斗樞首先糾崔呈秀其疏曰廠臣公而呈秀私廠臣廉而呈秀貪廠臣名而呈秀汙雖若阿璫而開糾璫之機者楊也久不得伸及爲副院疏請復三朝要典反自入其惡旣而投繯殉節失之小得之大蓋棺論定貶不勝褒然張楊又尙有別張僅編而刻楊則奸猾之尤 祁世培爲巡撫時有軍儲之裕八萬以二充史道陵軍儲六萬尙在鎮江庫中楊龍友監軍京口欲漏其賦而無辭遂爲城金山之說金山雖百丈之高七尺之堅於



江防何益耶前人節之後人靡之祁公苦心一旦填之江魚可爲切齒

阮圓海誓師江上衣素縹圖碧

玉見者叱爲梨園裝束錢謙益家妓爲妻者柳隱冠插雉羽戎服騎入國門如明妃出塞狀大兵大禮皆娼優排演之場欲國之不亡安可得哉 瑤草當國賄賂滋章千名百品受者既多餽者無以爲異門下

僧利根時時爲次餽獻之高下總憲李沾進一帶慮其不之重也囑利根稱爲至寶瑤草遂以進上亦囑中官贊其非常上每服以御朝 京師諺曰都督多似狗職方滿街走相公只愛錢皇帝但喫酒又有署

瑤草之門曰兩朝丞相此馬彼牛同爲畜道二黨元魁出劉入阮豈是仙宗復於兵部門署曰闖賊無門匹馬橫行天下元凶有耳一人直入中原朝事徵諸野太史陳風時事可知矣 南都之政幅員愈小則

官愈大郡縣愈少則官愈多財賦愈貧則官愈富斯之謂三反三反之政又烏乎不亡 妖僧大悲者非

真大悲乃吳僧大悲之行童從大悲往來錢謙益申紹芳家故妖僧折對時但知有青門牧齋而已其夜

叩洪武門自稱

烈皇帝聞人擒之以隸戎政張玉筍玉筍以爲此等妄男子但當速斃之若一經窮究

國體不無少損此大臣憂國之至誼而都人藉藉遂謂玉筍且杖殺 烈皇矣玉筍遂以屬三法司又變

而爲潞邸之弟自言受封郡公本朝烏得有郡公哉物怪人妖豈非亡國之祥 東宮事黃虎山左崑玉

及劉良佐各有爭疏獨虎山一揭爲孚簡明切若所云不殺則東宮爲假殺之則東宮爲真皇上雖以大



公至正之心恐臣下逢君之惡臣受先帝知遇之恩不敢不言舉朝悚然良佐兩朝倫典一疏答旨至言朕夫妻伯姪之間豈無天性九五真龍其辭卑以遜一至於此孰爲爲之劉澤清幼時曾習舉子業試時一拳毆殺一隸遂跳出應兵部將材舉天下第一其對客常曰我二十一投筆三十一登壇四十一裂土竟不知二十年中所作何事僅僅以富貴自誇小丈夫小丈夫高英吾幕府多才英吾跋扈飛揚之氣一變而爲忠烈固是千古奇男子渡河兩疏令人讀之慟哭何異諸葛出師二表耶英吾死前虎山死後兩賢雖相厄于生前當釋然于地下茅土之賞斯爲不媿二劉之死何足贖罪耶東宮自三月朔入都三日而元妃至又二日而詹有道遂冒稱恭皇帝有道者南都一皮傭耳聞空中有聲曰汝可至宮中尋子忽若爲物所憑遂直叩東華門口出妄言立斃杖下又有劉祥神附其身自稱玄天大帝者國之將亡必有妖孽斯其然乎斯其然乎廣陵之繁富冠絕海內高黃之爭端由此而起英吾之死諸鎮將尙欲爲興平伯報仇而虎山竟分兵圍揚州諸鎮將妻子俱在城中遂倒戈南向虜遂乘勢而下虎山死矣我不欲謂之非誤國也從逆一案竟與南運相終始大抵守節固是臣誼然君子不責人以死從逆者六等定罪最爲不爽降寇復降清且逞禍於本朝殺無赦降寇寇敗從之而西反顏事讐爲寇死守者殺無赦雖汙寇命乘間南逃者其罪猶可追寇未敗而先歸者情則最輕今在清在寇者國法旣不能行僅執



歸者而問罪焉索賄百端從逆之獄七推五合寬嚴之旨相間而出逆資告匱欲淫未飫遂殺光時亨周鍾以假口鍾負重名於天下既汙僞命萬惡皆歸時亨亦一名諫議力阻南遷烈皇帝及於難而身事仇賊市朝之戮在所當行但於元惡大憝之中獨執二人而誅之此其東林也復社也則二人不爲刀環冤怪乎且二人之死亦非當事之意但借二人以殺雷周耳雷介公周仲馭以三朝舊事力阻定策者也夫叛國降賊與擁立異議孰重孰輕若舍重殺輕則無辭故殺光周以行己之志掩人之口至若漏網之奸投身各鎮遂冒朝班不可勝計朝廷刑書爲執政肘腋之府哀哉 瑤草雖稱大貪其實不及周宜興十分之八一經誤國萬惡皆歸總之太子元妃兩獄罪不容死瑤草爲元妃出揭言童氏借有金哥玉哥一婦人不足惜然皇嗣正重嗚呼弘光帝之皇嗣固宜重矣烈皇帝之皇嗣豈不更重乎且童氏而真也婦人亦非臣子所敢稱如其僞也又何皇嗣之有高興平潰卒之渡江也鄭羽公矢石俱發殲者萬人布告大捷京口人口祝羽公爲之建祠立碑無所不至潰卒進退無所遂叛降清羽公少年奇貴氣揚揚自負名世自二十五日至五月七日無一日不捷轅門鼓角凱歌震天京口民牛酒爭犒羽公開藩江上初七日大宴軍中歡舞雜興江聲潏發清乘閒潛入金山寺初八夜大霧四塞清遂截流而渡僅一二百人使羽公以全力制之當使隻輪不返軍心一潰靖鹵一軍竟爲方士之船入滄波而不復徒使江南塗炭夷



爲左衽天耶天耶卽閩中有桑榆之收其誤國亦非淺鮮矣 馬本有意爲君子實廷臣激之走險當其  
出劉入阮之時賦詩曰蘇惠才名千古絕陽臺歡舞世間無若使同房不相妬也應快殺竇連波蓋以若  
蘭喻劉陽臺喻阮也尙見相臣之體 東平之母賈東平進侯時值八秩初度稱觴極一時之盛及東平  
之降而戮也賈遂流離道傍無以朝哺靖南之母徐卒於廬州送葬亦極一時之盛及靖南死節竟瘞其  
旁千古憑弔生何足榮死何足悲於二夫人見之矣

以書生談朝事其訛者十之三四故予刪其訛而存其是非全錄也



明季稗史彙編卷十六終



明季稗史彙編卷十七

客溪樵隱編

求野錄

永曆十二年

戊戌

正月詔以原督師兵部尙書程源爲禮部尙書都御史錢邦芑掌院事

賜故輔臣吳毓

貞范鑛等贈卹

鑛總督雲貴駐劄黔省時孫可望兩使李定國一使白文選將兵赴黔與鑛盟共申信義扶明之約鑛因從容爲定國文選開陳大義且曰萬一可望渝盟奈何定國曰可望扶明我則奉之若其渝盟我則殺之無難也迨後帝蹕安龍可望強橫自恣無人臣禮文選燕見鑛有慙色邦芑巡撫四川時文選與忠國公王祥盟于烏江邦芑爲執牛耳後可望襲遵義王祥走死文選晤邦芑亦汗愧不能仰視邦芑曰非公賣國乃他人賣公耳因時閒燕言帝在安龍主辱臣死兩人泣數行下也于是文選對邦芑折箭自誓必殺可望會定國自粵西入安龍擁帝而南居間調護文選之力居多可望疑其有陰謀奪其兵權幽之別室而鑛已憤卒莫有爲之解者可望脅程源爲兵部尙書時邦芑爲僧矣亦傳之至授詹事府正詹兩人遂密連行在舊臣皆交歡可望鎮將此輩朴魯武人酒酣耳熱輒指可望罵曰剝一張



賊皮又生一張賊皮耶源又乘間言于可望文選驍勇可用使功莫如使過文選以得還兵權迫交水戰勝文選馬寶雖爲功首而開導于平日與離間逆黨奮發忠義于臨時鑛源邦芭其功咸不可泯至是帝皆旌之時馬吉翔用事頗忌源芭之來源功名自許入朝卽發吉奸狀吉翔翔喉言者劾源曾臣事可望非純臣源發憤杜門不視事芭雖掌憲而督理晉王李定國之軍事者爲金維新秩左都御史位在芭上以故都御史待命閣下不發芭亦鬱鬱浮沉朝請而已毓貞與吉翔仇也鑛亦非吉翔所善贈卹皆不副望公論惜之

二月清師取湖南入武靖沅辰遂至貴陽安順巡撫冷孟飪死之

于是粵西之南太四川之川南川東皆失自可望敗走朝廷論功行賞誇官設吏率皆宴飲恬愉爭功

修怨絕不以國事爲念部官二人

一名金簡字禹藏人越人後死蠻中其一人惜失其姓名焉

次第進諫謂內患雖除外憂方棘伺

我者方鴈行頓刃待兩虎之一斃一傷以奮其勇而我酣歌于漏舟熟睡于積薪之上能旦夕否乎二王老于兵事者也胡亦泄泄如是定國疑其劾已遽于帝前激切陳訴帝擬杖二臣以謝之朝士交論共執不可移時未決失陷之報踵至定國始逡巡引罪二臣乃得免

四月蜀王劉文秀薨



文秀之追可望至貴陽也盡收其潰兵可三萬人練以備邊漸有成局矣而晉王不悅請召之還并召諸將之在邊者與從可望之南犯者論功罪爲分兵多寡之地是以邊警猝至兵失其將將不得兵迄于大潰文秀先以正月還滇抑鬱不自得每屏人語曰退狼進虎晉王必敗國至是病革上遺表曰我死國事可預知臣精兵三萬人皆在黎雅建越之間嘗窖金二十萬臣將郝承裔知之臣死之後若有倉猝至妻操盤匿以待臣子御駕豹以備警御請駕幸蜀以十三家之兵出營陝洛庶幾轉敗爲功也乃薨晉王惡之

七月晉王李定國秉黃鉞出師

令李承爵出左路壁黃草壩郝三昇出中路壁雞公背白文選出右路壁遵義之孫家壩自三方告急屢促定國師期輒云有待蓋隨妖人賈自明之惑也自明善幻術多大言言上帝助兵當以某日下爲木偶人數百皆長尺許執旛幢爲行陣久而無驗時已初秋矣定國怒而斬之而諱其事乃出兵帝授以黃鉞凡古命將之禮無不備先由中路出關索嶺後李承爵告急乃移師黃草壩有以兵事諫者曰守石關一夫之力能制勝久之踰石關營于炎遮河郝三昇壁雞公背之絕頂糧少運艱士不宿飽孫家壩孤懸滇蜀之表聲援不及識者俱以爲憂



閏月晉王李定國告炎遮河之捷

十二月晉王李定國兵潰於炎遮河

于是雞公背孫家壩之師俱大潰十五日帝出奔李定國與清師戰于炎遮河之右小勝遂不設備清師驟至壓其營而壘明日決戰南兵槍礮北兵弓矢日中不決忽大風北來金槍失火其地山茅野草烟焰障天北兵乘風馳射定國驚懼棄衆先奔遂大潰十三日變服還滇請帝出幸言戰守計者以爲書生不足聽也十四日帝大集諸臣共議所之蜀王劉文秀之將陳建等舉文秀遺表請幸蜀定國曰葭爾建昌何當十萬人之至不如南楚緩出粵西急入交趾難之者曰清兵乘勝踰黃草壩則臨沅廣南道路中斷且喪敗之後焉能整兵以迎方張之勢不可黔國公沐天波進議曰自迤西達緬甸其地糧糗可資出邊則荒遠無際萬一追勢稍緩據大理兩關之險猶不失爲蒙段也帝可其議明日駕遂發滇官兵男婦馬步從者數十萬人從古乘輿奔播未有苦此之衆者時定國以大兵殿後國勢既搖人心思叛爰能奇之子承業糾狄三賧等數人以驍卒千餘伏大寺中謀劫定國而北定國覘者知其謀以告十八日晡時定國遽率兵千人嚴隊西走承業等不敢追

永曆十三年己正月初四日帝至永昌



帝發滇時百官護從軍民泣隨者日行不過三十里其後兵士乏食恣取民間以至所在逃避御前供奉頓缺而庶僚貧病扈蹕離次不前者甚眾崎嶇過大理而定國亦至明日帝行定國請堅守大理許之後數日白文選以孫家壩南潰之兵至列陣下關眾尙萬餘定國以數百騎赴之文選憤涕叱定國曰人主以全國全師畀王一旦至此誰執其咎定國慚南向叩首曰帝幸赦臣謂文選曰上既赦我願身一死以贖前罪文選收涕謝曰王許幾人死敵何益王行矣定國遂行又數日清帥平西王吳三桂追文選及之戰于下關又戰于丁當山文選敗南走入滇

晉王李定國敗績于磨盤寨其軍走清師引還

先是定國聞文選敗遂渡潞江

卽古怒江

至磨盤山下

卽古羅泯山蠻云高麗貢

諸將他趨者皆會勝兵萬人分設三伏

以待之以泰安伯竇民望爲初伏廣甯侯高文貴爲二伏總兵王國爲三伏令曰須敵至三伏舉礮首尾橫擊之清師至山下得降人盧桂生言其計清師乃釋馬而步搜伏者望榛莽叢積中矢礮雨發民望不得已舉礮出戰三伏亦發礮趨下救之戰于山下短兵相接自辰迄午僵屍堵壘民望血戰不已中流矢死南兵氣沮猶踞險而守及聞定國走將士失望半夜散去定國當日坐山顛上聞信礮失序大驚曰兵敗矣遂先走既踰險問帝安在知者曰帝西行去去騰越已百里路界茶山緬甸之間定國



曰我焉從彼蹕而追者及之君臣俱死無益也姑他往以圖再舉遂棄帝而奔二十四日帝南行尙未知磨盤之潰野次未定而總兵楊武至言定國遠逃追者將及帝遂接淅而行時漸昏黑行數里失道途大谷中時距故處僅一望諸宮人竄失公私囊橐多爲楊武刼奪二十五日扈將孫崇雅刼擄殺害尤烈二十八日扈衛靳統武引其衆叛去帝以從臣多叛決意入緬遂出鐵壁關關外卽緬甸矣緬酋使使迎之自稱于國也曰金樓白象王蓋處則樓居出則乘象足不履地也進貢天朝則稱緬甸宣慰使臣某國人稱之則曰某某法此言而公道主人也至是奉迎具表如常儀復奏曰天王遠臨百蠻驚畏請從官以下勿佩戎器馬吉翔傳旨從之諸從臣皆諫曰猛虎所以威百獸者以有爪牙故也奈何自棄其防以啟戎心不聽是日帝至芒漠緬人執禮甚恭並進衣食食物華亭侯王維恭謀擁太子還入關由茶山出鶴麗不果

二月初一日帝至水次

緬人艤四舟以待帝一后及太子一司禮監李國泰一文安安馬吉翔一浮水東下卽大金沙江其南與海接古稱黑水此其一也從官無舟或水或陸聽其爲計先在騰越從官以下及婦寺數尙四千及至蠻漠止一千四百五十餘人至是僅六百四十六人而已十八日帝至井梗駐蹕因緬人奏宮室未



備故暫憩也二十日緬酋迎大臣議事帝遣馬吉翔弟雄飛及鄔昌琦往及至酋亦不見令通事傳話所問者皆神宗時事二人未諳中朝典故竟不能答緬人哂焉最後出神宗時勅書相示其寶文較今微異以爲僞又以黔國公沐天波征南將軍印驗之無異遂不言是役也行人不才遂開遠蠻以不恭之漸

三月黔國公沐天波等謀奉帝往就晉王李定國之師不果天波及綏甯伯蒲縷總兵王啟隆等謀奉帝往護撒孟良以就定國馬吉翔不從遂止是月也緬人戕我從官以下數百人通政司朱蘊金姜承德自縊死自定國率殘潰之衆假道入緬焚掠劫殺十里相望緬人遂大發兵防之與官軍忿怨益甚至是從官以下從陸者始知帝尙在井梗也竟抵緬都之亞哇城緬人以爲寇至發兵圍之被殺者過半餘安置遠方後竟無存焉

四月咸陽侯祁三昇帥師迎蹕

三昇上表迎帝緬人請勅止之諫者曰此我君臣出險之一時也不聽使丁調鼎及部司楊生芳往以勅書止之曰朕已航閩將軍善自爲計三昇捧勅痛哭以爲帝真航閩也遂撤師

五月初四日緬人以龍舟鼓樂迎帝次于耆梗



亞哇城下有地名者梗卽大鷓鴣城舊池也界大金沙大盈沙之間地饒而險緬人結草爲廬編竹爲城帝入居之百官咸聚草次初八日緬人來貢禮儀甚腆自潰衆四掠百蠻受荼毒之慘然未敢請人主也三昇奉勅撤師之後緬人以帝威令尙行恐一旦移蹕紆禍無計故迎帝優奉以爲緩急自救之策且潛阻內外聲聞不通而帝益困矣

八月十五日緬酋脅黔國公沐天波執臣禮以見學士楊在行人任國璽疏劾之不報

緬俗八月十五日羣蠻贊見酋張嘉會以享之至是詔天波至脅令從緬制白衣椎髻跣足領諸海郡及棘夷酋長而拜以誇示遠近天波歸而自白且曰我爲皇上屈也在等以天波貪生辱國疏劾之留中不發

九月緬人進禾帝以廩給從官

永曆十四年庚子鞏昌王白文選帥師迎蹕次亞哇城不克而還文選自大理之敗間道渡隴川潞江踵帝之後以帝且入亞哇城矣二月中臨江不知帝之所在還兵南甸者久之至是招集流亡有精兵萬餘人是年七月復至江潞諭緬人假道迎帝不許遂攻之垂克矣緬酋懼求勅止之文選不奉詔謂使者曰前者祁將軍來詔云已航閩若前詔爲真則今勅爲贗使令勅爲真則航閩之後何自而來君非臣



何以威衆臣非君何以使人蠻人不足信也使者曰諾旣去不復至緬人守益堅文選望鵠鵠城痛哭引兵去

九月帝椎御寶以頒從官之不能舉火者

先是楊武孫崇雅之叛乘輜重散亡殆盡至沙漠惟中宮餘金盆銀盃各一又爲與夫盜逃而庶僚之貧者饑寒藍縷鳩鵠不足喻也馬吉翔李國泰以語激帝怒擲皇帝之寶令碎之以濟從臣與驥李國用叩頭不敢奉詔吉翔國泰竟鑿以分餉焉時吉翔等擁貲自贍且縱博酣飲高歌達旦安寢咫尺不顧也更值蠻人來往無尊卑少長皆短衣岸幘與蠻婦坐地交易雜以謔笑中國紀綱蕩然蠻人視之齒冷矣

永曆十五年

辛丑

二月鞏昌王白文選會晉王李定國之師大敗緬兵於錫波

先是定國入緬中餘衆不過千許檄調諸將皆以磨盤山之敗曰實不相附遂引而南至順蒙界外界地而食勢實窘迫會慶國公賀九儀以全師自廣南渡江龍江赴之精兵萬人攻孟良拔其城池饒魚稻諸將稍集軍聲復振久之九儀以文選先居木邦之南甸相去二千里不相聞也迨攻緬兵還以不克爲恥知定國取孟良并有九儀之衆乃爲書稍責以大義定國遂全師而西會文選于半途相與刑



牲歃血誓必克緬緬人知之拔其豪邊牙鮮邊牙樛爲大將集兵十五萬人遇於錫波江上臨戰巨象千餘夾以槍礮陣橫二十里鳴鼓震天大噪而進二王之兵不及什一且戎器耗失所操惟長刀手槊白楮而已定國警衆橫擊之大敗緬兵僵死萬計殺其將邊牙樛而邊牙鮮猶收餘衆柵大榕樹林中蔭可百里其夕鳴鼓竟夜如列陣比曉竟走還無一存者二王遂渡錫波江臨大金沙江以壅緬城

四月晉王李定國等迎蹕不果引兵還至亦渺賴山師大潰

先是定國等兵宗大金沙江諭緬人假道入覲并責其象馬行糧爲入邊之計緬人不聽盡燒其江船沿江據險設礮以守月餘定國等以糧少氣阻緬中耆老曰從此而北至鬼窟山有大芭蕉林伐之作筏可渡既渡尙有大居江阻之地饒材木居民數百家燒鑛冶鐵舟可立具也定國從之深蕉爲梁泛濟伐材設廠造舟焉未幾緬人斷浮橋僞廠所而軍饑疫作死亡相繼時軍行皆挈眷以行老幼累累爲累不堪不得已爲還軍之策或曰緬中瘴癘夏秋爲甚加以千里無烟人何以濟孟良不可得而返矣省地民風沙擺古者在西南海上行月餘可至其地高涼其產魚稻盍往諸定國等已從之行至亦渺賴山下其山互數百里登峯一覽竟其西面大海矣是夕文選裨將趙得勝憾其擁衆白文選還且曰王毋爲賀九儀之續文選入山據險自保數日後定國不得已引餘兵三千問道還孟良斷後文選



入邊遂迎降于清師

五月緬人弑其酋弟爲緬王

自潰兵躡入緬地其民罹兵火之厄死者幾半國人愾其酋曰王迎帝故帝階之爲禍者王也酋曰我迎帝不迎賊也賊禍我帝不禍我奈何以是爲怨乎於是上下相猜忌今定國等來攻酋之弟守景邁景線引蠻衆五萬人入援并大出金帛以犒其衆諸蠻奮發凡爲戰守其略一出于酋之弟國人愛之遂歸心焉是月二十三日縛酋置衡輿中投之江立其弟爲王遣弟來告且索金賀不報

六月緬人招大小從臣盡殺之并圍行在漢人多遭其禍

前年八月黔國公沐天波屈拜緬酋其後外來兵迎緬人大恐又札迎天波乞詔諭止之且許資象馬糧糗相助入邊而外兵飄忽既進速退是以蠻益輕我及二王亦渺賴山之潰蠻尤肆志然尙未敢爲逆也時清帥平西王吳三桂旣留鎮其固山楊坤謀劾黔國公世守滇土以爲磐石之計必入緬取帝以獻乃可遂上疏固山嚴檄緬酋令獻帝自効緬人于是謀殺從官以孤帝勢使人來曰賊衆潰矣緬土安矣請天使大臣詛盟以相信也天波欲辭馬吉翔李國泰曰蠻人敬鬼重誓可往也乃行日向午緬人以兵三千圍行在索漢無少長貴賤皆飲刃而死有竄入帝所伏匿者亦搜而殺之宮中兩貴人



及命婦自縊死者相望伏屍枕藉良久緬人護駕官大呼曰毋得驚害老皇帝亂始定移帝他所緬僧使其徒來進食數日帝乃得進是日赴硯水之會死知名者松茲王王某國公沐天波文安侯馬吉翔都督馬雄飛綏甯伯蒲繯華亭侯王維恭侍郎蔡士廉楊在御史任國璽鄔昌琦部司楊生芳鄧居詔學錄潘潢典簿齊應選總兵魏豹王起隆內臣李國泰等二十四人其自縊行宮者吉王慈烱王妃張氏宗臣議漆闕臣王國璽錦衣衛官趙鳴鑑王大雄等二十三人嗚呼行在諸臣雖賢不肖間殊其崎嶇守國則一至是同爲一邱之貉而帝已爲三桂几上肉矣緬人何足恨耶明日帝驚悸致病緬人恐帝又不測無以致辭於三桂乃迅潔行宮迎帝復入居之復貢衣被錦布等物

十二月初三日清帥平西王吳三桂帥師臨江緬人執帝以獻

三桂既以兵臨緬城大江緬人奉金盤一十六枚置饌以迎卽日緬蠻來給帝曰李定國兵又至矣馬步軍數萬列江濟索帝甚急語未竟蠻人遂昇帝所坐以行後宮號哭震天步從五里外乘舟渡河舟大不及陸三桂使將負帝登岸帝問曰卿爲誰對曰臣平西王前鋒章京高得捷也帝默然初九日清帥平西王吳三桂以師擁帝還滇帝旣還滇三桂遂以捷聞

晉王李定國薨



緬自萬厯中絕貢且據有木邦麓川及八百媳婦之地雄視西南然與古刺暹羅兩國爲世讐帝自蠻漢舟行從官雲散有入古刺者馬九功江國泰等有入暹羅絕愛之妻以女如珍之已以女爲定國計妃于是問道通慰勸謀連兵伐緬九功等亦爲古刺招到潰兵得三千人亦到書致定國相與犄角兩國之兵將發會三桂繫帝旋滇謀者以告定國聞之躡踊號哭自擲于地者百計不食三日自表于上帝以祈死憤懣致病七日而薨暹羅古刺之師失望而返


永歷十六年壬寅四月二十五日吳三桂以帛進帝所帝遂崩皇太子及皇姪殉之明亡

時在寓中忽大風霾黃霧彌天雷電交作空中有二龍蜿蜒而逝滇民無不悲悼焉 是年三桂卽進爵爲親王益甲萬餘人移家口于漢中美厥功也其後緬蠻至者云晉王李守國所葬地至今春草不生蠻人過之輒跪拜而去















明季稗史彙編卷十八

也是錄序

嗚呼國運之興衰成敗天乎人也人乎天也僕每讀史至國破君亡之際未嘗不掩卷歎歎而不忍多讀者嗟乎天步之艱如此人謀之失如彼天人俱失何以爲國嗚呼痛哉前明肇基江左繼定燕都永洪之蘊釀其人宣嘉之昌隆其運隆萬之裕大其休吁可謂盛矣既而流寇橫噬金甌墮地君死社稷萬古增光一時之忠臣烈婦死國殉夫四海之志士遺民勤王舉義破巢殞首死亡不顧不可謂非德澤之在人者深而忠義之天常難泯焉耳繼而聖安不守于南京思文復潰于閩越制閩諸臣援立先帝意以成旅未始不可興少康白水未始不可起光武帝立一日明祀亦藉延一日者諸臣不敢負先帝之心卽諸臣不敢負太祖養士之心也奈何兵皆烏合將盡叛臣流離行間跋涉險阻成棟之師旣覆騰蛟之功不成翠華奔播于巖疆黃屋飄零于瘴雨無斟鄩之餘燼可然無朔方之義師可召無海島之戰艦可航帝至是雖有大可爲之才亦英雄無用武之地矣奈之何哉奈之何哉南甯迎駕僅同催汜之謀可望任僕罪可勝誅乎幸而晉王以喪敗之餘計無所出乘虛奪駕遂蹕雲南交水之犯省會之攻岌岌乎且剗刃于二宮矣一敗塗地狼狽降



清示瓊獻圖兵端遂啟漁人之利

清實收之況乎定國既自撤其藩籬維新且日弄其威福三路外攻逆黨內應晉王方倉皇于舟中之敵國奚暇整戈禦敵也鑒輿西邁奔走三宣託食緬蠻有如寄寓方且文恬武嬉苟延歲月不思出險天波之策不行吉翔之恣日甚卒之衆叛親離內外三絕文武屠滅誰與圖存

清兵出塞帝遂北轅逆賊進弑明之宗祀忽焉遂斬嗚呼嶺嶠之遺聞猶載輟耕之錄茲焉緬甸之遷播難徵文獻之存幸有從蹕故臣鄧凱一之錄焉于以收什一于百千而忠奸罪狀自爾昭然僕不揣疎謬竊欲博採遺聞以續明紀仰以帝立于廣其始事也終于緬其終事也自古無不亡之國獨惜帝以仁柔之資際不可爲之日宗社板蕩豺虎縱橫上係于母后高年弗忍引決而懷愍再辱殞身賊手嗚呼人與天也然天絕明于蠻而不絕明于史則斯人斯錄之存未始非天意焉是錄得之鄉閭好古者之家亟請而繕錄一帖初讀而抑憤續讀而漣而天命既衰人謀復否嗚呼痛哉因序而藏之以俟後世之司馬遷班固其人者桐山樵隱冥鴻子元益氏雪涕敬書



明季稗史彙編卷十八

自非逸史編

也是錄

永曆十二年戊戌十二月十五日帝自滇畿起行

永曆十三年己亥正月初四日帝至永昌府

閏正月十五日永昌府起行

十八日至騰越五日內至緬

自永昌一路入緬文武官四百餘員隨從之役三千餘人其時護駕者則靳統

武也

二十四日甫下營而未炊忽揚武兵到傳言後面滿兵隨到各營兵士俱忙亂奔散馬吉翔與司禮李宗遺催駕卽行遂踉蹌而奔君臣父子夫婦兒女不復相顧兵馬亂處火光竟天各營行囊皆被搶劫上之貴人宮女俱爲亂兵所掠

二十五日至鐵壁關孫崇雅叛肆掠行在輜重凡文武追扈稍後者悉爲所擄  
二十六日靳統武昇帝由斜谷而去



二十八日帝入緬關緬人要請各從臣去弓矢刀杖勿驚擾緬人衆不從馬吉翔傳旨命悉去戎備衆乃遵行是日抵芒漠緬人迎貢亦頗循禮

二十九日黔國公沐天波與皇親王維恭與璽李崇貴等計曰我等須引東宮入茶山既可在外調度各營且皇上入緬亦可遙爲聲援或不至受困皇后不許

三十日起行

二月初一日帝至大金沙江僅得四舟止可供上用餘各自買舟走小河又訪問得陸行亦可達彼岸卽有從陸者計諸臣隨行之衆于騰越起行尙不下四千此時簡閱止一千四百七十八人從舟行者六百四十六人餘者從陸

初四日馬吉翔李國泰不候太后東宮卽命放舟太后大怒曰連我也不顧欲陷皇帝於不孝耶衆乃止初六日長行

十八日至井梗緬人爲阻每日止行二三十里

二十日緬人來報我兵四集請敕阻之是晚諸臣悉會御舟前議誰可往衆各推諉惟鄭凱與行人任國璽請行馬吉翔恐二臣暴其過惡因弘謂緬人曰此二人無家去則不還矣旋復報各營已撤去遂止



不行

二十四日緬酋來邀大臣過河議事上命馬雄飛鄔昌往至則緬酋不出惟令通事傳語所問皆神宗時事二臣不能答緬人哂之因所賫敕書與神宗時所賜御寶相去微別以爲僞又出黔國公征南將軍印相對乃信蓋緬人於神宗萬厯二十二年因亂來朝請救朝廷却之是年遂與緬絕出此蓋以示前代未嘗受恩也時亡國出奔情境體貌大有非臣子所忍言者矣

三月黔國公沐天波與綏甯伯蒲縷總兵王啟隆邀馬吉翔等集大樹下天波曰緬酋遇我日不如前可卽此走護臘撒孟艮諸處尙可圖存吉翔曰如此我不能復與官家事將皇上三宮交諸公爲計可耳衆默然遂散時白文選率兵於二月初五日已抵緬亞哇迎駕相去不過六十里寂無知者然皆不探聽虛實惟焚掠爲事而已

十七日起陸諸臣至亞哇城對河屯駐緬酋疑曰此等非避亂乃是陰圖我國耳發兵圍之傷者甚衆因分居各村總兵潘世榮降于緬通政寺朱蘊金中軍姜成德自縊死

四月芒漠來報有我兵祁信者來迎駕請救止之吉翔卽請以錦衣衛丁調鼎考功司楊生芳往至五月望後始還祁兵得敕不進吉翔復與緬官之把隘者敕一道云朕已航閩後有一切兵來都與我殺了



五月初一日緬酋遣都官備龍舟鼓樂來迎

初五日上去井梗

初七日至亞哇城對河安扎

初八日至者梗卽後陸諸臣所駐舊地也先建草房十間請上入居之外以竹爲城每日守護者百餘卒其諸文武自備竹木結宇而居

初九日緬酋遣貢甚厚上亦優答之時緬婦自相貿易雜踏如市諸臣恬然以爲無事屏去禮貌皆短衣跣足闌入緬婦貿易隊中踞地喧笑呼盧縱酒雖大僚無不然者其通事爲大理人私語人曰前者入關若不棄兵器緬王猶備遠近今又廢盡中國禮法異時不知何所終也

八月十三日緬酋來招黔國公沐天波渡河并索禮物蓋緬酋以中秋日各蠻皆貢獻故責幣帛以彰聲勢天波至脇令椎髻跣足以緬禮見天波不得已而從之歸而泣告衆曰我所屈者爲保全皇上計也若使執抗不知將作何狀衆且不以我爲罪府平于是禮部楊在行人任國璽皆疏劾之留中不發是月上患腿瘡旦夕呻吟而諸臣日以酣歌縱博爲樂中秋之夕馬吉翔李國泰呼黎園黎應祥者演戲應祥泣曰行宮在邇上體不安且此時何時而行此忍心之事乎雖死不敢奉命吉翔等大怒令痛鞭



之時蒲繼所居亦密邇西內繼大開博肆叫呼無忌上聞而怒令毀其居繼仍如故

九月十九日緬人進新穀上命給從臣之窘迫者馬吉翔徇私散給鄧凱見之大罵吉翔于行殿吉翔旗鼓吳承爵摔凱而仆傷其足遂不能行

永歷十四年

庚子

七月緬人復招黔國公沐天波渡河天波力辭緬使曰此行不似從前可冠帶而行至則

遇之有加禮始知各營將臨緬城晉王李定國率兵迎駕有疏云前後具本三十餘道未知曾達御覽否今與緬定約議於何處迎鑾伏候指示而諸臣在緬燕雀自安全無以出險爲念者緬營索敕朦朧而去外兵久候音問俱絕遂拔營去後緬人來言此輩全無實心爲主惟向各邨焚掠亦不計議恢復方略或索本圖象隻糧草相助而行乃惟播惡於無辜不邀天之庇也時馬吉翔楊在以潘璜能通緬語囑其扶鸞曰仙告我矣某處有兵來迎當以某日至岡上以邀賞取悅又恐定國至衆將疾攻其惡不得自恣故矯旨令勿入緬而一切惟事牢籠諸臣好醜蓋難枚舉至文武陞遷仍由權賄國事至此尙可問乎

九月馬吉翔奏有大臣三日不舉火者上怒令典璽太監李國用碎皇帝之寶以濟之國用叩頭曰臣萬死不奉詔旣而馬吉翔李國泰竟鑿以散各臣吉翔弟雄飛專恣尤甚託者必先通雄飛乃得於是行



人在國璽纂宋末諸奸行事彙成一帖進之吉翔聞恨之不置進御殿上方覽閱次日國泰竊袖之出  
永曆十五年辛丑二月二十八日鞏昌王白文選密遣緬人賁疏至云臣不敢速進者恐驚萬乘欲其扈送出關爲上策耳候卽賜璽書以決進止後五六日文選率兵造浮橋爲迎蹕計相去行在僅六七十里  
緬人復斷其橋文選候話不得遂撤營去

三月有款盟謀劫東宮斬關以出者兼殺吉翔國泰以弭後患事洩坐以結盟投緬密旨捕黔國公沐天波家人李姓王啟隆家人何愛各付本主殺之

五月道臣任國璽有時事三不可解之疏意以禍在然眉急圖出險上令國璽以出險策條奏馬吉翔李國泰扼之不可

二十三日緬蠻弑其兄而篡其位遣官索賀不從

七月十六日緬人來邀當事大臣渡河議事皆辭不行

十八日緬人又遣官至曰此行無他我王子慮衆立心不善請飲咒水後令諸君皆得自便貿易生計耳  
否則我國安能久奉芻粟耶

十九日馬吉翔李國泰脇粟俱行止留年老內監二二人侍上鄧凱以足疾得免已而緬人以兵三千圍



駐蹕處大呼曰爾大臣可俱出飲咒水有不出者亂槍攢刺之諸臣猶豫既無寸兵可以相持又慮上與宮闈有失延久何可爲計遂悉出出則以三十人縛一人駢殺之上聞與中宮皆欲自縊內侍之僅存者奏曰上死固當其如國母年高何且旣亡社稷又棄太后恐貽後世之譏盍姑緩以俟天命上遂止已而緬兵入營搜財帛宮中上貴人自縊宮女及諸臣妻女縊於樹者纍纍如瓜果然上與太后以下二十五人同聚一小屋中驚皇無措已而通事引緬官來護守惟曰不可傷皇上與沐國公時遍地橫屍緬官請上移沐天波所居之室大小止存三百四十餘人聚於一樓哭聲聞於一二里外寺僧私以粗糲進賴以得飽且知諸臣之飲咒水俱爲所殺而黔國公沐天波及王昇魏豹王盛隆等各擊傷緬兵數人而死死亦倍慘赴緬飲咒水被殺者共四十二員爲松滋王某黔國公沐天波馬吉翔馬雄飛蒲縷王維恭鄧士廉鄧居語楊在鄔昌琦任國璽王祖望裴廷模楊生芳郭璘潘璜齊應選魏豹王自金安朝桂王昇陳謙王盛隆龔勳吳承爵張伯宗任子信張拱極劉相宋宗宰宋國柱劉廣益兄弟丁調鼎李國泰李茂芳楊宗華李崇貴又有周虞沈楊諸內監皆同時畢命焉

二十一日緬人仍請上還舊居處

二十五日進鋪陳銀布等物且致詞曰我小邦王子實無傷犯諸臣之心因各營兵殺戮邨民民恐實甚



乃甘心於諸臣以快其忿也幸無介介於小邦上頷之而已上病所存大小男女無不病者死亡相繼諸臣送之由陸路而去者約離緬半月程住四五日皆爲緬人所屠其子身無家累者約離緬一月程方住於一小國中緬人以兵洗之而擒其王以歸蓋從上入緬者殘無噍類矣

十二月初二日未時有緬官二王人來謁云此地不便於居處請移他所爾國兵近我城將發兵取道於此恐驚官家耳語未畢而緬人舁上所坐杌子卽行太后大哭隨之繼有二肩輿舁太后中宮以行大小男女步行五里外渡河至岸已昏黑不知所由爲何徑三鼓後至營始知爲清師也

初四日上入清師大營

初六日上復轉啞哇城

初九日上長發歸滇

永曆十六年壬寅三月十三日上入滇城

四月初四日命鄧凱帶小子出外

初八日上被難 緬兵爲害吉王同妃自縊及總兵王華宇熊維賢與馬寶二官錦衣趙明晃王大雄王國相吳承胤朱文魁吳千戶鄭文遠李旣白凌雲嚴藤子尹襄俱千戶有內官陳德遠等十八人同時



自縊婦女則劉<sup>缺</sup>二貴人松滋王妃皇親王國璽妃及諸臣妻女不下百五十人又莫承爵齊環王盛隆姜成德等諸臣之妻赴死尤烈其陸行諸巨氓王朱蘊金姜世德馬九功潘世榮危禮存向鼎忠溫如珍劉九臯等亦就義而未亂時以病卒者潘其齊環米仲王偉瑞昌王劉璽忠徐鳳翥并內臣數人其諸臣子女之死者不及悉記也吁酷矣



明季稗史彙編卷十八終



明季稗史彙編卷十九

江南聞見錄

乙酉五月初十日連日警報疊至是日趙忻城有演放大礮之示不果夜分北風甚急北兵渡江由七里港進迫神京時日將暝宏光計無所出召內臣韓贊周問策韓云此番勢既洶湧我兵單力弱守和無一可者不若御駕親征濟則可以保社稷不濟亦可以全身上是其議卽刻束裝跨鞍時將二鼓從通濟門出攜帶惟太后至一妃及內相多人文武絕少或云往武林或云往雲貴或云往太平紛傳不一是舉旬日間噴有人言未嘗不叱其僞至是果然知其作計已非一日究所從來則馬士英實始之也○十一日昧爽閔傳上已出城京中文武一時隱遁有不去者將門首封示盡行洗去男女蜂擁出門扶老攜幼者不可勝數間有斌少媚艾金蓮躑躅跬步難行見者心惻旣出而復十有八九以路多兵也已而閉門欲返不得者十居二三莫竟其終矣○辰刻忻城出示安民有大駕播遷本府死守此土已致 大清帥自有裁酌爾民不必驚惶徙避等語○副院楊維垣硃示云天子出巡乃古今暫避常理本院惟有盡忠殉國一死等語已卽自經○各門旣閉百姓數百人往中城獄擁太子上馬從西華門入宮尙未櫛沐園中人悉自出奸悍兵民乘機入大內搶奪金帛甚多大半爲強者所得太子雖爲百姓擁入文武元老無一至



者百姓遂擒相國王鐸禁中城拔鬚髮極其毆打旋入其家搶刦一空○兩月以來天氣陰霾悽慘日色罕見是日天清日朗晝夜明朗○圖遷雖馬士英主之其實宏光埋怨士英勸其卽位今值多難仍著士英設法故以出奔之說進且士英之貲浮于宏光士英之欲生亦甚於宏光宏光存士英不能獨去追旣出置宏光于靖藩黃得功營士英乃揚鞭挾貲兵從擁護竟作天外冥鴻矣先是馬士英調川兵三千爲出奔捍衛計去而不盡者若干人作祟於城方勇協力一心竟夜巡警兵乃不敢放肆秦淮兩岸燈光燭天達旦如晝○十二日早開太平門驅川兵出走門外之民逐殺之傷一二十人銃礮之聲自朝至午少息川兵無復存者○城內柵門盤詰甚嚴獲奸細及馬士英中軍共八人忻城立斬之○阮大鍼家被搶馮可宗陳盟王一心周之璵馮夢禎蔣鳴玉張元始姚士衡沈應旦吳希哲陸康稷申緒葛含馨羅志儒黃哀赤陳濟生申縝芳吳适顧繹詒陶廷煜俱去張捷高倬張有譽俱死○午後太子傳示告示用硃標坐日空字黃紙書之曰泣予先皇帝丕承大鼎克壯前猷凡諸臣庶同苦播著中外罔不宜知胡天不弔慘遭奇禍凡有血氣裂眚痛泣予小子分宜殉國思以君父大仇不共戴天皇祖基業血汗非易忍恥奔避圖雪國恥予惟先帝之哀奔投南都實欲哭陳大義身先士卒不意巨奸蔽障致櫻桎梏予雖幽城獄每念先帝無一日不三痛三絕也如今者聞兵遠避先爲民望其如高皇帝之陵寢億萬姓之性命何



泣予小子將歷請勳舊文武諸先生念予高皇帝三百年之鴻烈先皇帝十七載之舊恩助予振旅扶此顛沛何期父老人民圍抱出獄擁入皇宮予見宮殿披靡踰踰祖業不勝悲涕奈諸父老焉知予負重冤豈稱尊面南之日乎謹此布告在京文武勳舊諸先生士庶人等念此痛懷勿惜會議予當恭聽并抒皇猷勿以前日有不識予之嫌惜爾經綸之兆也不念舊惡垂諸訓典非敢云赦惟願卽臨匡予不逮謹此十三日早開通濟門放勇衛營兵入城中乘間而出者甚衆柵禁稍寬店肆頗有開張者文武臣僚集中府會議安民城守各有告示不等然俱不及立新主事太子敕封中城獄神蕭王周龍匣差官奉敕二人執金棍前行至禁中開讀兵馬司素服迎之以其所居之室改爲殿宇傍晚有雲間貢生徐瑜蕭某謁忻城面陳太子宜卽位忻城立叱斬之○十四日北兵至城忻城縋出見于營議進城事保國朱鎮遠顧駙馬齊等俱在豫王問爾等勳戚爲太祖爲成祖一一問答有差豫王喜忻城城守有功加位興國公手攜立保國有賜金鎧銀鞍馬貂裘八寶達帽等物進牛酒席地共飲問太子何在忻城次日送至營李喬攜進大清告示徧掛通衢民心稍定告示二道大清國攝政叔父王令旨曉諭河南南京浙江江西湖廣等處文武官員軍民人等知道爾南方諸臣當明朝崇禎皇帝遭難陵闕焚毀國破家亡不遺一兵不發一矢不見流賊一面如虎藏穴其罪一也及我兵進剿流賊西奔爾南方尙未知京師確信又無遺詔



擅立福王其罪二也流賊爲爾大仇不思征討而諸將各自擁衆擾害良民自生反側以啟兵端其罪三也惟此三罪天下所共憤王法所不赦予是以恭承天命爰整六師問罪征討凡各處文武官員率先以城池地方投順者論功大小各陞一級梗命不服者本身受戮妻子爲俘倘福王悔悟前非自投軍前當釋其前罪與明朝諸王一體優待其福王親信諸臣早知改過歸誠亦論功次大小檄到之處民人毋得驚惶奔竄農商照常安業城市秋毫無犯鄉村安堵如故但所用糧料草束俱須預備運送軍前兵部作速發牌出令各處官員軍民人等及早互相傳說毋得遲延致稽軍務特茲曉諭咸使聞知順治二年五月日 欽命定國大將軍豫王令旨諭南京等處文武官員軍民人等知悉余奉聖旨統領大兵勘定禍亂順者招撫逆者剿除大兵到處兵不血刃官員實捧敕印來降不次優擢者有之照舊供職者有之民間秋毫無犯產業安堵如故昨大兵至維揚城內官員軍民攬城固守予痛惜民命不忍加兵先將禍福諄諄曉諭遲延數日官員終于抗命然後攻城屠戮妻子爲俘是豈余之本懷蓋不得已而行之嗣後大兵到處官員軍民抗拒不降維揚可鑒夫人皆天地所生逆命之徒欲死則宜自盡何得貽累生靈本朝承天之眷遇戰必勝攻城必克諒爾等聞之熟矣雖然耀德必觀兵仁義招撫天時人事洞然可鑒今福王僭稱尊號沈湎酒色信任僉壬生民日瘁文臣弄權只知作惡納賄武臣要君惟思假威跋扈上下離



心生民塗炭極矣予念至此感歎不已故奉天伐罪救民水火合行曉諭○十五日太子出洪武門入營豫王敬禮甚厚留之營中衣以錦紫袍云其真假不能辨須帶歸于北以明之百官是日始朝豫王十六日百官遞職名到營參謁朝賀如蜩時將午禮部尙書錢謙益引大清官二員兵使五百餘騎從洪武門入謙益向帝闡四拜因下淚北兵問故謙益曰我痛惜太祖高皇帝三百年之王業一旦廢墜受國深恩能不痛心北兵歎息候開正陽門進索鎖匙不得引進東長安門盤九庫錢糧官兵俱住內忻城遂將搶掠大內兵丁八人遊于街市傳令百姓設香案俱用黃紙書大清國皇帝萬歲萬歲并風調雨順國泰民安等字又大書順民二字粘於門午後撥達兵五十名守通濟洪武聚寶三門劉良佐兵爲崇南門外百姓訴於豫王發北兵三百趕殺立刻降之○十七日文武各官爭趨朝賀職名紅揭堆至五尺者十數堆凡生監候選候考無不至豫王不見○十八日文武官員及鄉保方長人等送幣帛牲醴米麵熟食茶葉糖酒果烟等物於營絡繹塞道舉國若狂○忻城約各勛喚戲十五班進營開宴逐齣點演正酣暢間塘報各鎮兵至忻城遞報于王閱之漠然又點戲四五齣方撤席發兵迎敵卽刻就行○鰲鱗內相進鰲魚二大籬用龍旗龍袱卑禮小心豫王不受○十九日達兵八人搶小物于神樂觀道士稟王命縛斬之差御史王懷少卿黃家鼐御史劉光斗等往淮安甯國蘇松等處討取降順冊○達兵搜不朝賀現任



官陳盟等家有收其家屬者豫王出示令前日入內搶刦金銀緞疋腰刀等物自行交還武英殿或江甯縣免其前罪仍令總甲逐戶搜有藏匿者梟示○二十日令文武各官將印信劄付盡數交納武英殿聽換給又令大開南門放出城三日忻城剃頭起是後徐魏國柳安遠徐永康湯靈璧李臨淮等以漸俱削訖文官惟李喬孫渠葉應祖等實爲出家適合時尙○二十一日合城百姓旣苦搬移又恐五旗兵至雖免殺戮惴惴不甯三日之間路不能行而露宿與暴觀城市者不可勝記○二十二日豫王念史閣部忠烈可嘉令建祠坊旌揚薦馨仍令禮部尙書優恤其家眷以示異數○二十三日中書龔廷祥義不臣服投武定橋河死浮尸二日○二十四日豫王進城穿紅錦箭衣乘馬入洪武門官員紅素服不等分班兩旁迎賀預一日禮部紅榜徧粘城市故無一不至○二十五日尋到宏光暫停天界寺豫王往接昇以無幔小轎首蒙包頭身被藍布衣以油扇掩面百姓唾罵太后及妃俱隨後從正陽門宏光易馬衣一把搥乘馬至靈璧侯家設宴太子上坐宏光昭坐豫王穆坐從容向宏光曰不爲先帝報仇反將太子監禁此是何意宏光穆然又曰我大兵尙在揚州爲何棄了陵寢土地先去以失民望自主之耶抑左右教之耶宏光答語支吾汗出浹背餘言尙多不能盡述喚樂戶二十八人歌唱侑酒席散發還仍禁○二十日內著教師開戲一本以便供應又黃虎山兵約萬餘人俱自薙髮隨達兵進城向豫王求用不收止收其衣



甲兵刃○二十六日點印官及二十四衙門內相三人到遲要打百棍沒其家告道乃止○二十七日發兵三千往蘇杭催討降冊此時尙未知楊文驄殺黃家鼐等官也○二十八日豫王出南門報恩寺拈香觀者如堵黃端伯抗節罵詈左右欲兵之豫王不忍加刑忻城送之獄○傳清朝八政一曰求賢二曰薄稅三曰定刑四曰除奸五曰銷兵六曰隨俗七曰逐僧八曰均田互相傳說尙無頒示○二十九日中南西三城百姓幸免于遷居歸功忻城踵門言謝忻城勸令三城釀金犒兵以絕窺伺百姓從之



明季碑史彙編卷十九終



明季稗史彙編卷二十

前行人司行人瞿其美記

粵游見聞

唐王次閩

高帝之子封國河南省南陽府王諱聿鍵因累囚鳳陽高牆國變淮撫路振飛護之出弘光元年某月保國公朱國弼劾舊淮撫路振飛賊信日逼先縱獄囚天潢游至兵拒河上皇上扁舟不納入城且云鳳陽有天子氣蓋爲王也鄭鴻逵鎮守京口有武弁王姓者以三千金賂職方司王麗青欲得京口王利其賄遂調鴻逵鎮山東鄭失職因怏怏而清兵又屠揚州犯瓜洲鴻逵聞風先遁挾王至閩一云鴻逵曾與清兵相拒于京口清將張天祿史可法愛將也鴻逵陣傷其一目故清從天甯州渡江鄭遂棄王入閩

總兵方國安圍金華府

國安浙人左良玉標官也左夢庚投清兵南奔與朱大興有隙回兵至婺園攻匝月殺掠甚慘至閩六月二十五日方解



桂王在梧州

王神宗之子也萬厯末年就國衡州崇禎十七年張獻忠破衡州長世子次王子俱爲賊害王僅與第三子安仁王及妃王氏馳永州第四子永明王卽今上也爲賊所囚宣國公焦璉時爲湖南列校斬守者負之西馳追至永州與王會是時楚地殘破粵中稍安七月壬辰惠桂二王駐廣西十一月戊子桂王薨諡曰端弘光元年四月有旨召安仁永明二王赴近畿六月巡撫瞿式耜梧州上任遂同太妃王氏聯舟東下王撫軍值靖江之難家屬得王母覆庇之力永明王正位葬王于梧州之陵是爲興陵廟號端皇帝

魯王監國于會稽

王諱以海崇禎十一年清人犯山東劉澤清鎮守兗州清人賂之黃金十萬澤清遂棄不守清人入兗執魯王王年幼詭稱魯王牧兒見清兵掠王邸皆忽流淚清人怪之旁有人曰此是魯藩八千歲也清人刃之三擊不中駭曰汝大有福我不殺汝前有一少年女子甚麗犯之不從死于墻下意汝婦耶汝其埋之王因得脫十七年夏六月丙子王渡江入浙十二月乙巳王移居台州紹興起義陳函輝首先推戴張國維繼之迎王至紹興卽監國位以明年爲監國元年是年仍稱弘光元年



唐王卽帝位于閩中

以丙戌本年爲隆武元年封鄭鴻達爲定虜侯鄭芝龍先封南安伯至是封平虜侯并賜子成功國姓以駙馬體統行事掌宗人府事封皇弟某爲唐王叔某爲鄧王拜鴻達爲大將軍擇吉授鉞至期大風雨駕旣登壇當授鉞時風吹所懸匾墮中鉞柄折爲二乘馬冒雨還宮閣臣黃道周與芝龍爭班列都御史何楷佐之尋道周以督師出關楷請急歸離城南四十里爲賊所傷幾死或云鴻達使之也

詔改福州府爲福京

以布政司爲行宮按察使爲芝龍第

太僕寺少卿萬元吉春坊庶子楊廷麟守贛州

曠昭巡撫江西清將劉一鵬統數百騎至南昌牌先至昭卽命士民出迎而身自扁舟遁去獨贛州不下上命萬元吉督鄉紳楊廷麟等協力固守措置有方人情大悅改分巡道爲行宮累疏請迎車駕幸贛州贛居山川上游豫不能仰面攻且左爲楚右爲閩浙背爲粵東足以控制三面使四方豪傑知朝廷有恢復大計也芝龍力阻之不報

秋八月靖江王自稱監國于桂林



王固篡位者自立後其嫡嗣同其宗二十餘人上疏告許天啟崇禎兩朝迄無甯歲王厚賂朝貴以故輒直王每下許者于獄弘光元年二月丙寅王表賀登極因奏金永連三州皆爲土賊所據撫按匿不以聞及南郡失守王遂睥睨神器以楊國威爲大將軍推官顧弈爲吏科給事中臬司曹燧等皆俯首聽命推署僚吏有差檄廣左右江四十五洞土狼標勇自稱監國

靖江王執廣西巡撫都御史瞿式耜囚之

逆藩作難兵將東撫臣瞿式耜啟以大義謂之曰兩京繼階大統懸于一髮豪傑睥睨逐鹿閩詔旣頒何可自與內難爲漁人利靖怒使促耜入桂耜卽陰檄思恩參將陳邦傳防梧又止狼兵勿應靖靖再遣桂平道井濟促耜入俱弗應未幾靖提兵至梧耜坐梧城中靖謁耜促耜朝耜曰王也而朝禮也謁耜者曰易朝服耜曰王烏用朝服以常服朝禮也靖知耜不可奪一日迂耜語耜未及靖舟拽上一小艇至宦官門正劉應科羅之護衛指揮曹升持刀加耜頸逼巡撫敕印耜曰敕印可刃求耶桂推官顧弈遮耜頸拽過數舟數仆數起耜坐神稍定曰我朝廷開府重臣若欲爲帝曾廬陸之漁戶之不若矣靖假撫軍令入署索敕印撫軍家人疑有變奉敕印惟謹靖竄恐西撫與東督應而西撫情形已達數調兵兵之羽馳颺矣用小艇挽耜上桂塞其艙竇不令見人但聽水石瀾瀾聲至桂閉于王邸耜日凝坐



不與諸靖人語諸靖人無敢向耜語者王邸人進食撫軍未嘗食也先是五月中撫軍知靖藩必有變先遣標官徐高至桂林察王動靜高幼子得出入宮中至是得進饘粥云高後爲坐營掛制勝將軍印永曆四年殉始安王難

廣西巡撫遣人福京請乞師 耜以王之立也非序不勸進靖變防禦有素故處之泰然而夫人邵日夜啼哭因遣家人周文賁疏間道至閩賀上卽位并乞師曰嶺表居楚豫上游嶺表失則豫無所憚楚未得通天下事益不可爲矣臣式耜朝以死則粵中夕以亡豈惟一省之憂因陳靖江形勢有必敗狀上大喜

秋九月思恩參將陳邦傳討靖江克之 靖既遣師挾撫軍西矣驟與陳邦傳遇兵敗返桂時耜猶著單紗矣靖送衣服飲食俱不受一日趨耜撫軍令調狼兵耜曰戴罪之臣曷可蒞戎事瞑目不食求自斃諸靖人畏之送居劉仙巖距桂城五里許王符調狼狼不應外兵且急復逐耜入請還撫軍治耜曰戴罪之臣曷可再還撫軍治送敕印至耜卽免冠南面拜敕印而受之諸靖懾然復請蒞事不答曰使往返薄暮還治城中人士始帖然時湖南列校焦璉爲粵西總鎮楊國威旂鼓知所事非正歸撫軍撫軍授之以計會邦傳兵應檄至璉夜縋城下入邦傳軍復組邦傳上城陴守皆璉兵隨擒國威顧弄等五



鼓攻靖邸戒士卒第求靖江以安人心他無所擾厥明大定復誠兵將獲鼓惑靖江數人其外並無侵株

冬十一月總河兵部侍郎路振飛入閣辦事上以淮撫路振飛有舊恩下詔購訪募能訪致者賞千金官五品京官至是某訪得立授都督府經歷振飛相飛第三子年十七就見賜名太平授錦衣百戶復改兵部職方司主事尋陞廣西按察使僉事復奉敕招撫丁父艱南歸與其兩兄居洞庭兩山之間

帝幸太學行郊禮

十有二月詔親征初六日登舟泊芋原驛二十二日發二十九日至建甯府駐蹕

遣錦衣衛康永甯如安南不克行遣康永甯航海借兵至明年五月回云風逆不得泊岸望涯而返

附記隆武元年安南國王貢使至使人衣冠頗類中國差承但椎髻跣足所貢惟金龜銀鶴銀爐香網等無他異物

丙隆武二年

魯監國元年  
清順治二年

春正月以舊輔馬士英爲辦事官鄭芝龍方國安合疏荐舊輔馬士英兩人皆士英門下也時國安營錢塘江上士英在營中詔充爲辦事官軍前辦事候恢復杭城復官



二月廣西總制丁魁楚執逆藩靖江歸於福京 委總兵官馬吉翔解至建甯行在王病死從叛推官顧  
弈總兵楊國威等伏誅封丁魁楚思恩伯陳邦傳富州伯

以廣西巡撫瞿式耜爲兵部右侍郎 平逆藩功也晉司馬兼副都式耜辭曰國家禍變構難同室詎臣  
子稱功地西臣辦西奚以功爲不聽復授是職

以晏日曙巡撫廣西 輔臣曾櫻荐也式耜得代遂放舟東下山水詩自娛

遣錦衣衛同知馬吉翔招撫闖賊李自成軍 陞吉翔都督同知管錦衣衛事尋領敕招撫流賊李錦錦  
卽自成之姪也自成破京後清兵追逼遁至黃州棄衆先奔爲鄉兵所殺錦代領其衆同其妻高氏弟  
必正渡洞庭湖竄踞山寨至是賜錦名赤心封氏忠義夫人頒敕往招之

督師閣部黃道周救徽州兵敗死之 道周與徽州清將有舊清將之黃因督兵三百人長驅至徽州遇  
險清伏兵四出盡殲其衆輜乘道周至郡送至金陵時洪承疇爲南都內院慰勞令降大罵不屈不食  
半月被殺

三月帝幸延平府 建甯行宮閣臣蔣德璟所營也卽巡方署以湫隘喧譁屢形責讓初一日移駐城外  
伽藍初六日登舟十一日抵延平以府署爲行宮兵侍東閣陳洪謐在籍遣內官鄧金趨之不至



魯王遣行人林必達來 必達同一武弁通書鄭芝龍意欲私自招徠之而不及表聞芝龍以上聞逮下詔獄會百官廷鞫上大怒切責必達已而釋之改必達福建督學御史

清人襲績溪督師金聲死之 績溪居萬山中四面皆峭壁前止通一路遠三十里聲營其中山上立十三營以十三副將主之前路以大木扎營防守甚固會有降清鄉官黃澍來始說以天命聲慨然叱之澍卽婉順而陰間其上下于是各標離心清從甯國山中間道襲績溪遂無與抗執聲至金陵不屈被殺合門十餘口皆自縊時洪承疇監斬聲旣死尸猶不仆洪入院見聲儼然衣冠危坐堂上洪驚入內恍惚不敢出者數日其靈爽若此

四月錦衣衛百戶徐某至自雲南 雲南撫按及沐天澤交章稱黔國公沐天波造反有土司沙定洲出奇兵撲滅之天波子身遁去時有識者咸疑非實會一宗室任彼中道府力證成之遂詔天澤襲封定周搜捕陞宗室僉都御史往督師已而錦衣衛百戶徐某前以弘光登極頒詔雲南至是歸述所親見云一土司反天波調定洲兵往定洲不奉調叛司平天波密有移師意定洲先發統本司勁兵突闖府第天波僅以身免母妻及弟天澤俱被刦脅令具疏通判素黑曾爲天波所糾以宿恨故爲沙左袒嗣又傳聞天波遁出糾合各土司擒縛定洲然地遠莫能得要領朝廷置而不問



五月清師渡錢塘江方國安降兵部尙書張國維死之 清人渡江馬士英方國安合兵奔至天台詢之士人云山西有徑可通楚粵至滇閩者因衆軍未聚稍憩以俟山上有石橋恐敵人之來襲也命毀之橋中有石版版有文曰方馬之兵至此而止二人大駭以爲天意也遂留不去遣人至杭投誠貝勒大悅命阮大鍼遺之以書以異其禮兩人大喜卽遣將押魯監國欲執之以贄所遣將至魯營卽發病不省人事魯監國欲執之逸兩人至杭貝勒復誘兩人使盡攜眷屬及愛將銳卒入城中駐札月餘貝勒治宴其將領四十八人同時就戮囚士英國安挾之入閩俱械一室士英日吟詩消遣忽一日引入洪塘與總兵數人俱被戮時有黑氣從西南來以爲諸臣被慘猶有天變云張國維聞清兵渡江謂知府王禮曰子有父母在可無死余國之大臣也義不得生暫欲薙髮以紓民難於是經理諸事三日畢從容自縊清重之 附記兵侍楊文驄士英戚也乙酉夏道蘇州取庫金二十餘萬子鼎卿以總兵帶孤銜有兵一千掠取民貲無算又詭稱兵數萬要餉朝廷不能應文驄至行在語頗不遜至是降清又聞清兵渡江文驄與田仰居山島中有兵一二萬田楊同遣兵四百載幣獻貝勒貝勒盡殺之次日田仰私送幣帛數車貝勒受之使田兵別營以鐵騎千餘圍之盡放田兵出圍令田兵下馬捨器械又次日火礮四衝亂箭齊發一營化爲肉醬貝勒至閩阮大鍼隨行至嶺上口稱雷爺相見遂墮馬死雷名縝



祚太平府人也以孝廉仕至河間道因劾周延儒被黜者聖安朝六等定罪爲阮大鍼寃死故顯靈云  
逸史氏曰金人破兩京死者寥寥宋遂以亡清師渡江是何死者之多也豈天之不祥明也耶死有重  
于泰山者張司馬輩是也死有輕于鴻毛者方國安輩是也有死非所貴者仍氏甘爲忠臣其何光少  
康之烈耶更有死不盡其辜者馬士英阮大鍼非耶士英從君于昏刈忠臣于朝投賢者于遐荒而不  
之恤也委典刑于撤局而致之顛連也奔而抗抗而降罪浮于秦檜賈似道矣寸磔之何以雪海內之  
忿耶

清人屠金華府督師閣部朱大典死之 大典守金華清貝勒圍之出兵與戰殺其衆數萬清人怒攻之  
益力逾月有五日力竭城破大典以家眷悉置樓上實火藥筒於下焚之滿門殞焉 附記清兵破錢  
塘一云水涸一云二十八日夜月色甚明似有天意云 是役貝勒以諸將不竭力各責有差張存仁  
亦責三勒云

監國魯王還台州 魯王復還台州航海有疏自謝云向爲諸臣所誤上憫而許之杭城失後錢塘拒守  
皆浙中諸將士力閩無與也鴻逵以擁立居首功卽授鉞出師逗遛觀望厯冬逾春不敢越關乃詔班  
師及錢塘師潰金華旣失無復抗衡者矣 附記清兵追魯王海中忽有龍升天清兵沒水者無算因



此得免一云錢塘師潰陸武君臣酌酒相慶嗚呼人之痿痹一至此哉

誅妖人 貴州撫臣俞思恂疏稱弘光舊主流寓該屬土司詔議奉迎儀注及遣副都御史周昌晉向內

曰往認尋細閱疏中情形并詳詢實奏人事多訛舛御史錢邦芑等上疏止之已而思恂續疏言其詐  
偽詔卽時處決 召方士蔡鼎閩諸大臣所薦命召之以方外服見封國師然所言庸鄙占策無驗

六月皇子琳原生 進百官有差詔封鄭芝龍泉國公尋改平國公鄭鴻逵漳國公尋改定國公

盜殺閣部顧錫疇 錫疇流寓溫州有鎮將與督學相結取事例銀供餉諸生鼓噪總兵賀君堯執一二

人殺之錫疇欲參之君堯乘夜縛而投之江子鑒遁免 附記顧爲佟邦年門生邦年之子爲清嘉湖

道鑒在署中君堯以賂佟求官鑒以事告乃置諸法

秋七月殺總兵陳謙 御史錢邦芑劾其外嬖有狀逮下詔獄鄭芝龍力救不聽尋殺之

雷州守將黃海如殺清知府趙最推官李宣國

高州府義師逐清所置官復其城

詔釋都察院僉都御史田闢于獄 闢河南人甲戌進士弘光中以戶部權稅處州二月募兵入衛改都

察院僉都御史署院事疏糾閣臣曾櫻語連中宮上含怒未發也五月遣錦衣衛王之臣往閱其師并



發月餉之臣迎合上意疏糾詭兵冒餉遂下詔獄然兵籍俱實餉又自辦上所給尙未發也衛臣王承恩婉轉辯白班行亦多申救上怒不解至是以皇子恩得釋清兵至卒抗節擁衆山谷崎嶇楚粵間至戊子九月兵死

秋八月黃鳴俊退自衢州督師閣部黃鳴俊久駐衢州忽退入仙霞關上怒其子職方司主事天復從駕逮下詔獄又命建甯府羈鳴俊鳴俊懼請奮勇自效尋統兵出關

皇子薨諡莊敬

清人入關御史鄭爲虹死之先是鄭芝龍力請旋蹕福京且云傾家相助可四百萬入關固守決難飛渡上不聽芝龍歸又令歸又赴行在力向中宮言又不聽決策赴虔詔宣芝龍商留守事宜芝龍亦不至

詔改贛州府爲忠義府時萬元吉楊廷麟協力固守夏又命吏部尙書郭維經經理圍困經年士氣不挫故有是褒

清人襲汀州帝崩二十一日駕發延平二十八日抵汀州府清兵踵至建甯知府楊三畏延平道趙秉樞一路迎降隨征御史王國翰以警急聞上怒欲殺之次日清兵至扈從俱先遁上及中宮俱陷國翰



同子都督同知涼武死之按科臣吳其鼐疏云舊輔臣何吾驥領兵駐關聞清人至輒遁清人卽假何兵旗號以進汀州城中未之知也半夜卒起犯駕帝自刎侍郎曹學佺死之

安仁王薨 王英明特達才略過人有知人之鑒嘗曰居安可寄社稷臨難不奪大節者惟司馬瞿公一人而已與人言必諄諄辨論曲盡人意一日宴罷夜半疾作急召瞿式耜入付以後事執手流泣曰孤負先生顧王弟永明王曰國家事一聽瞿先生處分且自言其前世曰孤再生伽藍而王弟一羅漢也先生好輔之言畢而薨式耜慟哭曰王乃漢光唐肅之流也天不祚明早奪其年悲夫 原缺 幸毋傷神如是乃奉永明王嗣之卽今上也

秋九月清人破忠義府督師閣部萬元吉春坊庶子楊廷麟吏部尙書郭維經及龔棻死之 余至吉安遇山人李伯開述贛州事甚詳一時死難者甚衆余時欲急往桂林未及詳記偶于舟中得楊翰林詩集有與家人書知其子在某縣困苦伶仃後因亂失其集良可惜也

冬十月永明王卽帝位于肇慶 閩汀之變丁魁楚失雄還肇閩首揆何吾驥亦自閩遁歸香山大司馬瞿式耜在肇慶憂曰朝廷事裂矣曷可一日無君謂魁楚曰公制府帶甲五嶺甯坐視顛危耶請急議監國時閣學呂大器自閩來李永茂以大司馬守制亦至式耜曰永明王賢此殆天意十四日迎王于



梧王三讓王太妃亦曰此大事恐不勝任願先生更擇可任者羣臣固請乃至肇慶府卽皇帝位改元永曆和風旭日現五色雲有五色大鳥從南來集殿上士民懽呼咸謂中興可卜頒詔楚滇黔蜀軍士謳吟靡不以爲再覩神京也初上至寶鼎寺禮肉身無量佛佛忽起立益信安仁王羅漢之說云

兵部尙書呂大器兩廣總制丁魁楚入閣辦事吏部右侍郎兼閣學瞿式耜掌銓事推置僚屬有差李永茂守制不朝請

清人犯南海舉人陳邦彥死之 南海縣起義舉人陳邦彥兵敗被擒十月初一日清佟養甲令磔諸市談笑就刑神色不變

十一月蘇觀生自閩逃來 楚師百萬戎旗星屬總督何騰蛟方節制三面楚豫遼遠不及援虔贛州抗守經年析骸易子極其慘酷閩輔蘇觀生駐兵南甯輔車相依宛若秦越一聞汀變卽撤兵回廣虔州遂不守矣

蘇觀生立唐王于廣州 觀生過三水不赴肇以監國諸公不與議也適唐淮諸王航海至廣觀生遂擁唐王立之國號紹武僉曰今上監國詔盡頒矣天下知有新君今復蹈靖王覆轍以速外氛二百里立兩帝自樹內應三百國紀人披其葉而我刈其根矣奚不利孺子王耶觀生不聽



帝自梧州還肇慶 贛州敗書至司禮內監王坤趨上移梧避之冢宰瞿式耜曰上之立也爲祖宗雪仇恥爲生民援塗炭正宜奮大勇以號令遠近今強敵日迫東人不靖苟自畏縮外棄門戶內釁蕭牆國何以立爭之不聽遂移梧尋還肇

東都殺兵科給事中彭耀 大學士陳子壯書達冢宰瞿式耜請力饘蘇而兵東上遣彭耀泣諭之曰今上神宗嫡胤奔然靈光大統已定誰敢復爭且閩虔旣陷強敵日逼勢已剝膚公不協心戮力爲社稷衛而同室操戈此袁譚兄弟卒并于曹瞞也公受國家厚恩乃貪一時之利不顧大計天下萬世將以公爲何如人也觀生大怒戮耀于市集兵向肇耀粵東人舊爲秦令有政聲

兵部右侍郎林佳鼎帥師伐東郊敗績死之李明忠走 東兵將西上遣佳鼎督兵剿之時有白旗賊新就東撫觀生用以拒命賊故海寇狡猾善水戰詐以數十艘降林林不備遂以火礮焚林艘焚死總兵李明忠登岸陷泥中幾不免

鄭芝龍以福州降清 芝龍欲出降弟鴻逵子成功力阻之不聽旣降貝勒謂其親從俾離左右尋發遣赴燕都惟狎客陳鼎隨之去芝龍妻日本人也以兵死成功樹殺父報國旗至今出沒海上時成功年十三歲或曰二十歲云



十二月清人入廣州殺唐王蘇觀生 先是九月二十日漳州府降清貝勒分命副總兵李成棟率偏師取廣東以佟養甲督之潮惠兩府相繼下省會寂不聞也至是十五日清兵突至先遣十餘騎入城無一抗拒者餘兵相繼環此城上閤日乃下遣唐王自裁蘇觀生縊死宗室皆被殺時潮州山寨私擁趙王佟李遣兵往趙王卽自歸削髮居光孝寺會陳子壯致啟事泄王實不知也廣州知府陸元機降清佟李勒令元妙觀自縊

清人犯高州大學士陳子壯死之何吾騶降 禮部尙書陳子壯初爲佟養甲逼令薙髮尋悔之所居地名九江集衆起議屢攻省城不克後攻高州李成棟追及擒歸被殺子壯以詞臣起義于端州九江鄉衣甲器械無不精絕部伍士卒皆蛋戶番鬼其人敢勇善發西洋銃故殺敵不下數萬計尋間出爲清兵所得養甲深恨之以木丸塞其口置于重臺之上設祭三壇遣舊輔何吾騶學政袁彭年羅拜拜訖碎磔之



明季稗史彙編卷二十一

賜姓始末

朱成功者鄭芝龍之子也母爲倭女初名森弘光時入南京太學聞錢謙益名執贄爲弟子謙益字之曰大木丰采掩映奕奕耀人隆武帝立年才二十一入朝上奇之賜今姓名俾統禁旅以駙馬禮行事封忠孝伯初芝龍之爲盜也所居爲泉州之東石其地濱海有李習者往來日本以商舶爲事芝龍以父事之習授芝龍萬金寄妻子會習死芝龍乾沒之遂召募無賴爲盜于海中久之而所得不貲崇禎中受巡撫沈猶龍招撫芝龍娶日本長琦王族女凡爲日本贅壻者例不得歸惟芝龍挈其妻還東石第宅縱橫數里遂爲八閩富人猶龍母生日進珊瑚樹高丈許飾以珠龍金盞觀者艷之芝龍從者擧生犀黃金爲甲每出則百人如一人焉時南安有荀慙惠安有劉香老皆稱富強慙先亡香恃強不就撫朝命芝龍討之戰于五虎門外之定海所芝龍力不敵香弟芝虎勇甚望見香乘大艦指揮兵士芝虎直前躍艦而上香手格芝虎兵器墮之遂徒手而搏相持入海俱死芝龍旣併其衆威震全閩江右鄒維璉嗣爲巡撫欲抑之而勢彌熾弘光帝立封南安伯及勸進唐藩御極改元隆武晉封平國公北兵入福州芝龍退屯安海樓船尙五六百艘乃爲洪承疇所誘必欲降附諸將多不從成功痛哭而諫芝龍不從單騎北去芝龍旣



降其家以爲可免暴掠遂不設備北兵至安海大肆淫掠成功母亦被淫自縊死成功大恨用僂法剖其母腹出腸滌穢重納之以斂丙戌十二月朔成功會文武羣臣移于南澳勤王于烈嶼設高皇帝神位定盟恢復丁亥仍稱隆武三年移于南澳勤王者遠近至軍聲頗震五月于廈門中左所設演武場七月令定國公鄭鴻逵軍圍泉州于桃花山不克十月從大學士路振飛曾櫻議頒隆武四年戊子大統歷用文淵閣印印之戊子閏三月同安安溪以下皆下以吏部主事葉翼雲署同安事五月圍南安縣不克而返八月同安破葉翼雲及鎮將邱進金裕皆死之知永歷帝駐蹕廣西之肇慶遣光祿寺卿陳士京入朝己丑士京還自行在封成功爲延平王始稱永歷三年六月漳浦守將納款庚寅成功南下辛卯二月泉州偵廈門軍薄襲破之曾櫻自縊諸紳咸避于浯時成功自南反泉州襲者始退十二月攻漳浦知縣某出降壬辰正月海澄守將赫文興舉城降圍長泰縣北督陳錦來援敗之二月復平和詔安南靖三縣進圍漳浦縣府七月七日陳錦爲其內史李進忠等五人所刺以其首來降八月刑部侍郎王虞石至自五指山言隆武在彼爲僧繼而遣使至廈門一時故臣皆不能決九月北師金帥援漳島師失利癸巳二月五指山復遣來存問諸臣使言隆武帝令離五指駐平遠縣將起兵故臣乃具公疏請敕驗視卒不可得五月金帥以萬騎攻海澄遇伏大敗六月島師南下會潮州守將郝尙文反正以定海李孟設署太守事其



屬縣潮陽惠來相抗成功赴剿甲午四月清朝割漳泉惠潮四郡地令島師薙髮不受潮州復陷十一月發水陸師應西甯王李定國于粵東十二月朔復漳州府漳屬十縣降者九獨龍巖不下十二月泉屬七縣降者六未正月破仙遊攻半月四月援粵之師失利統軍者黃梧降級五月祭旗大演陸師戈甲耀日集搢紳觀之六月祭海大演水師九月南征破揭陽澄海普甯三縣命浚揭城毀澄普十一月舟山巴臣興舉城降發師已三月阻風至是已抵城下十六日北師再遣議和丙申正月十一日始頒永歷十年大統歷以前年有戎事也台州北將馬信棄其城納降于舟山二月降將馬信馮用張洪德俱抵廈門謁成功五月十日粵師失利歸斬其將蘇茂閏五月改廈門爲思明州六月二十四日黃梧以海澄叛知縣王士元從之部將康雄不從斷其手得墜城出七月五日以勇忠侯陳某爲守思明州成功帥師北伐奪閩安鎮斬北將胡希孔生擒百七十餘人二十三日戰于南臺奪橋又明日戰于橋北再勝二十八日戰于較場奪馬二十五匹擒延平參將張禮八月四日復連江二十六日舟山陷總制陳雪之英義伯阮駿俱赴海死丁酉十二月島上火藥局灾戊戌正月行在以璽書通問二月松江徐孚遠汎海由交趾入安隆交趾要其行禮不聽不得過遂反廈門破孚遠遁跡爲北帥吳六奇所藏完髮以死海外生一子扶櫬歸故里未葬子亦死成功會師浙海以少司馬張煌言爲監軍北伐抵羊山羊山故有龍祠海舶



過者致祭必以生羊卽放于山上久而孳乳日蕃見人不畏避軍士競逐之天朗波平怪風猝至海舶自相冲擊義陽王某死焉于是返旆己亥五月全師北指張煌言以所部義從前驅入江煌言兵抵瓜洲城下明日成功至北師出禦滿漢死者千餘乘勝逼其城成功南渡攻鎮江煌言泝長江未至儀徵五十里吏民迎降六月二十八日煌言抵觀音門成功已下鎮江水師畢至軍聲大震七月哨卒七人掠江浦取之五日蕪湖以降書至成功謂煌言蕪城上遊門戶倘留都不能旦夕下則江楚之援兵日至控扼要害非公不可七日煌言至蕪湖傳檄郡邑江之南北相率來歸郡則太平甯國池州徽州縣則當塗蕪湖繁昌宣城甯國南甯南陵太平旌德貴池銅陵東流建德石埭青陽涇縣巢縣含山舒城廬江高淳溧陽建平州則廣德無爲和陽凡得郡四州三縣二十四而下流之常鎮屬縣亦皆待時而爲降計其時忽有大帥單騎而反飯于村店店惟一老嫗大帥遑遽問曰今日之事如何老嫗不知其爲大帥因曰聞殺北人盡矣大帥不敢飯而去留都亦無意降未定而諜知島師疎放樵蘇四出營壘爲空士民浮水而嬉用輕騎襲破前屯成功倉猝移帳質民軍竈未就北師傾城出戰兵無鬪志島師大敗成功遂乘流出海并檄鎮江之師煌言趨銅陵與楚師遇兵潰變姓名從建德祁門山中出天台以入海成功之敗而歸也以廈門單弱方謀所向中途遇紅夷船其通事乃南安人也謂成功曰公何不取臺灣公家之故土也有臺



灣則不患無餉矣臺灣者海中荒島也崇禎間熊文燦撫閩值大旱文燦向芝龍謀之芝龍曰公第聽候所爲文燦曰諾乃招饑民數萬人給銀三兩三人給牛一頭用海船載至臺灣令其芟舍開墾荒土厥田惟上上秋成所獲倍于中土其人以衣食之餘納租鄭氏後爲紅夷所奪築城數處曰臺灣曰雞籠曰淡水此外又有土城數十處臺灣之城亂石疊高數丈厚丈餘用火煨之化爲石灰融結一塊其門戶澎湖澎湖淡水地勢低下海舶至此必易舟而入故險而易守成功逼攻臺灣至澎湖適遇水漲竟以海舶渡之直抵城下城中紅夷不過千餘人其餘皆鄭氏所遷之民也以火礮攻城城堅不受礮灣民導之曰城外高山有水自下而上統於城濠貫城而過城中無井泉所飲惟此一水若塞其水源三日而告變矣從之紅夷乞降遂以大舶遷國成功王其地辛丑以疾卒子錦嗣甲寅福藩耿精忠反稱裕民元年朱錦入据漳泉二府猶稱永厯二十八年戊午精忠降甲申錦仍歸臺灣癸亥錦卒子克塽嗣年十二不克統領其衆衆潰降于清史臣曰成功不出臺灣徒經營自爲立國之計張司馬作詩誚之曰中原方逐鹿何暇問虹梁又曰只恐幼安肥遯老杖藜皂帽亦徒然卽當世之尊乎成功者不過比之田橫徐市之間而已某以爲不然自緬甸蒙塵之後中原之統絕矣而成功以一旅存故國衣冠於海外稱其正朔在昔有之周厲王失國宣王未立召公周公二相行政號曰共和共和十四年上不係於厲王下不係於宣王後



之君子未嘗謂周之統絕也以此例之成功不可謂徒然矣獨怪吾君之子匿於其家而不能率之以申  
大義於天下某聞海外尙多人物當必有說以處此



明季稗史彙編卷二十二

華復謫

兩廣紀略

甲申三月二十七日梁溪發棹逗遛者嘗者一月五月朔渡江六月朔過南昌十九日踰梅嶺七月朔上新興陸道十五日渡海二十一日抵臨高任署無室衙無役悔三百金資斧至此也每二更聞雞啼聲愀然曰此亂徵也胡爲乎來哉方匝月生熟黎以署令而破城先一日居民告我於所寓前後書新任某寓此則無患是日早爲之署令已戮及母妻矣慘哉貪酷可爲哉我宵晝廢寢殮招撫者六十日至十月府道拏脅從保全者千餘家推官相公欲殺無辜我力阻逢怒十一月遂愆本道林次翥以坐視不救幸災樂禍責我因罷官舉邑紳民哀之哭而送者數百人植去思碑於城隍廟西以誌變亂時得賢父母斯時適適然釋重負也周孚先棄我去就儋州陳知州館子養隨我寓遷居瓊臺望五指插天並緣海尋水落石出處東眺大洋見巨濤如山而來初驚怖特甚後則數其濤之大小而樂焉乙酉年六月殺署令事復發以閩地爲皇居其家屬特奏故也欲提該邑紳民問罪舉國狂走我又爲之出銀八十兩於粵東臬司寢其事十一月周孚先卒於李司李署停棺小北門復爲塋之內戌年二月天衢爲道府所拏逃入瓊府



依我時春夏交城外野雞每每夜啼惡之後入秋冬益甚曰必亂徵也去之十月朔攜家眷過海而北客雷州二更雞啼更甚棄去行七百里上廣西梧州府陸川縣孚先子亦隨焉時十一月望舊令施古璜已去任我爲屋三楹於城以貯眷屬十二月朔上北流同古璜下蒼梧時古璜已召銓曹欲趨端溪也二十日至德慶州傳言羊城紹武帝已爲清朝所除古璜不敢再下我獨往二十二日入肇慶擁戴首相丁魁楚者嗷嗷要銀至二十五日早晨猶遇退朝官拖朱施施少刻永曆帝以兩人轎下小艇走矣我有一小艇下河隨衆而逃除夕傍晚遇古璜於滕縣丁亥年元旦舍舟從陸古璜止於北流我仍回陸川時已元宵夕也陸川縣城野雞又復二更啼矣心雖惡之計亦無他之二月初六日古璜忽挾家眷仍奔陸川依我者四月二十二日清兵大至百室安堵我止費銀三錢爲一飯以待浙人嗣三四月舊總戎陳邦傳潛於賓陽始則縱兵刦掠後則被搶者率多追隨以肆刦掠自四月初一日破容縣五月初五日破北流之後遍地皆賊皆曰恢復兵也五月初六日將家眷寄入深山之大橋村山水田土佳絕幾欲家之因有幾担木香在城不欲遠去離城數里棲一庵中至十五日陸川縣破矣我亦被掠送入監一夕索銀五百兩我以一妾與之彼贈我銀八兩深入大橋周孚先子棄我入博白陳邦傳部下爲參將七月內家眷染瘴氣初七家婦亡二十五先妻亡至八月初婢僕輩死者五人我父子亦大病同入城寓城東紫銅坡十六



日孫時顯者率兵攻雷州路經我寢室釜室俱罄父子二病體受其毒拳者累百與死爲隣矣二十五日周孚先子提兵過陸川來看我病九月初一日遷入陸川署令內室因念家鄉骨肉俱喪此地戀此何爲十月十五日將先妻冢婦之柩焚焉攜其殖一千五百里上南甯府經綠珠貴妃故里山水奇秀甲天下知南甯從未經兵火也定兒并妻不從十一月二十二日入郡城人物繁庶糧食便易昔號爲小南京猶然樂土意欲居之適一浙人送一梧州女子吾大兒遂買屋四楹於治前蕭元圃之對門復有感菴項竹匠之族國初至此甲第聯綿現兄弟叔姪舉人四人與我爲家人好亦足樂也至戊子三月初十日永厯帝又踰躡而至矣斯時見有隨駕者吾常吳元聲浙東嚴秋治江右王登水蕭韓若數人耳四月杪廣州李成棟者忽反投明朝遣洪天擢潘曾瑋李綺三人齎疏迎駕六月初十日永厯帝駕下肇慶時南甯城野雞又二更啼矣我決意東下苦無舟至七月十三日丹陽賀退庵與吾一舟方欲解維退庵爲仇人所劫行李被搶將及於我我急訴之而止退庵飄驚不知何往我身自操舟月白風清迅水順流任其所之自永瀘而橫州而貴陽而潯州而平南而滕縣而梧州而封川而德慶而肇慶竟日竟夜三十里鼓棹而下過德慶時夜聞鉦鼓聲有言曰此皇舡也我初不信明日視之是也抵端溪西峽時爲七月二十九日也僑寓於東門外閩江樓右師古璜亦在焉賀退庵皆在焉遇龔端木令郎在田言元琳事爲之淚零者



彌夕斯時凡屬相知皆爲我揀如何好官做不知我冷眼覷破見宰執仍無柱石之才羣僚率多微倖之徒瞿稼軒官非不顯也戊子年二月二十三夜之弔打不免丁魁楚銀非不多也丁亥年四月初四日夜父子駢首就戮生當斯世爲官適近喪身一路人情險惡世事涼薄知此筵席決無好散場遂以空閒觀忙官忽聞賀退庵以特參李綺三人三人復仇囑成棟養子李元允繫之於監欲絕其食以斃之退庵無親戚僕隸只告哀於我我若放手退庵死矣爲之用銀一百兩以活其命又爲之求解於太監夏國祥以減其罪至己丑年二月初一日復爲之保出獄再贖銀四兩買衣飾四月初一日又贈銀令之逃入桂林後退庵不知何往後三月初李成棟亡之信已確肇慶君臣各復解體適有浙人旅亡遺妻無養歸之於我我亦遷於鄉以消夏一年來文官之命制於武臣之手身登兩榜時爲武弁揮拳屈膝五虎一狗笑破人口至八月雞又一二更啼矣甚至兩翅生距駭云此必大亂之徵也宜急去十月中再攜家眷遷至番禺縣之石壁鄉至庚寅年正月初七日肇慶聞清兵破南雄自己兵丁在城內外大搶大殺先從官之顯者囊之重者及之惜我不及見也庚寅年清朝兵馬頓首五羊城外守禦諸人以爲萬分無虞一浙人邀我入廣因見天衢爲同知宿三夕於毛子霞寓每酒後將睡雞輒大唱我私念曰如此兵圍困難又何啼豈有更甚於此者乃我出方一月而城破矣破城後十一月二十日入城見天衢一軀體也問我討銀三兩



置衣服妻妾被拏又討銀二十兩贖妻出又討銀五兩置衣被當富貴時不會受他一毫之惠偏於患難相逢真惡緣哉晤香山令張嘉仲談家鄉事甚是茫然殊悶悶仍還石壁至辛卯正月有上韶州之便遂寄曲江

### 丁魁楚

丁魁楚原以撫臺失機遣戍贖歸癸未年四月擒劉超報功王崇巖在職方復還原職戴罪屯田者也至南京弘光則授爲兩廣制臺矣到任以來惟崇賄賂留都敗時實通靖江王後靖藩自洩其機反爲魁楚所縛隆武晉封平粵伯焉丙戌年十一月永歷擁戴意雖出於西撫式耜而決成之功魁楚爲最也當此大任宜稍易其平生之所向矣乃擁戴後兩月苞苴更甚十二月十五日知廣城已陷新主又逃乃撥心腹幹事者三人各挾幾千金令之潛上廣城謀入清朝主帥營內相機作事魁楚則將三年官囊裝載四十號大哨船棄永歷帝獨上岑溪縣專候此三人回音此三人者初入李成棟營爲家丁未幾卽密以魁楚下情告再以珍寶進成棟曰今在何處速請出仍借重兩廣可也三人持成棟請書上岑溪魁楚大喜將四十號哨船盡行移出丁亥年三月初四日至肇慶成棟知之先五里迎接握手歡談恨相見晚許以明日卽仍督兩廣事傍晚設接風酒盡歡而散先是魁楚三子同來廣東先已殞其二於端溪署止存一



并幼孫相隨妾婢及夫人婦則不止數百人也俱在四十號哨船內至三更成棟船上傳令請丁老爺相公講機密話魁楚父子不敢不往至則成棟端坐不起兩列火炬魁楚卽跪下曰犯官有罪乞饒兒子成棟曰令你先看兒子卽砍其子次砍魁楚成棟走出船頭高燈齊起照耀如同白日將家丁四十船之男人各營分撥一人其女人不論老少美惡一五一十數入李家船聞止有一妾於過船時投入水中此外不曾失一針也三年狠毒送於一旦不保其身並不保其妻子人言魁楚官囊積銀八十萬珍珠金寶番貨十倍之所遺二孫聞在李氏宮頭家做奴僕見其自言姓丁又打頭半死云

### 洪天擢

洪天擢乙酉丙戌兩年俱在廣東做兩司官擁戴永歷時自擇其地要做高雷廉瓊四府軍門卽以都察院副都御史寫敕駐高州丁亥正月清兵下高州則攜妻子奔雷州清兵至雷州則攜妻子奔瓊州清兵以無船過海劄徐聞者一月天擢在瓊爲練兵措餉索詐地方幾萬金復擅行殺戮者幾千人至四月初二日先航海投誠於李成棟仍以海道事畀之管理至戊子年成棟叛歸明天擢首至南甯永歷寵之以銓左遺賫諭至廣慰勞成棟朝夕同堂者袁彭年也潘曾緯也李綺也耿獻忠也佟養甲也皆蓄髮四月餘矣忽一席間令在座言志至天擢則曰我不願做官若有一千銀子養得老母便去做和尚矣成棟曰



好好快叫裏邊擯一千銀子送洪和尚速喚剃頭人替洪和尚薙髮在席莫敢措一詞見銀子擯去矣薙髮人來矣成棟令去天擢巾帽竟剃做和尚矣天擢不敢道一字只得歸去至明日又不好戴和尚帽又不戴紗帽亦不敢見成棟之面無可奈何之極先央人漸以不敢領銀之說還過銀子後再逐一解說方許他上肇慶到任永歷于七月二十八日到肇慶故天擢十二月方來也在肇慶以李用楫與之有隙後修怨一場庚寅年正月聞清兵至請爲高廉四府軍門攜妻子復去高州爲舊日受害之人所殺妻子俱擄去天擢歛人丁丑進士向同侯淡泉二次上春官路結社後又同榜淡老令黃岡時彼爲知府宗祿事獨受其害擁戴時彼爲四府軍門李武舟與有力到瓊州卽難爲武舟一家絕無香火故舊之情故天報之如此

### 李綺

李綺字友三庚辰進士松江人也授瓊山縣知縣在任六年見人惟有不飯吃三字爲啟口之談資乙酉年四月欲上南京考選竟自離任入廣城六月知南京潰遂買屋三千置田六千爲安土計八月仍入廉再掌廣刑館事大兒子死於廣城丙戌年八月福京又潰綺攜家眷上肇慶遇永歷登極授西臺十二月十八日知廣城又潰永歷必走恐侍御欲隨行二十日乃爲一疏特參首揆丁魁楚二十二日下旨降三



級調用喜極卽刻解維西上梧州至橫州由靈山攜妻妾弱媳二大女二幼女一幼子入廉州居城中丁亥年二月清兵至廉州綺家爲地方人所搶人口無恙綺解入廣城總兵李成棟仍畀廣刑館五月中言不稱旨打二十板因爲佟養甲之幕賓九月朱統鑒起兵破廉州綺妻尙有金子三千藏在地時一家男婦大小俱搶散并地中金亦去綺在廣不知也戊子年正月間綺夫人與家人漸聚第二兒亦出相對一破屋中真無飯吃矣聞有同年選茂明縣知縣今科張鳳翼者時護行在在南甯綺幼子閏三月初一日至南甯府年十七八歲與鬼爲鄰詢其令尊云無音耗亦連聲無飯吃詢其來爲張年伯因入見鳳翼淡淡也送程二兩出在寓且欲與鬼爲侶矣候之但云家母在廉絕粒者半月矣望兒歸同鄉相知者恐卒此再致意鳳翼及早送歸鳳翼乃送銀六兩又程二兩再益又一兩斷斷不能矣抑爲買藥僱轎止存三兩在身初十日早晨出城行不滿五十里逢盜罄刦身穿衣服俱去又被大棍數十下直與鬼爲一矣轎夫仍昇之回一裸體而已此時同鄉在南甯者共爲出衣出被出柴米舊寓主人不許其入另覓一室安頓之至半夜見有香一炷然起綺子自念曰此必觀世音菩薩來救我當坐起領受久之香不見矣再欲睡下仍取衣被蓋無有也伸手摸帳亦無有也及天明所脫下之衣服及鍋頭柴米碗箸之類盡爲偷兒所竊方知夜間之香非觀音大士斯時彼亦甚無氣息停二日卽殂再爲告張鳳翼贈銀二兩凡在同鄉



共爲殮之停柩于西門萬壽庵至四月初十日綺至南甯知其子已死矣又知其妻在廉州往迎之止一夫人也女之大者不必論矣有大歲小女出招贖出五月中同夫人小女下廣城至德慶又遇盜夫妻二人寸絲無存及至廣小女亦殂至九月李成棟以綺爲學道己丑至庚寅十一日皆是也十一月初二廣城既破綺在肇慶陽江縣考秀才初六日下午後報到急忙起身回廣顧家眷路遇大兵弔綺於樹百般拷打隨身之物無一存焉及至家已有一武將來拿索去銀一萬矣十一月綺投誠見面銀一萬又押出助餉三萬辛卯正月拘入廣城將妻出賣又云無飯吃矣



明季稗史彙編卷二十二終



明季稗史彙編卷二十三

東明聞見錄

丁永歷元年 魯監國二年

春正月帝幸桂林

清師薄廣城且急輔臣瞿式耜請視師督戰士駐峽口而清師復據廣城司禮王坤趨上西避之耜夜棹小舟留駕曰我兵水路覺至三水可上下搯也爭之不得請身留肇宗人府朱容藩曰左右所恃惟式耜一人式耜留守上行益孤亦不許上舟西耜部署五日始疾發抵梧上行又五日矣丁魁楚惑於奸弁蘇聘從梧入岑溪王化澄攜中樞印去潯州西上護蹕者惟輔臣瞿公而已上于正月抵桂耜分部守禦諭誠楚蜀各路征鎮粵西居山川上游東決不敢仰而攻兵士雲屯湖南北立需戰粵南甯太平出滇柳州慶遠通黔左右江四十五洞土狼標勇襲國家威惠三百年撫粵悉受銜櫟足資內備復疏請王錫蓀文安之爲相周堪廣郭都賢劉遠生爲六卿召給事丁時魁掌禮垣給事金堡素稱清直終制召還時草昧之初惟瞿輔臣導養聖德修紀綱挽人心布威武抑權閥起用人望招徠俊傑爲首務一時朝廷倚以爲重文安之王錫蓀入閣辦事從瞿式耜請也不書原官闕疑也



湖廣巡撫何騰蛟督川廣江諸路兵馬 從瞿式耜請也晉閣事

清師入肇慶府朱治澗走 治澗字子晦浙江舉人崇禎時爲肇慶府同知驟陞兩廣總制至是終爲佟李逼薙髮云

清師入梧州曹燧降丁魁楚被殺 先是人傳清兵取肇將薄梧蒼梧知縣萬思變作一大木龜令人牽之號于路曰降敵者似此及佟李兵進薄梧州廣西巡撫曹燧以春秋得雋者也因與櫬肉袒牽羊以迎曰燧不知天命不早事君使君懷怒以及下邑燧之罪也若以罪不赦俘諸軍惟命若惠邀天之幸苟保首領使得自新君之惠也涕泣不敢仰視李成棟笑而釋之兵入梧城思變大書曹燧姓名于木龜上置諸堂遁去時輔臣丁魁楚以三百餘艘載黃金二十萬兩白金二百四十餘萬兩入岑溪李成棟追及之殺而投諸河闔門無存者

清師入平樂府陳邦傳走 清師入平樂邦傳棄城趨南甯佟養甲改廣東布政耿獻忠爲廣東巡撫獻忠陝西人初任金華府同知與朱大典同守府城厯陞道陞撫降清授布政

三月帝幸全州 平樂報至司禮王坤又趨上幸楚輔臣瞿式耜上疏略曰上不幸楚楚師得以展布自有出楚之期茲半年之內三四播遷兵民狐疑局促如飛瓦翻手散而覆手合又曰在粵而粵存去粵



而粵危我進一步則人亦進一步我去速一日則人來亦速一日又曰楚不可遽往粵不可輕棄今日勿遽往則往也易今日若輕棄則入也難今海內幅員止此一隅以全盛視粵西則一隅似小就西粵恢中原則一隅甚大若棄而不守愚者亦知拱手送矣不聽

以兵部尙書瞿式耜留守桂林 式耜知駕不可留請身留桂遂勅耜爲留守特賜尙方劍兼文淵閣大學士便宜行事各路悉秉節制復疏請上暫蹕全州以扼楚粵之中內外兼顧楚奉威靈近奮氣而下粵士知法駕未遠踴躍以恢東

三月清師犯桂林留守督師瞿式耜帥師大敗之清從平樂直入桂林虛無甲兵留守連檄召焦璉璉駐別縣黃沙鎮聞召卽率騎三百人來時山水汎溢士卒俱從水中行百里水及馬腹至江無舟搜村落得漁舟二小艇士卒次第渡畢璉乃渡以三月初十日薄暮抵留守府留守懼甚拊其背而勞之如家人父子翌日遣人于大墟運糧而清兵數萬猝至一卒倉皇奔報氣急舌結喘息僅屬東西指曰敵至留守笑曰敵至耶何張皇若是清騎數十乘虛突入文昌門留守署在城東樓下清兵已登城樓下矢集集留守綸巾留守叱曰狡猾乃敢爾呼焦璉璉袒臂控弦提刀至留守卽挽弓自下射一將顛清矢集屋上或中免謁牌璉發數矢敵應弦而倒清騎乃下城短兵接戰時城中乏食璉所統三百人方糜粥



畢猶不知清騎已入閉城門清餘騎由是不得出繞城走璉復殺數人清騎復上城挾馬越城下奔大軍璉卽麾三百騎大呼殺出清兵自渡江東未有抗衡者見璉方錯愕璉引騎直貫其營左右衝突所向披靡自寅至午斬首數千級衝清兵爲三清復合兵圍之璉又大呼殺入戈刃所及血雨肉飛殺數千騎清兵膽落留守復率士民擊金鼓從之以助軍威追殺數里清以數十騎遁去斯役也璉以三百騎破清兵數萬桂林得全南渡以來武功第一

安國公劉承胤遣兵次於桂林 先是留守疏請詣全徵兵承胤從武岡入猶尊朝廷逐司禮王坤爲竊天子權面叱周鼎瀚爲奉奄寺鼻息雅重留守發兵數千援桂

詔晉瞿式耜武英殿大學士兼少師太子太師不拜 上遣官敦式耜入行在嚴敵甚備不敢奉召以守桂功進官不拜

吏科給事張家玉恢復博羅縣清兵至復陷家玉死之家玉癸未進士廣州新會人也官侍讀兼吏科給事誓不降清起兵海上沿海諸縣旋復旋矢志不少挫復恢博羅縣慷慨賦詩自分必死已而清兵追護乃斬之懸首通衢顏色如生

夏五月劉兵亂守將焦璉逐之 承胤諸部至桂挾餉不出兵留守搜庫藏而外捐囊萬金夫人邵捐簪



珥數百兵卒不肯出與焦兵主客不和譁變擊鬪掠市而去

帝幸武岡改爲奉天府 劉承胤請以金吾郭承昊馬吉翔嚴雲從封伯御史毛壽登參金吾無矢石功何得援邊例吉翔等疑疏出劉湘客指周鼎瀚遂羣嗾承胤逼上立下廷杖旨縛壽登湘客及御史吳德操萬元吉于行在午門外朝諸臣亦跪午門外伏地不起申救乃免四臣俱落職承胤益橫遂攬大權挾天子幸武岡留守瞿式耜疏留蹕全陽曰聞郊禮成卽圖移駕不知將回桂林耶將幸武岡辰沅耶夫上原以恢復兩粵爲心不徒西粵未恢未可移駕卽東粵未恢且當駐全也不聽竟蹕武岡專官再促留守入直留守不奉召

清師犯桂林留守督師瞿式耜帥師大敗之遂復陽朔平樂 清遣恭王孔有德淮王耿仲明治王尙可喜取湖南諸府進取廣西全州將抵桂林五月二十五日偵兵變積雨城壞遂大闢入薄城下環攻文昌門吏士失色時焦璉爲流矢所中血流至肘奮臂而呼督師撫按肘羽投石分門嬰守用西洋銃擊中馬騎清勢稍却乃出城戰擊殺數千人自辰至午不及餐將士枵腹留守括署中米蒸飯親出分哺將士益樂用命向晡雨未息暫收兵明復出戰璉奮力直入橫衝其陣清兵大靡棄甲曳兵而奔留守先令別將馬之驥伏于隔江聲相接勢倍振清兵初分路從間道栗木嶺來之驥待銃一決疾馳渡江



運糧提鞬連斃三人清兵氣奪大北追殺二十里而還孔有德敗時望虞山樹木皆以爲天神幾爲焦兵所及自此不敢窺桂云是三月之內危於清亂于兵留守從容指磨乃得底定璉久將桂得桂人心留守以國士遇之故得其死力璉乘勝遂復陽朔并下平樂

征蠻將軍思恩侯陳邦傳復梧州 時懷集縣丞徐定國向匿山中誓不薙髮至是引兵復懷集縣廣西

御史魯可藻督師復賀縣富川引兵至平樂與焦兵會陳邦傳由賓柳及潯州清兵大懼其巡撫耿獻忠遁還廣州遂復梧

旌保桂功封瞿式耜臨桂伯焦璉新興侯式耜辭不拜 疏曰本朝封拜文臣自王威甯王新建外指不多屈或憐臣死守孤城謂省會無虞不妨破格以行鼓勵其如貽笑四方何不允復疏報軍情曲折并自劾曰自二月十五日移蹕之後以迄五月二十九日凡百有六日矣此百六日中遇寇變者二遇兵變者一皆極危險萬死而無一生之望者夷狄患難變故當前總辦一死字亦遂不生恐怖不起愁煩惟是臣之病不徒在身而在心不徒在形而在神身與形之病可療也心與神之病不可醫也又曰臣所依恃者皇上皇上駐全猶有見天之日駕旣幸武臣復何望再請返蹕全陽不聽

以魯可藻巡撫廣西 可藻和州人以明經授新城縣有政聲考最陞御史巡撫廣西留守敘軍功拜是



職

秋八月劉承胤叛降清奉天皆陷清師殺之 勦鎮劉承胤號鐵棍擁重兵善健鬪然子女玉帛過多愛戀恐失遂出降清上倉皇出走清師入武岡利承胤之貲伴與結盟數月後召與飲宴殺之

清師執吳炳 上之出也百官俱未之知吳炳以疴疾留逼之薙髮投誠未逾月病死

帝幸柳州 承胤之降也百官未知上先知之獨與太后倉皇出奔惟錦衣衛馬吉翔步從百姓獻雞黍土司獻金刀上皆慰勞之崎嶇險阻由武入粵瞿留守遣人間道請由古滬還象州入桂上次柳州留守極言不可輕移一步黔滇地荒勢隔忠義心渙三百年之土地僅存粵西一綫返蹕收復號召聯絡粵師出粵以恢江贛楚師出楚以恢武荆再疏請迎極言粵西之山川形勝兵馬人情俱有可恃年時豐稔飛輓有資上三勅召留守留守不赴

督師閣部何騰蛟來桂林 督師何騰蛟新參嚴起恆咸至桂南安侯郝永忠率兵驟至疑主賓不相容大不安瞿留守加禮撫慰永忠樂爲之用宜章伯盧鼎亦至自楚留守復疏請返蹕極言柳州猺獞雜處地瘠民貧不可久駐慶鄰黔蜀南甯地逼交夷壤遠勢僻難圖中興不可遠幸邇來將士瞻雲望日以桂林爲杓樞道路臣僚疲趼重繭以桂林爲會極江楚民情尙以桂林爲拯救之聲援騰蛟與永忠



鼎璉等俱分防住汛可圖恢復不聽

帝次象州 覃裕春子鳴珂與龍文明備兵驚移聖駕倉皇跋涉宛如武岡時會陳邦傳子禹玉以二十人送駕軍容備始復次象州

冬十有一月督師何騰蛟大敗清師於全州 瞿留守曉夕籌畫調和主客集郝永忠焦璉誓于神前刻期出師宜章伯盧鼎與滇鎮總兵趙印選分路駐全鼓勵益涌勸餉捐輸轉運不絕騰蛟得展其韜略大敗清三王之兵于全州斬級無算獲名馬駱駝而還諸帥連營而軍如天津閣道互三百里清兵退入楚

帝還桂林 劉湘客作留守傳詳其事曰自十一月上自象蹕桂自春徂冬公不徒治軍而兼治民身在象念切廷陞公曰所重者在外猶在內也司禮龐天壽七月請催兵下梧久在粵舊司禮王坤被劉承胤逐者復入自武岡至柳至象票擬皆係全出馬吉翔手也公欲上攬大權明賞罰嚴好惡親正人聞正言威德兼行以服遠近其政事之得失肇慶時爭而得者十年茲爭而不得者十至閣移多改票儲曰上意爭而不勝其爭者更十之九矣公歎曰勳帥異懦竊望詎非朝廷之處置無以服其心耶騰蛟再督師出全兵益不睦焦璉下平樂永忠壁興安公憂勞于密勿之間每曰既無以挽政事之得失又



無以輯和勦鎮之心在內在外兩無所得仙仙覩覩搏手奚補哉五鼓肅衣冠而起黎明入閣夜分始歸處流極之運肅然如治朝也視上動靜審上飲食雖美瓜燒餅非時且進上不食不敢先食家人凜凜操節猶孝子之事嚴親也各路奏使延之入語計道路遠近給發路糧江閩廣浙書使慎密周遠方蠟表月數至其遠人亦以桂爲歸勅諭黔蜀進兵召入伏處之臣

以下闕疑

戊永歷二年

魯監國二年

春二月帝幸柳州 郝永忠璧興安聲言被襲夜至闕欲撤兵左右禁近卽欲上遷金鑾輿不旋時留守瞿式耜曰不可督師警報未至營夜驚無大恐二百里外之風塵遽使九五露處耶播遷無甯日國勢愈弱兵氣愈難振民心皇皇復何依左右禁近益周章不止無已侯督師果急甲士山立正宜親兵督戰天威咫尺激勵將士若以走爲上策桂愈危柳又不危乎今日可到桂明日獨不可到南太平反覆數百言上曰卿不過欲朕死社稷耳留守泣下沾衣嚴起恆曰明晨且議五鼓留守備御用銀三百兩將進而乘輿已發矣時二月二十二日也

盜掠桂林 郝永忠闖賊李自成之左營也受撫後素不奉約束先是總兵陳龍友忠勇善戰屢挫強敵以二百騎候見督師何騰蛟永忠襲其營而殺之剛愎貪傲其天性也惟騰蛟稍制之前與焦兵不睦



瞿留守曲爲調和撫慰丞忠稍爲留守用及璧興安會有江西進士蕭琦留守知永豐時門生也爲人  
僉壬以禮垣驟陞司馬時居永忠營日夜求所以媚之遂言桂林富饒留守殷厚趨永忠赴闕因聲請  
清兵刼營撤兵西上抵桂巡撫于元燧請老以堅壁閉城弗納而琦詭以舊誼請留守納永忠比入城  
卽縱兵宣淫擄掠極其慘酷焦璉遣人謂留守曰強敵外逼奸宄內訌勢不能兩全願移師至桂保公  
出城駐兵城外俟賊乏食必出城外掠卽統兵四面擊之不過數日而賊兵可盡然後以全爲保障以  
梧州爲門戶協力守之事可萬全留守以治兵相攻恐傷百姓且虞敵騎擣虛不聽至是留守以乘輿  
早發疾出送駕永忠卽以數十兵遮留守車數十兵躡留守署冠服圖書被刼城中百姓奮擊俱爲殺  
傷留守家人假何督師令箭救留守家屬得出留守裸體坐署中持令箭者逼留守登舟演營亦自靈  
川撤兵城內烟火高于樓櫓留守家人放舟三里樟木港黎明少司寇劉遠生等至港留守一日一夜  
不飲食惟嘆息不及送駕不死署中爲恨遠生等謂兵變倉卒急難著守請下朔平間催焦璉入援發  
檄遠生毋內恐檄紳士毋驚疑薙髮檄一吏入桂息烟火收倉儲毋爲亂人所搬盜留守然之舟下三  
十里登市井入民屋草檄分發明日留守小艇返桂城下俾知留守在也仍暫下陽朔璉兵續上上楚  
鎮周金湯熊兆佐亦入桂城守留檄按察司僉事邵之驊部璉兵收視倉中餘米定人心三月初一日



入桂廡舍零落滿城但暴屍骨火煙中燔炙氣耳留守令軍悉屯官舍灑掃街路其從官被擄似雲人者漸周給之太常卿黃太元死于兵棺殮之桂城星星始有人督師何騰蛟自永甯至滇鎮胡一清統兵至焦璉自平樂統兵至軍復大振

豫國公金聲桓建武侯王得仁圍贛州 聲桓雖爲清臣意常怏怏不樂爲用及鎮江西屢忤按臣副將王得仁勸金反領之正月二十七日乘清官俱集府治驟率兵圍之盡殲焉令百姓俱易漢裝稱隆武正朔草檄四出遠近應向江西全省俱復楚地震動獨贛州未下時鎮守湖廣羅提督恐兵趨廣欲先敵金兵於贛州西觀勝負爲向背遣人移書曰人心未死誰無漢思公創舉非常扶大義爲天下倡天下成引領企足日夜望公至但贛州東西要害山川上游公欲通粵則贛界其中公欲他出則贛乘其後莫若先下贛贛下則楚地可傳檄定矣金以爲然至是帥師圍贛贛守將高進庫卽前在吉安府父兄妻子俱爲滇兵所殺者也又以先受師不肯下移書佟養甲謂贛爲東粵門戶贛朝下則粵夕受兵贛城三面距山皆崇崖峭壁仰面萬仞勢難驟攻第列營固守城中乏食不及旬日束手待斃我爲公守公資我糧先有清官實到採辦銀六萬兩養甲借三萬給之

三月清師復犯桂林督師何騰蛟帥師大敗之追至全州 郝賊亂後清兵意桂林空虛烏金王帥兵數



萬直抵北門指揮談笑謂城旦旦夕下壘留守坐北門慰勞軍士勉以忠義何督師督將校分三面出胡一清統滇兵從文昌門周金湯熊兆佐統楚兵從榕樹門督師同焦璉從北門戰未合璉卽奮臂顧左右曰璉爲諸君破賊戰騎橫矛直奔清營清兵圍之矢如雨下璉左右冲擊勢如游龍清兵合而復散者數次撫粵將軍劉起蛟見璉被陷大呼殺入與璉合擊殺數百人貫其營而出會胡一清從東至督師撫其背曰兒好爲我破敵一清卽躍馬奮擊殺數人奮敵馬而馳一清好剪馬騾每乘馬必剪馬騾清兵認爲牛輒曰此騎牛蠻子不易當也胡與焦合兵而前金湯兆佐從旁橫擊璉標下趙興白貴統銳師四面夾攻皆殊死戰白貴戰沒清兵大奔追殺二十里烏金幾獲北渡甘棠遁去留守于北門待督師還交相勞苦是三月二十二日也督師遂列營榕江諸師分大小兩路軍於桂當郝賊亂之監司府縣俱散留守悉令還署舍撫順荒餘收拾破傷治簿書誠職守招徠撫字四野漸集大兵日需粟數百石留守然髮爪辦之督師乃得督兵出嚴關留守上疏詣行在候天子三宮起居當乘輿發桂塵霽裂矣留守獨處城中傳聞頗凶上欷歔泣下至是大喜知留守在也下璽書旌美遣官慰視憔悴留守寸縷無遺賜紗段銀兩并賜精忠貫日金圖書一方皇太后亦賜紗段銀兩與夫人邵桂城儼然都會云留守卹死事軍士家爲壇祭之焚白貴屍得箭鏃數升人皆駭曰此楊貴後身也



帝幸南甯府 上自柳如南甯留守念天子宵衣旰食南甯蠻鄉不可久蹕日爲上清輦道請還桂督勳  
鎮將士直取全州促巡撫魯可藻下梧會東人有反正信令可藻繕兵若待敵者可藻銜自署兩廣舊  
例東撫稱制兼粵西西撫稱撫留守曰方今武人多自署撫軍師一面牽制輒自命貽遠人笑周鼎瀚  
以閣部擅留守亦疏止之陳邦傳稱粵西世守牒四飛留守駁止之今日功晉五等尙未裂土海宇剝  
削止粵西一隅爲聖蹕之地楚滇數萬之師日需食輒曰獨擁豈老成憂國所隱料瞿留守身雖在外  
朝廷綱紀無不極言力請曰臣與皇上患難相隨休戚與共原自不同于諸臣一切大政自得與聞朝  
議可否象指所聞本亂而求未治未之前有又念無講官經筵不御石室塵封何由聞得失手書八箴  
于扇進之 趙臺順天人錦衣籍以武職改文階陞南甯添設巡撫有才幹能得士司心會有潮州人  
胡執恭爲吏部當該在先帝時陳邦傳因襲職與執恭有舊旣而執恭至廣西在邦傳軍中邦傳之子  
禹玉因迎駕得近上票擬時下勅有拜君之賜于無窮句遠近笑之禹玉欲得南甯執恭佐之臺不讓  
日治兵相攻

夏四月清將李成棟以廣東來歸詔封東安伯不拜進侯又不拜尋封惠國公 先是清之下閩也前期  
鑄印特遣貝勒爲大將其于粵固未之及也成棟以副總兵吳淞貝勒調隨閩閩下令以偏師赴粵不



意唾手得之將卒皆成棟麾下自謂汗馬功高及佟養甲敘功疏下進兵部尙書假便宜成棟受其制又凡成棟所下地方委官署養甲必亟易之以是觖望形之詞色養甲漫不省成棟又遣大廳方甘載寶賂于朝廷過江西地已反正扼之不得通密謀附和李兵號稱五十萬寶十五萬而我兵鱗集于江廣者不可勝計陳子壯雖殉難其子中書喬生統舊卒居腹心成棟甚懼一日回署藩司袁彭年養子李元肩登樓去梯相謂曰吾輩因國難去順歸清然每念之自少康至今三千餘年矣正統之朝雖有敗必有繼起而興者本朝深仁厚澤遠過唐宋先帝之變遐荒共憫焉今金將軍聲桓所向無前焦將軍璉以二矢復粵七郡陳將軍邦傳雖有降書而不解甲天時人事殆可知也又聞新天子在粵西遣人瞻仰龍表酷似神祖將相交和神人共戴若引兵輔之事成則易以封侯事敗亦不失爲忠義是時兵餉之權在藩司養甲牒銀五萬兩犒師彭年不與以激怒其軍心舊將軍李明忠辱殺養甲之委署官以挑之有池州胡奇故從養甲辦事得授南雄知府及清遣御史劉顯明巡粵至雄守將張某訐奇提問視職閒游省會窺見端倪以告養甲養甲不提一本所親從皆成棟人也計無所出勉出一示許士民復冠裳冀以先發得赦死而成棟已密製大旗二面刺靖難安民四大字十五晨遣人掣去養甲所豎總督旗而以新旗易之養甲唯唯惟命時上駐南甯成棟遣洪天耀赴行在自陳謝罪請迎乘



與時陳趙仇殺人心皇皇乍聞反正之舉驚疑百出天耀等皆舊臣降清者力陳成棟忠誠且述金聲桓反正事甚悉人心始安諸臣在粵者爭往迎駕成棟過布邏卒分道遮止惟耿獻忠在梧州得先輸款詔下歸附功亞成棟尋陞工部尙書以素與成棟家厚得不更置

夏五月清師圍南昌府 金聲桓反正江西聲撼南北警報至北京大恐盡撤滿洲驍騎移檄遠近徵兵四集遣固山譚泰劉良佐等帥師抵江西時步兵二十萬騎兵十萬水兵十萬舟萬餘艘牛車駱駝西洋銃等無算舟尾相接浮江而上金鼓震天亘三百里清兵出師之盛前此未有也聞聲桓圍贛州欲急救之有獻救韓伐魏之策者遂趨江西圍南昌初聲桓反正時舊輔姜曰廣爲督師奉孟藩世子鎮守南昌精銳盡撤以行姜固文士不嫻將略被圍大懼不知所爲

豫國公金聲桓圍贛州不克師還 先是聲桓愛高進庫才欲降之令軍士不得放礮日增壘堅壁爲久困計及南昌警至王得仁先知之計曰我聞先發制人不制于人莫若祕其警報不令人知督三軍之士銳志攻城城中乏食不知外救不及三日贛必下贛下則一師守贛一師守粵粵知贛破必從風而靡然後西通西粵右守嶺表清兵知贛破粵下必解圍向贛我以逸待勞戰則勝守則固南昌亦得息肩間出以絕糧道則數十萬之衆可殲于旦暮矣若攻城垂破而撤兵棄之強敵在前贛乘其後此危



道也獨不見甯王覆轍乎聲桓以家在南昌聞警急不約王遽退師王兵見金兵退不知其故亦大退得仁雖斬之不能禁止贛師突出自相踐踏者數千人金抵南昌突圍而入自此江西府縣仍爲清有贛亦間出取吉安府南昌遂成孤注矣

建武侯王得仁救九江府師還 金聲桓已入南昌王得仁率兵二萬直趨九江姜曰廣以檄召之得仁曰九江據長江要津清兵轉輸必由之道我聞興師十萬日費千金以數十萬之衆深入攻城而糧道已絕非分兵攻我卽撤兵東下分則勢弱撤則師勞九江四面臨江城小而固以我守之未可卒下公輩引兵徐出東西撓擊內外夾攻此犄角之勢若棄要害入孤城譬猛虎陷阱此成擒耳曰廣不聽一日夜檄數十至得仁嘆曰不過欲得仁同公輩死也遂撤兵西上清兵以舟師扼諸江以萬騎持勁弩駕西洋砲扼諸路得仁首先士卒轉鬪而前斬級數千奪輜重火砲什物無數城中亦出兵相應乃入城清兵屠九江老弱婦女殺掠殆盡

六月留守督師閣部瞿式耜犒師全州 前月二十七日督師何騰蛟乘勝復全陽上疏報捷不自爲功曰爲皇上以信臣用臣耆瞿式耜一人也至是初三日式耜方病暑往全勞師諸軍列營全城外數十里旌旗蔽日將帥咸帕首弓刀伏馬前曰微瞿公無以有今日



金聲桓王得仁以江西來歸封爵有差 聲桓反正半年尙稱隆武正朔後有舊臣至述閩陷廣立之詳始改稱永曆至是反正報至留守瞿式耜疏請慎選持節大臣往諭聖德彼數年不見天子其號令署置苟緩急失宜不亦褻朝廷而失人心乎憂正非細少司寇劉遠生周秦人久于節鉞名聞江右可遣疏入不報尋封聲桓豫國公得仁建武侯

惠國公李成棟攻贛州不下 先是江西反正贛州不從聲桓攻圍三月困敝欲降會北兵突至南昌聲桓師退至是成棟頓兵南安信使往復迄無要領逡巡却退

帝幸肇慶府太后中宮俱駐端州 四月中李成棟遣舊臣洪天耀等迎駕上意未決勳鎮陳邦傳等請留輔臣瞿式耜請駕幸桂疏曰興陵兩載陷風塵成棟令地方官修葺陵殿巍然天壽彼數年想見天子漢官一旦奮不顧身且移山趨海之力更非有所疑也但事權號令宜歸于一茲軍功爵賞文武署置決于成棟若歸于朝廷則事權中擾閫外不能專制不歸朝廷則徒擁虛位且楚黔雄師百萬騰蛟翹首威靈如望雲霓聖駕旣東軍中將帥謂皇上御新復之地成棟亦有邀駕之嫌號令旣遠人心渙散再疏令簡討蔡之俊入迎又疏令給事中蒙正發迎駕又曰前日粵東未復上宜住桂以視楚今日江廣反正則宜住楚桂以出楚事機所在毫釐千里吏部侍郎吳貞毓請幸廣城成棟適自嶺還師上



遣使勞軍成棟備法駕進御用嚴護衛自梧州迄端州結綵數百里旌旗與樹色靄映甲兵與日月爭光千里間樓舩相屬極其壯麗連日天氣和朗帝駐雞籠山有景雲覆護留守瞿式耜築三亭于其上以表其忠碑文至今存焉復有黃龍見于海口呂宋遣使入貢甌邏巴國人進圖識上大嘉成棟親率將士築沙堤議改兩廣軍門爲行宮留守瞿式耜命少司寇劉遠生謂成棟曰天子天下主爵也賞征伐出自天子天子又與天下共之脫上駕此爵賞征伐疑天子必有私隱令寄政不可不嫌也指揮進取奚能如意成棟曰然遂罷修行宮仍以肇爲發祥正位之初都

詔加李成棟太傅總管七省行軍大司馬

時從上艱難者頗自負五蛇功而成棟意不懌也盡用其素

所私昵常爲清官者布列內外又用其乾兒元膺

本姓費河南人

門幹吳之蕃掌錦衣衛事凡不出其門下

并不經其題授者必捕擊之

惠國公李成棟師取郴州

是月分兵三萬往湖廣郴州先是佟李進取廣西不克差辦事瞿紹祖往湖

南乞師監軍兵部侍郎佟養和卽養甲兄也以兵少不允紹祖三往仍撥裨將田起鳳統兵五千來援行至郴聞變止頓成棟欲并其衆計遣一介可折筆使耳然意在縱兵擾民時從韶郡分兵三萬取道樂昌宜章往招起鳳起鳳以師來歸往來騷擾一方不勝困敝云 有潘名世者先授清任梧州府推



官反正後改保昌知縣成棟過嶺時有養馬卒病付名世畜之卒有所索不遂成棟敗歸蜚語云知縣謂君不能殺敵只會殺百姓成棟怒以他事呼之至縛斬之時閩粵多盜鄉民結寨自保廣州有一寨下瞰河成棟舟過戲謂起鳳試往攻之起鳳登寨民懼發砲擊斃成棟怒厲衆攻之毀之捕其貲屠其民

李成棟妄殺廣州府良民八百餘人 是時成棟得自專恣縱兵殺掠有土人衛姓者家頗溫潤與鄰黨相謂曰兵若至須協力禦之釀酒告神一無賴嫌酒薄告成棟謂合謀殲公等問何以爲驗曰凡內襪綴幅短一截許者其黨用以自別也成棟怒卽欲屠城會日已暮百官跪請雷雨又大作姑頓刀凌晨邏卒四出搜得卽戮之妻子飲泣皆不知所坐云衛姓身被戮家被抄沒

盜殺潮州知府凌犀渠等 叛將軍任重賊殺道臣李某潮州知府凌犀渠海陽知縣岳桂任重故武弁後入綠林丙戌冬就撫隸王承恩帳下爲中軍官佟李至授委潮州府鎮反正後李某任肇慶道凌犀渠任南甯知府岳桂任懷集知縣並調令各抵任岳出任重所部卒不遜道直前衝突岳怒執而笞之解府府責之解道道責之任重怒唆衆兵詭稱山寇至突入三人署擒殺之

秋八月閩臣路振飛錦衣衛康永甯總兵汪某來朝從閩航海至行在閣臣晏日曙兵部尙書蕭琦相繼



去

盜殺兵部右侍郎劉季鏞 季鏞吉水人父升丁丑狀元以劾楊嗣昌奪情謫官家居後以起義官至閣部封廬陵伯卒諡文襄季鏞從起義丙戌授翰林待詔繼入廣西至今官戊子五月統衆至鄱縣逐清所置官而居之已而衆散己丑還行在尋出有羣盜來就撫統之至樂昌四出剽掠禁之不止反爲所殺

九月定興伯督師閣部何騰蛟復永州衡州 先是七月初十日騰蛟統勦鎮曹志建等圍永州清兵食盡殺民以食舊紳劉興秀鄉居清官力致之羈城中首被禍已而民盡九月二十日清兵突圍走至衡州旋望風遁二府皆復將恢長沙會志建不受節制還屯永之龍虎關騰蛟因頓兵

冬十有一月惠國公李成棟攻贛州敗績 時爲清守贛者高進庫柯某故隸左良玉麾下與成棟相締盟前此六月遣使招之約以踰杖壯救不至當輸款至是成棟厲氣攻之軍中火具盡移以行鋏鋤等器多方促辦又慮無舟過嶺苛執人夫舁過梅嶺士人亦不免焉道路死者頗多既抵贛日暮薄城將饑卒餓而成棟氣驕莫敢言者是夜城中鼓角齊鳴清兵突出成棟策馬先奔軍士爭竄所賫器械皆棄不顧靡有存者



李成棟殺佟養甲并劉顯明 養甲於崇禎年間謫名董莢由提塘得志總兵宏光時賄馬士英提督南直鹽法贏積過多貝勒至攜之入閩因令取粵反正後封漢城侯帶閣銜至是成棟敗歸以宿恨且慮有他變頤指朝廷以公差遣出夜半襲而殺之顯明則清所遣以巡粵者并將官劉某係遼東人及同差兵部某等成棟皆分頭捕戮之時又有內官李元培齎銀六萬來粵採辦養甲于內借銀三萬給贖州元培以餘銀進上得入司禮仍拜成棟爲叔李元培吳之藩弗善也力詆之成棟出師日陞辭卽于御座旁掣之行上愕不敢問太后遣內官問而挽之成棟不聽更肆慢語而出

督師閣部堵胤錫復湘潭進攻長沙不克 胤錫統李赤心等恢復湘潭赤心桀驁甚至營中稱高氏爲太后及具疏稱自成爲先帝胤錫皆隱忍聽之不上聞且請封爲興國高氏弟必正輩封伯者十餘人統衆至湘潭縣屠其民長沙懼協力爲清拒守故弗克

十有二月執清人李紹祖歸于桂林誅之 紹祖瞿留守同年進士也降清任楚撫守永州何騰蛟攻圍七旬城中乏食軍士掠婦女爲糧猶堅不下有馬廷鸞者明朝縣令吳郡太倉人也時在城中與紹祖居守騰蛟獲其子不殺廷鸞感恩由是城中動靜纖悉皆通清之援兵遂絕紹祖始降滇營解至桂林留守流涕讓之曰汝素受國恩奈何生爲背叛之人死爲不義之鬼今復何言紹祖曰天下人皆降清



豈獨紹祖也留守曰天下人皆不爲紹祖清其奈我何紹祖詞窮遂磔之

遣使召弋陽王不至 王江西宗室也請兵入建陽建陽者從英德縣之滄光廠遡流而上爲陽山縣連州連山縣達于湖廣地皆深林峭壁人喜用砲砲卒背負不用手攜而發輒命中郡王入土人擁護之成棟屢攻弗克反正後遣科臣洪士鵬往亦不得入七月有宣忠伯王承恩請行遂命齎勅往十二月與王遇於陽山然衆皆居奇自恣不聽王赴闕卒不得其要領而還有標下彭鳴京鍾某羅某願統其衆數萬隨承恩出自効亦不果用

己丑永曆三年

魯監國四年

春正月李成棟殺宣忠伯王承恩 承恩大興人世襲錦衣指揮衛事加今職至是彭鳴京等願爲之用又胡中丞田闢有衆數千亦願隨之承恩大喜成棟聞之忌且怒初八日兩舟相遇于英德成棟邀過舟歡飲夜闌佯醉卽席殺之

李成棟殺東閣大學士朱由樸 由樸江西宗室壬午鄉舉廣東教諭丙戌鄉試充同考官歷陞翰林院侍讀至是入閣出自上命成棟令錦衣衛捕繫獄中死之

清師襲湘潭縣督師閣部定興伯何騰蛟死之 騰蛟貴州人以孝廉歷官至楚撫左夢庚反逼至南京



不從自投江中流四十里若有物負之遇救不死清兵至糾合其鄉健勇稱演營并統曹志健等崎嶇湖南粵西間戰功甚多可稱中興名佐治至是同總兵馬進忠輕騎趨李赤心營會師恢長沙日已暮駐師湘潭會進忠兵已離城所統止馬養麟百五人清總兵徐勇聽李紹祖子密報遣驍騎五十昏夜入城養麟馳騰蛟墮馬被獲不屈死之

詔贈何騰蛟中山王子諡 騰蛟既死其夫人某幼子二皆大罵被賊殺上聞之大慟輟朝三日贈諡蔭其子文瑞爲中書舍人文瑞歷任兵部侍郎永歷五年病卒于行在

清師屠南昌府豫國公金聲桓大學士姜曰廣死之建武侯王得仁不知所終 南昌被圍有一道士至自稱雲水真人能運粟役鬼且云合城人宜茹素戒殺自有天兵來助非惟解圍又能破敵曰廣信之凡城中有飲酒殺生者皆重罰之百日不出兵清兵因此得合圍增壘百日後道士自稱我奸細也爲清朝進士現任某職汝輩若不降必遭屠戮矣城中人怒車裂而食之南昌三門傍山清皆掘塹築牆三門沿江則以漕艘闌截江南聲桓兵不得出發砲皆軼牆外或突江中城中計米數金易子析骸之憐等於睢陽自夏及冬日夜混戰至正月大雨連旬城磚毀爛清以西洋砲攻之城皆震裂聲桓不知可守使匠爲數棺闔門親屬漢裝坐入其中四面縱火自焚王得仁統死士三百人殺出澹臺門清兵



者無算得仁不知所之或云殉難 逸史氏曰友人何松石令南昌余與季弟西遊屈指以計八十有五甲子矣每追往事淚簌簌下南昌城外有廣廈撫軍解石帆建以治兵者也壯麗過于滕王閣而秋水長天落霞孤鶩殆與閣景相埒歲在丙子春夏之時時值鄉試羣英咸集郡人時華萬茂先執牛耳與盟者一百七十二人皆自以爲振衣千仞濯足萬里與日月爭光者也孰意時異勢殊改革之際殉難殆盡姜太師被難後余過南昌取道吉安知己零落寥寥數人耳又復四年學士郭宇止以憤死于平南王師選部蕭伯玉以憂死于金蓮山中若萬風后輩皆遭時不偶骨化魂消俯仰之間俱成陳迹豈不痛哉友人爲余道南昌忠烈事甚詳豫國公人才皎皎見人默無一語建武侯遼東人髮五色人俱稱爲王雜毛善談論有謀略當反正時有勸聲桓直趨楚地與何騰蛟夾水而軍表裏山河必無害也聲桓不從及南昌被圍建武侯欲扼九江絕餉道姜督師不聽二策不用遂絕中興之望矣兩粵失余落魄遊羅定州遇紹興人金芳爲清羅定州同其兄某在平南王尚可喜幕府與謀議二人在先帝時會居袁崇煥幕中芳以創敵功授靖安縣二尹得交于忠黨舒魯直家宰熊文舉詢魯直近事則以姜壤靖節于大同者也嗚呼忠義之氣何獨鍾豫章若此哉予歸同一僮父路途悽愴無復生人之望十一月二十二日遇家中遺族姪起華候余并季弟一札詢諸江右



同盟之贛州路遇二孝廉俱易姓者前揖勞余因閱季弟所寄札遽昨舌曰此皆起義諸君子也傳勿高聲余笑而謂之曰不佞豈畏死者顧諸君子安在哉孝廉曰曩者金王之難諸君子各懷徇國之心是以受禍俱烈今其存者十之一二也又皆或謫或隱無有安然食息于茲土者忠義之氣之死靡他是以屢躡而不悔也子之南昌試往觀焉余終扼于膺父不得見

二月惠國公李成棟攻贛州行至信豐卒時江西警報日至成棟麾下各大鎮俱懸壘東繁華不肯出師成棟獨以其屬行且愧且忿又恣睢殺戮人皆不敢近次信豐夜聞鼓噪聲或曰清兵或曰民變成棟醉甚倉皇上馬無一隨者渡江溺死三日後有鐵人鐵馬浮于水面始知成棟死也朝野傷之蔭其子元胤爲南陽伯逸史氏曰余從先太師在朝無仕宦情好詢前言往行成棟雖武夫儘有過人者敬先太師瞿稼軒李愬之于裴度也信學憲袁特邱呂布之于王允也慕黃門金道隱董卓之于蔡邕也讓引鹽濟西事雖不行心可尙哉先士卒援南昌命雖不延志可嘉矣又謂朝廷功賞不宜濫文武職掌各宜分言官直氣宜獎進鹵簿不得與內閣機務駿駿乎有古大臣風闖賊肆虐成棟深恨赤心爵列五等牧遊之力居多成棟弗是也成棟亡部曲益不振嗣後喪師失地宮官諸臣欲倚牧游以傾異己遂借蹕東粉刑書先太師悉其寃直書四年朝事致牧遊君側恨之廣西從此困矣



至于恣睢直戇不無有之記者著其大不遺其細若曰驕泰以失可不信哉

夏四月清師入衡州又入郴州 三月清時鄭王至長沙府四月陷衡州續陷郴州時李赤心分佈各營屯駐郴州及諸屬縣一聞清兵至望風而遁清兵追之至龍虎關而還

五月督師閣部堵胤錫來朝 時胤錫過龍虎關宿民寨曹志建遣卒圍之幾不免會建以保昌侯晉永國公中書廖某齎勅印至爲和解之得達行在入閣辦事三日復有督師之命 志建鄞人也字光宇世襲滄州衛清兵入京師合家死事者九十三人胤錫爲長沙太守與志建善謀招兵志建薦楊國棟爲將楊後爲將晉武陵侯胤錫亦晉閣部督忠貞營志建爲楚將復地得楚粵二十餘縣晉永國公卽以所得地爲食邑老營駐龍虎關忠貞故起羣盜所過殘虐戊子秋何騰蛟恢長沙檄忠貞援江西取道龍虎關志建患疾引兵還騰蛟由是遂困時胤錫復督忠貞入衛并堙木刊志建疾之設兵提防遂至格鬪胤錫爲志建所獲強留月餘會有江西宗室朱謀烈舊認志建爲父在志建營乘曹堵不睦欲陰搆之于中取事胤錫夜逸匿故御史何某之子何圖復家志建率兵往索圖復不與圖復家近獠獞貲財富厚素能撫集獠人遂與志建戰志建誘殺圖復破其家圖復二子走獠獞恨志建入骨志建銳卒亦盡矣清兵橫行湖南遂無與抗者惟守道州二十縣而已後志建言及此事甚悔幾至墮淚誓殺



朱謀烈

忠貞營師次德慶州 李赤心至行在移屯德慶州時江西陷沒已久行在猶不聞會兵部侍郎程峴抗節深山至是赴聞因命齎勅趨李赤心往援途遇赤心赤心佯稱清兵已逼當亟入衛因自爲殿而以子女行裝托峴護之先行比入界口守將張某利其輜重發砲斃峴而取之赤心既至屯德慶州聲言欲清君側之惡行在震恐遣堵胤錫力解之乃止

盜殺兵部侍郎程峴 峴吉安府進士舊蘇松糧道去任時招兵三百人攜歸江右日與鄰里相鬪姻親郭之祥解之隆武丙戌授惠潮添設巡撫盡室至粵西至是攜家至忠貞營并胤錫家屬及兩家輜重放舟東下守將利其多財殺而取之兩家家屬殲焉

詔誅楊弘遠 有董姓伯爵者陝西人也上命鎮羅定州取道德慶見程峴被殺以上聞將領楊弘遠不戒軍士奉勅剿之董以礮碎楊三百艘弘遠伏誅亂兵殲焉

滇將趙印選來桂林 印選滇將也初清入南京時印選同王一清王永祚出滇勸王至江西吳浙俱爲清有遇清將高進庫與戰襲其老營盡殺其父兄妻子進庫忿戰益力破滇軍三人走湖南投閩邵何騰蛟己丑正月清師破湖南執騰蛟于湘潭楚地盡爲清有三人相謂曰吾儕以勸王出滇因國破君



亡暫依何閣部今閣部死軍新破不可復振將死封疆乎則吾無封疆責將就降乎則當時之出滇者謂何桂林留守督師仁慈好士可與共當一面盍往焉收殘卒得萬餘宵走桂林留守大喜遣使郊迎但部署不嚴路過多行刼掠焦新興部將趙興好剛使氣怒滇營之橫遂治兵相攻殺滇兵四五人幾成肘腋之變留守亟詔新興語之曰國家危在旦夕方賴諸將軍協力同心共扶社稷豈容私鬪兩軍皆感泣焦新興斬趙興以謝滇將事始得釋因進印選開國公一清興甯侯王永祥甯遠伯以滇軍守桂林全州是爲滇營焦新興守陽朔

焦璉殺其將趙興 死不以罪粵人情之曰白貴驍死趙興劉起蛟相繼誅焦營自此弱矣 逸史氏曰糾糾武夫公侯干城趙興是耶始安所統焦兵最弱敵之輒大創之何以致此茅平菴僧爲余道劉將軍起蛟戰于虞山下帶首級垂馬下纍纍如貫珠當是時寇幾殲嗟乎此真將軍也獨白將軍貴以戰死趙劉二將皆以細過誅嗟乎乃壞汝萬里長城不獨宣國之過也

新興侯焦璉治師陽朔 逸史氏曰二人同心其利斷金雖天步艱難使各勳鎮同心協力上下和睦卽傾國南牧豈能長驅也焦宣國見余于陽朔舟中促膝而語淚簌簌下余與宣先太師語弗省也一日余讀范文正公傳先太師語余曰今日無可耕有城必守余曰談何容易惟焦侯可符斯意耳太



師默然

秋七月新興侯焦璉開國公趙印選遣將王承祥張明剛同圍永州

九月督師閣部堵胤錫卒于潯州 乙未冬余同清凝上人避兵陽羨山中識公里次年春公長子問關

至楚觀公余欽敬者久之通家吳二公子天石述公招忠貞營始末余喟然曰自成爲率土大仇其部雖無罪獨不念朱全忠故事耶先生之志則大矣未幾余遊粵悉公事忠貞自蜀轉戰由楚至梧休息甲士初無入東粵意焚掠特甚行都近郊諸璫漂漂焉是時貂璫鹵簿秉政每用強鎮之勢脇天子復借天子之權制朝士大抵崔胤故智也武岡則以劉承胤潯州則以陳邦傳東粵則以李成棟而朝中之士又各值朋黨爭門戶楚人袁彭年丁時魁蒙正發秦人劉湘客浙人金堡舉朝側目稱爲五虎皆海內名士素以先太師爲景行自附于正人之列至于凌轢宮府侵軋同寮所恃東諸侯也吳人吳貞毓張孝起吳霖朱士鯤燕人于元燧蜀人程源趙昱豫人朱謀烈等皆朝中矯矯者遼人馬吉翔上之倖臣也北人夏國祥以士人爲內侍者也俱心恨五人并忌東諸侯陰以陳邦傳爲朱全忠李茂貞不勝則寄徑于牧游而藉忠貞以佐邦傳故牧游入朝激忠貞入東東人力圖中興以東土爲行都是誰力也若邊臣提兵咸入衛輿東土不能屯正竭東鎬銖不能供億牧遊無以應移先太師稼軒書云上



有密勅東人握君于掌一朝不戒生劫入舟朕不復有中土之望惟卿與瞿先生圖之先太師得書知斯語非上意復書曰我輩不力任封疆聽人臯牢而起釁端非社稷福也公無可奈何未幾公薨公長子以疾夭于忠貞營中公之家屬死于德慶州亂兵蜀人武陵侯楊國棟每向余悲之公之夫人獨留家困頓特甚今里中故國士大夫有過而問焉否耶萬里孤忠骨銷塵土今日爲公敘其事不可謂無緣也已庚寅春余圖入蜀不果悶甚太師手持一編至曰此堵太師之手蹟也弟世治春秋少有異才堵太師數年之精神于是乎在子爲之正之且死不朽矣余受命正其疑而刪其繁蕪兩月始畢時滇事沸先太師曰春秋于弑君之賊汚其宮瀦其室先帝之變忠貞是由堵牧遊儼然錫其子姪何歟余唯唯嗚呼華督弑殤公後有忠良世其家善善及子孫惡惡止其身亦春秋之義歟第赤心勇于私鬪怯于公戰仍穿窬之故智牧遊不省也依以爲重猶童蒙之鵠云

清師破梅嶺治兵中寨 清耿尙二王將下廣東駐師吉安府命贛州守將高進庫爲嚮導道之枯樹清兵舉火焚之引師中屯寨贛州清將柯某以六騎逐我兵四百餘人謂進庫曰南雄卽日可下也高謂柯曰南雄破當籌我四千金柯不應因此不進余從清寨中間遊至行在語大司馬曰譬賊人已入門戶猶熟睡不省耶



永國公曹志建道人報捷 清定南王孔有德至衡州高蛟麟先期攻道州志建與戰敗遂出白金二十萬置營中令曰斬一級者賞金一錠軍士爭先赴敵死戰清人大敗斬首無算蛟麟却走志建道人赴行在報捷

冬十月寶豐伯羅成耀戍南雄次于韶州 清兵在中寨舉朝震怒命羅成耀戍南雄府爲禦敵之計成耀畏懦師至韶州止焉與南雄尙隔十里也

十有一月忠貞營至梧州李赤心死 先是流賊李自成破北京沿邊鎮將無不望風而靡獨吳三桂世鎮關外不服自成欲往征之軍師宋矮子曰皇爺去皇爺不利三桂來三桂不利自成不聽至山海關與三桂戰三桂兵敗宋矮子云明日午時數當大凶宜收兵回京又不從是晚矮子忽失所在次日巳午間忽見塵沙山起聲如雷鳴軍士色戰自成大驚不知何故方錯愕間清兵突至自成兵不能支大敗而奔至紫荊關遣本朝降將唐通守之通復降清自成至陝西稍收部署殘兵尙五十餘萬而清騎三千猝至自成曰來何神也遂發兵圍之三日夜人馬寂然自成不敢擊欲伺其動靜方剿滅之而清大兵已至三千騎從中奮起金鼓齊鳴左右沖突內外夾攻自成復大敗奔湖廣至江西屯兵九月山中或曰黃州忽一日單騎出至民寨爲鄉兵王姓兄弟所殺存兵三十餘萬自成兄子李錦賜名赤



心號一隻虎同自成妻兄高必正左營郝永忠等十八人俱至湖南隆武元年馬吉祥往招撫不從後督師何騰蛟堵膺錫招撫之各受封號爲忠貞營至是楚地已失計無所之伴入衛粵西郡縣受其荼毒陳邦傳與之聯姻冀藉其力以傾東勦殊不知放虎自衛也師次橫州止焉赤心死必正統其衆其部下將領岳侯某病死于梧州淮侯劉國昌出懷集或曰降清或曰死矣兵散橫州屬南甯府界在南潯之間

十有二月王永祚張明剛敗績於永州 永州三面距河我軍以陸師臨其一面清師李東斗堅守五月食盡兵疲猶不肯下是月十二日會孔有德兵至銜枚疾走遶出河外乘我不備取我老營我兵自相擾亂遂各逃入山谷棄甲兵而走百姓恨滇營之擄掠也爭縛而獻諸清惟焦部將張明剛全師而還留守瞿式耜頓足曰我畜銳卒兩年一朝奔潰豈天果不祚明耶嗣後出偏師以恢楚者不可復問而粵西之門戶危于累卵矣

清師屠南雄府羅成耀逃自韶州伏誅 清旣屠南雄西上成耀棄韶州至廣城會輔臣何吾驤輦餉至行在中途成耀刦掠密勅李元胤討之元胤遂于席間斬之以正失守封疆縱軍刦掠之罪

郝尙文以潮州降清

缺

余里人

原缺

朝行在道由閩中見郝尙文述潮州事云尙文之子因在南京未



降時已遣人通馬部院矣至是遂以潮州降

馬部院名國柱

庚寅永曆四年 清順治七年

春正月帝幸梧州南陽伯李元膺留守肇慶 南雄失守成耀棄韶報至行在震恐戒舟西上給事中金堡爭之不得留守瞿式耜疏曰粵東水多于山雖良驥不能桮合自成棟反正上有甯宇財賦繁盛十倍于粵西衣甲糧餉內可自強外可借敵材官兵士南北相雜制勝致王可操券而求也且肇去韶千餘里強弩乘城堅營固守亦可待勤王兵四至傳曰我能往寇亦能往以天下之大止存一隅退寸失寸退尺失尺今乃朝聞警而夕登舟不知將退至何地疏再上而已移肇抵梧矣百官踉蹌就道提督禁旅都督同知南陽伯李元膺慨然曰百官皆去將委空城以待敵耶遂留守之

杜永和出奔海口復入廣城 先是鎮守廣東江甯伯兼管兩廣印務杜永和棄城奔海口李元膺移檄責之永和復還廣州堅守

盜掠廣西巡撫魯可藻新興侯焦璉遣兵討之盜奔龍虎關永國公曹志建誅之 時可藻丁艱居母中永國公權稅官劉成玉利其貲欲劫之可藻竊聞卽放舟赴行在適舟柁壞不能行成玉兵卒至撫標下趙玉與成玉同謀遂無禦者劫掠一空宣國公焦璉聞之怒卽遣兵討成玉成玉奔永國軍兩國兵



幾相向余時在恭城致書永國勸解之志建杖死成玉事始解 逸史氏曰天下安制在相天下危制在將惟將相和士卒豫附非獨將相然也將與將亦然中興永國宣國皆有將略永勤而器小宣勇而才疎小人間之遂至兵敗身軀豈不悲夫劉成玉平樂隸也爲永國權稅將趙玉惠國公蒼頭也爲撫軍旗鼓兩人始相好繼相惡也撫軍在兩人臯牢中成玉覺撫軍于永國而撫軍不之覺也庚寅正月十日余送清凝上人東歸見撫軍撫軍大言欲經略東南謀寄徑龍虎關余因見永國語甚異余曰宋時李忠定公出撫河東以幕中多士遂至將相之情扞格不通終于無濟文士且敗事況羣小諛佞輩乎永國心善余言而成玉遂以十四日提兵掠撫軍矣宣國聞變卽日發兵靡平樂余在恭城致書永國曰方今天子蒙塵強敵四逼惟藉羣公固廉藺之交繼桓文之業乃志君父之大仇修細人之微隙天下後世以爲此何等舉動哉永國悟兵始解宣國兵多鄉人皆士著粵人心歸之永國兵皆楚人以何圖復故徭獞士民恨焉是役也兩人之搆雖釋兩國軍士益立門戶如水火矣嗣後清兵襲曹關借徭獞之力清人襲平樂將士不戰疑爲永國兵嗚呼蓐爾一隅將帥如此尙何言哉

新興侯焦璉帥師入衛璉以討劉成玉故帥師東下遂赴行在



滇人孫朝宗入貢 朝宗一名可望流賊張獻忠養子也獻忠破蜀屠戮殆盡盡收蜀府金銀載入錦江爲川將楊展截殺重貨悉沉江中奪入貴州病死時李赤心已歸順朝宗慨然曰我輩汗馬二十年破壞天下張李究無寸土而清享漁人之利甚無謂也我當仍歸明朝力挈天下而還之一雪此恥遂率衆入雲南會沐國公爲洞蠻所劫卽提兵平蠻與沐結姻歸朝廷因封景國公武康伯胡執恭同陳邦傳假堵牧遊令擅封朝宗爲秦王矯詔所載崇之以監國許之以九錫推之以總攬朝政節制天下兵馬事之以父師朝宗傳檄四方定番侯皮熊首參其不道留守瞿式耜疏請斬胡執恭以正欺君辱國之罪朝宗亦知封王非出朝廷意至是遣人入貢黃金一萬兩良馬一百匹自上書請封復以黃金四萬兩賂朝貴高必正出疏爭之閣臣嚴起恆堅執不許由是怨兩人入骨矣

慶國公陳邦傳帥師入衛詔杖禮科給事中金堡兵科給事中丁時魁尋遣戍削奪都察院左都御史袁彭年翰林院侍讀劉湘客遣戍兵科給事中蒙正發 時詞諫諸臣多失人意羣輩伺權者指政所必去會陳邦傳入衛遂下丁時魁金堡蒙正發劉湘客于詔獄瞿式耜聞報上疏申救謂中興之初宜保元氣勿濫刑再疏爭之曰詔獄追賊乃魏忠賢弄權鍛鍊楊左等事不可祖而行之上頒勅命四人罪狀皆宦官意勅出忌者之手式耜封還謂法天下之公也不可蜚語橫加開天下之疑失遠人之望凡七



疏皆不報詔杖金堡丁時魁削奪袁彭年劉湘客蒙正發亦遣發 逸史氏曰嗚呼桂之亡也奚俟庚

寅之十一月耶詔獄興而亡于是乎在矣武岡之難上馳太后中宮騎錦衣馬吉翔步從三日不得

其至一士人舍其人供神宗像與上貌類上且拜且泣士人夜夢有天神降其家諸天人悉從有一

學士侍側一鬚而魁梧者曰此蘇軾學士也一秀而傑瘦者此李泌山人也士人師學士方以智識

其貌似山人奇寤因自揣曰當中南坐者豈當今天子耶跪而進膳上受之大駭羣鄉人環視各具

難黍吉翔慰之翌日土司庫祐始來朝庀器用具卒乘黃金刀若吉翔者真患難君臣也 吉翔幸

上時窺太后堡大怒欲殺之大司農吳貞毓當成棟反正時又勸上蹕五羊又以縣令薦于成棟得

賄八百金成棟輕之堡奏其事二人恨堡入骨劉湘客貧丁時魁富金給事刻意清操有所需求輒

資于二人二人有彈劾或敲骨或吸髓則以金給事先之袁彭年中郎子神宗朝東林苗裔也反正

後與東諸侯善蒙正發給事其鄉人每原缺輒出五人手每一令出五人自伐其功遂爲眾的道路

以目上移蹕梧州陳邦傳自潯州入衛遂下四人于獄而疏彭年留守閩邸報得堡疏愛其文憐其

遇至于泣下七疏申救而吉翔貞毓及朝士并恨留守思中傷不遺力矣留守文臣不嫻兵凡所以

彈壓勦鎮號令諸軍者惟曰借爵賞以勵將士也從來勦鎮不得獻士于廷是時吉翔秉政督撫有



疏尙稽遲勳鎮薦人朝拜疏而夕下矣一日軍餉以養戰士也焦餉六萬半食桂林灌陽入永國義興入宜章惟靈田臨桂二縣督府得專資焉滇營舊爲楚鎮食楚地十二月之敗全撫馬光匿穴中餉道絕趙印選懇之朝司農牒二邑之餉與之錢穀之出入并不在督撫矣嗚呼名爲留守不知何藉可守號爲督師不知何師可督哉自入桂以來列較勳鎮可以推腹心共患難惟宣國一人耳印選軌之駐平樂矣鞭長難及又恐其復合也每師退必曰焦兵來桂截老營也自全退榕江榕江退木黎嶺莫不皆然夫以熒熒一桂捍江南半壁剪其手足掣其肘腋城無一卒庫無一錢雖武侯復生亦奈之何留守時爲余言簌簌欲淚可傷也已欽宗之棄李綱也出之于外秦檜之殺岳飛也罷其兵權今更仇讎事之方面托之委國于仇委仇于敵用之而卽殺之奸臣之誤國也愈出而愈奇矣先太師以余善理財余曰蕞爾國惟錢法鹽政屯田三事耳遂開錢局月得二萬金余意得請于朝東省行錢則以錢易鹽以鹽使民地可漸闢財可漸理嗚呼朝廷方困廣西其肯濟廣西耶印選一日來小東臯忽發大言請餉恢永余曰全州無敵奈何棄之而欲他圖乎楚師數萬食粵地師老則財匱財匱則兵散敵來何以應金給事曰今日敵來諸君肯降耶敵亦何屑受君等降耶余曰莫若三分現在之兵一軍守全城一軍衝鋒出奇兵一軍屯田充餉印選勃然曰屯田須牛種練兵須



足食衝鋒須堅甲利兵方學士曰努力向前自有天授印選默然余因嘆曰外患可禦內宄難除桂其殆哉此庚寅八月九日也嗟乎一桂林也在內則馬吳諸臣在外則趙陳諸勳鎮日夜圖維以亡桂爲事而一老臣拮据其中此實難矣桂亡時余遇李元胤于梧州云朝士聞桂警有酌酒稱賀者嗚呼獨何心哉獨何心哉

趙印選自桂林逃靖江世子及其弟鎮國將軍死之清師入桂林督師閣部臨桂伯瞿式耜總督楚師司馬張同敞不屈死之十月初五日清兵大舉入嚴關趙印選胡一清王承祚佯以分餉入桂林榕江其空壁也武陵侯楊國棟甯武伯馬養麟方馳出小路榕將軍未見敵而四潰留守發使趣印選兵出城城中大亂沿途驅掠留守令戢不得城外潰兵雲飛鳥散水東門外烟火蔽天而鳴鑼聲繞城靖江王及綏甯侯蒲縷出走王世子及其次子俱縊于宮中留守方巾行衣危坐署中胡一清躍馬入署曰至矣至矣公上馬且從一清去留守曰去何之從一清去何如從留守留守因舉杯屬一清曰能飲酒乎一清曰今日豈飲酒時遂躍馬遁適總督張同敞自靈川回過江東不及家來留守署留守喜曰敞至我死不孤矣敞曰公將何行留守曰封疆之臣知有封疆封疆旣失更復何去敞曰將欲得當以他圖也公有命敞敢不死遂止飲酒督標致遠將軍戚良勳牽三馬至跪而請曰公爲元老係國安危身出



危城尚可號召諸勳再圖恢復留守曰四年忍死留守其義謂何我爲大臣不能禦寇以至于此更何面目見皇上提調諸勳乎遣之出城復有家人泣請曰當忍死須臾次公子從海上二三日且至萬里赴行在乞一面而訣留守曰我重負天子尙念及兒女耶亟揮之曰去毋亂我厥明清兵入二公冠帶南面坐清兵望見以爲神不敢入乃發千人圍留守署執去見定南王孔有德有德曰公閣部耶好閣部留守曰汝王子耶好王子有德箕踞地上顧曰坐留守曰我不慣胡坐有德肅然起且揖之見同敝曰汝何人左右命之跪敝大罵曰汝非我毛姻家僕耶提溺器時誰爲汝跪有德大怒厲聲曰余大聖人之後也敝曰汝等已爲犬羊辱侮先聖罪當死有德氣咽直前批其頰旁武士或牽項或以刀背折足強作跪狀敝大罵不屈牽去將斬之留守正色叱曰張司馬國之大臣不得無禮死則我同死有德素重留守悚然遂止因曰某年二十起兵海上橫行山東南面稱孤後爲清將賜稱王擁衆數萬任以南方之事富貴如此公今日降明日亦然矣語曰識時務者呼爲俊傑清自甲申乘闖賊之變驅馳中國五年之間南北一統至一縣縣破至一州州亡天時人事意可知已公守一城捍天下數年于茲屢挫強兵能已見于天下尙誰爲乎不轉禍爲福建立非常以事明者事清無憂富貴空以身膏草野誰復知之留守曰汝爲丈夫旣不能盡忠本朝復不能自起逐鹿稱孤未幾甘爲敵人鷹犬俊傑固如



是乎尙得以時務富貴欺天下男子耶昔少康一成一旅恢復光武十八年中興天時人事未可知也  
且本閣部無功德異能受累朝大德位三公兼侯伯常願殫精竭力掃清中原今大志不就自痛負國  
雖刀鋸湯鑊百死莫贖尙蒙恥于腥羶中逐臭耶一死足矣毋多言有德知不可屈愈欲降之總督叱  
曰痴痴痴豈有天朝大臣降寇者乎有德愈重之館二公于別所防禦甚嚴而供帳飲食如待上賓留  
守日與總督慷慨廣和清臬司王三元蒼梧道彭爌皆留守里人有德使說以百端不應復進曰國家  
興亡何代無之人生若朝露何自苦如此公可薙髮爲僧自當了悟爲世人所不能焉豈僅僅守拘儒  
之節耶留守曰僧者降臣之別名也佛卽聖人聖人人倫之至也未識人倫何爲了悟賦詩倡和自若  
見浩氣吟二人見其至誠喟然曰此真正人不敢復言會留守遣死士遺焦璉書極言清兵羸弱勸璉急提  
兵抵桂且曰中興大計無以我爲念邇卒得之以獻有德大恐閏十一月十七日晨請二人留守方食  
食撤與總督振衣同出留守曰我二人多活四十一日今事畢矣總督曰快哉行也今日獲死所清人  
皆爲泣下二公顏色不變洋洋如平時總督藏一白綢巾于懷至是服之曰爲先帝服也將服此以見  
先帝至獨秀巖下留守指曰一生只愛泉石願死于此整衣冠爭就刃俱被殺時日色無光大雷冬發  
遠近士民莫不流涕同被難者旗鼓陳希賢錦衣衛楊芳齡家人陳祥先是初三日留守知不可守遣




坐營制勝將軍徐高寶印謝表赴行在道阻匿陽朔山中清兵攻獨洞獲之至是亦同殉難滇營一卒怨總督剋其心食有德怒而殺之阿達哈哈番又一拖沙刺哈及馬蛟麟蒞桂雅重留守命以蘆蓆覆之加土于上越三日侍御姚端楊藝留守門下士也入王邸謀殲兩公啟視留守刃血在頸身首不殊面色不變兩人撫之而哭曰忠魂儼在知某等殲公乎忽張目左右視楊撫之曰次子來見公耶長公失所耶目猶視端叩首曰我知師心矣天子已幸南甯師徒雲集焦侯無恙目始瞑遂具衣冠淺葬二公于風洞山之曠地姚端築室于旁同清凝上人守墓不去云留守孫翰林院檢討昌文于十月遣人入行在辭世襲臨桂伯爵印且陳桂林不可守狀聞警辭朝同南大司馬魯可藻御史朱田林問道而上阻山中次年四月爲叛將王陳策扶之以出至梧州大學士方以智爲僧在大雄寺聞昌文將至謂清將馬蛟麟曰瞿閣部精忠今古無兩其長孫來汝能以德綏之義聲重於天下馬蛟麟以爲然厚遇之浙人魏元翼以墨吏黜心恨昌文譖于清將執之至桂將甘心焉未至一日元翼家中鐵索鏗然繞室有聲元翼伏地請罪忽吳語曰汝不忠不義乃欲殺我孫耶元翼叩頭乞緩三日少畢家事又忽楚語曰此不義奴速殺之奚問焉九竅流血而死有德疾遣將禱于城隍忽見宮詹司馬四大字入殿見總督南面儼然大驚拜歸以告有德大駭供雙忠神位于鐵佛寺昌文適至有德因厚禮之昌文遂遷



留守柩于明月洞清凝亦遷總督之柩與夫人合葬焉總督無子惟一女適兵部主事吳重義改葬之  
晨夫婦適至人謂忠義所感云清凝上人者陽羨人真誠不談禪能急人難從予入粵留守愛而禮之  
桂陷時適在昭平同留守次子元鎬崎嶇赴難走至永安州遇兵元鎬失于路清凝倉皇入桂林而留  
守已沒清凝結廬于柩側朝夕焚香種菜自給衣食時缺終依依不忍去元鎬有至性五月航海覲親  
艱苦備嘗至十月始至粵西萬里尋親不獲一見可哀也矣或曰已死或曰入滇不知所終 逸史氏  
曰人有五福死往往重考終命余以爲非也土生亂世不能馬革裹尸亦當肆諸市朝余乙酉膺世  
勳不能死我丙戌仇人不能死我戊子己丑虎狼盜賊不能死我庚寅辛卯刀槍戟劍不能死我是  
書旣成世有黃祖輩否耶國可滅史不可滅死固甘心矣




















明季稗史彙編卷二十四

慈谿應喜臣著

更名廷吉字渠臣戊辰進士

青燐屑

思宗御極之元年五鳳樓前獲一黃袱內襲小畫一卷題云天啟七崇禎十七還有福王一清晨內侍檢得卽奏御前思宗因傳巡皇城各官究所從來時袁槐眉先生以省垣隸皇城事奏上曰此事不經何由得至大內且臣等巡視俱各未見而內臣特奏之焉知非有奸人包藏禍心潛伏肘腋而爲此耶如一追究將來必有造訛立異簧惑聖聽者矣上可其奏立命火之

丁丑予計偕北上禮闈竣事訪宣武門外斜街見鄉民數輩擁一白雞羽毛純白喙距俱赤云重四十斤索價一兩觀者環堵莫之敢售蓋不知爲何物也偶閱字彙鳥獸部鷺字註云鷺形如雞毛色純白喙距純紅所見之國亡

癸未六月夜坐納涼忽陰雲四合雷電交作爆光之中出火星一道聲如炮炭考之天元玉曆曰電中聚火人君絕世

壬癸年間都下變異種種如天津撫院將台旂竿終夜號泣撫臣具疏以聞椎牲祭之亦不輟



鳳陽祖陵悲號震動三年不止守陵內臣大集雲水齋醮彌夕鸞鶴翔空累數千百震號如故

五鳳樓前門拴風斷三截京師黑眚見大內百怪出如此之類紀述未盡

都人士爲予言癸未春京營巡捕軍夜宿旗軍之西首更定時一老人囑曰今夜子時有一婦人渾身縞素涕泣而至自西向東汝切不可放過如放過爲害不淺至雞鳴卽無事矣吾乃地祇神靈將來救此一方民命如違吾言當得重譴至夜將半果有一婦泣訴如前云歸母家不意夫死急欲奔喪不避昏夜邏者謹如前戒堅執不允婦亦暫退迨漏五下邏者睡去婦折而東矣輒復旋反蹴邏者醒而告之曰吾乃喪門神也上帝命我行罰災此一方汝何聽老人言阻我去路汝今抗旨災首及汝言迄不見邏者大懼奔歸告其家人言未及終仆地而死嗣後遂有疙疸瘟西瓜瘟探頭瘟等證死亡不可勝計

甲申四月鳳陽總督馬士英總兵黃得功剿寇內臣盧九德聞變南行江北郡縣擄掠一空

總漕黃希憲聞變南行挾持獨富東省士民多從之者山東總兵劉澤清至淮安安東守將邱磊截其家口輜重數日得還

番山鵠高傑之別號首將李成棟至清江浦守將張士儀以火攻之殺護甚衆

五月閣臣高弘圖樞臣史可法督臣馬士英內監韓贊周盧九德科臣李沾臺臣左光先等共擁福藩世



子正位南京改元弘光遣諸臣分道安撫天下從龍定策諸臣進位有差

上命諸臣集議誰任居守誰任督守內監韓贊周言于衆曰馬相公弘才大略堪任督師史相公安靜甯一堪任居守士英不樂出鎮辭曰吾往歲擒劉超服老回回多負勤苦筋力憊矣無能爲也史老先生鎮撫皖城屢建奇績目今番山鵠已至淮南淮安士民仰公盛德不啻明神慈父督是師者非公而誰史公曰誠如公言毋乃過其實耶東西南北惟君所使吾敢惜頂踵私尺寸墮軍實而長寇仇乎願受命越數日遂進太子太保兵部尙書武英殿大學士視師淮揚

朝議既定以史公督師淮揚蘇州吳縣廩膳生盧渭率太學諸生抗疏爭之有秦檜在內李綱在外宋終北轅等語朝野傳誦以爲名言時人方之陳東云

時劉澤清據淮安維揚士民之懼番山鵠之乞據揚城也登埤固守堅不令入四野居民奔竄靡甯而高傑之兵殺人無忌莫敢撓鋒江都觀政進士鄭元勳恃其才之足以服衆也且認時局之線索在手岸然出而爲調人往來高營酣飲達旦傑復以幣餌之元勳氣益揚揚語于衆曰高帥之來勅書召之也馬士英聘書現在卽入南京尙且聽之況揚城乎百姓未知真實閔然以元勳與賊通賣揚城以市德遂共刃之寸骨片脰咀嚼俱盡

先是士英用金幣往聘番山鵠弘光帝手詔有將軍以身許國帶礪共之等語



元勳有別墅在城西東南隅水色山光互相掩映顏曰影園壬午春日牡丹盛開得姚黃二本因言宋錢公輔園亭曾得此種賞花同時之客俱登崇階爲一代名佐元勳意頗自擬刻影園集徵名人詩歌以百什計而竟遭奇禍何也

元勳旣死番山鷄大懼因刦閣部于福緣庵羅列兵仗甲士環堵公夷然處之將及浹旬乃爲具疏以瓜步城屯其士卒衆志稍安

高傑橫甚頭顱滿野聞督師來亦頗嚴憚分命將士夤夜掘坎埋齒掩骼升帳之日傑詞色俱變惴惴然若有不可測者及庭見時坦衷樸質平易近人偏裨亦各留茶自此將帥視爲易與矯命橫行大爲跋扈之勢矣

六月朝議封黃得功爲靖南伯劉澤清爲東平伯劉良佐爲廣昌伯高傑爲興平伯是爲四鎮左良玉鄧芝龍唐通等進爵有差

七月安撫浙江監察御史左光先疏薦原任徐州碭山知縣應廷吉于朝有三式之學皆精天官之微更悉臣與久處信而有徵所當投大遺艱究其底蘊等語部覆授廷吉淮安府推官閣部具疏請之奉旨廷吉卽以淮安府推官職銜閣部軍前効用同得是旨者爲劉湘客通判張鑑紀克用等



揚州初定遂于八月督巡淮安點視劉澤清兵馬奏以澤清駐淮安高傑駐瓜揚黃得功駐儀徵劉良佐駐壽春各有分界

是月魯藩從東莞來信宿而去

唐藩從鳳陽來會于淮浦盤桓旬日唐藩以閣部有肄業之恩往還簡札稱門生唐藩先以罪廢禁錮高牆弘光帝登極閣部具疏救之

八月十五日閣部升帳忽旋風從東南起吹折牙旗一面其風旋轉丹墀良久方散公以廷吉初至軍前欲試其實卽命占之占曰風從月德方來爲本日貴人時當有貴臣奉王命而至者風勢旋轉飄忽其事爲爭音屬徵象爲火數居四二十日內當有爭鬪之事五日前後須防失火且損六畜越三日城西北隅火焚死一驢燬民舍三間匝月遂有土橋之變而督師高太監以王命至公因其學之非妄也時咨問焉九月從淮抵揚初定從征文武官員經制俸廩之數開標額兵三萬人四鎮同之每鎮本色米三十萬石銀四十萬兩左良玉稱是各鎮不等

閣部請印七顆設督餉道印一顆以原任副使黃鉉掌之監軍道印一顆以原任副使高岐鳳掌之行軍兵部職方司郎中印一顆以黃日芳掌之同其官者爲秦士旂主事何剛施鳳儀等監餉同知一員以知



縣吳道玉署之無印監紀推官印一顆先後掌其印者爲原任僉事陸遜之原任知縣應廷吉同其官者爲劉景綽梁以樟呂彥良等從征立功爲原任翰林院庶吉士吳爾壘淞泗兵備石啟明開府推官李長康贊畫通判張鑠知縣殷埏支益等參贊等官不及備載侯方岳後至以爲桃源知縣督師大廳副總兵印一顆以李正春掌之督師中軍旂鼓印一顆以馬應魁掌之同其官者爲翟天葵陶正明等督師軍前賞功參將印一顆以汪一誠掌之

靖南伯黃得功標下監軍職方主事一員以馮元鵬爲之監紀推官一員以徐 爲之

東平伯劉澤清標下監軍道一員以淮海道加太僕寺少卿張文光爲之監稅知縣一員以原任贛榆縣

知縣方來商爲之

東平鎮淮匪毗殺人無所顧忌北來朝臣韓如愈等悉被慘殺其餘泯泯者不能盡悉然願指唯諸惟熊民之言是聽樊明信片言轉移全活甚衆

廣昌伯劉良佐標下額設未詳

興平伯高傑標下監軍道一員以王相業爲之監紀同知一員以原任安塞縣朱統鏞爲之監紀通判一員以許鴻儀爲之

總河軍門王永吉標下監軍道一員以黃國琦爲之監紀推官一員以楊芬爲之

江北督師太監高起潛標下設額未詳



四鎮各私設行鹽理餉總兵監紀等官自畫分地商賈裹足鹽運不行各私立關稅不係正供東平則陽山安東等處興平則邵伯江堰等處多兇橫掠民民不聊生

弘光帝既立以戶科右給事中左懋第加兵部侍郎總兵官陳洪範加宮保都督使北修和議懋第不屈以身殉難洪範放還尋亦被戮 當事者議以阮大鍼爲兵部尙書舉朝爭之南都人夜書一聯于司馬堂闖賊無門匹馬橫行天下元兇有耳一人濁亂中原爾時弊政難以枚舉南都人復書西江月一詞于演武場云有福自然輪著無錢不用安排滿街都督沒人擡徧地職方多無賴本事何如世事多才不若多財門前懸掛虎頭牌大小官兒出賣

黃蜚自登州來欲覲南都路經淮揚慮爲高劉二鎮所掠以書致黃得功欣然以兵迎之弗虞高之尼其來也至邗關外五十里地名土橋角巾緩帶飲馬蓐食高營三叉河守備不審其由以得功暗襲維揚報高高遂密布精騎于土橋左右而黃不知也俄而士馬圍合漸漸逼身馬不及介人不及裝箭集如雨得功以槍撥去無及膚者所乘戰馬價值千金攢簇而斃得功奪他馬而馳隨行三百騎盡爲高營收去疇昔之夜番山鵠以得功離鎮發兵離鎮千人夜襲儀徵守城副將卮鉞馬岱等偵知之相與謀曰高兵來以主帥他出也姑以舊城委之天明主帥必至內外夾擊吾事濟矣因閉門堅守令士卒飽食熟睡城



外四隅虛設烟火以爲疑兵薄暮高兵大至見已設備不敢前進又見烟火聯絡以爲黃兵營盤砲矢齊發夜半與火藥俱盡城中望見馬岱爭先殺出千人喪魄俄頃盡殲

番山鵠必欲以揚爲鎮屢肆挾閣部爲請于朝維揚士紳又復大興守土以無禍爲辭閣部遂遷于東

偏行署以督府居之入城日高夫人邢氏號令嚴肅頗稱安堵

按邢氏闖賊李自成妻也番山鵠通焉自成覺之杖之百將殺之番山鵠挾而南奔

自成追之不及邢氏美而豔然嚴毅將士悚惕番山鵠見之終身不復議置側室

閣部銳意河南黃日芳陸遜之叩應廷吉曰師相將有事于中

州君意何若廷吉曰明年太乙在震角亢司垣始擊掩壽星之次當殞上將天下事未可知也聞東省探細人至臨淄士民翹望王師如雨濟旱何不取道于東義聲直進彼中豪傑必有響應者二公默然

朝廷疏論時政有微刺公者曰督師之地爲招亡納叛之區閣部之前爲藏垢納污之所蓋指北來諸公而言也公置之不辯于是東平各挾阿私上疏論薦中外之勢同水火矣

興平定居閣部遂如儀徵點視黃得功兵馬大閱于部賞資金帛千金有差

黃高交惡遂各治兵番山鵠曰曩昔千人皆維揚惡少嘗欲圖我我故驅之假手于黃君之士卒豈敢敗衄也黃必欲報怨閣部不得已復之儀徵泊舟吾臺庵側以爲調釋值得功母夫人逝苦次與語稍霽色焉因命監紀通判許鴻儀推官應廷吉往高營議和高雖聽命而所得馬匹匿弗肯還往反再四始償百



匹皆羸瘦不堪者解至黃營止收其半閣部復以二十四匹強之餘三十四匹漸次斃矣高不肯補閣部不得已償解三千兩復令高傑以千金爲黃太母贈憾始稍釋

南內出太祖時所積軍器及新造弓矢等件數可十萬副解赴閣部軍前路經儀徵聞黃營將士搶掠過半督藩令箭禁不能止黃營監紀推官徐某解犯令者數人皆牧豎也閣部宥而弗治所失軍器亦不可問矣兵部主事馮元鵬來見閣部以其名家子禮接之而倨傲不恭氣質與得功等遂令監黃軍蓋外之也

儀徵返旆決意河南之行番山鵠于初十日祭旂風吹大纛頓折紅衣大砲無故自裂傑曰此偶然耳遂于十月十四日登舟應廷吉私謂人曰旂斷砲裂已爲不祥今十四日俗稱月忌又爲十惡大敗何故登舟同列曰高藩幕下智囊濟濟豈無解此者詩曰無易由言莫捫朕舌廷吉曰其然吾言過矣

二十一日閣部暫駐清江浦遂奏李成棟爲徐州總兵官賀大成爲藩標先鋒總兵官陸遜之爲大梁屯田僉事胡漸忠爲睢州知州冷時中爲開封府通判李長康爲開封府推官經略中原時原任戶部主事蔣臣歸安縣儒學生員韓繹祖後至閣部乞奏官之辭不受

諸藩各分汛地長江而上爲左良玉汛地天靈州而下至儀徵三叉河爲黃得功汛地三叉河而北至高



郵州界爲高傑汎地自淮安而北至清江浦爲劉澤清汎地自黃家營而北爲史公汎地自宿遷至駱馬湖爲總河軍門王永吉汎地

閣標張天祿爲前鋒鎮駐瓜洲許大成為游擊領忠貫營李栖鳳爲甘肅鎮駐睢甯劉肇基仍總兵官駐高家集張士儀爲河協鎮駐王家樓沈通明爲參將駐白洋河

黃鉉督理糧餉往來常鎮何剛催趲糧餉往來蘇松兼理忠貫營事高岐鳳爲監軍道同李栖鳳協防睢甯黃日芳爲行軍職方郎中秦士奇施鳳儀副之應廷吉爲監紀推官吳道正爲監餉知縣馬應魁爲中軍副將翟天葵爲旗鼓陶匡明副之汪一誠爲賞功參將同駐白洋以任防河之役後北兵入揚州吳道正馬應魁陶匡明汪一誠等死之有使從北方來自稱燕山衛王百戶特書一函函題云某王致書史老先生閣下史公令中軍官厚加款待上其書于當堂令詞臣擬議報書以答之十月有旨以莫須有事捕安東副將邱磊下獄劉澤清自往唁之飲饌豐美把臂嗚咽且諭獄吏小心承值會當書疏請磊復職無何磊竟殺雖史公奉旨而行實東平修怨爲之也

十一月四日爲閣部懸弧之辰舟抵崔鎮各官免參急報剡城夏固山關入宿遷史公憮然不樂亟召衆官舟皆未至惟應廷吉從因召見徐問曰在昔姜子牙張子房諸葛孔明何如人也廷吉對曰三公皆王



佐才不得位置優劣雖勳名事業成就不同則時有利不利也龐德公曰臥龍雖得其主未得其時斯言確矣公曰陳壽有言將略非其所長廷吉曰考之傳記孔明種種調度出人意料豈壽所能窺測他具論出師表云鞠躬盡瘁死而後已至于成敗利鈍非臣之明所能逆睹只此數言萬世人臣之軌則也公改容謝曰年兄教我矣廷吉與公同譜故云既而曰天上事已不可爲先帝變日予待罪南樞分固宜死轉念天下國家之重庶幾主器得人希紹一成一旅之烈不意決裂至此揆厥所由職由四鎮尾大不掉爲今之計惟斬四臣頭懸之國門以爲任事不忠之戒或其有濟昔之建議而封四鎮者高弘圖也從中主張贊成其事者姜曰廣馬士英也依違其間無所救正者余也又曰連日天象變異如許年兄何不擇其善者而言之廷吉曰據實而言猶疑僞妄敢臆說乎令取新書二冊贈廷吉而別 次日抵白洋河令廷吉監劉肇基軍高岐鳳監李栖鳳軍進取宿遷初八日黎明師濟河夏固山遁去遂復宿遷 越數日夏固山復圍邳州軍于城北劉李二將軍軍于城南兩將相望未嘗一矢相加樵採者出北兵諭之曰爾民卽吾民吾不殺汝好守城池毋爲他賊所據相持半月各引去

邳宿報至南都貴陽方箕踞而戲讀罷大笑哈哈不住時東省楊公士聰在座驚問曰邳宿淪陷幸而復完南北關係不淺公何泄泄爲貴陽曰君以爲誠有是事耶楊曰甯有無疾而呻者貴陽曰不然此史道



鄰之妙用也歲將莫矣陽河將吏例應叙功耗費錢糧例應銷算蓋爲敘功銷算地也楊且信且疑明春奉使河上始知無僞

復有使從北方來自稱鴻臚寺班周某者致書如前公不啟封沉之于水重資其人而遣之

鹵簿所至凡一技一能欲效用者皆投策進見隨試隨收月有廩餼以推官應廷吉董其事命曰禮賢館于是四方倖進之徒接踵而至甚有獻策請鬻三山街大功坊以助軍餉者裴臣病之白史公曰是皆躍冶之士究無實用所捐膏腴亦百姓脂膏也曷不遣此輩歸塾就業另儲真才以副實用乎公曰吾將以禮爲羅冀拔一千千百以濟緩急耳廩之如故相聚數月旣無拔萃之才亦無破格之選始私相謂曰求之甚殷遇之甚疎吾輩其齊門之瑟也夫稍稍引去城破日從公及于難者止一十九人

額餉難設所入不敷所出遂以戶部主事施鳳儀行鹽揚州

揚州爲高藩汎地不隔碍不行復以周某爲理餉總兵興販米豆官私夾帶上下爲奸利之所入不全在官遂議屯田以陸遜之爲大梁僉事官給牛糧籽粒另設屬員迄無成功復欲應廷吉屯田邵宿廷吉辭曰國家屯政原有成額小民世受謂之恆產焉所謂閒曠而屯之且屯田籽粒旣入于官有司常賦又何從出聞之桃源縣生員有愿輸牛百頭小麥五百石以請縣官者斷無是事爲此言者欺公也公不以爲



然強之視屯田愈事事

朔風日勁河陽倍嚴因令秦士奇等沿河築墩以爲施放砲火之地應棐臣曰是無益也黃河兩岸沙磧  
坎礧土性虛浮春水泛漲斷必傾圯安能架砲而同事諸公方欲以築墩多少爲己功且欲爲富室進  
身地議格不行迄今兩岸一望平沙墩基尙存識者嗤之以爲搏沙之智

延陵鄉紳朱一馮者虎踞灘田盈千累百家殷富衆怨所歸公慮經費不足輒造其廬請助餉萬金以塞  
衆口朱不理焉及興平鎮揚膚訴者沓至興平遂疏于朝追贓數十萬減至四萬力不能完一馮浮海赴  
閩第三子庠生號長源者受刑追比羈管社學隆冬隔宿卸棧墮其二指後北兵入復與戴姓兄弟糾集  
灘兵橫行衡命戴已就戮一馮父子不知所終



明季稗史彙編卷二十四終



明季稗史彙編卷二十五

慈始應喜臣著更名廷吉字樂臣戊辰進士

青燐屑

乙酉元旦大風拔木雪積數尺自臘迄春陰凝不霽白洋河干聊爲綿蕞飄灑浸潤竟不成禮閣部以糧餉不前諸軍飢餒斷葷絕飲蔬食啜茗而已興平至徐州程肖宇率驍健之士六人以降肖宇豐沛間大盜也聚千衆歟

攻掠無忌思宗末年百戰獲之下廷尉獄未正厥辜興平遂與歃血定盟餽遺酬酢略無虛日浹旬酒

酣俱殺以殉及至永城鄉紳某者蓄積甚厚輸犒數千興平亦與定盟旋復見殺并籍其家故許定國力爲之備興平所宅徐州館舍極其精潔忽異物疊見坐臥不甯陡于白晝無因而火興平胸首俱焦狼狽走出隨身寶玩灰燼無餘爰是決意北征抵睢城焉

天啟甲子七月五星聚張辛巳春黃河涸漕艘不行錢塘江舟人炊飯水入釜爲火壬午秋熒惑入南斗  
棐臣歎曰伯陽父有言今周之德若二代之季矣象緯告凶名川枯竭將毋同乎是時黃河清泗州麒麟見閣部謂棐臣曰是非休徵與將謂有建武紹興之事也棐臣曰天心仁愛托物徵奇魯狩獲麟未聞爲尼山之瑞公艱然而起



是月閣部命監紀通判張鑑往河南招撫土寇劉洪啟

混名一把沙

李際遇楊四等便道過許定國營且戒以

勿令興平知也

英吾至睢州扎營二十里外懸王命旂于城堽令曰無故而入城者視此兵民安堵秋毫無犯翌日英吾率親信精銳之三百人入睢州城許定國素服角帶候迎二十里外執禮甚恭有千戶某者攔馬投詞云定國謀汝英吾不之信馬前責六十棍送定國營許卽梟示英吾遂與定盟歃血鑽刀結爲兄弟定國以美姝進英吾屏不御徐謂許曰行軍之日無所事此弟如有心爲吾畜之掃清中原以娛吾老定國唯唯而退興平意欲急行定國遲遲不果興平詰之定國曰山妻偶恙興平愠曰弟人傑也何無丈夫氣兒女子願去則去否則殺之以絕他念前途立功惟君所欲倘濡忍不能吾當爲君除之定國驚曰此乃弟結髮非他婦比當卽隨行幸勿見罪定國爲上燈之酌已則侍飲於興平令伊弟許泗陪宴諸將各侑以妙伎一人飲半酣諸將覺其有異密告興平曰今日之宴大非昔比伊弟許泗神魂不安將毋懷不仁乎興平笑曰爾等以定國爲虎狼耶吾視之直蠅蟻耳諸將再欲進言興平揮之而退遂各暢飲人挾一伎不自知其落於穀中也興平寢室無宿將健兒止髻髻之童數輩所用鐵棍重十八斤詭稱四十斤每以自隨漏將殘前後左右長槍叢集小童急報興平急起索鐵棍失之矣猶奪他人之槍步戰達旦連殺數



人而斃三百人盡皆開膛身首異處覓一全屍不得也次日亭午城外將士約略聞之猶未敢入越三日李本深等始率衆至定國已渡河北向矣睢城接壤屠戮幾二百里所至之處飛走皆刑

元正十日閣部所乘座船桅竿夜輒作聲自上而下復自下而上中軍官備牲祭之亦復不止詢之長年曰無他不過主人欲更舟耳十八日興平凶問至公遂如彭城

興平既沒諸將互相雄長下弦之夕幾至血刃公環甲戴弁坐以待旦兢兢不免昧爽與諸將盟以興平嫡甥李本深爲揚州提督嫡弟高某爲副將以胡茂楨爲閣標大廳李成棟總兵徐州其餘將佐各有分地立其子爲世子請卹請廕于是衆志帖然

東平開藩淮邸大治宮室窮極壯麗造一水閣費及千金落成日淮庠諸生爭獻詩賦稱頌功德其閣忽傾二生溺水死

淮陰紫霄觀皂莢樹一株產物如飴色黃味淡淋漓不徹士民以爲甘露縱觀如市裴臣過而見之曰此爵餉也白者爲甘露黃者爵餉所見之地期見易主

公弟原任翰林院庶吉士可程自北來歸公疏請歸之司寇有旨卿宣力于外不遑將母卿弟可程淮居私第侍奉甘旨靜聽處分不必引咎由是可程歸于京師



史公勾當公事每至夜分隆冬盛暑未嘗暫輟且恐勞人略不設備員役倦怠獨處舟中參伍有言宜加警備者公曰有命在天人爲何益坦然如故後以公務冗煩以黃蠡源老成練達欲令與處一舟面加商榷蠡源辭曰月芳老矣不能日侍左右師臺亦當節勞珍重毋以食少事煩蹈前人故轍且發書走檄幕僚濟濟俱饒爲之徵兵問餉胥吏有司事耳老師但董其成綽有餘暇何必晝夜損神以躬親博勞瘁乎公曰固知公等皆受用人不堪辛苦蠡源曰兵者殺機也當以樂意行之將者死官也須以生氣出之汾陽聲伎滿前窮奢極欲何嘗廢乃公事乎公笑而不答

二月公還自徐州黃虎山聞英吾之變啟釁欲襲維揚代領其衆守城戒嚴總河王鐵山總漕田百源深以爲憂且慮高兵橫軼令兼屯田僉事監紀推官應廷吉持節安撫而史公令箭適至遂并行焉至邵伯鎮撤其橫稅商民歌舞

十五日公自徐至揚令同知曲從直中軍馬應魁入虎山營問所欲爲虎山曰吾乃朝廷大將累立戰功僻處儀徵小邑番山鷄一賊耳有何功績占據名邦今旣身故令將泰興興化通泰二州行鹽地面盡歸于吾念其死於王事權分高郵寶應江都等處養其妻子如拂我意誓不罷兵高營將士亦摩拳擦掌雄據不一月命高盧二太監持諭解兵始退去時人爲之語曰誰喚番山鷄子來闖仔不和諧平地起刀兵



夫人來壓寨邢夫也虧殺老媒婆史公也走江又走淮俺皇爺醉燒酒全不保二鎮罷兵高藩邢氏夫人慮稚

子之孤弱也恐獨立不足以有成知閣部無子欲爲螟蛉公怪之謀諸將佐僉曰無傷公心不然毅形於色輒有獻策者曰是不難渠係高氏有高監在公盍爲三盟令父其父子其子公可其議次日那夫人設宴將吏畢集公備隆意語高監監忻諾受其子拜邢夫人亦拜并拜公公不受環柱而走高監止焉宴畢各散又明日高監設宴宴公并宴高世子公甫就坐令小黃門數輩俱圍有衣蟒者挾公坐不得起令世子拜邢夫人亦拜以父稱之公無可奈何勉強盡歡快快彌日前冬紫微垣諸星皆暗公屏人夜出召棐臣從公仰視曰垣星失曜奈何棐臣曰上相獨明公曰吾昔位上相近爲瑤草矣雖然輔弼百暗上相其獨生乎愴然不懌吳爾墳從英吾北征睢州變化流寓祥符偶遇一婦自稱王妃爾墳不察以爲弘光帝元后也因開封守臣附疏以進至京師鞠之則周府宮人也爾墳以妄言得罪楊公留不遣夜發飛騎促爾墳至代疏引罪爾墳獲免後守新城不知所終

鴻臚卿高姓蒼頭從北平來路遇一男子著綉蟒裙蒼頭驚曰子其王子乎男子詭曰然吾太子也少選則曰非也吾乃王戚晚族屬王之明也蒼頭因爲設策令渠冒稱太子詐往浙江因報主人曰太子渡江而來矣高弗審立命追之且聞于朝百僚勘察舊時認識盡得其情高鴻臚棄市之明向繫廷尉未服上



刑弘光帝出奔北兵未至市囂數百擁入大內黃袍加身三日斃于亂兵公向不知顛末曾爲具疏後深悔之

三月左良玉帥師南下暨二旂于鷓首左曰清君側右曰定儲位其實良玉不知也首其事者以他詞誘良玉出府良玉顧問欲何所往首事者輒令衆曰命燒府第衆共舉火烟焰張天良玉不知所爲首事者進曰小人乘權儲君未定袁臨候等約同舉事良玉唯諾及至九江繼咸乘城拒守砲達于寢良玉始知爲首事者所賣驚怖而殂左衆遂舍九江歷皖城逕趨都下馬瑤草等羅拜黃潯山于楊前潯山曰吾受國厚恩臨事致身分也何煩公等重禮遂視師江上累戰皆捷左衆計絀渡江納款北兵入白土關潯山臂中箭毒不能挽強披甲登舟竟爲流矢所殪

句容東南數十里地名白土關

靖南罷兵高營將士販命投誠惟閣部是聽內有忮其威名者以原任翰林院編修衛胤文總督淮揚軍事公恬不介意而將士憤懣不平慰諭再三終不受命子安蒞任之日無一人至者維揚旣設督撫幕僚集議于公曰公督師也督師之體居中調度與諸藩異奈何與彼互分汛地是閣部與藩鎮等也爲今之計公盍移駐泗州防護祖陵以成居重馭輕之勢然後繕疏請命將此仔肩交付衛子安王鐵山乎公曰曩之分汛虞師武臣之不力也吾故以身先之移鎮泗州未爲無見遂于是月一日令裴臣監督參劉恆



昨游擊孫桓都司錢鼎新于光等舡隻會黃蠡源于清江浦

時蠡源防河未撤也

渡洪澤湖向泗州進發

屯泗之議既定公謂應棐臣曰禮賢館諸生隨軍有時兼之河防多負勤苦今又趨泗是重勞也君盍品定才識量能授官酬其積勩乎因于四月二日于督撫左廂策試諸士第嘉禾歸昭崑山孫元凱等爲甲乙并授唐大章唐妍張大武陸燧等通判推官知縣等官

盧渭是年充歲貢生赴揚謁見實有非分之望公優禮有加劇談不倦及試職銜識卓議高詞采濬發原擬壓卷公手其文擊節歎賞另立特等贈以路費三兩而已諸生遷次次日進謝公各諭遣留棐臣小飲從容問曰君精三式之學所言淮陰安堵終不被兵與諸人同第言夏至前後南都多事予所不解亦無持是說者棐臣對曰今歲太乙陽局鎮坤二宮始擊關提主大將囚客參將發而又文昌與太陰并凶禍有不可言者夏至之後更換陰局大事去矣公于袖中出弘光帝手詔示棐臣曰左兵南矣吾將赴難君言不信則可倘如君言奈天意何執棐臣手唏噓而別遂于午刻發平山堂

公既赴召將一應軍務付棐臣令箭便宜行事三之日棐臣督諸軍赴泗過淮揚劉鶴洲以令箭取軍器火藥餉銀等件

蓋施誠菴教之也誠菴以公不假兵柄心思應之獨任且爲劉之私人且南北危急謂此餉無主故令東平取之

棐臣堅執不與謂其差官曰吾

朝廷命官欽定閣員非劄委者比藩鎮令箭何爲至我差官曰令箭所以差官也棐臣曰然但此軍器錢



糧受命閣臣督往泗州今雖暫時隔絕何可便付況已薄暮亦非交割錢糧之時明晨吾當親見藩臺面議可否差官唯唯而退裴臣卽以令箭子夜叩關退回高郵屯劄 公至草鞋峽黃濟山等已敗左兵於江上公先具疏入告奉 旨有北兵南向卿速回料理不必入朝公登燕子磯南面八拜慟哭而返

諸軍駐高郵奉閣部令箭云左軍順流而下邳宿道卽督一應軍器錢糧至浦口會剿午刻奉令箭云北兵南來諸軍不必赴泗速回揚州聽調隨後復奉令箭云盱眙告急邳宿道可督諸軍至天長接應裴臣謂諸將曰閣部方寸亂矣豈有千里之程如許之餉而一日三調者乎驚急頻仍揚城必有內變吾等第當堅守相機而進諸將唯唯否否計無所出偶語而散

十一日公至天長檄召諸將救援盱眙單騎當先不避風雨忽報盱眙已降泗州降將侯方巖全軍敗沒浮橋亦陷公一日一夜冒雨拖泥奔至揚州尙未得食城中鬩傳許定國領大兵至欲盡殲高氏以絕寇對且云出自公口

十四日五鼓高兵斬關奪門而出悉奔泰州牲畜舟楫爲之一空

十五日移泗諸軍尙屯高郵黃日芳檄防河兵至適見北來餘艘挂帆江上蜂擁而來問之則劉鶴洲田百源之勤王師也裴臣以劉有前隙遂移屯高郵湖 是日有北使至高郵自稱前庚辰進士陳某云湖



廣人又云江西人僚屬無識其面者捧三函內一函封題如前一函題曰某王令旨仰總河都御史某開拆一函題曰某王令旨巡撫淮安都御史某開拆職方郎中黃日芳等與之辨論種種使者以三罪罪我曰爾君薨葬城隅汝輩聽其凌夷草土竟不發喪一罪也吾國爲汝國報仇汝輩擅立福藩世子二罪也吾國爲汝君發喪歸葬又爲汝國殲除勁敵罔知報謝亦無一介行李往來三罪也日芳等云先帝變起倉卒諸臣料理不及重頓發喪已差大臣左懋第等恭伸款謝使者曰土地山川皆吾國之餘也些須玉帛何足掛齒今奉天討罪以有道伐無道何說之辭日芳等辭以主帥不在徐當另議彼亦不留馳驛北去

十六日北氛日亟黃日芳檄川將胡尙友韓尙良各領本部扎營茱萸灣以爲聲援應廷吉帥諸軍來會屯瓦窰鋪以爲犄角是日田劉撤兵回淮安矣

十七日移泗諸軍駐瓦窰鋪何剛率忠貫營兵來會時方至午食北哨陡至射倒柴臣家丁衆大駭愕諸君執三眼槍逐之旣退復奔邵伯鎮遇胡韓二將兵斬首七級適南風大作諸軍復退邵伯胡盧家嘴地方屯劄

十八日城守愍嚴公檄各鎮援兵無一至者前鋒鎮移軍天靈洲矣午刻公檄黃日芳駐邵伯鎮卽爲汛



地秦士奇副之黃鉉糧未回以東省未任監軍道孫芝秀署督糧道事應廷吉副之駐邵伯鎮轉運糧儲胡韓二將往來護送

十九日公檄何剛督所部兵入城守衛劉肇基率所部兵亦至遂共入城城陷日剛以弓弦自經死

二十日北兵以大砲未至屯斑竹園驍將押往單騎刦營奪馬一疋斬首一級而還公賞以蟒紗一襲白金百兩

二十一日甘肅鎮李栖鳳監軍道高岐鳳帥所部兵四千入至梁以樟應廷吉張鑾施鳳儀并禮賢館諸生俱入城守衛

二十二日李高有異志將欲刦公以應北兵公正色拒之曰此吾死所也公等何爲如欲富貴請各自便前北兵遣我降人百計說公初猶令馬旂鼓往來陳說是日止令隔河而語嗣後有北人來亦不容矣李高見公志不可奪遂于二鼓拔營而出并帶護餉川將胡尙友韓尙夏諸兵北去公恐生內變亦聽之不禁也自此備禦單弱餉不可繼城不可守矣

二十三日漏下二鼓公謂裴臣曰移泗餉銀約二十萬軍器火藥十萬并諸糧米俱看首尾棄之可惜諸將非君至當靳不與可賁夜出城陸續轉運以濟緩急又云吾自覺憤憤已後急務便宜行之不必關白



于我事竣日彙報可也柴臣曰廷吉現守南門若何公曰以施誠菴代之于是縋城而下城陷日誠菴走至鈔關門背中流矢斃北兵未集時劉肇基等請乘不備背城一戰公曰銳氣不可輕試且養全鋒以待其斃不知坐失事機及北兵從泗州運紅衣砲至一鼓而下肇基率所部四百人巷戰而死川兵既去護餉無人

二十三日游擊韓飛護運糧七百石至揚子橋遂爲北兵所掠殺死捐水數人焚毀略盡

二十四日北兵試砲飛至郡堂彈重十斤四兩滿城惶怖知府濟甯任民育吉服危坐城中城破死之眷屬俱投井中同知曲從直并其子拔貢生某分守東門皆死之舊城西門地形卑下城外高阜俯瞰城下勢若建瓴且爲興化李宦祖塋樹木陰翳由外達內絕無阻隔枝幹回互勢少得出諸將屢以爲言公以李氏蔭木不忍伐也且言諸將以此地爲險吾自守之二十四日夜砲落雉堞二堵二小卒緣牆而上城上鼎沸勢遂不支周志畏以少年兩榜蒞事江都頗立崖岸遂與高營將士不協時被窘辱百計謝事以難其請適江右羅伏龍至遂以水土不服議調而以伏龍代之羅受事三日羽檄交馳周仍不去公因勅新舊縣令一同守城城破日周羅死之家口無一免者縉紳故大司馬張伯鯨督修重城同知王纘爵運使揚振熙與難



二十五日揚城失守邵伯鎮文武一時星聚移泗之餉退屯赤岸湖埜人灣至二十九日蕞甘肅鎮李栖鳳令其弟栖鸞率衆大掠時李成棟扎營高郵東門栖鸞不敢逕進乃以小艇載輜重潛過護餉各官得以漁舟遁去

二十六日漕河諸臣望風歸附劉鶴洲田百源等從安東航海三溝閘瓜步等處北騎密布許大成決下河堤以沙甓至沿海富安場等處避亂黃斌卿鄭彩守江口楊文驄駐金山築圍牆以避砲矢

五月初十夜大霧橫江北兵夜取瓜州市鹽門扇柵欄竹椅木棹結爲一牌上然燈燭大施號砲亂流而下以爲北騎之襲江也悉力攻擊北兵從坎壘橋狹流輕舟飛渡不過一二十人黎明高阜僻處虛設亭幃擊鼓吹螺沿江守兵遂無固守且有先期納款者江東王氣於斯盡矣 閣部沒後新朝念其忠勤勅有司給粟帛以養其母與西門小房一區以處其室戊子歲鹽城人復有竊其名字以號召蚩氓者掠廟灣入淮浦震驚白下官復拘繫其孥有北將曰曩下淮揚吾當先摧敵若史公者業手刃之矣此固假竊名字行當自敗何必疑其母妻哉並釋之或曰今有墓在梅花嶺逸史云聞爲裨將史威所築疑假疑真不必深辨 唐存德先生言乙酉元旦南都一大僂夢至帝所見冕玉而搢笏者捧冊覲帝曰此在刼人數也帝曰南人多北人少乎冕玉者曰然高傑開刀定數應爾帝首肯而退嗚呼前定之說不虛也



明季稗史彙編卷二十六

平西王吳三桂傳

吳三桂字長白遼東籍高郵人提督京營吳襄子也幼試武舉出華亭董宗伯其昌門下以父廢得官歷都督指揮積勲至大總戎崇禎十四年薊遼總督洪承疇出山海關會八鎮兵於甯遠三桂偕王樸馬科楊國柱等與我

朝兵戰于松山國柱敗沒三桂與樸等俱夜遁樸被誅而三桂僅鐫秩未幾奉命鎮守甯遠三桂年方及壯曾冠諸軍北門鎖鑰藉無恐十七年春闖賊李自成由晉入燕漸逼京師給事中吳麟徵疏請棄關外邊地速召三桂入衛陝督余應桂亦上言闖賊勢大非全力注之不可請調關東吳三桂及天下雄鎮會師真保之間併力協剿度賊可滅廷議以棄地非策疏請不報三月自成破陽和賊將入真定京師戒嚴始信麟徵棄甯遠封三桂平西伯飛檄令入關東討賊三桂被命遷延不卽發簡閱步騎攜挈人民從五十萬衆日行數十里十六日次山海關而昌平陷矣二十日抵豐潤而都城陷矣三桂聞變回至關門頓兵不進猶豫未有所決自成聞三桂回師據關執其父襄令作書招之略曰汝以君恩特簡得專閫任非真累戰功歷深資也今汝徒飾軍容怯懦觀望使李兵長驅直入既無批吭搗虛之謀復乏刑格勢禁之



力事機已去天命難回吾君已逝爾父幸存嗚呼識時務者亦可以知變計矣及今早降不失通侯之賞  
猶全孝子之名萬一徒恃憤驕全無節制主客之勢既殊衆寡之形不敵頓甲堅城一朝殲盡使爾父無  
辜並受屠戮身名俱喪臣子均虧不大可痛哉遣降將唐通寶銀四萬犒師并襄手書以往而別令賊帥  
率兵二萬守關拒三桂三桂得書欲降爲書覆父有國破君亡兒自當以死報今吾父諄諄以孝字督責  
兒又不得不勉遵嚴命等語適有愛妾陳沅在襄所爲自成奪去三桂詢知大憤乃遣使乞降于我

朝求共討賊時 九王統兵十餘萬西向以觀動靜總督洪承疇及三桂舅祖大壽皆在

本朝親信用事求發兵助中國三桂又自潛詣大營承疇大壽卽引見 九王遂定盟起師先是三桂佯  
受賊犒師銀而襲殺其守關兵殆盡賊帥負傷遁歸至是傳檄遠近略云闖賊李自成以么麼小醜蕩穢  
神京日色無光妖氛吐燄豺狼突于城闕犬豕据于朝廷又云弑我帝后刑我縉紳戮我士民掠我財物  
二祖列宗之怨恫天壽淒風元勳懿戚之誅鋤鬼門泣日又云周命未改漢德可思誠志所孚順能克逆  
義兵所向一以當千試看赤縣之歸心仍是朱家之正統自成聞之大驚自率兵六萬東行以禦三桂挾  
太子二王吳襄自隨僞將劉宗敏李過等皆從前鋒至永平三桂與之十二戰無勝負及自成大隊至薊  
三桂營拔之進圍山海城數匝復分兵從關西一片石出口東突外城逼關內三桂不能敵 九王度勢



已急統大兵馳至英王率二萬騎從西水關入三桂見 九王薙髮稱臣令關內兵悉薙髮迫于戰期兵不及薙髮者裂白布三條纏縛于身爲別 九王居後隊三桂爲前鋒 九王令三桂先與賊戰旣而遣鐵騎繞出吳兵之右以標爲號急擊賊兵劉宗敏負重傷自成大敗走永平英王豫王急令三桂追之自成一日夜馳入京師仍立十二塞于城外大兵攻之連拔八塞斬首二萬級自成大懼令僞將上城巡狩遣唐通出戰爲三桂參將馬有威所殺自成益窘乃使使議和三桂曰還我太子二王而後罷兵自成出太子見三桂三桂先令守備張成指揮范玉各率兵一千用賊旗幟東西設伏俟太子出疾擊賊營又令都司耿士良率大兵爲應以奪太子自成果中伏大敗然所出者非真太子也自成復令挾吳襄上城以招三桂三桂射殺左右挾者自成遂斬襄懸其首于城上并家口三十餘人盡殺之四月三十日縱火焚宮殿棄京城而去三桂見火起料賊必西走戒諸將勿入城救火分路追賊及于定州之清水河下岸賊將谷大成勒馬迎戰爲三桂所斬軍士斫祖光先馬光先墜傷一足自成復大敗走三桂在定州以賊將首級遙祭其父將奪回金銀散給將士三軍感悅聞自成屯兵真定與遼東巡撫黎玉田合兵追及之自成屢敗而憤復勒精騎迎擊三桂三桂張二翼以進斬僞將三人首萬級自成復益兵搏戰率諸賊帥直逼營前大罵曰今日決一死戰勿令外國來助乃爲豪傑耳三桂分兵迭戰自辰至酉互有殺傷會東風



大作黃沙蔽日賊營旗倒馬蹶自成急收兵三桂射之中脇遂拔營西遁度固原入山西三桂乃還軍京師時 九王已定燕京奉命攝政以三桂有大功晉爵平西親王南京復福藩僭立以三桂討賊復讐晉爵薊國公世襲贈父襄爲遼國公母祖氏遼國夫人遣使臣沈廷揚海運米十萬銀五萬犒之三桂弗受八月復遣使臣左懋第陳洪範賁銀幣謝我

朝并勞三桂懋第等至謁三桂出銀幣且致福藩意三桂謝曰時勢至此我何敢受賜惟有閉門束甲以俟後命耳懋第被羈北京洪範南遷始知

本朝渡江之志時自成逃至平陽發兵守隘 攝政王命三桂統大兵追賊入山西自成數戰不勝遂走

西安明年春三桂復率兵西伐自成合數十萬悉力而戰三桂率鐵騎衝陣所向披靡斬首數萬賊衆大潰自成遂出武關南走荆襄大兵既定三秦復追賊入楚自成走死羅公山其衆降于何騰蛟闖賊遂滅順治七年庚寅是時餘逆未靖桂王僭號永曆黔滇蜀粵之間猶阻聲教 世祖命三桂及定南王孔有德平南王尚可喜嗣靖南王耿繼茂統兵南下以清宇內三桂由秦入蜀郡邑皆迎附九年永曆走安隆張獻忠餘黨孫可望以兵迎之遂遣僞將劉文秀王復臣收復四川文秀善撫士卒多樂爲死蜀人聞其至所在響應重慶叙州諸郡邑爲三桂所克者次第失陷三桂迎戰輒不利乃斂軍退守保甯文秀躡其



後惟恐失敵復臣諫曰三桂勁敵也且我軍驕矣以驕軍當勁敵能無失乎不聽至保甯又諫曰毋圍城  
圍則兵分力弱師老財匱文秀曰三桂坐守孤城計日可下將軍何怯甚也令張先璧軍其西南先璧驍  
將號闕神軍容耀日然勇而輕敵三桂巡城至西南曰是可襲而破也乃開門出精騎犯其壘果驚潰轉  
戰而南至復臣營營爲亂軍所擾又阻以水勢遂不支三桂乘勝合擊復臣手斬數人圍者益衆乃曰大  
丈夫不能生擒名王豈其可爲敵所辱遂自刎文秀解圍去三桂按兵不追曰平生未見如此惡戰特欠  
一著耳令如復臣言我軍休矣文秀旣敗退三桂益統兵進四川遂平十五年戊戌大兵三路入滇經略  
洪承疇由貴州大路取雲南與僞將李定國相距于曲靖征南將軍趙布太由廣西至黃草壩而入三桂  
則由四川至遵義水西以取滇省永厯走永昌遂遁入阿瓦以蕩平功

上命三桂總統全師鎮守雲南而經略及將軍貝勒等俱復命始三桂西征留長子于京師以固  
朝廷意其子寵眷有加旋尙主爲額駙恩禮優渥亞於親王貝勒而三桂包藏禍心日伺釁以動

世祖賓天三桂入臨慮廷議見留乃提兵遠道絡繹啟行三桂未至前驅在燕者人馬塞途居民走匿  
朝廷恐其爲變令于京城外搭廠設祭三桂哭臨成禮而去吏兵二部選用文武官三桂欲市恩於人每  
以藩府龍鳳下批咨部曰某爲某守令某爲某參遊雖部選以定例必撤回而用藩府所咨選者號曰西



選西選之官幾滿天下所選官蒞任督撫大吏亦改容加禮惟恐得罪藩府也三桂自討闖賊平藩以來幕府故舊散亡殆盡乃擇諸將子弟及四方賓客資性穎敏者授以黃石素書武侯陣法以備將帥之選一時少年浮夸之士人人自爲大將材也所收士卒又皆孫可望李定國張獻忠之勁旅故部下多勇健善鬪鎮滇據守戰馬漸倒斃而川馬力弱難以臨陣三桂密諭養子陝西總鎮王屏藩王輔臣等選西馬之勇健者歲進三千匹皆從西番繞道至滇兵火之後在在凋敝所征財不足以充府藏因招徠商旅資以藩本使廣通貿易殖貨財以給軍需又以遼地產參利盡四海而連附獨出巴蜀因嚴私採之禁設官監之官收其直而鬻于市犯者至死當是時三桂自以滇中形勢南扼黔粵西控秦隴財用富饒兵甲堅利且治軍嚴整號令肅然屯守攻戰之宜無不畢具乃復僞爲恭敬虛懷延納由是將士樂爲之用民心亦翕然歸附強藩雄鎮咸受其籠絡其不軌之志固不待智者而後知也康熙十一年秋

上以三桂逆謀漸著欲先發制之以其乞師入關有功社稷不欲顯正其罪

特召三桂移鎮關東予以世職蓋欲銷其逆志以功名善終也詔至雲南全藩震動反謀益急然恐舉兵滇蜀所在阻隘不能全進謀至中原據腹心以至指臂長驅北向可以逞志乃拜受詔命待使者益謹而陰勒部將吏使始不知狡謀乃日以



上命促之督責過深頗凌辱其將吏始請改期繼請緩行皆持不可三桂欲反恐其下不從乃設宴大會諸將酒三行起而嘆曰老夫與諸君共事垂三十年今四海昇平無所用吾輩行且遠矣未知聖意所在且盡今日歡與諸君敘故未識異日復相見否諸將聞言皆泣下時有十三太保者皆藩下都統佐領官三桂寄其心膂令將強兵護藩府至是皆喻意約期待變越兩日使者促益急三桂下教會諸將曰行期迫矣 朝廷之嚴譴不可逃也若使臣之驅策老夫不意至此諸君行矣毋使徒受使臣辱也諸將怒曰行卽行耳何相逼爲三桂復慰之曰 朝命也誠不可緩但向者諸君得處此土以有其家以享富貴伊誰之賜願諸君思之諸將皆稽首曰邀殿下之福曰非也諸將曰然則 君上之恩曰是已未盡然也昔我受先朝厚恩待罪東陲值闖賊構亂召衛神京計不能兩全乃乞師 本朝以復君父大讐繼平滇蜀得棲息于此今日之富貴皆先朝餘蔭耳故君之陵寢在焉可無別乎先是辛丑冬三桂兵臨阿瓦檄取永厯以歸縉使貴陽府治殮其遺骸葬府城外故云爾諸將皆拜聽命于是卜日謁陵先期復集諸將謂之曰別故君當以故君之衣服見指其首曰我先朝曾有此冠乎指其身曰我先朝曾有此衣乎老臣且易服以祭諸君其預圖之諸將皆曰諾乃下令三軍擇某日啟行趣使臣先發至日各具漢官威儀集陵下三桂易方巾素服酬酒山呼再拜慟哭伏地不能起三軍皆哭聲震如雷人懷異志蓋至是而三桂



之反謀成矣將行復下教屬將吏曰老夫耄矣行且戍邊惟是戎伍之事不可以不習明晨當于郊外大閱後期者按以軍法向曉鳴鼓角整隊伍軍容肅然三桂披甲上馬揚鞭疾馳發三矢皆中的長槍大劍畫甲雕戈羅列左右每馳馬一回卽于馬上接一器運之風馳雨驟英武絕人其意欲以力誦衆心也癸丑冬三桂就道命前隊先行自擁大軍殿後日行三十里行數日卽稱疾不起撫臣驅之急使者日三四輩至楊前詞益峻色益厲三桂堅臥不起諸將數來問疾勸進藥餌不聽故以言激之曰吾疾在心豈藥石所能愈乎想曩者披堅執銳身經百戰開拓疆宇有大勳于王室章皇帝不以老臣爲不肖錫之藩封載在盟府今撫臣一外吏相凌乃爾一旦入國門付廷尉我豈有生路耶諸將聞言果忿忿而出軍士裹甲露刃矢在弦馬塞道風動塵生日色慘澹居民皆駭走襲執撫臣殺之持其首見三桂三桂頓足失聲以頭搶地曰爾輩殺我爾輩殺我我三百口死不旋踵卽爾輩亦且族矣諸將大呼曰唯反耳反耳三桂大喜霍然而起卽部署諸將囚執二使以撫首祭旗纛其妻聞變哭而出曰殺吾兒矣以長子尙主留京爲質故也三桂不顧傳檄四方前隊在荆楚者皆舉兵反奉使筆帖式王新命乘間得脫疾馳五晝夜至京師赴兵部告變至則以手抱柱日上視氣厥不能出一語堂吏見狀知有異急以湯灌之半日始甦乃大言曰三桂反矣撫臣被殺使臣見執矣舉朝震動貴州提督李本深張獻忠勇將也從孫可



望入京後鎮黔中陰與三桂往來至是遂從之反發兵守險聲勢甚大貴撫曹申吉以片紙書三桂反本  
深作亂內之亟插雙羽馳告川湖總督蔡毓榮所在戒嚴陝西提督王輔臣聞三桂反卽欲舉兵爲應因  
甯羌告警以請餉不給激怒軍士卽回秦州據平涼以叛誘降我鞏昌游擊袁成棟協防階文岷洮參將  
潘瑀臨洮遊擊曾文耀蘭州遊擊董正己遣趙陳兩僞總兵進屯鞏昌攻陷河東諸州郡三桂以輔臣爲  
僞鎮西大將軍陝西總鎮王屏藩與輔臣俱受僞諭僞印密相聯結聞輔臣叛遂據守城隘發兵以應吳  
逆入秦之師爲西道主三桂以屏藩爲僞將軍時有欲求先朝後以繫人望者有欲疾行渡河全師北向  
或勸下九江扼長淮以絕南北運道或勸據關中巴蜀塞殺函以自固三桂皆拒弗從甫至湖南遽僭大  
號改常德府治爲行宮易黃瓦不及以漆黝之築壇衡山下告卽位于上帝建國大周改元利用復于山  
下結蓐廠萬間爲受朝之地文武以次稱賀舞蹈未畢大風忽起蓐廠捲入雲中俄而驟雨如注逆黨草  
草卒事識者早知其不克終矣於是三桂以其婿吳之茂爲僞西蜀大將軍與屏藩輔臣合兵破甘肅下臨鞏  
將李本深攻陷湖南諸郡規圖進取以其侄吳之茂爲僞西蜀大將軍與屏藩輔臣合兵破甘肅下臨鞏  
駐師隴右謀據關中與我定西大將軍多羅貝勒巡撫華善靖逆將軍張勇提督王進寶相持于武關三  
關諸將惟屏藩最善用兵每出偏師絕糧道斷驛站以隔燕秦音耗散布流言煽動三秦我軍數爲所困



以其姪吳世賓爲僞親軍金吾衛大將軍率兵下廣東降我嗣定南王孫延齡廣西提督馬雄三桂封延齡僞臨江王授雄僞東路都總官以其將馬承蔭率兵廣東降我平南王尙之信俾仍掌藩事授藩下都統王國棟爲僞輔翼將軍協守廣東復遣使至福建招靖南王耿精忠至臺灣招鄭成功子經使各起兵侵擾閩粵以分我軍勢精忠經皆通款于三桂其時 本朝之大將軍鎮守岳州與吳逆相持者爲川湖總督蔡毓榮將綠旗兵與督臣協守三楚者爲江南水師提督楊捷統滿兵與提臣爲犄角以遏吳師者爲大將軍賴塔奉 命招撫楚蜀以輯甯軍民者爲大將軍公圖海總統諸師擁重兵爲南北聲援者順承郡王也當三桂起滇南窺荆楚李本深應于黔精忠叛于閩之信延齡擾于粵巴蜀旋破鄂岳告急王輔臣據平固下隴右王屏藩出陽平關圖鳳翔人心搖搖當官無固守志天下事幾不可問矣幸天奪其魄逼洞庭而不卽渡得劍南而不能守僅徘徊衡湘間此乃天命非人力也又三桂初發難時洛邑頑民猶思祿父故訛言煽動所在響應耿尙二王及臺灣鄭氏皆通使往來及聞其南面自尊建號改元設官製厯由是天下解體角材而至者皆思有以誅之矣自癸丑軍興滇蜀之間屢歲不登米一石價五六兩鹽價三四百錢一斤軍需孔殷則加稅田畝地丁額征畝至五六錢徵催嚴迫怨聲四起故所破州縣旋得旋失加稅不足又于雲南麗江等處鑿山開礦採取金銀日役苗夷萬人士司多忿怨而三桂窮極奢



憐愛妾陳圓圓自收京時仍覓得之携之入蜀入滇寵專房晝夜聲色自娛不理軍務脅從之衆日引領以望王師之至十六年丁巳大兵定浙東下八閩入兩粵精忠之信旋皆反正延齡爲馬雄所軋謀復背吳事泄被殺鄭氏亦退屯島中閩粵既定三桂之勢益孤王師無東顧憂遂并力西向王輔臣據守平涼與張勇等相持三載輔臣承僞旨屢以王爵餌勇遣僞守備陳旺質僞諭僞印併吳之茂密書至勇即遣子雲翼從口外入京奏聞與陝西提臣王進寶孫思克進攻益力河東州郡漸次恢復輔臣勢威遂率平涼慶陽固原諸郡州以降大軍乘勢謀取漢中興安分兵五路屢有殺獲三桂漸老耄援秦之師不繼所得州縣以次仍失屏藩之勢據陽平關爲平涼聲援輔臣既降屏藩之茂益弱屢爲大軍所挫後戰敗自刎死之茂遁入成都秦省蕩平王師遂由隴入蜀夏國相同李本深規取楚地與我督兵提臣滿師等軍隔洞庭湖北營湖中飛矢雨礮晝夜不息國相等不能進取尺土士氣漸沮順承郡王遣大臣遺書三桂三桂不從明年戊午王師四集湖南故土奄然歸定時三桂已退守成都本深見勢不支謀復歸順大將軍公圖海遣使諭以威福遂降國相西遁三桂抗命藉命苗兵爲助所爲標槍發無不中得數十苗兵扼險而守百萬之衆莫可誰何至是皆遁歸胡國柱爲逆藩額駙有統袴習每出師一切服用玩好奇花怪石棐几湘簾茶鐙博具悉載以行軍壘未定先爲經營日以詩酒自娛不以軍事爲意及王師壓境國



勢日逼國柱密謀急歸順有謀士爭之曰王以大任屬將軍將軍足一動則黔中斷左臂滇南援絕荆楚解體王之全局俱敗且將軍今日降明日誅矣與其降之死不若力戰死國柱意已決不聽馬寶亦力爭不得乃馳告三桂值中秋三桂方擁歌姬與所嬖陳圓圓臨軒玩月忽國柱變聞大呼曰吾事去矣卽氣噎仆地遽絕左右姬妾莫不遑駭急救之不復甦矣三桂死夏國相等扶其孫世璠于柩前嗣立築園寢于成都皆僭踰制後大兵破蜀發其塚粉骨爲塵無餘骸焉三桂構逆凡五年卒七十有五嗣孫世璠僭號雲南改元洪化以五華山宮爲宮城昔僞永厯在滇築宮于五華三桂益廣其址緣以重垣俯以傑閣極土木之盛至是遂駐軍焉拜僞大學士夏國相爲上柱國左丞相宮府機宜咸諮詢之拜僞將軍馬寶爲元帥專司閫外先是靖逆侯張勇密奏搗滇之策上命議政親王會議未報至是命大將軍多羅貝勒大將軍公圖海從貴筑大路駐軍曲靖而平南將軍賴塔率平閩粵之師由廣西入滇屯黃草壩會軍進討雲南大震自粵入滇有石門道之險兩山矗立中通車馬一人守隘萬夫莫窺平南兵至奪於先聲守兵皆撤營遁歸大軍過險衆志始定吳軍于要路聯接營寨以拒我師一夕傳言關神顯聖敵疑我軍劫寨自相殺天明始散遺皮盔皮甲無算吳軍恃苗兵鐵槍發必洞腋我軍以烏槍制之團牌十伏槍百火至齊發苗兵多死是時吳軍于石虎關口築礮臺一座臺前飭田百頃鑿池爲淖時值播種上插



青秧以陷馬足我軍偵知夜傳令軍士各備泥一升竹梯千乘迂道至關下先以泥實地乃附竹梯蟻登矢石雨下屍與臺等欲至第六次吳軍不支悉遠遁我軍反據其上開大礮擊之死者萬數馬寶將大兵居外我撫遠大將軍公圖海日遣使實金幣至其營諭以朝廷威福寶惑于利心動復縱反間謂寶將擁衆入城謀不利于孺子世璠頗信之軍糧調遣每不如其所請寶衆進退維谷圖公以愛子爲質誘令釋甲歸順遂信質來降以兵衛入京上欲原之迫于言者與耿精忠同磔于市死之日天鼓鳴日無光愁雲四合寶謂行刑者曰我將歸天也體無寸膚面不改色寶死圖公亦被闕焉寶臨陣所過必衝一血路滿兵死者凡數萬將刑八旗軍士雲集爭市其肉歸以祭沒于土事者二十年春二月平南大將軍侯平西大將軍至會議進剿四月大軍集雲南城下諸將數請攻城大將不許曰軍士冒矢石觸鋒刃裹創走萬里得至於此今遺孽釜息昆明諒無他虞我按兵不動曉以大義必有起而爲變者何忍令我軍士復填此堅城下乎遂撤攻具築長圍以困之會城外接昆明池池內橫以木筏上設樓櫓與大軍爲犄角勢以防奔逸城中樵蘇不通者閱月數出銳卒衝擊營壑我軍堅壁不動吳勢益屈僞丞相夏國相慮其黨謀變悉移諸將家口屯五華山宮城凡僞僚府署亦移宮城左右分門守禦以示必死秋九月巡守南門僞總管獻城約舉火爲內應我大軍會訊得實傳令三軍五方齊進至夜僞政府火起我軍師銜枚至南



城下門啟師遂入夏相國知內有變趨至宮城號哭而言曰吾聞守社稷者死社稷王毋自辱逼世瑁自縊并殺宮妾數人歸殺其妻子遂自殺比明大將軍統全師入城雲南平諸將以城中百姓爲逆死守照律應屠大將軍曰滇民不幸爲吳逆誘脅死于兵役者半死于飢荒者半幸天兵弔伐民困稍蘇殘黎有幾忍復殺之乎宜仰體 聖朝一視同仁至意暫緩斧越之誅候 旨定奪尋邀大赦與民更始滇民大悅初三桂僭號衡州衡州山嶽廟有白龜大如錢多靈異三桂志希器卜日詣廟供天下輿圖于神座前默視龜之所向蹣跚循走不出長沙衡永間已復從貴州至雲南而止再三虔禱白龜三復如之三桂君臣相顧失色後果如所卜 外氏史曰嗟嗟三桂不忠不孝身陷大逆家破屍戮爲萬世笑信哉自作孽不可追也當其稽首 清庭乞師討賊六軍縞素萬姓同仇使有明九廟神靈一舒在天之憤厥功非不偉也而徒以耽情優笑蠱惑妖淫而爲此舉則豈志存君父者哉洎 本朝定鼎燕京錫之珪璫爵列親王河山帶礪之誓載在司勳可謂榮矣乃居寵而不思感受恩而不知報驕奢淫佚恣行無忌據滇南尺土欲與 天朝抗命僭號改元妄竊神器抑何愚也卒之毒流播紳禍延黎庶徒覆其宗而絕其祀哀哉



耿仲明字雲臺先世山東人徙遼東蓋州衛爲皮島毛文龍養孫名毛有傑生而面深黑手掌潔白如玉軀幹偉長驍勇善戰文龍爲心旅官至參將明懷宗改元起前遼東巡撫袁崇煥爲督師賜上方劍得便宜行事崇煥故與文龍不相能至是復伐其功檄召至軍中議事語不合卽出上方劍斬之一軍皆譁崇煥恐生變奏罷江東帥府散其徒衆令仲明及島將孔有德隸山東巡撫孫元化麾下會禦東師出兵而餉不至仲明顧有德嘆曰大將軍要合義旅跋涉荒陬出萬死以復疆宇而卒之冤死我與若直几上肉耳可鬱鬱久居此乎有德然之遂率兵歸本朝仲明亦率其衆七千來歸崇德元年封懷順王後從世祖入關定天下改封靖南王順治四年丁亥永明王由榔僭號永曆據有兩粵滇黔上命仲明及定南王孔有德平南王尚可喜統兵下湖南襲永曆于武崗永曆走柳州獲僞安國公劉承胤殺之湖南平六年乙丑復同有德可喜率兵南下行至吉安仲明卒于軍中子繼茂襲封藩爵十二月繼茂與可喜入廣東而有德入廣西繼茂等進攻廣州羊城三面臨水僞將杜永和李建捷等悉力拒守不克拔攻圍至十月閏月偏將范承恩約降爲內應城始破永和走瓊州建捷走肇慶建捷後與其兄元胤共收高雷欲迎永曆入海爲土兵所獲執至繼茂營勸之降不應令之作書招永和永不從遂殺之是冬有德亦克桂林明年潯州鎮帥陳邦傳來降杜永和亦降于繼茂兩粵漸平九年壬辰永曆遁入安隆其臣李定國等謬以恢



復爲名所在蠱起桂林尋陷有德自焚死粵中震動 上命平靖兩王同鎮廣州以靖餘孽一府兩藩俱應浩繁藩府使命絡繹旁午役縣令如奴隸視百姓如草芥後科臣上言兩藩並建諸所未便狀會海寇鄭成功進掠漳泉諸郡遂移繼茂鎮守八閩開府福州康熙元年鄭成功死子經嗣立臺灣多故繼茂同總督李率泰遣人招諭經經請如朝鮮事例不報知經終無歸化意因糾合紅毛島夷令乘間進襲臺灣十月繼茂同率泰滿帥郎賽合紅夷出泉州提督馬得功出同安黃梧施琅出漳州尅期進討經將周全斌軍潰退守銅山繼茂等遂拔廈門金門二鎮屠之繼茂尋卒子精忠嗣督精忠氣宇魁偉生有異表少長宮壺不知祖父締造大勳繼位後日與宵小爲伍而羣不逞之徒復煽以邪謀因讖緯所載有天子分身火耳之謠誦火耳者耿也天下有故據八閩以圖進取可以得志勸令部署將士以待時變十二年癸丑雲南吳三桂叛以書招精忠遂舉福建以應之執總督范承謨置諸獄承謨被拘三載矢志不屈王師破仙霞嶺遂遇害精忠反自稱總統天下兵馬上將軍以弟姪爲左右大將軍統領五軍五軍設五都督五都尉五副都尉其下設偏將軍有開遠將軍平遠將軍等號曾養性爲左軍都督養性最善用兵從東路出福甯州破溫台等處等州白顯中爲後軍都督顯中本旗人范時榮爲副都尉王錫爲開遠將軍破江西廣信饒州馬九玉爲驍騎將軍同江允勳出烟霞嶺破金華衢州有羅將軍者破嚴州徽州時承平



日久民不知兵一聞精忠兵至守者或降或遁故所向皆捷浙之將軍爲圖賴巡撫爲田逢吉總督爲李之芳反報至賴竊輒不能起時稱擡不動將軍逢吉頓足不止稱跌脚巡撫之芳聞變掀髯不已稱掀髯總督一時烽烟四起羽書踵至之芳疾馳至衢州城中已空力爲捍禦想掀髯時已定討賊立功之志征福建浙江者爲和碩康親王以十三年駐師金華參贊軍機者爲內院學士黑白大臣紀振疆提大兵相待江上者爲平南將軍賴塔督理大軍糧餉者爲戶部侍郎達都大兵俱集衢州州帶山環水江之南九龍山爲九玉所據江之北姜家山洞衆嶺爲滿漢大軍所屯將軍賴塔與督臣李之芳畫江而守十四年八月十五夜九玉潛引兵劫寨殺傷甚衆得志而去明年丙辰八月十三日康親王至衢十四日親臨江上相視九玉營壘密諭隨征福建左鎮兵劉顯著滿洲副都統胡圖乘夜出兵十五日黃昏望九龍山而進遣九玉復遣兵劫寨遇于渡江時兩軍相值彼此莫辨彼此開大礮擊之九玉兵遽退初九玉立營在九龍山頂山下密布梅花椿以阻我師其出兵僅開一徑魚貫而行兵出關隨閉及遇我師猝不能歸守散處山下進不能越江以劫我退不得歸營以自守顯芳驅衆力戰連發大礮擊其兵一時精銳俱盡九玉知事不濟亦于山頂開礮山高礮遠反越江而去我師無受傷者十六日顯芳率輕騎直抵其壘以覘動靜知彼軍已奪氣卽于是夜乘虛而進縱火焚其寨九玉遂不支僅以五十騎遁歸常山康親王率大



軍繼之盡降其衆乘勝直抵仙霞嶺守者開關納款時僞後軍都督白顯中頓兵廣信王慮其前後夾攻因留守建陽而自率大軍竟進會顯中移檄至聲言會兵十七萬齊集建陽守者大懼議欲求援于大將軍而大軍已發勢不可回有諺曰陸孔昭隨征在建陽倡議往撫衆卽推孔昭夜往遂策五騎持康親王諭帖至崇安見顯中之副將范時榮王鎬等諭以禍福衆皆聽命時顯中據崇安關爲八閩九江之聲援凡銜命以往者恐其搖動軍心至卽殺之以堅衆志聞孔昭至遣飛騎來追而范王已授意從間道歸矣范王旣降顯中勢益孤弱孔昭復銜命往許以不死不得已亦降精忠所恃惟馬九玉白顯中曾養性三人九玉旣敗顯中復降養性所破郡縣王師漸次克復而臺灣鄭經復納其降將乘虛襲閩精忠憂憤不知所出初經使人借漳泉二府精忠不許耿鄭始惡經遣將取同安僞守將張學堯降海澄總兵趙得勝亦不附精忠率其衆降經王師圍潮州精忠不能救僞總兵劉進忠亦以州降後汀州僞守將劉應麟興化僞守將馬成龍邵武僞守將楊德相繼降經精忠故封盡入鄭氏而康親王自提大軍壓壘而陣且以軍帖諭之勸令歸化許仍襲舊封精忠以鄭警日逼而王師壓境知勢已去遂降 上以臺灣未平俾仍統其部四十七年七月精忠從浙閩姚啟聖甯海將軍喇哈達都統穆黑林平南將軍額塔等進剿臺灣經僞將劉國軒率二十一鎮兵與王師戰于龍虎山都統胡兔先合不利啟聖援之亦潰精忠故讐鄭親



督戰斬陣退者三人衆始定援槍大呼而入平南繼之破營十六國軒泗水遁經退入臺灣浙閩平精忠降後鬱鬱不得志復萌不軌之志 上于是討其叛逆之罪俘至京師與吳三桂將馬寶同歸於市 外

史氏曰仲明起身戎校乘中夏多故歸命 本朝邀封王爵其被恩寵也厚矣洎乎入關戡亂率師南征志切從龍功高汗馬非所云國士遇我國士報之者耶繼茂嗣位克承父志粵西再警協力蕩平臺灣阻化興師進討可謂無忝所生矣雖其天性嗜殺所至糜爛然欲削平區宇驅滌海氛志未嘗一日忘也惜天不永其年異日滇南感化澣海歸誠不獲躬際其盛精忠承兩世遺蔭嗣封藩爵固宜宣力王家矢心勿二上念 朝廷寵綏之渥下念祖父締造之艱則子燕孫貽正未有艾奈何附于吳逆穴鼠井蛙妄窺大器兩浙八閩之間丁壯陷鋒刃老弱罷轉輸兵連禍結彌年不解罪尙可追乎厥後王師四出詘于勢而後降蔡市之誅固已晚矣

### 平南王尙可喜傳

尙可喜遼東人毛文龍養爲孫名毛永喜勇而善謀官遊擊文龍被害率親兵五百自島中歸于 大清封智順王佐定天下改封平南王順治四年同定南三孔有德靖南王耿仲明及噶喇賴其焦奈藍拜平湖南所至克捷六年復同嗣靖南王耿繼茂平廣東廣東底定遂 命鎮守其地開府廣州有子女一百



三十餘人長卽安達公尙之信次卽平南將軍尙之孝可喜自以馬上得功名始終不弛師教其子故之信等多驕縱不法之信初留京師歷被兩朝恩寵康熙六七年間歸藩不得父志酗酒嗜殺所爲多不

道深宮靜夜無以解醒卽佩刀刺其侍者雖寵愛弗惜也喜畜犬築居設監出必塞途居民避路嘗怒一監命左右割肉啖犬肉盡而止王之宮監傳命至見其腹大曰此中必有奇寶卽刺刃于腹而斃嘗縛王之堂官王化曝酷日中自辰至酉百計規脫王知之呼之信至予杖三十而凶惡之甚浙人金光字公綢多智數從王入關後定楚粵多與密議乘間言于王曰安達公剛而多虐勇而寡仁若以嗣位必不利于社稷請廢之而立之孝王深然之然猶豫終未決光恐洩謀反曲事之信凡鑿山開礦煮海鬻鹽無不窮極其利于是平南之富甲于天下而光之橐亦充然矣後臺灣鄭錦下東莞守將趙天元謝厥扶以舟師迎降乘勢欲襲廣東之信與父計殺光以謝鄭曰向之抗衡上國者皆光之爲也十二年癸丑詔撤三藩戶部尙書梁清標郎中何嘉祐奉使廣東撤平南藩兵至則可喜拜詔如儀主客無一言遽夜環帳房館垣皆露刃注矢鼓三下聞介馬聲嘉祐曰事棘矣卽起叩尙書白事耳語移時出醺燭草疏鼓未絕而疏已成諸旦可喜率之信及諸統領詣使館齊聲懇啟行艱難願守廣中以報効大夫毋貽後悔尙書遽起拄司賓口曰止拜詔尙未竟而遽言啟行何謂也吾陞辭時上密諭使臣謂王勞苦異諸藩當



永鎮南疆而昨以通詔不可異故俟茲密宣今所撤獨平西藩耳王未行也而曰啟行何也可喜等皆錯愕各相視曰可信乎尙書探懷中疏與之曰此復疏也可喜及諸將傳視畢尙書曰吾已宣諭訖可以覆矣叱具案鼓樂遂拜使使負疏行可喜等色始下率諸將詣案謝之信徘徊未肯前可喜囑其指曰幾負聖朝歡宴三日而去越四日而三桂之反聞至矣可喜以之信凶惡不悛恐終貽悔後具疏請于朝以次子之孝爲嗣而自歸老遼東以盡餘年章未下而三桂兵至之信遂幽其父發兵從三桂反可喜聞變涕泣悔不早從金光言不數日遽歿遺命以本朝冠服殮上以之信從逆削其藩爵之孝不從兄叛拜平南將軍之信初附三桂復與鄭經通後俱不相能旋歸順本朝從莽將軍征吳逆僞將馬承蔭等于廣西復拜之信爲宣議將軍征江西福建耿逆餘兵之未靖者時方多故而尙氏有大勳故朝廷以大度容之丁丑五月寬之信從逆之罪命承襲父爵爲平南親王率兵討孫延齡駐軍宣武縣有藩下人張伯全與張士選者素不悅于之信忽召伯全至軍伯全懼密約士選入京告變謂之信心懷怨望放言訕上士選本之孝私人之孝欲襲藩位搆難多端告誥之興所由來也王國棟者旗下逃人之信愛之倚爲心腹其主人奉使至粵見國棟索重賄不得歸告督部之信贖以十萬金位至都統沈上達者江西優童也之信嬖之授以藩府家政大小事咸取決焉王府護衛張禎祥爲之信所任寵無與并三人素黨



之信之孝謀去其兄三人反附之搆之信罪發其征馬承蔭時與莽將軍不協以礮擊大營謀殺莽將軍意在反復與伯全等共證成之 上命侍郎宜昌阿等按問時藩府兵悉隸于國棟國棟方與粵撫金僞交歡僞授意國棟偕尙之璋至廣西軍中之信聞 詔卽解玉印還廣州待罪羈留五仙門地方官設兵嚴衛內外音耗不通母萬福金與其弟若子日夕涕泣不知所爲而國棟爲藩下都統全藩在掌握乘之信被羈凌虐尙氏奪其權收其重貲尙氏子弟積不能平思所以報之矣李天植者藩下總兵也密與府中議曰國棟與我輩同起廝養沐恩日久未至固山先王所以待之者不爲不厚矣安達公通款僞周曾無一言諫阻亦受輔翼將軍之秩今公已反正襲封霄小讒搆致見羈執不能剖肝瀝膽力白其誣反欲賣主以求富貴先王抔土未乾而使全家骨肉危如累卵國棟之肉其足食乎不若誘而殺之庶足慰在天之靈而舒合門之憤遂伏武士于兩廊傳尙太夫人命馳召國棟國棟帶刀入見語不遜卽縛之之信子剋其目天植同尙之節等寸磔之國棟家人奔告金撫捕同謀諸人皆無諱詞撫以狀 聞天植坐謀反死同死者一百八人天植妻舒氏驅二女及侍妾自盡然後自刎死十九年八月十七日之信賜死于府學之名宦祠粉其骨揚灰焉兄弟同死者三人沈上達家人鍾姓者拾其遺骸餘盡瘞之西園報資寺之孝及宗族之產皆沒入官家人發旗下爲奴平南四十年積聚所得外洋幣帛以百萬計其入官僅



什之一上達等蠶食之餘盡歸撫臣私橐而發難之之孝不得過而問焉撫臣意猶未足欲併上達之所  
有許以具題免其爲奴追上達金盡仍遣入京上達有怨言謂將白其事于 上撫臣懼得罪中道追回  
令有司嚴鞫之以三千金買獄吏五百金買獄卒殺之以滅口上達死伊子仍沒入與 內務府爲奴一  
日上偶見之子大聲呼冤且泣且訴懷中出平南藩貲原冊呈上遂逮撫臣追其幣入官卒正其罪初之  
信爲逆時建正殿有鐵栗木柱大可合抱殿成柱上忽題一詩曰掘斷老龍傷粵秀怪風吹上尉陀城可  
憐白草黃沙國直待劉家汗馬鳴詩句倒題于柱意竟不可解又有仙降乩云周鄭交惡亡蓋指之信初  
通三桂鄭錦後皆相背卒以滅國也而可喜實始終一節後開棺見其冠服如制故之信等四人伏誅外  
其餘家口俱從寬典 外史氏曰嗚呼平南披金帶甲食土分茅逆知其子之不肖而自請歸遼善夫惜  
乎不早教其子使披猖至此則亦未爲無過也若之信幽其父而身死之孝許其兄而家破國棟負  
恩而磔死上達噬主而死獄撫臣黷貨而亡軀天道何昭昭也平南雖有逆子而始終一節猶得保  
其百三十口之子女福善禍淫之說我于平南一藩而益信

定南王孔有德傳

孔有德至聖裔也原籍山東徙居遼陽明熹宗元年練兵遊擊毛文龍將親兵一百九十七人襲破鎮江



城有德其一也驍勇善鬪臨陣先登爲諸將冠文龍愛之養爲孫名毛永詩文龍開府毛島有德累官至參將及文龍爲袁崇煥所殺調往山東隸巡撫孫元化麾下會師告警元化檄有德出禦兵餉不以時至衆軍皆譁有德歎曰大將軍功名卓卓猶且不免我輩死固晚矣時勢如此尙可爲耶遂率親兵八百人來歸還襲皮島克之以功封恭順王後從世祖入關定天下改封定南王初皮島之潰文龍麾下先後來歸封王封伯爲總督爲將軍者甚衆獨有德心念舊恩言及大將軍時事輒抑鬱不自勝文龍喪停登州北寺有德親具舟從海道遣人迎之將葬于遼陽舟至中流颶風倏起怒濤山立有德拜而言曰公不欲往東耶因返舟舟移而風止有德素與文龍從子副總兵毛承祿親厚歸命後孫撫令承祿往說之有德謂之曰李少卿有言歸易耳恐再辱奈何今明官皆刀俎我何能爲魚肉耶欲留承祿事之承祿不可尋歸以讒見殺及開府廣西復迎事文龍子諸生承斗恭禮甚恭可謂不以盛衰改節不以新故易志者也順治四年三月上命有德同平靖兩王及滿師等下湖南其秋大兵破武岡常德寶應諸州郡明藩遁走廣西湖南遂定七年冬率師下廣西入全州破桂林執明留守瞿式耜總督張同敞勸之降不屈殺之憫其忠許令歸葬復克潯梧平慶等府廣西平捷聞遂命鎮守其地開府桂林以其將李如春線國妾爲都統留守而有德同敬謹親王尼堪統大兵進取黔中九年壬辰二月有德以七百騎出河池向貴



州大軍至柳州接應五月僞將李定國率兵收復湖南由黎平出靖州進攻靖沅武岡俱下之有德聞警急回守禦而定國由西延大埠偃旗捲甲倍道疾進七月二日襲全州破之遂奪嚴關關在全州西南爲桂林出入所必由有德馳救不及初四日兵過平樂府定國營于嚴關設象陣以待兩軍既接有德令素嚴將士殊死戰象奔還定國斬御象者嚴鼓進兵象復衝突天大雷雨敵兵呼聲動地乘象陣而入我軍不能支遂退馳入桂林閉城拒守越三日定國兵至城下時粵西初定人心未固定國攻城守陣者皆不立桂林遂陷有德整衣冠坐府中嘿無一言久之謂夫人曰不幸少入軍中漂泊鐵山鴨綠間冀立寸功垂名竹帛及大將軍以忠受戮歸命 本朝歷被兩朝知遇爵以親王錫之藩社榮寵至矣我受國厚恩誓以身殉若輩亦早爲自計夫人曰君無慮我不死指其子及女曰第兒曹何罪而亦遭此劫乎囑老嫗負之去泣而送之曰此子苟脫于難當度爲沙彌無效乃父一生馳驅南北下場有今日也言畢與其妾皆自經有德縱火焚其府向北再拜拔劍自刎死家口一百二十人皆被害子尋爲定國軍士所訴死于安隆女亦見獲以年幼羈養軍中 上聞有德閣門死難震悼撤朝下 詔褒卹諡忠烈賜葬京師歲時祭祀其後李如春線國安收集潰兵大破定國之衆廣西復平有德之女得歸守臣具疏以聞世祖與太皇太后憫有德歿于王事其子庭訓已見殺止遣一女令送入宮爲 太后養女名孔四貞及四貞年



十六 太后爲擇佳婿四貞自陳有夫蓋有德存日已許配孫偏將之子延齡矣因下

詔求得之奉

太后命爲夫婦賜第西華門外廣西之再定也以線國安統其衆部曲如故而藩府久虛 上念孔後無人并慮孔師無主乃封四貞爲和碩格格掌定南王事遙制廣西軍延齡爲和碩額駙內輔政大臣都勒機昂邦世襲一等阿思尼哈番延齡美丰姿曉音律長于擊刺體勁捷能趨九尺屏風惟不喜讀書然遇有章奏令幕友誦之輒能斟酌可否與人交必盡其誠能容人過失時年亦十六云四貞美而才自以太后養女又掌藩府事視延齡蔑如也延齡機智深狙以 太后故貌爲恭謹以順其意四貞喜出入宮掖日譽其能由是 太后亦善視之寵賚優渥亞于親王四貞不知延齡以計愚之也謂其和柔易制事益專決延齡內愈不平日思所以奪其權矣康熙五年丙午四貞面奏家口衆多費用浩繁欲就食廣西奉特旨查定南王女孔四貞于順治十七年奉 世祖章皇帝掌定王事在京遙制今應否給與伊婿孫延齡掌管著議及親王貝勒大九卿科道會議具奏諸大臣皆以爲可議上卽奉 旨孫延齡鎮守廣西將軍其下應設都統一員副都統一員卽著延齡遴具奏線國安年老著休致四貞遂請和碩格格儀衛以行與延齡南下抵淮安 誥封勅書至以延齡爲特進上柱國光祿大夫世襲一等阿思尼哈番和碩額駙守廣西等處將軍其妻室孔氏爲一品夫人四貞自以爲和碩格格已居極品不從夫貴也今忽封一



品夫人則仍似妻以夫貴矣疑延齡囑內院爲之不愜意夫婦遂不相能戴良臣者原係四貞包衣佐領頗有才智希大用力薦其親王永年爲都統而欲已與嚴朝綱副之孫延齡初不許乃營求于內四貞強之而後可雖爲之請 命于朝而心甚惡良臣因構難其間謂延齡獨信任蠻子而薄格格舊人由是尤婦亦不合良臣佐格格每事與延齡相左所用之人必逐之而後已延齡竟爲木偶不能復出一令矣四貞初任良臣以爲尊己故惟言是聽及其得志并格格而藐之權且漸歸于下事無大小皆擅自題請廣西一軍唯知有都統不知有將軍并不知有格格四貞乃大悔恨知爲良臣所賣仍與延齡和好然大權旁落不可復制三都統益自尊延齡積不能平以良臣等僭亂不法事訴於 上三都統亦具訴訐之

上命督臣金光祖究其事光祖與副都統嚴朝綱爲至戚奏延齡御下失宜良臣等無罪 上疑其言非實復令大臣按問三都統懼得罪併力求伸以故大臣亦不直延齡延齡于是始謀所以殺良臣矣十二年癸丑吳三桂反以書招延齡延齡遂召良臣等十三人議事伏力士擲盡爲號盡繫縛斬之卽舉兵吳逆封爲臨江王廣西提督馬雄亦定南藩下人爲都統之助惡延齡害已堅守不下後三桂大軍至廣雄乘勢亦降爲僞東路總督雖與延齡共事而彼此各相猜疑延齡乃復萌反正之意蓋其初叛也激于良臣之訟及見馬雄勢大畏其逼已四貞又日夜感 上恩勸延齡歸順計且決矣雄探得之密告三桂



謂延齡有異志宜急除之以絕後患十六年丁巳三桂遣其姪僞金吾大將軍吳世賓領兵以恢復廣東爲名駐師桂林城外延齡出迎世賓敘故相得甚歡及送之轅門有苗兵數十突起馬首延齡于馬簾中出利刃奮擊斃數人力不支爲所殺世賓送其頭于馬雄雄掀髯大笑曰延齡亦有今日乎頭忽墜目張口躍然而起直撲雄身雄大叫曰延齡殺我遂嘔血而死四貞幼時曾爲三桂養女延齡死遂拘之入滇其子亦爲吳世賓所殺厥後雲南平四貞歸京師奉有德祀延齡竟無後 外史氏曰三王皆爲開國大臣而定南獨以忠節顯觀其閭門俱殉孤女僅存豈非所謂殺身成仁者歟信乎聖人之後其所樹立固殊焉延齡夫以婦貴位尊柱國權重將軍共被恩寵何其渥也乃不學無術禍生肘腋臣節不忠卒至慘死以視婦翁不深有愧于地下哉



明季稗史彙編卷二十七

江都王秀楚記

揚州十日記

己酉夏四月十四日督鎮史可法從白洋河失守踉蹌奔揚州閉城禦敵至廿四日未破城前禁門之內各有兵守予住宅新城東楊姓將守焉吏卒募置予宅寓有二卒左右鄰舍亦然踐踏無所不至供給日費銀千餘將不能繼不得已共謀為主者觴予更謬爲恭敬酬好漸洽主者喜誠卒稍遠去主者喜音律善琵琶思得名妓以娛軍暇是夕邀予飲滿擬縱歡忽督鎮以寸紙至主者覽之色變遽登城予衆亦散去

越次早督鎮牌諭至內有一人當之不累百姓之語聞者莫不感泣又傳巡軍小捷人人加額焉午後有

姻氏自瓜洲來避興平伯逃兵

興平伯高傑也督鎮檄之出城遠避

予婦緣久別相見唏噓而大兵入城之語已有一二爲

予言者予急出詢諸人或曰靖南侯黃得功援兵至旋觀城上守城者尙嚴整再至市上人冒洶洶披髮跣足者繼塵而至問之心急口喘莫知所對忽數十騎自北而南奔騰狼狽勢如波湧中擁一人則督鎮也蓋奔東城外兵逼近不能出欲奔南關故由此是時始知敵兵入城無疑矣突有一騎自南而北撒韁



緩步仰面哀號馬前二卒依依轡首不捨至今猶然在目恨未傳其姓字也騎稍遠守城丁紛紛下窺棄  
甯拋戈并有碎首折脛者迴視城櫓已一空矣先是督鎮以城狹礮不得展城垛設一板前置城徑後接  
民居使有餘地得便安置至是工未畢敵兵操弧先登者白刃亂下守城兵民互相擁擠前路逼塞皆奔  
所置木板匍匐扳援得及民屋新板不固托足卽傾人如落葉死者十八九其及屋者足踏瓦裂皆作劍  
戟相擊聲又如雨雹挾彈鏗然鎗然四響不絕屋中人惶駭而出不知所爲而堂室內外深至寢閣皆守  
城兵民緣屋下者惶惶覓隙潛匿主人弗能呵止外廂比屋閉戶人煙屏息予廳後面城墻從牕隙外觀  
見城上兵循南而西步武嚴整淋雨亦不少紊疑爲節制之師心稍定忽叩門聲急則鄰人相約共迎王  
師設案焚香示不敢抗予知事已不濟如此然不能拂衆議姑連應曰唯唯於是改換服色引領而待良  
久不至予復至後牕窺城上則隊伍稍疎或行或止俄見有擁婦女雜行其間服飾皆揚俗予始大駭還  
語婦曰兵入城倘有不測爾當自裁婦曰諾有金若干付汝收藏我輩休想復生人世矣涕泣交下盡出  
金付予值鄉人進急呼曰至矣至矣予趨出望北來數騎皆按轡徐行遇迎王師者卽俯首若有所語是  
時人自爲守往來不通雖相違咫尺而聲息莫聞迨稍近始知爲逐戶索金也然意頗不奢稍有所得卽  
置不問或有不應雖操刀相向尙不及人

後乃知有捐金萬兩相獻次及予門一騎獨指予呼後騎曰爲而卒受斃者揚人導之也



我索此藍衣者後騎方舍轡而予已飛遁矣後騎遂棄余上馬去予心計曰我粗服類鄉人何獨欲予予弟至予兄亦至因同謀曰此居左右皆富賈彼亦將富賈視我奈何遂急從僻逕托伯兄弟扶孀女冒雨至仲兄宅仲兄宅在何家墳後肘腋皆窶貧居也予獨留後以觀動靜俄而伯兄至曰中衢血濺矣留此待予伯仲生死一處亦可不恨予遂奉先人神主偕兄至仲兄宅當時兩兄一弟一嫂一姪又一婦一子二外姨一內弟同避仲兄家天漸暮大兵殺人聲已徹門外因乘屋暫避雨尤甚數人共擁一毡絲髮皆濕透門外哀痛之聲悚耳懾魄延至夜靜乃敢扳簷下屋敲火炊食城中四週火起近者十餘處遠者不計其數赤光相映如霞電爍爍聲轟耳不絕隱隱又聞擊楚聲哀風淒切慘不可狀飯熟相顧驚憂淚下不能下箸亦不能設一謀子婦取前金碎之分爲四兄弟各藏其一髻履衣帶內皆有婦又覓一破衲舊履爲分換訖遂張目達旦是夜也有鳥在空中如笙篳聲又如小兒啼哭聲如在人首不達詢諸人皆聞之廿六日頃之火勢稍息天亦漸明復乘高升屋躲避已有十數人伏天溝內忽東廂一人緣牆直上一卒特刃隨之追躡如飛望見予衆隨舍所追而奔予予惶迫卽下竄兄繼之弟又繼之走百餘步而後止自此遂與婦子相失不復知其生死矣諸黠卒恐避匿者多給衆人以安民符節不誅匿者競出從之共集至五六十婦女參半兄謂余曰我落落四人或遇悍卒終不能免不若投彼大羣勢衆則易避卽不幸



亦生死相聚不恨也當是時方寸已亂更不知何爲救生良策共曰唯唯相與就之領此者三滿卒也搜予兄弟金皆盡獨遺予未搜忽來婦人內有呼予者視之乃余友朱書兄之二妾也予急止之二妾皆散髮露肉足深入泥中沒脛一妾猶抱一女卒鞭而擲之泥中旋卽驅走一卒提刀前導一卒橫槊後逐一卒居中或左或右以防逃逸數十人如驅牛羊稍不前卽加捶撻或卽殺之諸婦女長索繫頸纍纍如貫珠一步一跌遍身泥土滿地皆嬰兒或襁馬蹄或藉人足肝腦塗地泣聲盈野行過一溝一池堆尸貯積手足相枕血入水碧赭化爲五色塘爲之平至一宅乃廷尉永言姚公居也從其後門直入屋宇深邃處處皆有積尸予意此間是我死所矣乃逶迤達前戶出街復至一宅爲西商喬承望之室卽三卒窠穴也入門已有一卒拘數婦女揀拾箱籠綵緞如山見三卒至大笑卽驅予輩數十人至後廳留諸婦置旁室中列二方几三衣匠一中年婦人製衣婦本郡人濃抹麗妝鮮衣華飾指揮言笑欣然有得色每遇好物卽向卒乞取曲盡媚態不以爲恥卒嘗謂人曰我輩征高麗擄婦女數萬人無一失節者何堂堂中國無恥至此嗚呼此中國之所以亂也三卒將婦女盡解濕衣自表至裏自頂至踵并令製衣婦人相修短量寬窄易以鮮新而諸婦女因威逼不已遂至裸體不能掩蓋羞澀欲死者又不待言也換衣畢乃擁諸婦女飲酒食肉無所不爲不顧廉恥一卒忽橫刀躍起疾呼向後曰蠻子來近前數人已被縛吾伯兄與焉



仲兄曰勢已至此夫復何言急持予手前予弟亦隨之是時被執男子共五十餘人提刀一呼魂魄皆喪無一人敢動者予隨伯兄出廳見外面殺人衆皆次第待命予初念亦甘就縛忽心動若有神助潛身一遁復至後廳而五十餘人不知也廳後宅西房尙存諸老婦不能躲避穿至後面盡牧駝馬不能踰走心愈急遂俯就駝馬腹下厯數駝馬腹削削而出若驚駝馬稍一舉足卽成泥矣又厯宅數層皆無路惟旁有街可通後門而街門已有長鐵釘錮予復由後街至前闥前堂殺人聲愈惶怖無策回顧左側有廚中四人蓋亦被執治庖者予求收入使得參司火掌汲之役倖或苟免四人峻拒曰我四人點而役者也便再點而增入必疑有詐禍必及我予哀求不已乃更大怒欲執予赴外予乃出心益急視階前有架架上有一甕去屋不遠乃援架而上手方及甕而身已傾仆蓋甕中虛而用力猛故也無可奈何仍急趨旁街門兩手捧錐搖撼百度終莫能動擊以石則响達外庭恐覺不得已又復搖撼指破血流錐忽動盡力一拔錐已在握急掣門屢屢木槿也濡雨而漲其堅塞倍于錐予迫甚但力取屢屢不能出而門樞忽折扉傾垣頽聲如雷震予急聳身飛越亦不知力之何來也疾趨後門出卽爲城脚時兵騎充斥前進不能卽于喬宅左隣後門挨身而入凡可避處皆有人必不肯容由後至前凡五進皆如是直至大門已臨通衢兵丁往來絡繹不絕人以爲危地而棄之予乃急入得一楊楊顛有仰頂因緣柱登之屈身而匿喘息方定



忽聞隔牆吾弟哀號聲又聞舉刀砍擊聲凡三擊遂寂然少間復聞仲兄哀懇曰吾有金在家地窖中放我取獻一擊復寂然予時神已離舍心若焚膏眼枯無淚腸結欲斷不復自主也旋有卒挾一婦人直入欲宿此楊婦不肯強而後可婦曰此地近市不可居予幾不免焉頃之卒仍挾婦人而去室有仰屏似簾爲之不勝人然緣之可以及樑予以兩手扳樑行條而上足托駝梁下有席蔽中黑如漆仍有兵至以矛上搨知是空虛料無人在上予始得竟日未遇兵然在下被刃者又不知幾何人街前每數騎過必有數十男婦哀號隨其後是日雖不雨亦無日色不知旦暮久之軍騎稍疎左右惟聞人聲悲泣思吾弟兄已傷其半伯兄亦未卜存亡予婦予子不知何處欲蹤跡之或得一見乃附梁徐下躡足至前街街中人首相枕籍天暝莫辨爲誰俯尸遍呼無應者遙見南首數火炬蜂擁而來予急避之循郭走城下積尸碍步數跌復起每有所驚卽仆地如僵尸久之得達小路路人昏夜互觸相驚駭大街上舉火照耀如白日自西至亥方及兄家宅門閉不敢遽擊俄聞婦人聲知爲吾嫂始輕擊應門者卽予婦也大兄已先返吾婦子俱在予與伯兄哭然猶未敢遽告仲兄季弟之被殺也嫂詢予予依違答之予詢婦何以免婦曰方卒之追逐也子先奔衆人繼之獨遺我我抱彭兒投屋下不得死吾妹跌傷足亦臥焉卒持我二人至一室屋中男婦幾十人皆魚貫而縛因囑我于諸婦曰看守之無使逸去卒持刀出又一卒入刳吾妹去久之



不見卒至遂給諸婦出出卽遇洪嫗相攜至故處故幸免洪嫗者仲兄內親也婦詢予告以故哭泣良久洪攜宿飯相勸哽咽不可下外復四面火起倍於昨夕潛出戶外田中橫尸交砌喘息猶存遙見何家坟中樹木陰森哭音成韻或父呼子或夫覓妻呱呱之聲草畔溪間比比皆是慘不忍聞回至洪宅婦欲覓死予竟夜與語不得聞東方白矣

廿七日問婦避所引予委曲至一柩後古瓦荒磚久絕人跡予蹲亂草中置予于柩上覆以蘆席婦偃居其前我曲附于後揚首則頂露展足則踵見微出氣息拘手足爲一裹魂少定而殺聲逼至刀環响處惶呼亂起齊聲乞命者或數十人或百餘人遇一卒至南人不論多寡皆垂首匍伏引頸受刃無一敢逃者至于紛紛子女百口交啼哀鳴動地更無論矣至午後積尸如山殺掠更甚幸至晚予等逡巡走出彭兒酣臥柩上自朝至暮不啼不言亦不欲食渴時欲飲取片瓦掬溝水潤之仍睡去呼醒抱與俱去洪嫗亦至知吾嫂又被刳去吾侄在襁褓竟失所在嗚呼痛哉甫二日而兄嫂弟姪已亡其四矣相與覓曰中餘米不得遂與伯兄枕股忍飢達旦是夜予婦覓死幾斃賴洪嫗救免廿八日子謂伯兄曰今日不知誰死吾兄幸無恙乞與彭兒保其殘喘兄垂淚慰勉遂別逃他處洪嫗謂予婦曰我昨匿柜中終日貼然當與子易而避之婦堅不欲仍到柩後同匿焉未幾數賊入破柜刳嫗去捶擊百端卒不供出一人予甚德之



少間兵來益多及予避所者前後接踵然或一至屋後望見柩而去忽有十數卒吶喝而來其勢甚凶俄見一人至柩前以長竿擲予足予驚而出乃揚人爲彼向導者面則熟而忘其姓予向之乞憐彼且索金獻以金始釋予尙曰便宜爾婦出語諸卒曰姑舍是諸卒乃散去喘驚未定忽一紅衣少年操長刃直抵予所舉鋒相向獻以金復索予婦婦時孕九月矣死伏地不起予給之曰婦孕多月昨乘屋跌下孕因之壞萬不能生安能起來紅衣者不信因啟腹視之兼驗以先塗之血袴遂不顧所攜一少婦一幼女一小兒兒呼母索食卒怒一擊腦碎而死挾婦與女去予謂此地人逕已熟不能存身當易善地處之而婦堅欲自盡予亦惶迫無主兩人遂出并縊于梁忽項下兩繩一時俱斷併跌于地未及起而兵又盈門直趨堂上未暇過兩廊予與婦急趨門外逃急奔一草房中悉邨間婦女留婦而卻予予急奔南首草房中其草堆積連屋予登其巔俯首伏匿復以亂草覆其上自以爲無患矣須臾卒至一躍而上以長矛擲其下予從草間出乞命復獻以金卒搜草中又得數人皆有所獻而免兵旣去數人復入草間予窺其中有方桌數張外圍皆草其中廓然而虛可容二三十人予強入之自謂得計不意敗垣從半腰忽崩一穴中外洞然已爲兵窺見乃自穴外以長矛直刺當其前者無不被大創予股亦傷前者盡爲卒得後者倒扒而出予復至婦所婦同衆婦女皆伏臥積薪以血塗體糞綴其髮煙灰飾面形如鬼蜮鑒別以聲予乞衆婦



得入草底衆婦女擁臥其上予閉氣不敢動幾悶絕婦以竹筒授予口啣其末出其端于上氣方達得不死戶外有卒一時手殺二人其事甚怪筆不能載草上諸婦無不戰慄忽哀聲大舉兵已入室復大步而去不旋顧天漸黑諸婦起予始出草中汗如雨至夕復同婦歸洪宅洪老洪嫗皆在伯兄亦來云是日被刦去資擔賞以千錢仍付令旗放還途中亂尸山疊血流成渠又聞有王姓將爺居昭陽李宅以錢數萬日給難民其黨殺人往往勸阻多所全活是夜悲咽之餘昏昏睡去次日則廿九日矣

自廿五日起至此已五日私幸或可薄赦又紛紛傳洗城之說城中殘喘冒死縋城逃去者大半舊有官溝壅塞不能通流至是如坦途然亦以此反罹其鋒城外亡命利城中所有結伴夜入官溝盤詰搜其金銀人莫敢誰何予等念既不能越險以逃而伯兄又爲予不忍獨去延至平旦其念遂止原避處知不可留而予婦以孕故屢屢獲全遂獨以予匿池畔深草中婦與彭兒裹臥其上有數卒至爲刦出者再皆少獻賂而去繼一狠卒來鼠頭鷹眼其狀甚惡欲刦予婦婦偃蹇以前語告之不聽逼使起立婦旋轉于地下死不肯起卒舉刀背亂打血濺衣裳表裏潰透先是婦戒予曰倘遇不幸吾必死勿以夫婦故乞哀併累子故予遠躲草中爲不知焉予亦謂婦將死而惡卒仍不捨將婦髮周數匝于臂橫拖而去怒叱毒打由田陌至深巷一箭多地環曲以出大街行數步必擊數下突遇衆騎中一人與卒滿語數句遂捨予婦



去始得匍匐而返大哭一番身無完膚矣忽又烈火四起何家墳前後多草房然則立刻成燼其有寸壤  
隙地一二漏網者爲火一遍無不奔竄自出出則遇害百無一免亦有閉戶焚死者由數口至百口一室  
之中正不知積骨多少大約此際無處可避亦不能避避則或一犯之無金死有金亦死惟出露道旁與  
尸骸雜處生死反未可知予與婦子並往臥塚後泥首塗足殆無人形火勢愈熾墓中喬木燒著光如電  
灼聲如山崩風勢怒號赤日滲淡爲之無光目前如見無數夜叉鬼驅殺千百地獄人而馳逐之驚悸之  
餘時作昏瞶蓋已不知此身之在人世間矣驟聞足聲震响慘呼震心回看牆畔則伯兄被獲遙見兄與  
卒相持兄力大擲而得脫卒遂趕去此卒卽前日刦吾婦而復捨者也半晌不至予心搖搖伯兄忽走來  
赤身披髮爲卒所逼不得已向予索金救命予僅存一錠出以獻卒而卒怒甚舉刀擊兄兄輾轉地上流  
血滿身彭兒拉卒涕泣求免時年五歲卒以兒衣拭刀血再擊而兄將死矣旋拉予髮索金刀背亂擊不止予  
訴金盡曰必欲金卽甘死他物可也卒牽予髮至洪宅予婦衣物置兩甕中倒覆階下盡發以供其取凡  
金珠之類無不要而衣服擇好者取焉見兒項有銀鎖將刀割去去時顧予曰吾不殺你自有人殺你也  
知洗城之說已確料必死矣置兒于宅同婦急出看兄前後項皆被傷深入寸許胸前更烈予二人扶至  
洪宅問之亦不知痛楚忽瞶忽甦安置畢予夫婦復至墳處躲避隣人俱臥亂草叢中忽有作人語曰明



日洗城必殺一盡當棄汝婦與吾同走婦亦勸余行余念伯兄垂危豈忍舍去又前所恃者猶有餘金今金已盡料不能生一痛氣絕良久而蘇火亦漸滅遙聞礮聲三往來兵丁漸少予婦抱兒坐糞窖中洪嫗亦來相依有數卒攜四五個婦人內二老者悲泣兩少者嘻笑自若後有二卒追上奪婦自相奮擊內一卒勸解作滿語忽一卒將少婦負至樹下對合餘二婦亦就被污老婦哭泣求免三少婦毫不爲恥十數人互爲奸淫仍交與追來二卒而其中一少婦已不能起走矣予認知爲焦氏之媳其家平日所爲應至於此驚駭之下不勝嘆息忽見一人紅衣佩劍滿帽皂靴年不及三十姿容俊爽隨從一人衣黃背甲貌亦魁梧後有揚州數人跟隨紅衣人熟視予曰視爾非若儔輩中實言何等人予念時有以措大而獲免者有以措大而立斃者不敢吐實飾詞以告復指諸婦子問是誰具告以實紅衣人曰明日王爺下令封刀汝等得生矣命隨人付衣幾件又金一錠問汝等幾日不食予答以五日矣命跟我來予與婦且信且疑不敢不行至一宅所蓄甚富魚米充盈向一婦人曰你好好待此四人與予別去時已暮予內弟被卒刼去不知存亡婦傷之特甚少頃老嫗搬出魚飯食予宅去洪居不遠予取魚飯食吾兄兄喉不能咽數箸而止予爲兄拭髮洗血心如刀割是日聞封刀之語衆心稍定明日爲五月朔日勢雖不甚烈然未嘗不殺掠而富家大室方且搜括無餘子女由十餘歲起搶掠殆無遺類是日興平伯復入揚城而寸絲粒



米盡入虎口矣蕭條殘破難以奉述

初二日傳府道州縣已置官吏執安民牌遍諭百姓毋得驚懼又諭各寺院僧人焚化積尸而寺院中藏匿婦女亦復不少亦有驚餓死者查焚尸簿載數共八十餘萬其落井投河閉門焚縊者不與焉被擄者不與焉

初三日出示放賑偕洪嫗至缺口關領米米卽督鎮所儲軍糧如邱陵數千擔片時蕩然一空往來負戴者俱焦頭爛額臂脛傷折刀痕滿面如燭淚成行搶米之際雖親友不相顧强者去而復來老弱被重傷者終日不能得升粒

初四日天晴烈日蒸燻屍氣薰人前後左右處處焚燒煙結如霧腥聞數十里是日子燒棉及人骨成灰以療兄瘡垂淚頷之不能出聲

初五日幽僻之人使稍出來相逢各淚下不能出一語予等五人雖獲稍甦終不敢居宅內晨起早食卽出處野畔其粧飾一如前日蓋往來打糧者日不下數十輩雖不操戈而各制槌恐嚇詐人財物每有斃于杖下者一遇婦女仍肆擄劫初不知爲清兵爲鎮兵爲亂民也是日伯兄因傷重刀瘡迸裂而死傷哉痛不可言憶予初被難時兄弟嫂姪婦子親共八人今僅存三人其內弟外姨又不復論自四月二十五



日起至五月五日止共十日其間皆身所親歷目所親睹故漫記之如此遠處風聞者不載也後之人幸  
生太平之世享無事之樂不自修省一味暴殄者閱此當警惕焉耳



